

Namo tassa bhagavato arahato sammāsambuddhassa

Abhidhammapiṭake

Pañcapakaraṇa-anuṭikā

Dhātukathāpakaraṇa-anuṭikā

Ganthārambhavaṇṇanā

Dhātukathāpakaraṇadesanāya desadesakaparisāpadesā vuttappakārā evāti kālāpadesaṃ dassento **“dhātukathāpakaraṇaṃ desento”**tiādīmāha. “Tasseva anantaraṃ adesayī”ti hi iminā vibhaṅgānantaraṃ dhātukathā desitāti tassā desanākālo apadiṭṭho hoti. Ye pana “vibhaṅgānantaraṃ kathāvattupakaraṇaṃ desita”nti vadanti, tesam vādaṃ paṭikkhipanto **“vibhaṅgānantaraṃ...pe...dassetu”**nti āha.

“Kāmā te paṭhamā senā”tiādivacanato (su. ni. 438; mahāni. 28; cūḷani. nandamāṇavapucchāniddeśa 47) kilesavidhamaṇsanampi devaputtamārassa balavidhamananti sakkā vattum, “appavattikaraṇavasena kilesābhisaṅkhāramārāna”nti pana vuccamānattā khantibalasaddhābalādiānubhāvena ussāhāparisābalabhañjanameva devaputtamārassa balavidhamaṇsaṃ daṭṭhabbaṃ. **Visayātikkaṃamaṇaṃ** kāmādhātusamatikkamo. **Samudayappahānapariññāvasenāti** pahānābhisaṃmayapariññābhisaṃmayānaṃ vasena. Nanu cetaṃ pañcannaṃ mārānaṃ bhañjanaṃ sāvakesupi labbhatevāti codanaṃ manasi katvā āha **“parūpanissayarahita”**ntiādi. Vīrassa bhāvo vīriyanti katvā vuttaṃ **“mahāvīriyoti mahāvīro”**ti. Mahāvīriyatā ca paripuṇṇavīriyapāramitāya caturaṅgasamannāgata vīriyādhiṭṭhānena anaññasādhāraṇacatubbidhasammappadhānasampattiyā ca veditabbā. Tato eva hissa vīriyāhānisiddhipīti.

Khandhādiḷe dhamme adhiṭṭhāya nissāya visayaṃ katvā abhidhammakathā pavattāti āha **“abhidhammakathādhīṭṭhānatṭhena vā”**ti. **Tesaṃ kathanatoti** tesaṃ khandhādīnaṃ kathābhāvato. Etena atthavisesasannissayo byañjanasamudāyo pakaraṇanti vuttaṃ hoti. Atha vā dhātuyo kathīyanti ettha, etena vāti **dhātukathā**, tathāpavatto byañjanatthasamudāyo. Yadi evaṃ sattannampi pakaraṇānaṃ dhātukathābhāvo āpajjatīti codanaṃ sandhāyāha **“yadipī”**tiādi. Tattha **sāṭisayanti** savisesaṃ vicittāṭirekavasena anavasesato ca desanāya pavattattā. Tathā hi vuttaṃ **“sabbāpi dhammasaṅgaṇī dhātukathāya mātikā”**ti (dhātu. 5). Tenevāha **“ekadesakathanameva hi aññattha kata”**nti.

Idāni sāsane yesu dhātu-saddo niruḷho, tesam vasena aññehipi asādhāraṇaṃ imassa pakaraṇassa dhātukathābhāvaṃ dassento **“khandhāyatanadhātūhi vā”**tiādīmāha. Tattha **tatthāti** khandhāyatanadhātūsu. Mahanto pabhedānugato visayo etāsanti **mahāvisayā**, dhātuyo, na khandhāyatanāni appatarapadattā. Yena vā sabhāvena dhammā saṅghāsaṅghasampayogavippayogehi uddesaniddese labhanti, so sabhāvo dhātu. Sā dhātu idha sāṭisayaṃ desitāti savisesaṃ dhātuyā kathanato idaṃ pakaraṇaṃ **“dhātukathā”**ti vuttaṃ. Sabhāvatttho hi ayaṃ dhātu-saddo “dhātuso, bhikkhave, sattā saṃsandanti”tiādīsu (saṃ. ni. 2.98) viya. **Dhātubhedanti** dhātuvibhāgaṃ. Pakaraṇanti vacanaseso. Kuto pakaraṇa-saddo labbhātīti āha **“sattannaṃ pakaraṇānaṃ kamena vaṇṇanāya pavattattā”**ti. **Tena yojanaṃ katvāti** tena pakaraṇa-saddena “dhātukathāva pakaraṇaṃ dhātukathāpakaraṇa”nti yojanaṃ katvā. **Taṃ dīpananti** taṃ dhātukathāpakaraṇassa atthadīpanaṃ, atthadīpanākārena pavattaṃ vaṇṇanaṃ. “Atthaṃ dīpayissāmī”ti vatvā “taṃ suṇāthā”ti vadanto sotadvārānusārena tattha upadhāraṇe niyojetīti āha **“taṃdīpanavacanasavanena upadhārethāti attho”**ti.

Ganthārambhavaṇṇanā niṭṭhitā.

1. Mātikāvaṇṇanā

1. Nayamātikāvaṇṇanā

1. **Cuddasavidhenā**ti cuddasappakārena, cuddasahi padehīti attho. Tattha “saṅgaho asaṅgaho”ti idamekaṃ padaṃ, tathā “sampayogo vippayogo”ti. “Saṅgahitena sampayuttaṃ vippayutta”ntiādīni pana tīṇi tīṇi padāni ekekaṃ padaṃ. Itaresu padavibhāgo suviññeyyova. **Etehī**ti saṅgahādippakārehi. Nayanaṃ pāpanaṃ, taṃ pana pavattanaṃ ṇāpanaṅca hotīti “pavattiyati ṇāyanti”ti ca dvidhāpi attho vutto. Nayā eva uddisiyamānā mātikā. Atthadvayepi pavattanaṅṇakiriyānaṃ karaṇabhāvena saṅgahādippakārā nayāti vuttā. Tenāha **aṭṭhakathāyaṃ** “iminā saṅgahādikena nayaṇā”ti (dhātu. aṭṭha. 1). **Padānanti** atthadīpakānaṃ vacanānaṃ. Pajjati etena atthoti hi padaṃ. **Padānanti** ca saṃsāmisambandhe sāmivacanaṃ, **pakaraṇassāti** pana avayavāvayavīsambandhe.

2. Abbhantaramātikāvaṇṇanā

2. **Tadatthānī**ti paṭiccasamuppādatthāni. Paṭicca samuppajjati saṅkhārādikaṃ etasmāti hi paṭiccasamuppādo, paccekaṃ avijjādiko paccayadhammo. Tathā hi vuttaṃ saṅkhārapīṭake “dvādasa paccayā, dvādasa paṭiccasamuppādā”ti. **Tesanti** khandhādīnaṃ. **Tathādassitānanti** gaṇanuddesavibhāgamattena dassitānaṃ. Kasmā panettha paṭiccasamuppādo dvādasabhāveneva gahito, nanu tattha bhavo kammabhavādibhedena, sokādayo ca sarūpatoyeva idha pāliyaṃ gahitāti codanaṃ sandhāyāha “**tatthā**”tiādi. Tattha **tatthāti** tasmiṃ “pañcavīsādhikena padasatenā”ti evaṃ vutte aṭṭhakathāvacane. Kammabhavassa bhāvanabhāvena, upapattibhavassa bhāvanabhāvena. Padatthato pana kammabhavo bhavati etasmāti bhavo, itaro bhavati, bhavanaṃ vāti. **Tannidānadukkhabhāvenāti** jarāmarāṇanidānadukkhabhāvena.

“Sabbāpi dhammasaṅgaṇī dhātukathāya mātikā”ti idampi dhātukathāya mātikākittanamevāti “sabbāpi...pe... mātikāti ayaṃ dhātukathāmātikāto bahiddhā vuttā”ti vacanaṃ asambhāvento “**atha vā**”tiādimāha. **Pakaraṇantaragatā vuttā** dhātukathāya mātikābhāvenāti attho. Kāmañcetta mātikābhāvena vuttā, pakaraṇantaragatattā pana aññato gahetabarūpā ito bahibhūtā nāma honti, sarūpato gahitāva pañcakkhandhātiādikā abbhantarā. Tenāha “**sarūpato dassetvā ṭhapitattā**”ti. **Mātikāya asaṅgahitattāti** mātikāya sarūpena asaṅgahitattā, na aññathā. Na hi mātikāya asaṅgahito koci padattho atthi. **Vikiṇṇabhāvenāti** khandhavibhaṅgādisu viṣuṃ viṣuṃ kiṇṇabhāvena viṣaṭṭabhāvena.

3. Nayamukhamātikāvaṇṇanā

3. **Nayānaṃ** saṅgahādippakāravisesānaṃ **pavatti** desanā, tassā viniggamaṭṭhānatāya **dvāraṃ**. Yathāvuttadhammā yathārahaṃ khandhāyatanadhātuyo arūpino ca khandhāti **tesaṃ uddeso nayamukhamātikā**. Tenāha “nayāna”ntiādi. Viyujjanasīlā, viyogo vā etesaṃ atthīti viyogino, tathā sahayogino, saṅgahāsaṅgahadhammā ca viyogīsahayogīdhammā **ca saṅgahā...pe... dhammā**, saṅgaṇhanāsaṅgaṇhanavasena viyujjanasaṃyujjanavasena ca pavattanakasabhāvāti attho. **Cuddasapī**tiādinā tamevatthaṃ pākāṭataraṃ karoti. **Yehī**ti yehi khandhādīhi arūpakkhandhehi ca. **Te cattāro**ti te saṅgahādayo cattāro. **Saccādīhipī**ti saccāndriyapaṭiccasamuppādādīhipi saha. **Yathāsambhavanti** sambhavānurūpaṃ, yaṃ yaṃ padaṃ saṅgahito asaṅgahitoti ca vattaṃ yuttaṃ, taṃ tanti attho.

So panāti saṅgahāsaṅgaho. **Saṅgāhakabhūtehī**ti saṅgahaṇakiriyāya kattubhūtehi. **Tehī**ti saccādīhi. **Na saṅgahabhūtehī**ti saṅgahaṇakiriyāya karaṇabhūtehi saccādīhi saṅgahāsaṅgaho na vutto. Tatthāpi hi khandhāyatanadhātuyo eva karaṇabhūtehi dasseti. **Khandhādīheva saṅgahēhī**ti khandhādīhiyeva saṅgaṇhanakiriyāya karaṇabhūtehi, “khandhasaṅgahena saṅgahitā, āyatanasaṅgahena asaṅgahitā,

dhātusaṅgahena asaṅgahitā, te dhammā catūhi khandhehi, dvīhāyatanehi, aṭṭhahi dhātūhi asaṅgahitā”ti saṅgahāsaṅgaho niyametvā vutto. **Tasmāti** yasmā saccādīni saṅgāhakabhāvena vuttāni, na saṅgahabhāvena, khandhādīniyeva ca saṅgahabhāvena vuttāni, tasmā.

Kasmā panettha saccādayo saṅgahavasena na vuttāti? Tathādesanāya asambhavato. Na hi sakkā rūpakkhandhādīnaṃ samudayasaccādīhi, saññādīnaṃ vā indriyādīhi saṅgahanayena pucchitum vissajjitum vāti. Tathā ariyaphalādīsu uppannavedanādīnaṃ saccavinimuttatāya “vedanākkhandho katīhi saccehi saṅgahito”ti pucchitvāpi “ekena saccena saṅgahito”tiādīnā niyametvā saṅgahaṃ dassetuṃ na sakkāti. **Yathāsambhavanti** yehi sampayogo, yehi ca vippayogo, tadanurūpaṃ.

Rūpaṃ rūpena nibbānena vā vippayuttaṃ na hoti, nibbānaṃ vā rūpena. Kasmā? Sampayuttanti anāsaṅkanīyasabhāvattā. Catunnañhi khandhānaṃ aññamaññaṃ sampayogībhāvato “rūpanibbānehipi so atthi natthī”ti siyā āsaṅkā, tasmā tesam itarehi, itaresañca tehi vippayogo vuccati, na pana rūpassa rūpena, nibbānena vā, nibbānassa vā rūpena katthaci sampayogo atthīti tadāsaṅkābhāvato vippayogopi rūpassa rūpanibbānehi, nibbānassa vā tena na vuccati, arūpakkhandhehiyeva pana vuccatīti āha “**catūhevā**”tiādi. **Anārammaṇassa** cakkhāyatanādikassa. **Anārammaṇaanārammaṇamissakehīti** anārammaṇena sotāyatanādīnā anārammaṇamissakena ca dhammāyatanādīnā. **Missakassa** dhammāyatanādikassa. Anārammaṇaanārammaṇamissakehi na hotīti yojetabbaṃ. Yesam pana yehi hoti, taṃ dassetuṃ “**anārammaṇassa panā**”tiādi vuttaṃ. Yathā hi sārammaṇassa anārammaṇena anārammaṇamissakena ca vippayogo hoti, evaṃ sārammaṇenapi so hotiyeva. Tena viya anārammaṇassa anārammaṇamissakassa cāti daṭṭhabbaṃ.

4. Lakkhaṇamātikāvaṇṇanā

4. Visuṃ yojanā kātabbāti yo tīhi saṅgaho catūhi ca sampayogo vutto, taṃ sabhāgo bhāvo payojeti, yo ca tīhi asaṅgaho catūhi ca vippayogo vutto, taṃ visabhāgo bhāvoti imamatthaṃ dassento “**saṅgaho...pe... viññāyati**”ti āha. Yassa saṅgaho, so dhammo khandhādiko **sabhāgo**. Yassa asaṅgaho, so **visabhāgo**. Tathā sampayogesupi veditabbaṃ. Idāni yathāvuttaṃ sabhāgataṃ sarūpato niddhāretvā dassetuṃ “**tatthā**”tiādi vuttaṃ. Tattha **samānabhāvo saṅgahe sabhāgatā, ekuppādādiko sampayogeti** iminā ruppanādividhuro asamānasabhāvo saṅgahe visabhāgatā, nānuppādādiko vippayogeti ayamatto atthasiddhoti na vuttoti.

5. Bāhiramātikāvaṇṇanā

5. Etena ṭhapanākārenāti sarūpena aggahetvā yathāvuttena pakaraṇantaramātikāya idha mātikābhāvakittanasāṅkhātena ṭhapanākārena. Pakaraṇantarathapitāya mātikāya avibhāgena pacchato gahaṇaṃ bahi ṭhapananti āha “**bahi piṭṭhito ṭhapatattā**”ti. **Idha aṭṭhapetvāti** imissā dhātukathāya sarūpena avatvā. **Tathā pakāsītattāti** mātikābhāvena jotitattā. Dhammasaṅgaṇīsīsenā hi dhammasaṅgaṇiyaṃ āgatamātikāva gahitāti. Yehi nayehi dhātukathāya niddeso, tesu navesu, tehi vibhajitabbesu khandhādīsu, tesam nayānaṃ pavattidvāralakkhaṇesu ca uddiṭṭhesu dhātukathāya uddesavasena vattabbaṃ vuttameva hotīti yaṃ uddesavasena vattabbaṃ, taṃ vatvā puna yathāvuttānaṃ khandhādīnaṃ kusalādivibhāgadassanattaṃ “sabbāpi dhammasaṅgaṇī dhātukathāya mātikā”ti vuttanti evamettha mātikāya nikkhepavidhi veditabbo.

“Gāvīti ayamāhā”ti ettha gāvī-saddo viya “saṅgaho asaṅgaho”ti ettha padatthavipallāsakarīnā itisaddena atthapadatthako saṅgahāsaṅgaha-saddo saddapadatthako jāyatīti adhippāyenāha “**aniddhāritatthassa saddasseva vuttattā**”ti. Tena atthuddhārato saṅgahasaddaṃ saṃvaṇṇetīti dasseti. **Aniddhāritavisesoti** asaṅgahitajātisañjātīdiviseso. **Sāmaññena gahetabbatanti** saṅgahasaddābhidheyatāsāmaññena viññāyamāno vuccamāno vā. Na cettha sāmaññaṅca ekarūpamevāti codanā kātabbā bhedāpekkhattā tassa. Yattakā hi tassa visesā, tadapekkhameva tanti. “**Attano jātiyā**”ti **viññāyati** yathā “matteyyā”ti vutte attano mātu hitāti.

Dhammavisesaṃ aniddhāretvāti saṅgahitatādinā pucchitabbavissajjetabbadhammānaṃ visesaṃ akatvā. **Sāmaññēnā**ti avisesena. **Dhammānanti** khandhādidhammānaṃ. **Avasesā niddhāretvā**ti “saṅgahitena asaṅgahita”ntiādikā avasesā dvādasapi pucchitabbavissajjetabbadhammavisesaṃ niddhāretvā dhammānaṃ pucchanavissajjananayauddesāti yojanā. Nanu ca “saṅgahitena asaṅgahita”ntiādayopi yathāvuttavisesaṃ aniddhāretvā sāmaññēna dhammānaṃ pucchanavissajjananayuddesāti codanaṃ sandhāyāha “**saṅgahitena asaṅgahita**”ntiādi. Yassa attho ñāyati, saddo ca na payujjati, so lopoti veditabbo, āvuttiādivasena vā ayamattho dīpetabbo. **Tenā**ti luttaniddiṭṭhena asaṅgahita-saddena. **Saṅgahitavisesavisiṭṭho**ti cakkhāyatanena khandhasaṅgahena saṅgahitatāvisesavisiṭṭho, tena sotāyatanādibhāvena asaṅgahito sotapasādādiko yo ruppanasabhāvo dhammaviseso. **Tannissito** taṃ dhammavisesaṃ nissāya labbhamāno. “Te dhammā katihī khandhehi...pe... catūhi khandhehi asaṅgahitā”tiādinā asaṅgahitatāsaṅkhātō pucchāvissajjananayo parato pucchivā vissajjiyamāno idha uddiṭṭho hoti. **Visesane karaṇavacana**nti iminā tassa dhammassa yathāvuttasaṅgahitatāvisesavisiṭṭhatamyeva vibhāveti. Evamete pucchitabbavissajjetabbadhammavisesaṃ niddhāretvā pucchanavissajjananayuddesā pavattāti veditabbā.

Nanu ca “saṅgahitena asaṅgahita”nti ettāvātāpi ayamattho labbhatī? Na labbhāti tassa dhammamattadīpanato. Nayuddeso heso, na dhammuddeso. Tathā hi **pāliyaṃ** saṅgahitenaasaṅgahitapadaniddese “cakkhāyatanena ye dhammā khandhasaṅgahena saṅgahitā, āyatana...pe... dhātusaṅgahena asaṅgahitā”ti vatvā “te dhammā katihī khandhehi...pe... asaṅgahitā”ti (dhātu. 171) pucchitvā “te dhammā catūhi khandhehi dvīhāyatanehi aṭṭhahi dhātūhi asaṅgahitā”ti dutiyaṃ asaṅgahitapadaṃ gahitaṃ. Aññathā “cakkhāyatanena ye dhammā khandhasaṅgahena saṅgahitā, te dhammā āyatanasaṅgahena asaṅgahitā, dhātusaṅgahena asaṅgahitā. Te katame”icceva niddisitabbaṃ siyā.

Esa nayoti atidesena dassitamattamaṃ pākāṭataraṃ kātuṃ “**tesupī**”tiādi vuttaṃ. **Tatiyapadenā**ti luttaniddesena gahetabbanti vuttapadaṃ sandhāyāha. **Kattuatthe karaṇaniddeso** saṅgahitāsaṅgahitehi tehi dhammehi dhammānaṃ saṅgahitatāsaṅgahitatāya vuttatā. Tathā hi tattha pāliyaṃ “tehi dhammehi ye dhammā”ti dhammamukheneva saṅgahitatāsaṅgahitatā vuttā. Dutiyatatiyesu pana saṅgahitatāsaṅgahitatāsaṅkhātāvisesanadvārena dhammānaṃ asaṅgahitatāsaṅgahitatā vuttāti tattha “visesane karaṇavacana”nti vuttaṃ. Tenāha “**tattha hi...pe... dhammantarassā**”ti. Tattha **sabhāvantarenā**ti saṅgahitatāsaṅgahitatāsaṅkhātēna sabhāvantarena pakārantarena. **Sabhāvantarassāti** asaṅgahitatāsaṅgahitatāsaṅkhātassa sabhāvantarassa. **Etesūti** catutthapañcomesu. **Dhammantarenā**ti aññadhammena. **Dhammantarassāti** tato aññassa dhammassa visesaṃ kataṃ. Tattha hi antarena pakāravisesāmasanaṃ dhammeneva dhammo visesitoti. **Ādipadenevā**ti “saṅgahitenā”tiādinā vuttēna paṭhamapadeneva. **Itarehī**ti “sampayuttaṃ vippayutta”ntiādinā vuttehi dutiyatatiyapadehi. **Etthāti** ekādasamādīsu catūsu. Dutiyatatiyesu viya visesane eva karaṇavacanaṃ daṭṭhabbaṃ, na catutthapañcomesu viya kattuattethi adhippāyo. **Pucchāvissajjanā**ntiādinā tamevatthaṃ vibhāveti.

Vividhakappanatoti vividhaṃ bahudhā kappanato, saṅgahāsaṅgahānaṃ visuṃ saha ca visesanavisesitabbabhāvakappanatoti attho. Taṃ pana vikappanaṃ vuttākārena vibhājanaṃ hotīti āha “**vibhāgatoti attho**”ti. Sanniṭṭhānalakkhaṇena adhimokkhena sampayuttadhammā ārammaṇe nicchayanākārena pavattiyā sanniṭṭhānavasena vuttadhammā. Te ca tehi saddhiṃ tadavasiṭṭhe dvipañcaviññānavicikicchāsahagatadhamme ca saṅgahetvā āha “**sanniṭṭhānavasena vuttā ca sabbe ca cittuppādā sanniṭṭhānavasena vuttasabbacittuppādā**”ti. **Itareti** phassādayo. **Sabbesanti** ekūnanavutiyā cittuppādānaṃ. **Pariggahetabbāti** saṅgahādivasena pariggaṇhitabbā. **Mahāvisayena** adhimokkhena. **Aññesanti** vitakkādīnaṃ. **Vacanaṃ sandhāyāti** “adhimuccanaṃ adhimokkho, so sanniṭṭhānalakkhaṇo”ti **dhammasaṅgahavaṇṇanāyaṃ** (dha. sa. aṭṭha. yevāpanakavaṇṇanā) “taṇhāpaccayā adhimokkho, adhimokkhpaccayā bhavo”ti **paṭiccasamuppādavibhaṅge** ca āgataṃ vacanaṃ sandhāya. **Atthe satīti** “sanniṭṭhāna...pe... sādharmaṇato”ti evamatthe vuccamāne. **Vattabbesūti** saṅgahādipariggahatthaṃ vattabbesu. Vuttā **phassādayo** manasikārapariyosānā. **Tādisassāti** phassādisadisassa sādharmaṇassa adhimokkhasadisassa asādharmaṇassa aññassa dhammassa

abhāvā.

Nanu jīvitindriyacittaṭṭhitiyopi sādharmaṇā? Saccam sādharmaṇā, atthi pana visesoti dassento āha “**jīvitindriyam panā**”tiādi. Asamādhisabhāvā balabhāvaṃ appattā sāmāññasaddeneva vattabbāti yojanā. **Sāmāñnavisesasaddehi cāti** sāmāñnavisesasaddehi vattabbā ca samādhisabhāvā cittekaggaṭā. **Visesasaddavacanīyam aññanti** balappattasamādhito aññaṃ sāmāññasaddena byāpetabbaṃ, visesasaddena ca nivattetabbaṃ natthi samādhisabhāvāya eva cittekaggaṭāya gahittā. Na aññabyāpakanivattako sāmāñnaviseso **anañña...pe... viseso**, tassa dīpanato. **Tasseva dhammassāti** tasseva balappattasamādhidhammassa. **Bhedadīpakehīti** visesadīpakehī samādhibalādivacanehi vattabbā. **Vuttalakkhaṇā** anaññabyāpakanivattakasāmāñnavisesadīpanā saddā. Tato **viparītehi** aññaṃ byāpetabbaṃ nivattetabbaṃca gahetvā pavattehi sāmāñnavisesasaddeheva na sukhādisabhāvā vedanā viya vattabbā. **Tasmāti** yasmā asamādhisabhāvā samādhisabhāvāti dvedhā bhinditvā gahitā cittekaggaṭā, tasmā. **Asamādhisabhāvameva pakāseyya** visesasaddanirapekkhaṃ pavattamānattā. **Itaroti** samādhibalādiko visesasaddo. **Idhāti** imasmiṃ abhantaramātikuddese, sādharmaṇe phassādike, mahāvisaye vā adhimokkhe uddisiyamāne. Nanu ca abhinditvā gayhamānā cittekaggaṭā vedanā viya sādharmaṇā hotīti codanaṃ sandhāyāha “**abhinnāpi vā**”tiādi. “Cittassa ṭhiti cittekaggaṭā avisāhaṭamānasatā (dha. sa. 11, 15). Arūpīnaṃ dhammānaṃ āyu ṭhiti”ti (dha. sa. 19) vacanato samādhijīvitindriyānaṃ **aññadhammanissayena vattabbatā** veditabbā. **Na arahatīti** idha uddesaṃ na arahati samukheneva vattabbesu phassādīsu uddisiyamānesūti attho.

Mātikāvaṇṇanā niṭṭhitā.

2. Niddesavaṇṇanā

1. Paṭhamanayo saṅghāsaṅghapadavaṇṇanā

1. Khandhapadavaṇṇanā

6. “Abhiññeyyadhammabhāvena vuttā cattāro khandhā hontī”tiādinā, “rūpakkhandho abhiññeyyo”tiādinā ca abhiññātalakkhaṇavisayāti āha “**sabhāvato abhiññātāna**”nti. **Pariññeyyatādīti ādi**-saddena pahātabbasacchikātabbabhāvetabbatā saṅgayhati. **Adhipatīyādīti** adhipatipaccayabhāvaupaṭṭhānapadahanādīni. **Saccādiviseso viyāti** dukkhasaccādīpariyāyo abhiññeyyapīḷanaṭṭhādīviseso viya. **Evañca katvāti** nayamukhamātikāya abhiññeyyanissayena vuccamānattā eva. **Tesaṃ rūpadhammānaṃ** pañcanaṃ khandhānaṃ khandhabhāvena viya **rūpakkhandhabhāvena sabhāgatā hoti**, na vedanākkhandhādībhāvenāti saṅghalakkhaṇamāha. **Itīti** tasmā, yasmā rūpadhammā aññamaññaṃ rūpakkhandhabhāvena sabhāgā, tasmāti attho. **Rūpakkhandhabhāvasaṅkhātena** rūpakkhandhabhāvena atthamukheneva gahaṇe. Saddadvārena pana gahaṇe **rūpakkhandhavacanasāṅkhātena vā** rūpakkhandhavacanaṇṇatāsaṅkhātena. Idāni tamevatthaṃ pākāṭataraṃ kātuṃ “**rūpakkhandhoti hī**”tiādi vuttaṃ.

Purimenāti rūpakkhandhena. **Saññākkhandhamūlakāti**ādīsu “purimena yojijyamāne”tiādiṃ ānetvā yathārahaṃ yojetabbaṃ. Abhedato pañcakapucchāvissajjanaṃ khandhapadaniddese sabbapacchimamevāti āha “**bhedato pañcakapucchāvissajjanānantara**”nti.

Āyatanapadādivaṇṇanā

40. **Yadipi ekakepi sadisaṃ vissajjanaṃ** vissajjanaṃ samudayamaggasaccānaṃ “samudayasaccaṃ ekena khandhena...pe... maggasaccaṃ ekena khandhena ekenāyatanena ekāya dhātuyā saṅghitaṃ, catūhi khandhehi ekādasahi āyatanehi sattarasahi dhātūhi asaṅghita”nti (dhātu. 41) niddiṭṭhattā. **Etthāti** etasmiṃ indriyapadaniddese. **Cakkhosotacakkhosukhindriyadukānanti** cakkhosotadukaṃ cakkhosukhindriyadukanti etesaṃ dukānaṃ. Cakkhosotasukhindriyānañhi “ekena

kandhena ekenāyatanena ekāya dhātuyā saṅgahitaṃ, catūhi kandhehi ekādasahi āyatanehi sattarasahi dhātūhi asaṅgahita’nti ekake sadisaṃ vissajjanaṃ. Cakkhusotindriyadukassa pana “cakkhundriyañca sotindriyañca ekena kandhena dvīhāyatanehi dvīhi dhātūhi saṅgahitā, catūhi kandhehi dasahāyatanehi soḷasahi dhātūhi asaṅgahitā”ti, “cakkhundriyañca sukhindriyañca dvīhi kandhehi dvīhāyatanehi dvīhi dhātūhi saṅgahitā, tīhi kandhehi dasahāyatanehi soḷasahi dhātūhi asaṅgahitā”ti cakkhusukhindriyadukassa ca **asadisaṃ vissajjanaṃ. Nāpi dukehi tikassāti** cakkhusotacakkhusukhindriyādidukehi cakkhusotasukhindriyāditikassa nāpi sadisaṃ vissajjanaṃ. **Idhāti** saccapadaniddese. **Tikena cāti** dukkhasamudayamaggāditikena ca. “Pañcahi kandhehi dvādasahāyatanehi aṭṭhārasahi dhātūhi saṅgahitā, na kehici kandhehi na kehici āyatanehi na kāhici dhātūhi asaṅgahitā”ti sadisaṃ vissajjanaṃ.

6. Paṭṭicasamuppādaṅṅaṇā

61. Avijjāvacaṇenāti “avijjāpaccayā saṅkhārā”ti ettha avijjāggahaṇena. **Visesanaṃ na kattabbaṃ**, “sabbampi viññāna’nti vattabbanti adhippāyo. Tattha kāraṇamāha “**kusalādīnampi**”tiadinā. **Vissajjanāsadisena** sabbaviññāṇādisaṅgahaṇato. **Tesanti** viññāṇādiṇā. **Idhāti** imasmim paṭṭhamanaye. **Akammajānampi saṅgahitatā viññāyati** saddāyatanassapi gahitattā.

71. Jāyamāna...pe... mānānanti jāyamānādiavattānaṃ dhammānaṃ. **Jāyamānādibhāvamattattāti** nibbattanādiavattānaṃ dhammānaṃ. **Vinibbhujjivāti** avattānaṃ dhammānaṃ vinibbhogaṃ katvā. Paramatthato avijjānānāni, **sabhāvamattabhūtānī** paramatthadhammānaṃ avattānaṃ dhammānaṃ. Aparamatthasabhāvanīpi rūpadhammassa nibbattādiṇā dhammānaṃ ruppanabhāvena gayhanti. Tato “rūpakkandhassa sabhāgāni, arūpānaṃ pana jātijarāmarāṇāni”ti ānetvā yojanā. **Ekekabhūtānī** yathā ekasmim rūpakalāpe jātiādiṇi ekekāniyeva honti, evaṃ ekasmim arūpakalāpepi vuttaṃ. Tenāha “**rūpakalāpajātiādiṇi viyā**”tiadi. Anubhavanasañjānanavijjānakiccānaṃ vedanādiṇā nibbattādiṇi dhammānaṃ jātiādiṇi tathā na gayhantīti āha “**vediyana...pe... agayhamānāni**”ti. Tena vedanākkandhādiṇi jātiādiṇā saṅgahābhāvamāha. “Jāti, bhikkhave, aniccā saṅkhatā”tiādivacaṇato jātiādiṇampi saṅkhatapariyāyo atthīti saṅkhatābhisaṅkharānakiccena saṅkhārakkandhena tesam saṅgahoti vuttaṃ “**saṅkhatā...pe... sabhāgāni**”ti. Teneva ca saṅkhārakkandhassa anekantaparamatthakiccatā veditabbā. **Tathā duvidhānī** vuttapakārena rūpārūpadhammānaṃ nibbattādiṇi dhammānaṃ dvippakāraṇi. **Tenāti** yathāvuttasabhāgatthena. **Tehi kandhādīhīti** rūpakkandhasaṅkhārakkandhadhammāyatanadhammadhātūhi.

Paṭṭhamanayasaṅgahāsaṅgahapadavaṅṅaṇā niṭṭhitā.

2. Dutīyanayo saṅgahitena saṅgahitapadavaṅṅaṇā

171. “Saṅgahitena asaṅgahita”nti ettha saṅgahitāsaṅgahitasaddā bhinnādhikaraṇā na gahetabbā visesanavisesitabbatāya icchitattā. Yo hi dhammo saṅgahitāvisesavisiṭṭho asaṅgahito heṭṭhā uddiṭṭho, sveva idha asaṅgahitabhāvena pucchitvā vissajjīyatīti dassento “**yaṃ taṃ...pe... tadeva dassento**”ti āha. Ye hi dhammā cakkhāyatanena kandhasaṅgahena saṅgahitā, āyatanadhātusaṅgahena ca asaṅgahitā, tesameva puna kandhādiṇi asaṅgaho pucchitvā vissajjito. Tena vuttaṃ “**cakkhāyatanena...pe... āhā**”ti. **Sabbatthāti** sabbesu navesu vāresu ca. **Kandhādisaṅgahasāmaññānanti** “kandhasaṅgahenā”tiadinā avisesena vuttānaṃ kandhādisaṅgahānaṃ. “Sāmaññajotanaṃ visese avatiṭṭhati”ti āha “**niccaṃ visesāpekkhattā**”ti. Visesevabodhanatthāni pañhabyākaraṇānīti vuttaṃ “**bhedanissitattā ca pucchāvissajjanāna**”nti. **Savisesāva kandhādigaṇānāti** “kandhasaṅgahenā”tiadinā avisesena vuttāpi rūpakkandhādiṇā savisesāva kandhādigaṇānā, kandhādiṇā saṅgahoti attho. **Suddhāti** kevalā anavasesā, sāmaññabhūtāti vuttaṃ hoti.

Tatthāti yathādhikate dutiyanaye. Sāmaññajotanāya visesaniddiṭṭhattā āha “**saṅgahi...pe... niddhāritattā**”ti. **Tīsu saṅgahesūti** khandhādisaṅgahesu tīsu. **Aññehīti** vuttāvasesehi dvīhi ekena vā. **Ettakeneva dassetabbā siyuṃ** tāvatāpi saṅgahitena asaṅgahitabhāvassa pakāsittattā. **Tesanti** saṅgahitenaasaṅgahitabhāvena vuttadhammānaṃ. **Evamvidhānanti** “cakkhāyatanam sotāyatana”ntiādinā aniddhāritavisesānaṃ. **Asambhavāti** vuttappakārena niddisitum asambhavā. Saṅgahādinayadassanamattam nayamātikāya byāpāro, yattha pana saṅgahādayo, te khandhādayo kusalādayo ca tesam visayabhūtāti tehi vinā saṅgahādīnaṃ pavatti natthi. Tenāha “**nayamātikāya abhantarabāhiramātikāpekkhattā**”ti. **Saṅgāhakaṃ** asaṅgāhakañcāti vattabbaṃ. Yo hi idha saṅgāhakahāvena vutto dhammo asaṅgāhakahāvenapi vuttoyevāti.

“Ye dhammā khandhasaṅgahena saṅgahitā, āyatanadhātusaṅgahena asaṅgahitā”ti, “ye dhammā khandhasaṅgahena asaṅgahitā, āyatanadhātusaṅgahena saṅgahitā”ti ca **yattha pucchitabbavissajjitabbadhammavisesaniddhāraṇam natthi, tattha paṭhamanaye chaṭṭhanaye ca** “rūpakkhandho katihi khandhehi saṅgahito? Ekena khandhenā”ti (dhātu. 6), “rūpakkhandho katihi khandhehi sampayuttoti? Natthi. Catūhi khandhehi vippayutto”ti (dhātu. 228) ca evam **pucchitabbavissajjitabbabhāvena. Itaresūti** dutiyādinayesu. **Tassa tassāti** yaṃ pucchitabbam vissajjitabbañca “ye dhammā”ti aniyamitarūpena niddhāritam, tassa tassa “te dhammā”ti niyāmakabhāvena.

Etthāti etasmiṃ pakaraṇe. **Yena yena** cakkhāyatanādinā saṅgāhakena. **Khandhādisaṅgahesūti** khandhāyatanadhātusaṅgahesu. **Tena tenāti** khandhādisaṅgahena. **Aññanti** tato tato saṅgāhakato aññaṃ. Tabbinimuttam saṅgahetabbāsaṅgahetabbam yaṃ dhammajātam atthi, tam tadeva “cakkhāyatanena ye dhammā khandhasaṅgahena saṅgahitā, āyatanadhātusaṅgahena asaṅgahitā”ti **saṅgāhakāsaṅgāhakabhāvena uddhaṭam. Añño dhammo natthi** tassa sabhāgabhāvena saṅgāhakaṃ abhāvato. Siyā panetaṃ sabhāgena ekadesena saṅgahoti, tam paṭikkhipanto āha “**na ca so...pe... hoti**”ti. **Yañcāti**ādinā vacanantaram parihaarati.

Yadi cātiādināpi tasseva tena saṅgābhāvaṃ pāṭhābhāvadassanena vibhāveti. Tattha **so evāti** yo rūpādikkhando saṅgāhakahāvena vutto, so eva tena rūpādikkhandhena saṅgayheyya saṅgahetabbo bhaveyya, teneva tassa saṅgābhāve lakkhaṇam dassento āha “**na hi so eva tassa sabhāgo visabhāgo cā**”ti. **Ekadesā viya** cakkhāyatanādayo **samudāyassa** rūpakkhandhādikassa. **Rūpakkhandho cakkhāyatanādīnaṃ na saṅgāhako asaṅgāhako ca** sabhāgavisabhāgabhāvābhāvato. Esa nayo sesesupī. **Samudāyantogadhānanti**ādinā vuttamevattham pākāṭaram karoti. Tattha **yenāti** vibhāgena. **Teti** ekadesā. **Tesanti** ekadesānaṃ. Ettha tadantogadhatāya vibhāgābhāvo, vibhāgābhāvena sabhāgavisabhāgatābhāvo, tena saṅgāhakāsaṅgāhakatābhāvo dassitoti vedītabbo.

Yathā sabbena sabbam sabhāgavisabhāgābhāvena ekadesānaṃ samudāyo saṅgāhako asaṅgāhako ca na hoti, evam ekadesasabhāgavisabhāgānanti dassento “**tathā**”tiādimāha. Tattha **yathāti**ādi udāharaṇadassanena yathāvuttassa atthassa pākāṭakaraṇam. Khandhasaṅgahena saṅgāhakaṃ asaṅgāhakañcāti yojanā. Tathā sesesupī. **Na hi ekadesa...pe... visabhāgam** yena samudāyo saṅgāhako asaṅgāhako ca siyāti adhippāyo. Ettha ca saṅgāhakatam tāva mā hotu, asaṅgāhakatam pana kasmā paṭikkhipiyatīti codanam manasi katvā āha “**tasmā**”tiādi. Tattha **tasmāti** vuttamevattham hetubhāvena parāmasati. Attato aññassa, attani antogadhato aññassa, attekadesasabhāgato aññassa satipi asaṅgāhakateti yojanā. Tam panetaṃ “rūpakkhandho rūpakkhandhena saṅgahito asaṅgahito ca na hoti”tiādinā vutte tayo pakāre sandhāya vuttam. **Saṅgāhakattameva etesam natthīti** etesam attā, attani antogadho, attekadesasabhāgo cāti vuttānaṃ saṅgāhakahāvo eva natthi sabhāgābhāvato. Tena vuttam “na hi so eva tassa sabhāgo”tiādi. **Yenāti** saṅgāhakatena. **Evarūpānanti** yathāvuttānaṃ tippakāraṇam **aggahaṇam vedītabbam** satipi visabhāgabhāveti adhippāyo.

Tenāti “dhammāyatana”ntiādinā vacanena. Ekadesassa vedanākkhandhādikassa samudāyassa dhammāyatanaṃ saṅgāhakatam ekadesena samudāyassa saṅgahitabhāvanti attho, samudāyassa

rūpakkhandhassa ekadesassa cakkhāyatanassa sotāyatanassa ca saṅgāhakattaṃ samudāyena ekadesassa saṅgahitabhāvanti vuttaṃ hoti. Yadi evaṃ na dasseti, atha kiṃ dasseti āha “**catukkhandhagaṇanabhedehi**”tiādi. Tatha **catukkhandhagaṇanabhedehi** rūpādicatukkhandhagaṇanavibhāgehi. **Pañcadhāti** rūpādicatukkhandhasaṅgaho viññānakkhandhasaṅgahoti evaṃ pañcappakārena bhinnataṃ. Tenāha “**gaṇetabbāgaṇetabbabhāvenā**”ti. “Ekena khandhenā”tiādīsu karaṇatthe karaṇavacanamaṃ, na kattuattheti katvā āha “**saṅgāhakāsaṅgāhakanirapekkhāna**”nti. Tenevāha “**kammakaraṇamattasabbhāvā**”ti. **Dutiyādayo pana** nayā. **Agāṇanādidassanānīti** agāṇanagaṇanadassanāni. Nanu ca dutiyādīsu gaṇanādīnīpi vijjantīti? Saccamaṃ vijjanti, tāni pana visesanabhūtāni appadhānānīti visesitabbabhūtānaṃ padhānānaṃ vasenevaṃ vuttaṃ. “Cakkhāyatanena ye dhammā khandhasaṅgahena saṅgahitā”tiādīnā kattūdayo niddiṭṭhāti āha “**kattukaraṇakammattayasabbhāvā**”ti.

Tathā tathāti tena tena rūpakkhandhādippakārena. **Taṃtaṃkhandhādibhāvābhāvo sabhāgavisabhāgatāti** rūpadhammādīnaṃ rūpakkhandhādibhāvo sabhāgatā, vedanākkhandhādiabhāvo visabhāgatāti attho. **Yathāniddhāritadhammadassaneti** “ye dhammā, te dhammā”ti niddhāritappakāradhammanirūpane. **Saṅgāhakasaṅgahetabbānanti** cakkhāyatanādīkassa saṅgāhakassa sotāyatanādīkassa ca saṅgahetabbassa. **Samānakkhandhādibhāvoti** ekakkhandhādibhāvo, rūpakkhandhādibhāvoti attho. **Tadabhāvoti** tassa samānakkhandhādibhāvassa abhāvo aññakkhandhādibhāvo. **Ayanti** yvāyaṃ paṭhamanaye tathā tathā gaṇetabbāgaṇetabbatāsāṅkhāto dutiyādinayesu yathāvuttānaṃ samānakkhandhādibhāvābhāvāsāṅkhāto taṃtaṃkhandhādibhāvābhāvo vutto, ayametesamaṃ dvippakāraṇaṃ nayānaṃ sabhāgavisabhāgatāsu viseso.

Samudayasaccasukhindriyādīti ādi-saddena maggasaccadukkhindriyādi saṅgayhati. **Asaṅgāhakattābhāvato**ti saṅgahitatāvisiṭṭhassa asaṅgāhakattassa abhāvato. Na hi sakkā “samudayasaccena ye dhammā khandhasaṅgahena saṅgahitā, āyatanadhātusaṅgahena asaṅgahitā”tiādi vuttaṃ. **Dukkhasaccasadisāni** abyākatapadādīni. **Itarehīti** āyatanadhātusaṅgahehi saṅgāhakattāsaṅgāhakattābhāvato na uddhātānīti yojanā. **Evantiādi** yathāvuttassa atthassa nigamanavasena vuttaṃ. **Na rūpakkhandhoti** na sabbo rūpakkhandhadhammoti attho.

“Khandhapadenā”ti idaṃ karaṇatthe karaṇavacanamaṃ, na kattuattheti āha “**khandhapadasaṅgahenāti attho**”ti. Tenevassa kattuatthataṃ paṭisedhetuṃ “**na saṅgāhakenā**”ti vuttaṃ. Karaṇaṃ pana katturahitaṃ natthīti āha “**kenaci saṅgāhakenāti idaṃ pana ānetvā vattabba**”nti. **Saṅgāhakesu na yujjati** na saṅgahetabbesūti adhippāyo. Rūpakkhandhadhammā hi “ye dhammā khandhasaṅgahena saṅgahitā”ti vuttāti. Samudāye vuttavidhi tadavayavepi sambhavatīti codanaṃ samuṭṭhāpento “**etena nāyenā**”tiādīmāha. Paṭiyogīnivattanaṃ eva-saddena karīyatīti āha “**na hi aññamattanivāraṇaṃ eva-saddassa attho**”ti. Tenāha “**saṅgāhakato aññanivāraṇaṃ eva-saddassa attho**”ti. **So ca...pe... pekkhanti** iminā tamevatthaṃ pākāṭataraṃ karoti. Saṅgāhakāpekkhatte hi “so cā”tiādivacanassa “cakkhāyatanena rūpakkhandhova saṅgahito”ti ettha cakkhāyatanamaṃ saṅgāhakanti yathādhippetassa atthassa asambhavo evāti idāni taṃ asambhavaṃ vibhāvanto “**katha**”ntiādīmāha, taṃ suviññeyyameva.

Etthāti “aḍḍhekādasahi āyatanadhātūhi”ti ettha. “**Rūpakkhandhenā**”ti ānetvā **vattabbaṃ** āyatanadhātuvisesanattaṃ. Na so eva tassa, samudāyo vā tadekadesānaṃ saṅgāhako asaṅgāhako ca hotīti vuttovāyamattahoti āha “**rūpakkhandho...pe... na hoti**”ti. **Iminā pariyāyenāti** yasmā vuttappakāraṃ saṅgāhakattaṃ natthi “yena saṅgahitassa asaṅgāhakaṃ siyā”ti iminā pariyāyena. **Asaṅgahitatāya abhāvo vutto** aṭṭhakathāyaṃ (dhātu. aṭṭha. 171) “so ca...pe... natthi”ti. **Saṅgahitatāyāti** nipariyāyena saṅgahitabhāvena asaṅgahitatāya abhāvo vuttoti na yujjati yojanā. **Sā saṅgahitatāti** attanā attano, attekadesānaṃ vā saṅgahitatā. **Tenāti** rūpakkhandhena. **Tesanti** rūpakkhandhatadekadesānaṃ. **Atthi ca vippayuttatā** vedanākkhandhādīhi. **Cakkhāyatanādīhi viyāti** visadisudāharaṇaṃ. **Etehi** rūpavedanākkhandhādīhi **aññehi ca** evarūpehi. **Etāni aññāni cāti** etthāpi

eseva nayo.

Teneva tassa saṅgahitattābhāvadassanena hetṭhā dassitena. **Etthā**ti etasmiṃ vāre. **Aggaṇeti** akathane, adesaṇāyanti attho. **Samudayasaccādīsūti** samudayasaccasukhindriyādīsū yujjeyya taṃ kāraṇaṃ. Kasmā? **Tehi** samudayasaccādīhi khandhādīsaṅgahena **saṅgahite** dhammajāte sati tassa āyatanasaṅgahādīhi asaṅgahitattassa abhāvato. **Rūpakkhandhādīhīti** rūpakkhandhavedanākkhandhādīhi. **Saṅgahitameva natthi**, kasmā? “So eva tassa saṅgāhako na hotī”ti vuttovāyamattho. Yadi rūpakkhandhādīnā rūpakkhandhādīkassa attano...pe... natthīti sambandho. Aññassa pana vedanākkhandhādīkassa rūpakkhandhādīnā saṅgahitattābhāvena asaṅgahitattaṃ atthīti yojanā. **Ubhayābhāvoti** saṅgahitattāsaṅgahitattābhāvo. **Ettha** etasmiṃ vāre. **Dhammāyatanajīvitindriyādīnanti** dhammāyatanādīnaṃ khandhacattukasāṅgāhakatte, jīvitindriyādīnaṃ khandhadukasāṅgāhakatte yojanā. Pāḷiyaṃ anāgatattā “**sati**”ti sāsāṅkaṃ vadati. **Ādi**-saddena paṭhamena dhammadhātusaḷāyatanādīnaṃ sukhindriyādīnaṃca, dutiyena ekakkhandhassa saṅgaho datṭhabbo. Sukhindriyañhi vedanākkhandhasseva saṅgāhakaṃ. **Tesanti** khandhacattukakkhandhadukādīnaṃ **asaṅgahitatā na natthi** atthevāti tassā abhāvo anekantiko. **Pubbe vuttanayenāti** “rūpakkhandhādīhi panā”tiādīnā vuttanayena.

Tatthevāti tasmīyeva pubbe vutte sanidassanasappaṭighapade. **Nivattetvā gaṇhantoti** pubbe vuttaṃ paṭinivattetvā gaṇhanto paccāmasanto. **Tadvattabbatāti** tesam saṅgāhakāsaṅgāhakaṃsaṅgahitattāsaṅgahitattānaṃ avattabbatā. **Asaṅgāhakattābhāvato eva...pe... na saṅgāhakattābhāvototi** yasmā nesam asaṅgāhakattaṃ viya saṅgāhakattampi natthi, tato eva saṅgahitattāsaṅgahitattampīti dasseti.

Dutiyānayaṃsaṅgahitenaasaṅgahitapadavaṇṇanā niṭṭhitā.

3. Tatiyanayo asaṅgahitenaasaṅgahitapadavaṇṇanā

179. Rūpakkhandhena khandhasaṅgahena asaṅgahitesūti niddhāraṇe bhummaṃ. **Tasmāti** yasmā ekadesasabhāgatā samudāyasabhāgatā na hoti, tasmā. **Tenāti** rūpakkhandhena. **Tānīti** vedanādīkkhandhattayanibbānāni. Yathā ca ekadesavisabhāgatāya na saṅgahitatā, evaṃ ekadesasabhāgatāya asaṅgahitatāpi natthīti dassento “**na kevala**”ntiādīmāha. Saṅgahitāneva na na hontīti yojanā. **Teti** vedanādīkkhandhattayanibbānasukhumarūpadhammā. **Tehīti** viññāṇakkhandhacakkhāyatanādīhi. **Na kathañci sammissāti** kenacipi pakārena na sammissāti asammissatāya saṅgahitattābhāvaṃ sādheti. **Rūpakkhandhena viya...pe... na hotīti** yathā rūpakkhandhena sabhāgatābhāvato nibbānaṃ na kenacipi saṅgahaṇena saṅgahitaṃ, evaṃ viññāṇakkhandhacakkhāyatanādīhi taṃ āyatanadhātusaṅgahēhi saṅgahitaṃ na hotīti khandhasaṅgahābhāvo pākaṭo vuttovāti evaṃ vuttaṃ.

Evarūpānanti rūpakkhandhaviññāṇakkhandhacakkhāyatanādīnaṃ. Na hi nibbānaṃ sandhāya “rūpakkhandhena viññāṇakkhandhena cakkhāyatanena ye dhammā khandhasaṅgahena asaṅgahitā, āyatanadhātusaṅgahena saṅgahitā”ti sakkā vattum. Tena vuttaṃ “**saṅgāhakattābhāvato evā**”ti. Tathā “abyākatehi dhammehi ye dhammā khandhasaṅgahena asaṅgahitā, āyatanadhātusaṅgahena saṅgahitā”tiādī na sakkā vattum tādisassa dhammassa abhāvototi āha “**sanibbāna...pe... bhāvatovā**”ti. Aggaṇaṃ vedītabbanti yojanā. Tenāha “**na hī**”tiādī. **Kañcīti** kañci dhammajātaṃ. **Teti** abyākatadhammādayo. **Attanoti** abyākatadhammādiṃ sandhāyāha. **Ekadesoti** rūpakkhandhādī. **Attekadesasabhāgoti** nibbānaṃ. Tañhi dhammāyatanadhammadhātupariyāpannatāya tadekadesasabhāgo. **Asaṅgahitasāṅgāhakattāti** khandhasaṅgahena asaṅgahitānaṃ saññākkhandhādīnaṃ āyatanadhātusaṅgahena saṅgāhakattāti attho.

Visabhāgakkhandhanibbānasamudāyattā khandhasaṅgahena dhammāyatanena na koci dhammo saṅgahito atthīti yojanā. **Etassāti** “dhammāyatanena saṅgahitā”ti etassa padassa

dhammāyatanagaṇanena saṅgahitāti attho. Oḷārikarūpasammissaṃ **dhammāyatanekadesaṃ**.

Tatīyanayaasaṅgahitenasaṅgahitapadavaṇṇanā niṭṭhitā.

4. Catutthanayo saṅgahitenasaṅgahitapadavaṇṇanā

191. Tiṇṇaṃ saṅgahānanti khandhāyatanadhātusaṅgahānaṃ. Saṅgahaṇapubbaṃ asaṅgahaṇaṃ, asaṅgahaṇapubbaṃ saṅgahaṇaṇca vuccamānaṃ saṅgahaṇāsaṅgahaṇānaṃ pavattivisesena vuttaṃ hotīti āha “**saṅgahaṇā...pe... uddiṭṭhā**”ti. Saṅgahābhāvakato asaṅgaho saṅgahahetuko saṅgahassa pavattivisesoyeva nāma hotīti āha “**saṅgahaṇappavattivisesavirahe**”ti. **Kenaci** samudayasaccādinā tīhipi saṅgahehi **saṅgahitena** saṅkhārakkhandhāpariyāpanna **dhammavisesena** puna tatheva **saṅgahito** so eva samudayasaccādiko **dhammaviseso** saṅgahitena saṅgahito. **Saṅgāhakattābhāvasabbhāvā saṅgāhakabhāvena na uddhaṭā**, na asaṅgāhakattā eva. Yathā hi tīhi saṅgahehi na saṅgāhakā, evaṃ dvīhi, ekenapi saṅgahena na saṅgāhakā idha na uddhaṭā. **Tehi saṅgahitāti** tehi tīhi saṅgahehi saṅgahitā dhammā. **Yassāti** yassa attano saṅgāhakassa.

Sakalavācakenāti anavasesaṃ khandhādiatthaṃ vadantena. **Tena khandhādipadenāti** “teneva saṅgahaṃ gaccheyyā”ti ettha tena khandhādipadenāti evaṃ yojetabbaṃ. Evaṃ pana ayojetvā “yaṃ attano saṅgāhakaṃ saṅgaṇhitvā puna teneva saṅgahaṃ gaccheyya, taṃ aññaṃ saṅgahitaṃ nāma natthī”ti evaṃ na sakkā vattaṃ. Kasmāti ce? Na hi **yena** samudayasaccādinā **yaṃ** saṅkhārakkhandhāpariyāpannaṃ dhammajātaṃ khandhādisaṅgahehi **saṅgahitaṃ, teneva** samudayasaccādinā **tassa** tadavasiṭṭhassa saṅkhārakkhandhadhammassa, **na ca tasseva** kevalassa samudayasaccādikassa saṅgaho pucchito vissajjitoti yojanā, atha kho **tena** saṅkhārakkhandhadhammena phassādinā. **Saṅgahitassāti** saṅgahitatāvisiṭṭhassāti attho. Tasmā attano saṅgāhakaṃ sakalakkhaṇādiṃ saṅgaṇhitvā puna tena khandhādipadena yaṃ saṅgahaṃ gaccheyya, taṃ tādisaṃ natthīti attho veditabbo. **Vedanā saddo ca khandho āyatanañcāti** vedanā viṣuṃ khandho, saddo ca viṣuṃ āyatananti attho. **Aññaena** khandhantarādinā. **Asammissanti** abyākatadukkhasaccādi viya amissitaṃ. **Na hi...pe... etthāti** saṅgahitatāvisiṭṭhena dhammena yo dhammo saṅgahito, tassa saṅgahitatāvisiṭṭhoyeva yo saṅgaho, so na ettha vāre pucchito vissajjito ca. **Saṅgahovāti** kevalo saṅgaho, na kattāpekkhoti attho. **Na saṅgāhakenāti** idaṃ yathāvuttena atthena nivattitassa dassanaṃ. **Na hītiādi** taṃsamatthanaṃ.

Catutthanayasaṅgahitenasaṅgahitapadavaṇṇanā niṭṭhitā.

5. Pañcamaṇayo asaṅgahitenaasaṅgahitapadavaṇṇanā

193. Vuttanayenāti yasmā saṅgahappavattivisesavirahito asaṅgahitadhammavisesanissito pañcamaṇayo, tasmā yo ettha kenaci asaṅgahitena dhammavisesena puna asaṅgahito dhammaviseso asaṅgahitena asaṅgahito asaṅgahitatāya pucchitabbo vissajjitabbo ca. Tameva tāva yathānidhāritaṃ dassento “rūpakkhandhena ye dhammā khandha...pe... asaṅgahitā, tehi dhammehi ye dhammā khandha...pe... asaṅgahitāti āhā”ti catutthanaye vuttanayānusārena. **Yathānidhāritadhammadassananti** pāḷiyaṃ nidhāritappakāradhammadassanaṃ. Saha sukhumarūpenāti sasukhumarūpaṃ, tena sukhumarūpena saddhiṃ gahitaṃ viññānaṃ, tena sahitadhammasamudāyā **sasukhuma...pe... dāyā**. Ke pana teti āha “**dukkhasaccā**”tiādi. **Kesañcīti** nibbānacakkhāyatanādīnaṃ. **Tīhipi** saṅgahehi. Paripuṇṇasaṅgahehi tīhipi saṅgahehi asaṅgāhakā **paripuṇṇasaṅgahāsaṅgāhakā. Abyākatadhammasadisā** nevadassanenanabhāvanāyapahātabbanevasekkhānāsekkhādayo. **Itareti** rūpakkhandhādayo. **Tabbipariyāyenāti** vuttavipariyāyena, tīhipi saṅgahehi asaṅgahetabbassa atthitāya paripuṇṇasaṅgahāsaṅgāhakattāti attho.

Asaṅgāhakesu nibbānaṃ antogadhaṃ, tasmā taṃ anidassanaappaṭighehi asaṅgahetabbaṃ na hotīti attho. Tenāha “**na ca tadeva tassa asaṅgāhaka**”nti. “Vedanākkhandhena ye dhammā”tiādayo

nava pañhā dutiyapañhādayo, te paṭhamapañhena saddhiṃ dasa, nāmarūpapañhādayo pana catuvīsati āha “**sabbepi catuttiṃsa honti**”ti. **Rūpakkhandhādivisesakapadanti** “rūpakkhandhenā”tiādīnā asaṅgāhakattena visesakam rūpakkhandhādipadam. **Pucchāyāti** ca pucchanatthanti attho. “Rūpakkhandhenā”tiādi sabbampi vā viññāpetuṃ icchitabhāvena vacanam pañhabhāvato pucchā. Tenāha aṭṭhakathāyaṃ “pañhā panettha...pe... catuttiṃsa honti”ti. **Te hi lakkhaṇato dassitāti** te niddhāritadhammā teneva asaṅgahitāsaṅgahitatāya niddhāraṇasaṅkhātena lakkhaṇena dassitā.

Tadevāti eva-saddenāti “tadevā”ti ettha eva-saddena. “Yaṃ pucchāya uddhaṭam padam, tam khandhādīhi asaṅgahita”nti ettha “khandhādīhevā”ti avadhāraṇam nippayojanam pakārantarassa abhāvato. “Tīhi asaṅgaho”ti hi vuttam. Tathā “asaṅgahitamevā”ti saṅgahitatānivattanassa anadhippetattā. Tadevāti pana icchitam uddhaṭasseva asaṅgahitenaasaṅgahitabhāvassa avadhāretabbattāti dassento “**na kadāci**”tiādīmāha. Tattha **aññassāti** anuddhaṭassa. **Aniyatam dassetī** idam avadhāraṇaphaladassanam. **Niyamatoti sakkā vacanaseso yojetunti** idampi eva-kārena siddhamevattham pākaṭataram kātuṃ vuttam. Yato hi eva-kāro, tato aññattha niyamoti. **Evampakāramevāti** pucchāya uddhaṭappakārameva, yaṃ pakāram pucchāya uddhaṭam, tam pakāramevāti attho. **Tassāti** asaṅgahitassa. **Aññassāti** pucchāya anuddhaṭappakārassa. Etena yo pucchāya uddhaṭo tīhipi saṅgahehi asaṅgahito, tasseva idha pucchitabbavissajjitabbabhāvo, na aññassāti dasseti. Tenāha “**pucchāya uddhaṭañhī**”tiādi. Āyatanadhātusaṅgahavasena cettha rūpakkhandhādīnam **aññasahitatā**, viññāṅakkhandhādīnam **asahitatā** ca veditabbā.

Avasesā vedanādayo tayo khandhā nibbānañca sakalena rūpakkhandhena tesam saṅgaho natthīti “saṅgahitā”ti na sakkā vuttam, ekadesena pana saṅgaho atthīti “**asaṅgahitā na hontīti evam datṭhabba**”nti āha. “Rūpadhammāvā”ti niyamanam pucchāya uddhaṭabhāvāpekkhanti dassento “**pucchāya...pe... adhippāyo**”ti āha. Tena vuttam “**anuddhaṭā vedanādayopi hi asaṅgahitā evā**”ti. Etthāti etasmim pañcamanayaniddese. **Paṭhame nayeti** paṭhame atthavikappe. Tathā **dutiyeti** etthāpi. **Rūpaviññāṇehīti** asukhumarūpadhammehi viññāṇena cāti ayamettha adhippāyoti dassento “**oḷārika... pe... attho**”ti āha. Katham pana rūpadhammāti vutte oḷārikarūpasseva gahaṇanti āha “**rūpekadeso hi ettha rūpaggaṇena gahito**”ti.

196. Asaṅgāhakanti “cakkhāyatanena...pe... asaṅgahitā”ti evam asaṅgāhakabhāvena vuttam pucchitabbavissajjetabbabhāvena vuttampi kāmam vedanādīheva catūhi asaṅgahitam, tam pana na cakkhāyatanamevāti dassetuṃ “**cakkhāyatanena panā**”tiādi vuttam. **Yehi dhammehīti** khandhādīsu yehi. **Sabham** dhammajātam **teva** rūpādike dhamme **udāneti** pāḷiyam. Kasmā panetaṃ udānetīti āha “**sadisavissajjanā**”tiādi. **Paṭhamena** udānena. **Dveti** “bāhirā upādā dve”ti ettha vuttam dve-saddam sandhāyāha. **Tassa** asaṅgahitassa. **Yathādassitassāti** “rūpa”ntiādīnā dassitappakārassa. Dhammanvayaññāpūpadanam **nayadānam**. “Rūpam dhammāyatana”ntiādīnam padānam vasena **dvevīsapadiko esa nayo**.

Pañcamanayaasaṅgahitenaasaṅgahitapadavaṇṇanā niṭṭhitā.

6. Chaṭṭhanayo sampayogavippayogapadavaṇṇanā

228. “Tatthā”ti iminā “sampayogavippayogapadam bhājetvā”ti ettha sampayogavippayogapadam bhājitam, samvaṇṇetabbatāya ca padhānabhūtam paccamaṭṭham, na rūpakkhandhādīpadanti dassento “**yaṃ labbhati...pe... veditabba**”nti vatvā puna “**rūpakkhandhādīsu hi**”tiādīnā tamattham vivarati. Tattha **na labbhatīti** “sampayuttam vippayutta”nti vā gahetuṃ na labbhati, **alabbhamānampi pucchāya gahitam** paṭikkhepena vissajjetuṃ. Paṭikkhepopi hi pucchāya vissajjanameva. Tathā hi **yamake** (yama. 1.khandhayamaka.59-61) “yassa rūpakkhandho nuppajjittha, tassa vedanākkhandho nuppajjitthā”ti pucchāya “natthī”ti vissajjitam. Tena panettha rūpadhammesu sampayogaṭṭho na labbhatīti ayamattho dassito hoti. Alabbhamānampi sampayogapadam gahitanti sambandho.

Sabbatthāti rūpakkhandhavedanākkhandhādīsu. **Etesanti** rūpanibbānānaṃ. **Visabhāgatāti** atamsabhāgatā. Ekuppādādībhāvo hi sampayoge sabhāgatā, na saṅgahe viya samānasabhāgatā, tasmā ekuppādādībhāvarahitānaṃ rūpanibbānānaṃ sā ekuppādādītā visabhāgatā vuttā. **Tadabhāvatoti** tassā visabhāgatāya ekuppādādītāya abhāvato. **Vippayogopi nivārito eva hoti**, visabhāgo bhāvo vippayogoti vuttovāyamattoti. **“Catūsu hi”**tiādinā vuttamevatthaṃ pākāṭataraṃ karoti. Tattha **tesaṃ tehi** ca arūpakkhandhe eva parāmasati. **Visabhāgatā ca hoti** rūpanibbānesu avijjamānattāti attho. Tenāha **“na ca rūpekadesassā”**tiādi. **Tenevāti** catukkhandhasabhāgattā eva.

Tīhi viññāṇadhātūhi ghānājivhākāyaviññāṇadhātūhi vippayutte **anārammaṇamissake** rūpadhammamissake dhamme dīpeti rūpabhavoti yojanā. **Pañcahi** cakkhuvīññāṇādīhi pañcahi viññāṇadhātūhi. **Ekāya** manodhātuyā. **Na sampayutteti** na sampayutte eva. Tathā hi “vippayutte ahonte sattahipi sampayutte sattapi vā tā”ti vuttaṃ. **Tenāti** vippayuttatāpaṭikkhepena. **Tāhi** sattaviññāṇadhātūhi. **Sampayutte dīpentīti** sampayutte dīpentiyeva, na sampayutte evāti evamavadhāraṇaṃ gahetabbaṃ. Esa nayo sesesupī. **Sampayutte** vedanādike. **Sampayuttavippayuttabhāvehi navattabbaṃ**, taṃyeva viññāṇadhātusattakaṃ. Sampayuttabhāvena navattabbāni **sampayuttanavattabbāni**, bhinnasantānikāni, nānākkhaṇikāni ca arūpānīpi dhammajātāni. **Anārammaṇamissakasabbaviññāṇadhātutaṃsamyuttā** dhammāyatanādīpadehi dīpetabbā, **anārammaṇamissakasabbaviññāṇadhātuyo** acetasi kādīpadehi dīpetabbā, **tadubhayasamudāyā** dukkhasaccādīpadehi dīpetabbāti veditabbā.

Yadi evanti yadi anārammaṇamissānaṃ dhammānaṃ vippayogo natthi. **Anārammaṇamissobhayadhammāti** rūpanibbānasahitasabbaviññāṇadhātutaṃsamyuttadhammā. **Khandhādīhevāti** khandhāyatanadhātūhi eva, na arūpakkhandhamattena. Arūpakkhandheyeva pana sandhāya “tehi dhammehi ye dhammā vippayuttā”ti vuttanti nāyaṃ dosoti dasseti. **Tadekadesāti** “anārammaṇamissā”tiādinā vuttadhammasamudāyassa ekadesā. **Tadekadesaññasamudāyāti** tasseva yathāvuttassa samudāyassa ekadesā hutvā aññesaṃ avayavānaṃ rūpakkhandhādīnaṃ samudāyabhūtā. **Vibhāgābhāvatoti** bhedābhāvato. Bhedoti cettha accantabhedo adhippeto. Na hi samudāyāvayavānaṃ sāmāññavisesānaṃ viya accantabhedo atthi bhedābhedayuttattā. Tesaṃ accantabhedameva hi sandhāya “samudāyantogadhānaṃ ekadesānaṃ na vibhāgo atthi”ti saṅgahepi vuttaṃ. **Tenāti** avibhāgasabbhāvato sabhāgavisabhāgattābhāvena. **Tesanti** anārammaṇamissakasabbaviññāṇadhātuādīnaṃ. **Te ca** akusalābyākatā. **Tesanti** kusalākusalābyākatadhammānaṃ. **Tasmāti** yasmā vibhātasabhāvānaṃ na tesaṃ samudāyekadesādībhāvo, tasmā. Yasmā pana kusalādayo eva khandhādayoti khandhādīmasanena samudāyekadesādībhāvo āpanno evāti vuttanayena vippayogābhāvo hoti, tasmā taṃ pariharanto **“khandhādīni anāmasitvā”**tiādimāha. **Tesanti** kusalādīnaṃ. **Aññamaññavippayuttatā vuttā** “kusalehi dhammehi ye dhammā vippayuttā”tiādinā. **Sabbesūti** dutiyādisabbapañhesu.

Chattimsāya piṭṭhidukapadesu vīsati dukapadāni imasmim naye labbhanti, avasiṭṭhāni soḷasevāti āha **“soḷasāti vattabba”**nti. Tato eva “tevīsapadasata”nti ettha “tevīsa”nti idaṅca “ekavīsa”nti vattabbanti yojanā. **Sabbatthāti** sabbapañhesu. Ekakāleasantānānaṃ bhinnakālabhinnasantānānaṃ anekesaṃ dhammānaṃ samudāyabhūtā saṅkhārakkhandhadhammāyatanadhāmadhātuyoti āha **“kālasantāna...pe... dhātūna”**nti. **Ekadesasammissāti** cittiddhipādādīnaṃ attano ekadeseneva khandhantarādīhi sammissā iddhipādādayo, **anārammaṇehi** rūpanibbānehi ca asammissā. **Samānakālasantānehīti** ekakālasantānehi kālasantānabhedarahitehi ekadesantarehi, saṅkhārakkhandhādīnaṃ ekadesantarehi, saṅkhārakkhandhādīnaṃ ekadesavisesabhūtehi satipaṭṭhānasammappadhānasaññākkhandhādīhi vibhattā eva samudayasaccādayo sampayogīvippayogībhāvena, rūpakkhandhādayo vippayogībhāvena gahitāti yojanā. **Tehi** samudayasaccādīhi. **Te** saññākkhandhādayo. **Kehici** sahuppajjanārahehi ekadesantarehi vibhattehi. Na hi saṅkhārakkhandhādīpariyāpannattepi samudayasaccādayo maggasaccādīhi sampayogaṃ labhanti. **Tesanti** vedanākkhandhasaññākkhandhādīnaṃ. **Ekuppādā...pe... visabhāgatā cāti** ekuppādādītasaṅkhātā yathārahaṃ sabhāgatā visabhāgatā ca. **Tena** yathāvuttakāraṇena sampayogassa

vippayogassa ca labhanato.

Bhinnakālānaṃ samudāyīnaṃ samudāyā **bhinnakālasamudāyā**. **Vattamānā ca** ekasmiṃ santāne **ekekadhammā** vuttanti. **Tasmāti** yasmā etadeva, tasmā. **Tesaṃ** vedanākkhandhādīnaṃ **vibhajitabbassa** ekadesabhūtassa abhāvato. **Sukhindriyādīni** vedanākkhandhekadesabhūtānīpi. **Tena** vibhāgākaraṇena. Yadi samānakālassa vibhajitabbassa abhāvato cakkhuvīññādhātādayo vīññākkhandhassa vibhāgaṃ na karonti, atha kasmā “cakkhuvīññādhātu...pe... manovīññādhātu soḷasahi dhātūhi vippayuttā”ti vuttanti codanaṃ manasi katvā āha “**khandhāyatana...pe... vippayuttāti vutta**”nti. **Evamevanti** yathā dhātuvibhāgena vibhattassa vīññāṇassa, evamevaṃ.

235. Taṃsāmpayogībhāvanti tehi khandhehi sampayogībhāvaṃ. Yathā hi samānakālasantānehi ekacittuppādagatehi vedanāsaññāvīññākkhandhehi samudayasaccassa sampayuttatā, evaṃ bhinnasantānehi bhinnakālehi ca tehi tassa vippayuttatāti āha “**evaṃ taṃvippayogībhāvaṃ...pe... na vutta**”nti. Visabhāgatānibandhassa vibhāgassa abhāvena **avibhāgehi** tehi tīhi khandhehi. **Vibhāge hīti**ādīnā tamevatthaṃ pākāṭataraṃ karoti. **Vibhāgarahitehī** samānakālasantānehi ekacittuppādagatehi avibhattehi vedanākkhandhādīhi na yuttaṃ vippayuttanti vattuṃ. Tenāha “**vijjamānehi...pe... bhāvato**”ti. Tattha **vijjamānassa** samānassa samānajātikassāti adhippāyo. Na hi vijjamānaṃ rūpārūpaṃ aññamaññaṃ visabhāgaṃ na hoti. **Anuppannā dhammā viyāti** idaṃ visadisudāharaṇadassanaṃ. Yathā “anuppannā dhammā”ti anāgatakālaṃ vuccatīti āmaṭṭhakālabhedam, evaṃ yaṃ āmaṭṭhakālabhedam na hotīti attho. **Uddharitabbaṃ** desanāya desetabbanti vuttaṃ hoti. Vijjamānasseva vijjamānena sampayogo, sampayogārasseva ca vippayogoti atthibhāvasannissayā sampayuttavippayuttatāti āha “**paccuppannabhāvaṃ nissāyā**”ti. Tenevāha “**avijjamānassa**”tiādi. **Taṅcāti** uddharaṇaṃ.

Vibhāgarahitehī visabhāgatābhāvato avibhāgehi. **Anāmaṭṭhakālabhedeti** anāmaṭṭhakālavisesa. **Avijjamānassa...pe... sampayogo natthīti** etena pārisesato vijjamānassa ca vijjamānena sampayogo dassito. **Avijjamānatādīpake bhede gahite**ti yathāgahitesu dhammesu tehi vippayogīnaṃ avijjamānabhāvādīpake tesamyeva visese “arūpabhavo ekena khandhena dasahāyatanehi soḷasahi dhātūhi vippayutto”tiādīnā (dhātu. 246) gahite teneva ruppanādīnā bhedenā tesam aññamaññaṃ visabhāgatāpi gahitā evāti vippayogo hotīti yojanā. **Bhede pana aggahite tena tena gahaṇenāti** yathāvutte avijjamānatādīpake visese, visabhāge vā aggahite “vedanā, saññā, saṅkhārakkhandho tīhi khandhehi ekenāyatanena sattahi dhātūhi sampayutto”tiādīnā tena tena gahaṇena sabhāgatādīpanena visabhāgatāya aggahitattā sabhāgatāva hoti. Tathā ca sati sabhāgatte kā panettha sabhāgatāti āha “**vijjamānatāya...pe... hoti**”ti. **Tassāti** sabhāgatāya. **Tasmāti** visabhāgatāya alabbhamānattā, sabhāgatāya ca labbhamānattā.

262. Vitakko viyāti savitakkasavicāresu cittuppādesu vitakko viya. So hi vitakkarahitattā avitakko vicāramatto ca. Tenāha “**koṭṭhāsantaracittuppādesu alīnā**”ti. Tato eva so appadhāno, dutiyajhānadhammā evettha padhānāti āha “**ye padhānā**”ti. **Tenevāti** savitakkasavicāresu cittuppādesu vitakkassa avitakkavicāramattaggahaṇena idha aggahitattā, vitakkattike dutiyarāsiyeva ca adhippetattā. **Anantaranayeti** sampayuttenavippayuttapadaniddese. **Samudayasaccena samānagatikā** sadisappavattikā. **Itīti** iminā kāraṇena. **Te** avitakkavicāramattā dhammā na gahitā, samudayasaccaṃ viya na desanārulhā. Na savitakkasavicārehi samānagatikāti yojanā. Yadi hi te savitakkasavicārehi samānagatikā siyuṃ, “avitakkavicāramattehi dhammehi ye dhammā sampayuttā, tehi dhammehi ye dhammā vippayuttā, te dhammā na kehici khandhehi, na kehici āyatanehi, ekāya dhātuyā vippayuttā”ti vattabbā siyuṃ. Yasmā pana te samudayasaccena samānagatikā. Yathā hi ye samudayasaccena sampayuttehi vippayuttā, tesam kehici vippayogaṃ vattuṃ na sakkā, evaṃ tehipi. Tathā hi vakkhati “samudayasaccādīni”tiādi. **Dasamo...pe... vuttoti** ettha dasamanāyete tehi avitakkavicāramattehi vippayuttehi vippayuttānaṃ soḷasahi dhātūhi vippayogo vutto, osānanāyete tehi vippayuttānaṃ aṭṭhārasahi dhātūhi saṅgaho ca vuttoti tasmā na te savitakkasavicārehi samānagatikāti dasseti.

Vitakkasahitesūti sahavitakkesu. **Tesūti** avitakkavicāramattesu saha vitakkena dutiyajjhānadhammesu, “avitakkavicāramattā”ti gahitesu vuttēsūti attho. **Sabbepi teti** dutiyajjhānadhammā vitakko cāti sabbepi te dhammā sakkā vattum. Tathā hi sampayogavippayogapadaniddese “avitakkavicāramattā dhammā ekena khandhena ekenāyatanena ekāya dhātuyā kehici sampayuttā”ti vuttam. Tattha **ekena khandhenāti** saṅkhārakkhandhena. **So hi samudāyoti** “avitakkavicāramattā dhammā”ti vuttadhammasamudāyo. Nanu vitakkopettha dhammasaṅgahaṃ gato, so ca vicārato aññenapi sampayuttoti codanaṃ sandhāyāha “**na hi tadekadesassa...pe... hotī**”ti. **Yathāti**adinā tamevatthaṃ iddhipādanidassanena vibhāveti. Tassattho – yathā iddhipādasamudāyassa ekadesabhūtānaṃ chandiddhipādādīnaṃ tīhi khandhehi sampayogo vutto, taṃsamudāyassa na hoti, evaṃ idhāpi vitakkassa aññehi sampayogo avitakkavicāramattassa samudāyassa na hotīti.

Yadi evaṃ “iddhipādo dvīhi khandhehi sampayutto”tiādi na vattabbanti ce? No na vattabbanti dassento “**yathā panā**”tiādimāha. Tattha **tesūti** iddhipādesu. **Samudāyassāti** iddhipādasamudāyassa. **Tehi** vedanākkhandhādīhi **sampayuttatā vuttā** “iddhipādo dvīhi khandhehi sampayutto”tiādinā. **Tenāti** vicārena. **Na hīti**adinā yathādhigatadhammānaṃ sampayuttatāya navattabbābhāvaṃ udāharaṇadassanavasena vibhāveti. **Keci** vicikicchā taṃsahagatā ca mohavajjā mohena sampayuttā, keci asampayuttā. **Mohenāti** vicikicchāsahagatamohameva sandhāya vadati. **Iti** iminā kāraṇena na samudāyo **tena** mohena sampayutto. **Añño koci dhammo** hetubhāvo nāpi atthi, **yena** hetunā **so** dassanenapahātabbahetukoti vutto samudāyo. **Evanti** iminā nayena “bhāvanā...pe... yopi sampayuttā”ti navattabbatāya nidassetabbāti attho. **Evanti** yathā dassanenapahātabbahetukasamudāyassa sampayuttatā na vattabbā, evaṃ yena dhammena avitakka... pe... siyā, taṃ na natthi. **Tasmāti** yasmā avitakkavicāramattesu kocipi vicārena asampayutto natthi, tasmā. **Teti** avitakkavicāramattā dhammā. **Ekadhammepi...pe... kato** yathā “appaccayā dhammā asaṅkhatā dhammā”ti.

Chaṭṭhanayasampayogavippayogapadavaṇṇanā niṭṭhitā.

7. Sattamanayo sampayuttenavippayuttapadavaṇṇanā

306. Tehi samudayasaccādīhi khandhattayakhandhekadesādike **sampayutte satipi, sampayuttehi ca vippayutte** rūpanibbānādike tadaññadhamme satipi vippayogābhāvato. Saṅkhepena vuttamatthaṃ vitthārena dassetuṃ “**na hī**”tiādi vuttam. **Tato** lobhasahagatacittuppādato **aññadhammānaṃ** avasiṭṭhānaṃ kusalākusalābyākatadhammānaṃ **khandhādīsu kenaci vippayogo na hi atthi** khandhapañcakādīnaṃ saṅgaṇhanato tesam. **Te eva cittuppādāti** te lobhasahagatacittuppādā eva. **Tadaññadhammānanti** tadaññadhammānampīti pi-saddalopo daṭṭhabbo. **Tathāti** iminā na ca te eva dhammā aḍḍhadutiyaṅatanadhātuyo, atha kho te ca tato aññe cāti imamattaṃ upasaṃharati.

Nanu tadaññabhāvato eva tehi itaresaṃ vippayogo siddhoti āha “**na cā**”tiādi. **Tadaññasamudāyehīti** tato lobhasahagatacittuppādato aññasamudāyehi **aññe** lobhasahagatā dhammā vippayuttā na honti. Kasmā? **Samudāye...pe... vippayogābhāvato**. Tassattho – **samudāyena** lobhasahagatatadaññadhammārasinā **ekadesānaṃ** lobhasahagatadhammānaṃ vippayogābhāvato, tathā ye ekadesā hutvā aññesaṃ avayavānaṃ samudāyabhūtā, tesaṅca samudāyena vippayogābhāvato. Anena samudāyena avayavassa samudāyassa avayavena ca tassa na vippayogo, avayavasseva pana avayavenāti dasseti. **Esā nayoti** yvāyaṃ samudayasacce vutto vidhi, eseva maggasaccasukhindriyādīsu arūpakkhandhekadesattā tesanti dasseti. **Niravasesesūti** abahikatavitakkesu. Vitakko hi samudāyato abahikato. “So hi samudāyo”tiādiko vuttanayo labbhatīti āha “**aggahaṇe kāraṇaṃ na dissati**”ti.

Aññesupi samudayasaccādīsu **vissajjanassa...pe... daṭṭhabbaṃ**, yato samudayasaccādi idha na gahitanti adhippāyo. Sampayuttādhikārato “aññenā”ti padaṃ sampayuttato aññaṃ vadatīti āha “**asampayuttēna asammissanti attho**”ti. Idāni byatirekenapi tamattaṃ patitṭhāpetum

“**adukkhamasukhā...pe... gahitānī**”ti vuttaṃ. **Etena lakkhaṇenā**ti “asampayuttena asammissa”nti vuttalakkhaṇena. **Cittanti** “cittehi dhammehi ye dhammā”ti pañhaṃ upalakkheti. **Sahayuttapadehi sattā**ti “cetasikehi dhammehi ye dhammā”tiādina cittena sahayutte dhamme dīpentehi padehi āgatā satta pañhā. Tiṇṇaṃ tikapadānamaggahaṇena **ūnoti katvā**. Ye sandhāya “**tike tayo**”ti vuttaṃ. Taṃ pana vedanāpīttikesu pacchimaṃ, vitakkattike paṭhamanti padattayaṃ veditabbaṃ.

309. Uddhaṭapadena pakāsiyamānā atthā abhedopacārena “uddhaṭapada”nti vuttāti āha “**uddhaṭapadena sampayuttehi**”ti. **Tena** ca yathāvuttena uddhaṭapadena. **Manena yuttā**ti ettha mananamattattā manodhātu “mano”ti vuttāti āha “**manodhātuyā ekantasampayuttā**”ti.

Sattamanayasampayuttenavippayuttapadavaṇṇanā niṭṭhitā.

8. Aṭṭhamanayo vippayuttenasampayuttapadavaṇṇanā

317. Rūpakkhandhena vippayuttā nāma cattāro arūpino khandhā, tesam aññehi sampayogo nāma natthi tādisassa aññassa sampayogino abhāvato. Samudāyassa ca ekadesena sampayogo natthīti vuttovāyamatto. Vedanākkhandhādīhi vippayuttaṃ rūpaṃ nibbānaṃca, tassa kenaci sampayogo natthevāti āha “**rūpakkhandhādīhi...pe... natthī**”ti. **Tenā**ti “rūpakkhandhena ye dhammā vippayuttā”tiādivacanena.

Aṭṭhamanayavippayuttenasampayuttapadavaṇṇanā niṭṭhitā.

9. Navamanayo sampayuttenasampayuttapadavaṇṇanā

319. “Samāsapadaṃ ida”nti vatvā ayaṃ nāma samāsoti dassento “**yassa khandhādino**”tiādīmāha, yassa vedanākkhandhādinoti attho. **Yaṃ idha sampayuttaṃ vuttanti** imasmiṃ navamanaye yaṃ dhammajātaṃ sampayuttanti vuttaṃ. **Rūpakkhandhādīsu araṇantesu** abbhantarabāhiramātikādhammesūti niddhāraṇe bhumbaṃ. **Taṅhi** dhammajātaṃ **attanā sampayuttena** vedanākkhandhādinā sayam sampayuttanti niddhāritaṃ. **Ayogoti** asampayogo. **Vakkhati** dasamanaye. Tattha hi “rūpakkhandhena vedanādayo vippayuttā, tehi rūpakkhandho vippayutto”ti vatvā nibbānaṃ kathanti codanaṃ sandhāyāha “**nibbānaṃ pana sukhumarūpagatikamevā**”ti vuttaṃ. “Manāyatanam ekenāyatanena ekāya dhātuyā kehici vippayutta”nti ettha hi yathā sukhumarūpaṃ viya sarūpato anuddhaṭampi nibbānaṃ kehicitipadena gahitameva hotīti edisesu ṭhānesu nibbānaṃ sukhumarūpagatikanti viññāyati, evamidhāpi “rūpamissakehi vā”ti etena anupādinnaanupādāniyādīhi nibbānamissakehipi asampayogo vutto hotīti daṭṭhabbo. Avikalacatukkhandhasaṅgāhakehi padehi sahavattino aññassa sampayogino abhāvato atītānāgatehi ca sampayogo natthevāti tassa ayujjamānataṃ dassento “**vattamānānameva...pe... arūpabhavādīhīti attho**”ti āha. **Itareti** ye sampayogaṃ labhanti, ke pana te rūpena asammissā arūpekadesabhūtā. Tenāha “**vedanākkhandhādayo**”ti.

Navamanayasampayuttenasampayuttapadavaṇṇanā niṭṭhitā.

10. Dasamanayo vippayuttenavippayuttapadavaṇṇanā

353. Ye vippayuttena vippayuttabhāvena pāḷiyam aggahitā, tesu keci vippayuttassa dhammantarassa abhāvato keci khandhādīhi vippayogasseva asambhavatoti imamatthaṃ dassento “**dhammāyatanādiddhammā**”tiādīmāha. Tattha **sabbacittuppādagatadhammabhāvato**ti iminā bhinnakālatādivisesavato arūpakkhandhassa vippayuttassa dhammantarassa abhāvamāha, **anārammaṇamissakabhāvato**ti iminā pana sabbassapi. Kāmabhavo upapattibhavo saññībhavo pañcavokārabhavoti ime **cattāro mahābhavā**. **Vippayogābhāvato**ti vippayogāsambhavato. Na hi ye dukkhasaccādīhi vippayuttā, tehi vippayuttānaṃ tesamyeva dukkhasaccādīnaṃ khandhādīsu kenaci

vippayogo sambhavati.

Dasamanayavippayuttenavippayuttapadavaṇṇanā niṭṭhitā.

11. Ekādasamanayo saṅgahitenasampayuttavippayuttapadavaṇṇanā

409. Teti saṅkhārakkhandhadhammā. **Sesehīti** avasiṭṭhehi vedanāsaññāviññāṇakkhandhehi. “**Etena saha sambandho**”ti iminā padānaṃ sambandhadassanamukhena “samudayasaccena ye dhammā sampayuttā”ti pāliya atthavivaraṇaṃ pākaṭataraṃ katvā kehicītipadassatthaṃ kātum “**kehicīti etassa panā**”tiādimāha. Atthaṃ dassetum āhāti sambandho. **Visesetvāti** ettha tesam dhammānaṃ taṅhāvajjānaṃ saṅkhārakkhandhadhammāyatanadhammadhātupariyāpannatākittanaṃ visesanaṃ daṭṭhabbaṃ, yato te samudayasaccena khandhādisaṅgahena saṅgahitāti vuttā. Sayam attanā sampayutto na hotīti vuttaṃ “**attavajjehī**”ti. Tena vuttaṃ “cittaṃ na vattabbaṃ cittaena sampayuttantipi, cittaena vippayuttantipi”ti. **Sampayogārahehīti** visesanaṃ sukhumarūpaṃ nibbānanti dve sandhāya kataṃ, na taṅhādike.

Ekādasamanayasāṅgahitenasampayuttavippayuttapadavaṇṇanā niṭṭhitā.

12. Dvādasamanayo sampayuttenasaṅgahitāsaṅgahitapadavaṇṇanā

417. Navamanaye sampayogavisiṭṭhā sampayuttā uddhaṭā, dvādasamanaye ca sampayogavisiṭṭhā saṅgahitāsaṅgahitāti ubhayatthāpi sampayogavisiṭṭhāva gahitāti āha “**dvādasama...pe... labbhanti**”ti.

Dvādasamanayasampayuttenasaṅgahitāsaṅgahitapadavaṇṇanā niṭṭhitā.

13. Terasamanayo asaṅgahitenasampayuttavippayuttapadavaṇṇanā

448. Yehīti rūpakkhandhadhammāyatanādīhi. **Tīhipi** khandhāyatanādisaṅgahehi. Puna **yehīti** arūpabhavādīhi. **Oḷārikāyatanāneva honti** āyatanadhātusaṅgahehipi asaṅgahitattā. **Teti** catuvokārabhavādayo. **Vuttāvasesāti** rūpakkhandhadhammāyatanādīhi avasiṭṭhā. Satipi asaṅgāhakatte tehi asaṅgahitānaṃ sampayogo na sambhavatīti **vedanākkhandhādayo idha** terasamanaye **vissajjanaṃ na ruhanti** nārohanti. Tenāha aṭṭhakathāyaṃ “vedanākkhandhena hi khandhādivasena rūpārūpadhammā asaṅgahitā honti, tesaṅca sampayogo nāma natthī”ti (dhātu. 448) **asaṅgāhakā eva na honti** avikalapaṅcakkhandhādisamudāyabhāvato.

Teti “dukkhasaccādī”ti ādi-saddena vuttadhammā. **Asabba...pe... siyuṃ** avitakkāvicārādiddhammā viya. **Na tesam vippayogo natthi** tabbinimuttassa cittuppādassa sambhavato. **Vedanākkhandhena asaṅgahitānaṃ** anārammaṇamissakattā na “vippayogassa atthitāyā”ti vuttaṃ. Tathā cāha “rūpārūpadhammā asaṅgahitā”ti. **Ubhayābhāvatoti** sampayogavippayogābhāvato. **Anārammaṇasahitasabbaviññāṇatamaḍhātusampayuttatadubhayadhammā** acetasikacetasikalokiyapadādīnaṃ vasena veditabbā.

Terasamanayaasaṅgahitenasampayuttavippayuttapadavaṇṇanā niṭṭhitā.

14. Cuddasamanayo vippayuttenasaṅgahitāsaṅgahitapadavaṇṇanā

456. Dhammasabhāvamattattāti sabhāvadhammānaṃ dhammamattattā avatthāvisesamattattā.

Samucchiḷḷati etenāti **samucchedo**. Saṅgahādivicārāpariniṭṭhānabhūto cuddasamanayo. Tenāha “**pariyosāne naye**”ti. Vissajjetabbadhammavivittā pucchā **moghapucchā**, sā tathābhūtāpi

vissajjetabbadhammābhāvassa ñāpikā hotīti āha “**tesaṃ pucchāya moghattā te na labbhanti**”ti. Moghā pucchā etassāti **moghapucchako. Aṭṭhamo nayo** tattha sabbapucchānaṃ moghattā. **Tena ca saḥāti** tena aṭṭhamanayena saddhiṃ imasmim osānanaye aṭṭhamanaye ca osānanaye ca **ete** dhammāyanādayo sabbappakārena na labbhanti. **Vippayogassapi abhāvāti** tattha kāraṇamāha.

Cuddasamanayavippayuttenasaṅgahitāsaṅgahitapadavaṇṇanā niṭṭhitā.

Dhātukathāpakaraṇa-anuṭṭikā samattā.

Puggalapaññattipakaraṇa-anuṭṭikā

1. Mātikāvaṇṇanā

1. “Dhātukathaṃ desayivā anantaraṃ tassa āha puggalapaññatti”nti vutte tattha kāraṇaṃ samudāgamato paṭṭhāya vibhāvento “**dhammasaṅgahe**”tiādimāha. Tattha yadipi dhammasaṅgahe phassādīnaṃ pathavīādīnaṃca dhammānaṃ nānāyavicitto anupadavibhāgopi kato, na saṅgaho eva, so pana tesaṃ kusalattikādihetudukāditikadukehi saṅgahasandassanathoti vuttaṃ “**dhammasaṅgahe tikadukādivasena saṅgahitānaṃ dhammāna**”nti. Teneva hi taṃ pakaraṇaṃ “dhammasaṅgahe”ti samaññaṃ labhi. Kāmaṅca dhammasaṅgahepi “tasmim kho pana samaye cattāro khandhā hontī”tiādinā (dha. sa. 58) khandhādivibhāgo dassito, so pana na tathā sātisayo, yathā vibhaṅgapakaraṇeti sātisayaṃ taṃ gahetvā āha “**vibhaṅge khandhādivibhāgaṃ dassetvā**”ti, yato taṃ “vibhaṅgo”tveva paññāyittha. **Dhātukathāyāti** ādhāre bhummāṃ, tathā “dhammasaṅgahe vibhaṅge”ti etthāpi. Ādhāro hi saṅgahaṇavibhajanappabhedavacanasāṅkhātānaṃ avayavakiriyānaṃ taṃsamudāyabhūtāni pakaraṇāni yathā “rukkhe sākā”ti. Karaṇavacanaṃ vā etaṃ, dhātukathāya karaṇabhūtāyāti attho.

Ettha ca abhiññeyyadhamme desento desanākusalo bhagavā tikadukavasena tāva nesaṃ saṅgahaṃ dassento **dhammasaṅgaṇim** desetvā saṅgahapubbakattā vibhāgassa tadanantaraṃ khandhādivasena vibhāgaṃ dassento **vibhaṅgaṃ** desesi. Puna yathāvuttavibhāgasāṅgahayutte dhamme saṅgahāsaṅgahādinayappabhedato dassento **dhātukathaṃ** desesi tassā abhantarabāhiramātikāsarīrakattā. Na hi sakkā khandhādike kusalādike ca vinā saṅgahāsaṅgahādinayaṃ netunti. Tenāha “**tathāsaṅgahitavibhattāna**”nti. Evaṃ saṅgahato vibhāgato pabhedato ca dhammānaṃ desanā yassā paññattiyā vasena hoti, yo cāyaṃ yathāvuttadhammupādāno puggalavohāro, tassa ca samayavimuttādivasena vibhāgo, taṃ sabbaṃ vibhāvetuṃ **puggalapaññatti** desitāti idametesāṃ catunnaṃ pakaraṇānaṃ desanānukkamakāraṇaṃ daṭṭhabbaṃ.

Tesanti dhammānaṃ. **Sabhāvato**ti “phasso vedanā”tiādisabhāvato. **Upādāyāti** “puggalo satto poso”tiādinā khandhe upādāya. Paññāpanaṃ **yāya** tajjāupādādibhedāya paññattiyā hoti, **taṃ** paññattim. **Pabhedatoti** khandhādisamayavimuttādivibhāgato. Yāya paññattiyā sabhāvato upādāya ca paññāpananti saṅkhepato vuttamatthaṃ vivaranto “**tattha ye dhamme**”tiādimāha. Tattha asabhāvapaññattiyāpi mūlabhūtaṃ upādānaṃ sabhāvadhammo eva, kevalaṃ pana tesaṃ pavattiākārabhedasannissayato visesoti dassento “**ye dhamme...pe... hoti**”ti āha. Tattha **pubbāpariyabhāvena pavattamāneti** iminā pabandhasannissayataṃ dassento santānapaññattim vadati, **asabhāvasamūhavasena**ti iminā sesapaññattim. Tisso hi paññattiyō santānapaññatti samūhapaññatti avatthāvisesapaññattiti. Tattha pabandho **santāno**. Samudāyo **samūho**. Uppādādiko daharabhāvādiko ca **avatthāviseso**. Tesu asabhāvaggahaṇena vinā pabandhasamūhānaṃ asabhāvatte siddhe asabhāvasamūhavasenaṭi asabhāvaggahaṇaṃ pabandhasamūhavinimuttapaññattisandassanathanti tena avatthāvisesapaññattiyā pariggaho vuttoti vedītabbo.

Tesanti pubbe yaṃ-saddena parāmatthānaṃ indriyabaddhadhammānaṃ. Tenevāha “**aññesaṅca bāhirarūpanibbānāna**”nti. **Sasabhāvasamūhasasabhāvappabhedavaseṇāti**

rūpakkhandhādisasabhāvasamūhavasena cakkhāyatanādisasabhāvavisesavasena ca.

“Sasabhāvasamūhasabhāvabhedavasenā”ti ca pātho. Tatha **samūhasabhāvoti** sabhāvasantānaṃ avatthāvisesavidhuraṃ samūhavasena lakkhaṇamevāha. Tathā hi khandhapaññattiyāpi sabhāvapaññattitā vuttā. **Tāyāti** āyatanapaññattiādippabhedāya sabhāvapaññattiyā. **Vibhattā sabhāvapaññattīti** “phasso phusanā”tiādinā (dha. sa. 2) vibhattā phassādisabhāvapaññatti. **Sabbāpīti pi**-saddena sabhāvadhammesu sāmāññavasena pavattaṃ kusalādipaññattiṃ saṅgaṇhāti. Rūpādidhammānaṃ samūho santānena pavattamāno avatthāvisesasahito ekattaggahaṇanibandhano sattoti voharīyatīti so sabhāvadhammo nāma pana na hotīti āha “**puggalapaññatti pana asabhāvapaññatti**”ti. **Tāyāti** puggalapaññattiyā. Yasmā pana dhammānaṃ pabandho samūho ca dhammasannissitoti vattabataṃ arahati, tasmā “**pariñneyyādisabhāvadhamme upādāya pavattito**”ti vuttaṃ.

Vijjamānapaññatti pana “sabhāvapaññatti”ti vuttā, **avijjamānapaññatti** “asabhāvapaññatti”ti vuttā. **Sabbā paññattiyoti** upādāyapaññattikiccapaññattiādayo sabbā paññattiyō. Yadi sabbā paññattiyō idha dassitā honti, kathaṃ “puggalapaññatti”ti nāmaṃ jātanti āha “**khandhādipaññattīsū**”tiādi. **Aññatthāti** dhammasaṅgahādīsū. **Ye dhammeti** ye khandhādidhamme. **Paññattiyā vatthubhāvenāti** paññāpanassa adhiṭṭhānabhāvena. Adhiṭṭhānañhi paññāpetabbadhammā paññāpanassa. Evañca katvā khandhādīhi saddhiṃ puggalo gahito. **Ye dhammeti** vā ye paññattidhamme. **Paññāpetukāmoti** nikkhipitukāmo vatthubhedato asaṅkarato ṭhapetukāmo. **Paññattiparicchedanti** ca vatthubhedabhinnaṃ paññattibhūtaṃ paricchedaṃ. Evamettha attho daṭṭhabbo.

Sāmāññappabhedapaññāpanāti sāmāññabhūtānaṃ visesabhūtānañca atthānaṃ paññāpanā. **Tesanti** attha-saddāpekkhāya pulliṅganiddeso. **Tatthāti** paññāpanāya atthadassanabhūtesu dassanādīsū. **Idamevaṃnāmakanti** idaṃ ruppanādiatthajātaṃ itthannāmakaṃ rūpakkhandhavedanākkhandhādisamaññāṃ. **Taṃtaṃkoṭṭhāsikakaraṇanti** rūpavedanāditamtaṃatthavibhāgapariyāpannatāpādanaṃ. Tathā saññupādānamevāti āha “**bodhanameva nikkhipanā**”ti. Bodhanañhi bodhaneyyasantāne bodhetabbassa atthassa ṭhapananti katvā “nikkhipanā”ti vuttaṃ. “Paññāpanā”tiādinā bhāvasādhanena vatvā sādhanantarāmasanena atthantaraparikkappāsāṅkā siyāti taṃ nivāretuṃ “**yo panāyaṃ...pe... veditabbo**”ti āha. **Tesaṃ tesaṃ dhammānanti** taṃtaṃpaññāpetabbadhammānaṃ. Dassanabhūtāya nāmapaññattiyā **diṭṭhatāya**, ṭhapanabhūtāya **ṭhapatitāya**. **Taṃnimitatanti** tassa dassanassa ṭhapanassa ca nimittakāraṇataṃ. Nimittañhi kattubhāvena voharīyati yathā “bhikkhā vāsetī”ti, “ariyabhāvakarāni saccāni ariyasaccāni”ti ca.

Pāliyaṃ anāgatatanti vijjamānatādivisesavacanena saha pāṭhānārulḥataṃ. **Vijjamānassa satoti** vijjamānassa samānassāti imamatthaṃ dassento “**vijjamānabhūtassāti attho**”ti āha. **Tathāti** saccikaṭṭhaparamatthavasena **avijjamānassa** anupalabbhamānassa. Taṃ pana anupalabbhamānataṃ tathā-saddena byatirekavasena dīpitaṃ pākaṭataraṃ kātuṃ “**yathā kusalādīni**”tiādimāha. Tatha **vinivattasabhāvānīti** vibhattasabhāvāni. **Upaladdhīti** gahaṇaṃ. **Tenākārenāti** tena rūpavedanādiākārena avijjamānassa. **Aññenākārenāti** tato rūpavedanādito aññena tabbinimuttana paññāpetabbapaññāpanākārena vijjamānassa. Paññattiduke vuttameva “ayañca vādo sevattthikathāya paṭisiddho”tiādinā. **Lokaniruttimattasiddhassāti** ettha **matta**ggahaṇaṃ tassa paññattivatthussa na kevalaṃ vijjamānasabhāvātānivattanatthameva, atha kho viparītaggāhanivattanatthampīti dassento “**anabhinivesena cittenā**”ti āha. Catusaccapañcakkhandhādivinimuttaṃ saccantarakhantārādikaṃ **pañcamasaccādikaṃ**. Sace taṃ koci atthīti paṭijāneyya, ayāthāvagahitassa taṃ vācāvattumattamevassāti dassento āha “**sābhinivesena...pe... vutta**”nti. Uddese niddese ca sattavantaṃ padhānabhāvena āgamaṇaṃ sandhāyāha “**sarūpato tissannaṃ āgatata**”nti. Guṇabhāvena pana uddhamṣotapaññāvimuttapāsāṅgalekhādiggahaṇesu itarāpi tisso paññattiyō imasmiṃ pakaraṇe āgatā eva.

Yathāvuttassa...pe... avirodhenāti “vijjamānapaññatti avijjamānapaññatti”ti evaṃ vuttappakāraṇassa avilomanena. **Ācariyavādāti** cettha attanomaṭiyō veditabbā, aññattha pana aṭṭhakathā

ca. Yathā ca avirodho hoti, taṃ dassento “**tasmā**”tiādimāha. Tattha **avijjamānattā paññāpetabbamattatthena paññattī** etena “avijjamānā paññatti avijjamānapaññattī”ti imaṃ samāsavikkappamāha. **Avijjamānapaññattī** ettha hi dve samāsā avijjamānassa, avijjamānā vā paññattīti avijjamānapaññattī. Tesu purimena nāmapaññatti vuttā, dutiyena upādāpaññattiātibhedā itarāpi. **Sasabhāvaṃ** vedanādikam. **Tajjaparamatthanāmālābhatoti** tajjassa tadanurūpassa paramatthassa anvatthassa nāmassa labhanato, anubhavanādisabhāvānaṃ dhammānaṃ paramatthikassa vedanādināmassa labhanattāti attho. Etena visesanivattiattho matta-saddo, tena cāyaṃ viseso nivattitoti dasseti. **Parato labhitabbanti** paraṃ upādāya laddhabbaṃ yathā rūpādike upādāya sattoti nissabhāvasamūhasantānādi paññattivatthu. **Ekattenā**ti anaññattena. **Anupalabbhasabhāvātā** ñāṇena aggahetabbasabhāvātā, yato te navattabbāti vuccanti.

Sasūkasālirāsīādiākārena saṃkucitaggo vāsavāvāsudevādīnaṃ viya moliviseso kirītaṃ, so pana makuṭavisesopi hotiyevāti āha “**kirītaṃ makuṭa**”nti. **Sabbasamorodhoti** sabbāsaṃ vijjamānapaññattiādināṃ channaṃ paññattīnaṃ antokaraṇaṃ. **Saṅkhātabbappadhānattāti** idaṃ lakkhaṇavacanaṃ. Na hi sabbāpi upanidhāpaññattisaṅkhāvasena pavattā, nāpi sabbā saṅkhātabbappadhānā. **Dutiyam tatiyantiādikam** pana upanidhāpaññattiyā, **dve tīṇītiādikam** upanikkhattapaññattiyā ekadesaṃ upalakkhaṇavasena dassento tassa ca saṅkhyeyyappadhānatāyāha “**saṅkhātabbappadhānattā**”ti. Pūraṇattho hi saddo tadatthadīpanamukhena pūretabbamatthaṃ dīpeti. So ca saṅkhāvisayo padhānovāti dutiyādināṃ paññattīnaṃ saṅkhātabbappadhānatā vuttā. Yāva hi dasasaṅkhā saṅkhyeyyappadhānāti. Tathā **dve tīṇītiādinampi** paññattīnaṃ. Saṅkhātabbo pana attho koci vijjamāno, koci avijjamāno, koci saha visuṅca tadubhayaṃ missoti **chapi paññattīyo bhajattī**.

Itarāti upādāsamodhānatajjāsantatipaññattīyo vuttāvasesā upanidhāpaññattiupanikkhattapaññattīyo ca. Sattarathātibhedā upādāpaññatti, dīgharassātibhedā upanidhāpaññatti ca avijjamānapaññatti. Hatthagatādivisittā upanidhāpaññatti, samodhānapaññatti ca avijjamānenaavijjamānapaññatti. Tatheva “suvaṇṇavaṇṇo brahmassaro”tiādikā vijjamānagabbhā vijjamānenaavijjamānapaññattim bhajantīti āha “**yathāyogaṃ taṃ taṃ paññatti**”nti. Tena vuttaṃ “dutiyam tatiyam...pe... bhajanti”ti. **Yaññītiādi** yathāvuttaupanidhāupanikkhattapaññattīnaṃ avijjamānenaavijjamānapaññattibhāvasamatthanaṃ. Tattha **tañca saṅkhānanti** yaṃ “paṭhamaṃ eka”ntiādikam saṅkhānaṃ, tañca saṅkhānamukhena gahetabbarūpaṃ. **Ca-saddena** saṅkhyeyyam saṅgaṇhāti. Tampi hi paññāpetabbaṃ paññattīti. Tassā pana paramatthato abhāvo vuttoyeva. **Kiñci natthīti** paramatthato kiñci natthī. **Tathāti** iminā avijjamānenaavijjamānabhāvanti etaṃ ākaḍḍhati. Tenāha “**na hi...pe... vijjamāno**”ti.

Okāseti avīcīparanimmitavasavattīparicchinne padese. So hi kāmādhittānato “kāmo”ti vuccati. **Kammanibbattakkhandhesūti** iminā uttarapadalopena kāmabhavaṃ “kāmo”ti vadati. Bhaṇanaṃ saddo cetanā vā, taṃsamaṅgitāya tabbisitthe puggale bhāṇakoti paññattīti āha “**vijjamānenaavijjamānapaññattipakkham bhajati**”ti. Yebhuyyena rūpāyatanaggahaṇamukhena rūpasāṅkhātena saṅghānaṃ gayhattīti tassa tena abhedopacāraṃ katvā vuttaṃ “**rūpāyatana saṅkhātena saṅghānenā**”ti. Yaṃ abhedopacāraṃ bhinditum ajānantā nikāyantariyā rūpāyatanaṃ saṅghānasabhāvaṃ paṭijānanti. “Kiso puggalo, thūlo puggalo, kiso daṇḍo, thūlo daṇḍo”tiādinā puggalādināṃ paññāpanā tathātathāsannivitthe rūpasāṅkhāte kisādisaṅghānapaññatti, na rūpāyatanaṃ maddeti āha “**saṅghānanti vā rūpāyatane aggahite**”ti. **Paccattadhammanāmavasenāti** “pathavī phasso”tiādinā dhammānaṃ taṃtaṃnāmavasena. Kiccapaññattiādivibhāgena pavatto ayampi ācariyavādo “kiccapaññatti ekaccā bhūmipaññatti paccattapaññatti asaṅkhatapaññatti ca vijjamānapaññatti, līngapaññatti ekaccā paccattapaññatti ca avijjamānapaññatti, ekaccā kiccapaññatti vijjamānenaavijjamānapaññatti, ekaccā bhūmisaṅghānapaññatti vijjamānena vā avijjamānena vā avijjamānapaññatti”ti dassittatā “dhammakathā itthilīṅga”ntiādināṃ vijjamānenaavijjamānapaññattibhāvo, avijjamānenaavijjamānapaññattibhāvo ca dassitanayoti āha “**sabbasaṅgāhakoti daṭṭhabbo**”ti. Upādāpaññattiātibhāvo cettha kiccapaññattiādināṃ kiccapaññattiātibhāvo ca tāsam yathārahaṃ vibhāvetabbo.

2. Saṅkhepappabhedavasenāti “yāvātā pañcakkhandhā”ti sabbepi khandhe

khandhabhāvasāmaññaena saṃkhipanavasena, “yāvatā rūpakkhandho”tiādinā khandhānaṃ tato sāmāññato pakārehi bhindanavasena ca. **Ayaṃ atthoti** ayaṃ paññattisaṅkhāto attho. Sāmāññato vā hi dhammānaṃ paññāpanaṃ hoti visesato vā. Viseso cettha attano sāmāññāpekkhāya veditabbo, visesāpekkhāya pana sopi sāmāññaṃ sampajjatīti “kittāvatā khandhānaṃ khandhapaññattī”ti pucchāya saṅkhepato vissajjanavasena “yāvatā pañcakkhandhā”ti vuttanti tatthāpi “khandhānaṃ khandhapaññattī”ti ānetvā yojetabbanti āha “**yāvatā...pe... paññattī**”ti. “Yāvatā pañcakkhandhā, ettāvatā khandhānaṃ khandhapaññattī. Yāvatā rūpakkhandho...pe... viññānakkhandho, ettāvatā khandhānaṃ khandhapaññattī”ti evamettha pāliyojanā kātabbā. Evañhi saṅkhepato pabhedato ca khandhapaññattī vissajjitā hoti. Tathā hi imasseva atthassa aṭṭhakathāyaṃ vuttabhāvaṃ dassento “**yattakena...pe... ādikenā**”ti āha. **Tatthāti** tasmim̐ vissajjanassa atthavacane, tasmim̐ vā vissajjanapāṭhe tadatthavacane ca. **Pabhedanidassanamattanti** pabhedassa udāharaṇamattaṃ. **Avuttopi sabbo** bhūtipādiko, sukhādiko ca pabhedo. Taṃ pana bhūmimukhena dassetuṃ “**rūpakkhandho kāmāvacaro**”tiādi vuttanti daṭṭhabbaṃ.

Evaṃ aṭṭhakathāyaṃ āgatanayena pāliyā atthayojanaṃ dassetvā idāni taṃ pakārantarena dassetuṃ “**ayaṃ vā**”tiādi vuttaṃ. Tattha **ayaṃ vā**ti vuccamānaṃ sandhāyāha. **Etthāti** etasmim̐ khandhapaññattivissajjane. **Idanti** idaṃ padaṃ. **Yattako...pe... khandhapaññattiyā pabhedoti** iminā saṅkhepato vitthārato ca khandhānaṃ pabhedam̐ pati paññattivibhāgoti dassitaṃ hoti. Tenāha “**vatthubhedena...pe... dasseti**”ti. **Pakaraṇantare**ti vibhaṅgapakaraṇe. Tattha hi sātisaṃyāṃ khandhānaṃ vibhāgapaññattī vuttā. Tenāha aṭṭhakathāyaṃ “**sammāsambuddhena hi...pe... kathitā**”ti. Ettha ca paṭhamanaye samukhena, dutiye vatthumukhena paññattiyā vibhāgā dassitāti ayametesam̐ viseso.

Esa nayoti iminā khandhapaññattiyā vuttamatthaṃ āyatanapaññattiyādīsu atidisati. Tattha “**yāvatā pañcakkhandhā**”ti, “**khandhānaṃ khandhapaññattī**”ti idaṃ paññattiniddesapāliyā ādipariyosānaggahaṇamukhena dassanaṃ. “**Yāvatā dvādasāyatanānī**”ti, “**āyatanānaṃ āyatanapaññattī**”ti imassa attho “**yattakena paññāpanena saṅkhepato dvādasāyatanānī**”ti etena dassito, “**yāvatā cakkhāyatana**”ntiādikassa pana “**pabhedato cakkhāyatana**”ntiādikenāti. Tattha “**cakkhāyatanaṃ...pe... dhammāyatana**”nti pabhedanidassanamattametam̐. Etena avuttopi sabbo saṅgahito hotīti “**tatrāpi dasāyatanā kāmāvacarā**”tiādi vuttaṃ. Ayaṃ vā ettha pāliyā atthayojanā – “yāvatā”ti idaṃ sabbehi padehi yojetvā “yattakāni dvādasāyatanānī...pe... yattako dvādasannaṃ āyatanānaṃ, tappabhedānañca cakkhāyatanaḍḍinaṃ pabhedo, tattako āyatanānaṃ āyatanapaññattiyā pabhedo”ti pakaraṇantare vuttana vatthupabhedena āyatanapaññattiyā pabhedam̐ dassetiādinā itarapaññattīsūpi nayo yojetabbo.

7. “Cha paññattiyō...pe... puggalapaññattī”ti imaṃ apekkhitvā “kittāvatā...pe... ettāvatā indriyānaṃ indriyapaññattī”ti ayaṃ pālipadeso niddesopi samāno pakaraṇantare vatthubhedena vuttaṃ khandhādipaññattippabhedam̐ upādāya uddesoyeva hotīti āha “**uddesamattenevāti attho**”ti.

Mātikāvaṇṇanā niṭṭhitā.

2. Niddesavaṇṇanā

1. Ekakaniddesavaṇṇanā

1. Paccanīkadhammānaṃ jhāpanaṭṭhena jhānaṃ, tato suṭṭhu vimuccanaṭṭhena vimokkhoti nippariyāyena jhānaṅgāneva vimokkhoti aṭṭhakathāadhippāyo. Ṭṭhākārena pana “abhibhāyatanaṃ viya sasampayuttaṃ jhānaṃ vimokkho”ti maññaṃānena “**adhippāyenāhā**”ti vuttaṃ. Jhānadhammā hi sampayuttadhammehi saddhim̐yeva paṭipakkhato vimuccanti, na vinā, tathā abhirativasena ārammaṇe nirāsāṅkappavattipīti adhippāyo. Yathā vā jhānaṅgānaṃ jhānapaccayena paccayabhāvato saviseso jhānapariyāyo, evaṃ vimokkhakiccayogato tesam̐ saviseso vimokkhapariyāyo, tadupacārena

sampayuttānaṃ veditabbo. **Paṭhamam samaṅgibhāvatthanti** paṭilābham sandhāyāha. “Phusitvā viharatīti paṭilābhivā iriyatī”ti hi vuttaṃ. Aṭṭhakathāyaṃ “yena hi saddhiṃ...pe... paṭilāddhā nāma hontī”ti tehi sādhetabbasahajātādipaccayalābhoyevettha paṭilābho daṭṭhabbo. Yathā phasso yattha uppanno, taṃ ārammaṇaṃ phusatīti vuccati, evaṃ sampayuttadhammepi taṃsabhāvattāti āha “**samphassena phusanattha**”nti. Tassa “vivaratī”ti iminā sambandho. **Itarehīti** upacārapītiādīnā upacārapurimappanāparappanānaṃ paṭilābhakāraṇanti vacanehi. **Itare kāraṇattheti** “upacārena...pe... phusatiyevā”ti vutte kāraṇatthadīpake atthe. Phusati phalaṃ adhigacchati etāyāti kāraṇabhāvassa phusanāpariyāyo veditabbo.

Paṭhamatthamevāti samaṅgibhāvatthameva. **Tāni aṅgānīti** iminā jhānakoṭṭhāsabhāvena vuttadhammāyeva gahitā, na phassapañcamakaindriyaṭṭhakādibhāvenāti vuttaṃ “**sesā...pe... saṅgahitānī**”ti. **Evaṃ satīti** sukhasaṅkhātājhānaṅgato vedanāsomanassindriyānaṃ sesitabbabhāve sati. Evañhi nesaṃ phassakatā itarassa phassitabbatāva siyā. Tenāha “**sukhassa phusitabbattā**”ti. **Vedayitādhipateyyaṭṭhehīti** ārammaṇānubhavanasaṅkhātena vedayitasabhāvena, tasseva sātavisesasaṅkhātena sampayuttehi anuvattanīyabhāvena ca. **Upanijjhāyanabhāvopi** yathāvuttavedayitādhipateyyaṭṭhavisitṭho oḷārikassa ārammaṇassa nijjhāyanabhāvo. Abhinnaśabhāvopi hi dhammo purimavisitṭhapaccayavisesasambhavana visesena bhinnākāro hutvā visitṭhaphalabhāvaṃ āpajjati. Yathekaṃyeva kammaṃ cakkhādīnibbattihetubhūtaṃ kammaṃ. Tena vuttaṃ “**vedayitā...pe... vuttattā**”ti. **Aṅgānīti** nāyaṃ tapparabhāvena bahuvacananiddeso anantabhāvato, kevalaṅca aṅgānaṃ bahuttā bahuvacanaṃ, tena kiṃ siddhaṃ? Paccekampi yojanā siddhā hoti. Tena vuttaṃ “**paccekampi yojanā kātabbā**”ti. Yadi “sukhaṃ ṭhapetvā”ti yojanāyaṃ sesā tayo khandhā honti, sesā tayo, cattāro ca khandhā hontīti vattabbaṃ siyāti? Na, catūsu tiṇṇaṃ antogadhattā. Tenāha “**sabbayojanā...pe... vutta**”nti.

2. Asamayavimokkhenāti heṭṭhāmaggavimokkheṇa. So hi lokiyavimokkho viya adhigamavaḷañjanatthaṃ pakappetabbasamayavisesābhāvato evaṃ vutto. Aggammagavimokkho pana ekaccāsavavimuttivacanaṭo idha nādhīpeto. Tenāha “**ekacce āsavā parikkhīṇā hontī**”ti. **Ekaccehi āsavehi vimuttoti** diṭṭhāsavadīhi samucchavedavimuttiyā vimutto. **Asamaya...pe... lābhenāti** yathāvuttaasamayavimokkhassa upanissayabhūtaṃ adhigamena. Tato eva **sātisayena**, ekaccehi kāmāsavehi vimutto vikkhambhanavaseṇāti attho. **So eva** ekaccasamayavimokkhalābhī yathāvutto **samayavimutto** asamayavimokkhavisesassa vasena samayavimokkhapaññattiyā adhippetattā. **Soti** asamayavimokkhūpanissayasamayavimokkhalābhī. **Tena** sātisayena samayavimokkheṇa. **Tathāvimuttova hotīti** ettha **iti**-saddo hetuattho. Yasmā tathāvimutto hoti, tasmā samayavimuttapaññattiṃ laddhuṃ arahatīti pariññātatthaṃ hetunā patiṭṭhāpeti. Byatirekamukhenapi tamatthaṃ pākaṭataraṃ kātum “**puthujjano panā**”tiādi vuttaṃ. Tattha **samudācārabhāvatoti** samudācārassa sambhavato. **Soti** jhānalābhī puthujjano.

Yadi punarāvattakadhammatāya puthujjano samayavimuttoti na vutto, tadabhāvato kasmā arahā tathā na vuttoti āha “**arahato panā**”tiādi. **Tadakāraṇabhāvanti** tesam vimokkhānaṃ, tassa vā samayavimuttibhāvassa akāraṇabhāvaṃ. **Sabboti** sukkhavipassakopi samathayānikopi aṭṭhavimokkhalābhīpi. Bahiabbhantarabhāvā apekkhāsiddhā, vattu adhippāyavasena gahetabbarūpā cāti āha “**bāhirānanti lokuttarato bahibhūtāna**”nti.

3. Rūpato aññaṃ na rūpanti tattha rūpapaṭibhāgaṃ kaṣiṇarūpādi rūpa-saddena gahitanti tadaññaṃ paṭhamatatiyāruppavisayamattaṃ arūpakkhandhaniḥḥānavimuttaṃ arūpa-saddena gahitaṃ daṭṭhabbaṃ. Paṭipakkhabhūtehi kilesacorehi amūsitabbaṃ jhānameva **cittamañjusaṃ**. **Samādhinti** vā samādhisīseṇa jhānameva vuttanti veditabbaṃ.

4. Attano anurūpena pamādenāti ettha anāgāmino adhikusalesu dhammesu asakkaccaasātaccakiriyādīnā. Khīṇāsavassa pana tādisena pamādatirūpakena, tādisāya vā asakkaccakiriyāya. Sā cassa ussukkābhāvato veditabbā. Paṭippassaddhasabbussukkā hi te uttamapurisā.

Samayena samayanti samaye samaye. Bhummatthe hi etaṃ karaṇavacanaṃ upayogavacanañca. **Anipphattitoti** samāpajjituṃ asakkuṇeyyato. **Assāti** “tesañhi”tiādinā vuttassa imassa aṭṭhakathāvacanassa. **Tenāti** yathābhatena suttena.

5. Yenādhippāyena “**dhammehī**”ti **vattabbanti** vuttaṃ, taṃ vivaranto “**idhā**”tiādimāha. Tattha **idhāti** “parihānadhammo aparihānadhammo”ti etasmiṃ padadvaye. **Tatthāti** “kuppadhammo akuppadhammo”ti padadvaye. Sati vacananānatte attheva vacanatthanānattanti āha “**vacanatthanānattamattena vā**”ti. Vacanatthaggaṇamukhena gahetabbassa pana vibhāvanatthassa natthettha nānattaṃ, yato tesam pariyañtaratāsiddhi.

7-8. **Samāpatticetanāti** yāya cetanāya samāpattiṃ nibbatteti samāpajjati ca. Tenāha “**tadāyūhanā**”ti. Ārakkhapaccupaṭṭhānā satīti katvā āha “**anurakkhaṇā...pe... satī**”ti. Tenāha “ekārakkho satārakkhena cetasā viharatī”ti. Tathā hi sā “kusalākusalānaṃ dhammānaṃ gatiyo samannesatī”ti vuttā.

11. Aggamaggaṭṭhopi itaramaggaṭṭhā viya anupacchinnabhayattā bhayūparatavohāraṃ labhatīti āha “**arahattamaggaṭṭho ca...pe... bhayūparato**”ti.

12. **Kecīti** tihetukapaṭṭisandhike mandabuddhike sandhāyāha. Tena vuttaṃ “**duppaññāti iminā gayhantī**”ti. Dubbalā paññā yesam te duppaññāti.

14. Aniyatadhammasamannāgatasseva paccayavisesena niyatadhammapaṭilābhoti āha “**yattha... pe... hontī**”ti. **Tadabhāvāti** niyatāniyatavomissāya pavattiyā abhāvā.

16. **Pariyādiyitabbānāti** pariyaḍakena maggena khepetabbāni. Taṇhādīnaṃ palibudhanādikiriyaṃ matthakappattiyā sīsabhāvo veditabbo, nibbānassa pana visaṅkhārabhāvato saṅkhārasīsātā. Tenāha “**saṅkhāravivekabhūto nirodho**”ti. Keci pana “saṅkhārasīsamaṃ nirodhasamāpattī”ti vadanti, taṃ tesam matimattaṃ paññattimattassa sīsabhāvānupapattito taduddhañca saṅkhārappavattisabbhāvato. **Saha viyāti** ekajjhaṃ viya. Etena sama-saddassa atthamāha. Sahattho hesa sama-saddo. **Samsiddhidassanenāti** samsiddhiyā niṭṭhānassa uparamassa dassanena.

Idhāti imissā puggalapaññattipāliya, imissā vā tadaṭṭhakathāya. **Kilesapavattasīsānanti** kilesasīsapavattasīsānaṃ. Tesu hi gahitesu itarampi pariyaḍiyitabbaṃ kilesabhāvena pariyaḍiyitabbatāsamaññena ca gahitameva hotīti kilesavaṭṭapariyaḍānena maggassa itaravaṭṭānampi pariyaḍiyanaṃ. Vaṭṭupacchedakena maggeneva hi jīvitindriyampi anavasesato nirujjhatīti. Kasmā panettha pavattasīsamaṃ visuṃ gahitanti codanaṃ sandhāyāha “**pavattasīsampi**”tiādi. Odhiso ca anodhiso ca kilesapariyaḍāne sati sijjhamānā paccavekkhaṇavārā tena nipphādetabbāti vuttā. Tenevāha “**kilesapariyaḍānasseva vārā**”ti. Idāni tamatthaṃ āgamaena sādiento “**vimuttasmi**”ntiādimāha. **Cuticcitena hotīti** idamaṃ yathāvuttassa kilesapariyaḍānasamāpanabhūtassa paccavekkhaṇavārassa cuticcitena paricchinnattā vuttaṃ, tasmā cuticcitena paricchedenakena paricchinnaṃ hotīti attho.

17. **Tiṭṭheyyāti** na upagaccheyya. Ṭhānañhi gatinivatti. Tena vuttaṃ “**nappavatteyyā**”ti.

18. Payirupāsānāya bahūpakārattā **payirupāsitabbattā**.

20. Aggavijjā yassa anadhigatavijjādvayassa hoti, so ce pacchā vijjādvayaṃ adhigacchati, tassa paṭhamamaṃ adhigatavijjādvayassa viya atevijjatābhāvā yadipi nippariyāyatā tevijjatā, paṭhamamaṃ adhigatavijjādvayassa pana sā savisesāti dassento “**yāya katakiccatā**”tiādimāha. Tattha **aggavijjāti** āsavakkhayaññaṃ, aggamaggaññaṃeva vā veditabbaṃ. Sā ca tevijjatāti yojanā.

22. **Tatthevāti** saccābhisambodhe eva.

24. **Tanti** nirodhasamāpattilābhino ubhatobhāgavimuttatāvacaṇaṃ. **Vuttalakkaṇūpapattikoti** dvīhi bhāgehi dve vāre vimuttoti evaṃ vuttalakkaṇena upapattito yuttito samannāgato. **Eseva nayoti** yathā catunnaṃ arūpasamāpattīnaṃ ekekato nirodhato ca vuṭṭhāya arahattaṃ pattānaṃ vasena pañca ubhatobhāgavimuttā vuttā, tathā sekkhabhāvaṃ pattānaṃ vasena pañca kāyasakkhino hotīti katvā vuttaṃ.

Dassanakāraṇāti iminā “disvā”ti ettha tvā-saddo hetuatthoti dasseti yathā “sīhaṃ disvā bhayaṃ hotī”tiādīsu. Dassane sati parikkhayaṃ, nāsati āha “**dassanāyattaparikkhayattā**”ti. **Purimakiriyāti** āsavānaṃ khayakiriyāya purimakiriyā. Samānakālattepi hi kāraṇakiriyā phalakiriyāya purimasiddhā viya voharīyati. **Tato** nāmakāyato mucanato. Yato hi yena mucitabbaṃ, taṃ nissito hotīti vuttaṃ “**nāmanissitako**”ti. **Tassāti** kāyadvayavimuttiyā ubhatobhāgavimuttabhāvassa. Arūpaloke hi ṭhitārahantavasenāyattho vutto. Tenāha “**sutte hī**”tiādi.

Dvīhi bhāgehīti vikkhambhanasamucchedabhāgehi. **Dve vāreti** kilesānaṃ vikkhambhanasamucchināvasena dvikkhattuṃ. **Kilesehi vimuttoti** idaṃ paṭhamatatiyavādānaṃ vasena vuttaṃ, itaraṃ dutiyavādassa. Arūpajjhānaṃ yadipi rūpasāññādīhi vimuttaṃ taṃsamattikkamādinā pattabbattā, pavattinivārahehi pana kāmacchandādīhiyevassa vimutti sātisayāti dassento “**nīvaraṇasañkhātanāmakāyato vimutta**”nti āha. Yañcāpi arūpajjhānaṃ rūpaloke vivekaṭṭhatāvasenāpi rūpakāyato vimuttaṃ, taṃ pana rūpapaṭibandhachandarāgavikkhambhaneneva hotīti vikkhambhanameva padhānanti vuttaṃ “**rūpapaṭibandhachandarāgavikkhambhanena rūpakāyato ca vimuttattā**”ti. **Ekadesena ubhatobhāgavimuttaṃ nāma hoti** samucchedavimuttiyā abhāvā.

25. “Sattisayo”ti viya samudāye pavatto vohāro avayavepi dissati dassento āha “**aṭṭhavimokkhekadesena...pe... vuccati**”ti.

26. **Phuṭṭhānanti** phassitānaṃ, adhigatānanti attho. **Antoti** antasādiso phassaṇāya parakālo. Tadanantaro hi tappariyosāno viya hotīti. Kālavisaṃyo cāyaṃ anta-saddo, na pana kālattho. Tenāha “**adhippāyo**”ti. **Nāmakāyekadesatoti** nīvaraṇasañkhātanāmakāyekadesato. **Ālocito pakāsito viya hoti** vibandhavikkhambhanena ālocane pakāsane samatthassa ṇāṇacakkhuno adhiṭṭhānasamuppādanato. **Na tu vimuttoti** vimuttoti na vuccateva.

28. **Imaṃ pana nayanti** “apica tesa”ntiādinā āgatavidhiṃ. **Yena visesenāti** yena kāraṇavisesena. **Soti** diṭṭhippattasaddhāvimuttānaṃ yathāvutto paññāya viseso. **Paṭikkhepo kato** kāraṇassa avibhāvitattā. Ubhatobhāgavimutto viya, paññāvimutto viya vā sabbathā avimuttassa sāvasesavimuttiyampi diṭṭhippattassa viya paññāya sātisayāya abhāvato **saddhāmattena vimuttabhāvo** daṭṭhabbo. **Saddhāya adhimuttoti** idaṃ āgamanavasena saddhāya adhiṭṭhānaṃ sandhāya vuttaṃ, maggādhigamato panassa paccakkhameva ṇāṇadassanaṃ.

31. “Sototi ariyamaggassa nāma”nti nippiyāyena taṃsamaṅgī sotāpannoti adhippāyena codako “apī-saddo kasmā vutto”ti codanaṃ uṭṭhāpetvā “**nanū**”tiādinā attano adhippāyaṃ vivarati. Itaro “**nāpanna**”ntiādinā pariharati. **Samannāgato eva nāma** lokuttaradhammaṃ akuppasabhāvattā. **Itarehīti** dutiyamaggaṭṭhādīhi. **So evāti** paṭhamaphalaṭṭho eva. **Idhāti** imasmiṃ sattakkhattuparamaniddese. Sotaṃ vā ariyamaggaṃ ādito panno adhigatoti sotāpannoti vuccamāne dutiyamaggaṭṭhādīnaṃ nattheva sotāpannabhāvāpatti. Sutte pana **sotaṃ** ariyamaggaṃ **ādito** mariyādaṃ amuñcitvāya **panno** paṭipajjati katvā maggasamaṅgī “sotāpanno”ti vutto. Pariyāyena itaropi tassa aparihānadhammattā sotāpannoti veditabbaṃ. Pahīnāvasiṭṭhakilesapaccavekkhaṇāya samudayasaccaṃ viya dukkhasaccampi paccavekkhitāṃ hoti saccadvayapariyāpannattā kilesānanti āha “**catusaccapaccavekkhaṇādīna**”nti. **Ādi-saddena** phalapaccavekkhaṇauparimaggaphaladhamme ca saṅgaṇhāti.

32. **Mahākulamevā**ti ulārakulameva vuccati “kulīno kulaputto”tiādīsu viya.

33. Sajjhānako aparihīnājjhāno kālakato brahmalokūpago hutvā vaṭṭajjhāsayo ce, uparūpari nibbattitvā nibbāyatīti āha “**anāgāmisabhāgo**”ti. Yato so jhānānāgāmīti vuccati. Tenāha “**anāvattidhammo**”ti.

36. Parayoge tvā-saddo tadanto hutvā “**parasaddayoge**”ti vutto, appatvāti vuttaṃ hotīti “**appattaṃ hutvā**”ti iminā vuccati.

37. **Tenā**ti “upahaccā”ti padena. Nanu ca vemajjhātikamo “**atikkamitvā vemajjha**”nti iminā pakāsito hotīti adhippāyo.

40. **Tañhāvattasotā** tañhāvattabandhā. **Tassā**ti sotassa. Sambandhe cetam sāmivacanam. Uddhamṣotassa uparibhavūpagatā ekaṃsikāti āha “**yattha vā tattha vā gantvā**”ti. **Tassā**ti uddhamṣotassa. **Tatthā**ti avihesu. **Lahusālahusagatikā**ti lahuḷālahukāyugatikā, lahuḷālahukañānāgatikā vā. **Uppajjitvāva nibbāyanakādīhīti ādi**-saddena “ākāsaṃ laṅghitvā nibbāyati”tiādīnā vuttā tisso upamā saṅgaṇhāti. Antarāupahaccaparīnibbāyīhi adhimattatā, uddhamṣotato anadhimattatā ca asaṅkhārasasaṅkhāraparīnibbāyīnaṃ na veditabbāti yojanā. **Te evā**ti antarāupahaccaparīnibbāyīuddhamṣotā eva. Yadi evaṃ asaṅkhārasasaṅkhāraparīnibbāyīnaṃ upamāvacanena tato mahantatarehi kasmā vuttanti codanaṃ sandhāyāha “**tato mahanta...pe... dassanattha**”nti.

Tenāti “no cassa, no ca me siyā”ti vacanena. **Tenā**ti vā yathāvuttena tassa atthavacanena. **Imassa dukkhassā**ti imassa sampati vattamānassa viññānādidukkhassa. **Udayadassanaṃ** ñāṇaṃ. **Catūhipī**ti “no cassā”ti catūhi padehi. **Yaṃ atthī**ti yaṃ paramatthato vijjati. Tenāha “**bhūtanti sasabhāva**”nti, bhūtanti khandhapañcakanti attho. Yathāha “bhūtamidanti, bhikkhave, samanupassathā”ti. **Vivaṭṭamānaso** viviccamānahadayo tañhādisotato nivattajjhāsayo. **Upekkhako hotī**ti cattabhariyo viya puriso bhayaṃ nandiṇca pahāya udāsino hoti.

Avisiṭṭheti hīne. **Visiṭṭheti** uttame. “Bhave”ti vatvā “sambhave”ti vuccamānaṃ avuttavācakaṃ hotīti dassento “**paccuppanno**”tiādīmāha. **Bhūtameva vuccatī**ti yaṃ bhūtanti vuccati, tadeva bhavoti ca vuccati, bhavati ahoṣīti vā. Sambhavati etasmāti **sambhavo**. **Tadāhāro** tassa bhavassa paccayo. **Anukkamena maggapaññāyā**ti vipassanānukkamena laddhāya ariyamaggapaññāya. **Tenā**ti sekkhena.

Ekakaniddesavaṇṇanā niṭṭhitā.

2. Dukaniddesavaṇṇanā

63. **Kassacī**ti kassacipi. **Kathañcī**ti kenaci pakārena, vikkhambhanamattenāpīti vuttaṃ hoti. **Ajjhattaggahaṇassā**ti attānaṃ adhikicca uddissa pavattaggāhassa.

83. **Purimagga**hitanti “karissati me”tiādīnā cittena paṭhamam gahitaṃ. **Taṃ katanti** taṃ tādisaṃ upakāraṃ. Puññaphalaṃ upajīvanto kataññupakkhe tiṭṭhatīti vuttaṃ “**puññaphalaṃ anupajīvanto**”ti.

90. Guṇapāripūriyā paripuṇṇo yāvadattho idha tittoti āha “**niṭṭhitakiccatāya nirussukko**”ti.

Dukaniddesavaṇṇanā niṭṭhitā.

3. Tikaniddesavaṇṇanā

91. Sesasaṃvarabhedanāti kāyikavācasikavīttikkamato sesena saṃvaravināsenā. So pana dvāravasena vuccamāno manodvāriko hotīti āha “**manosāṃvarabhedanā**”ti. Idāni taṃ pakārabhedena dassento “**satisāṃvarādibhedena vā**”ti āha, muṭṭhasaccādippavattiyāti attho. Yaṃ kiñci sabhāvabhūtaṃ caritampi “**sīla**”nti vuccatīti akusalassapi sīlapariyāyo vutto.

94. Samānavisayānanti paṭhamaphalādiko samāno evarūpo visayo etesanti samānavisayā, tesam.

107. Tadattho tappayojano lokuttarasādhakoti attho. **Tassa** paramatthasāsanassa. **Mūlekadesattāti** mūlabhāvena ekadesattā.

118. Unnaḷo uggatatuṅghamāno.

123. Sīlassa anuggaṇṇanaṃ aparisuddhiyaṃ sodhanaṃ apāripūriyaṃ pūraṇaṇcāti āha “**sodhetabbe ca vaḍḍhetabbe cā**”ti. **Adhisīlaṃ nissāyāti** adhisīlaṃ nissayaṃ katvā uppannapaññāya.

124. Gūthasadisattameva dasseti, na gūthakūpasadisattanti adhippāyo. Gūthavaseneva hi kūpassapi jigucchānīyatāti. Ayañca attho gūtharāsīyeva gūthakūpoti imasmiṃ pakkhe navattabbo siyā.

130. Sarabhaṅgasatthārādayo rūpabhavādikāmādipariññaṃ katvā paññapento lokiyaṃ pariññaṃ sammadeva paññapentīti āha “**yebhuyyena na sakkontī**”ti. Asamatthabhāvaṃ vā sandhāya no ca paññāpetuṃ sakkontīti vuttanti yojanā.

Tikaniddesavaṇṇanā niṭṭhitā.

4. Catukkaniddesavaṇṇanā

133. Parenāti aññena, āṇattenāti attho. **Āṇattiyā attanā cāti** āṇāpakassa āṇattiyā, attanā ca āṇattena kataṃ tañca tassa āṇāpakassa yaṃ vacīpayogena katanti yojanā. **Āṇattiyā pāpassāti** āṇāpanavasena pasutapāpassa.

148. Desanāya karaṇabhūtāya. **Dhammānanti** desanāya yathābodhetabbānaṃ sīlādiddhammānaṃ.

152. Anantaranti ñāṇassa upaṭṭhitanti anantaraṃ vuttaṃ. Kiṃ pana tanti āha “**vacana**”nti. **Lujjatīti** idaṃ yena kāraṇena loka-saddo tadatthe pavatto, taṃ dassētīti āha “**kāraṇayutta**”nti.

156. Sahitāsahitassāti kusalasaddayogena sāmivacanaṃ bhummatttheti dassento āha “**sahitāsahiteti attho**”ti. Sahitabhāsanena desakasampatti, sahitāsahitakosallena sāvakasampatti veditabbā. Parisasampattipi ñāṇasampannassa dhammakathikassa paṭibhānasampadāya kāraṇaṃ hotīti āha “**sāvakasampattiyā bodhetuṃ samatthatāyā**”ti.

157. Kusaladhammehīti samathavipassanādhammehi. **Catuttho vutto**, yo neva saṅghaṃ nimanteti, na dānaṃ deti.

166. Yamidaṃ “kālenā”ti vuttanti “yo tattha avaṇṇo, tampi bhaṇati kālena. Yopi tattha vaṇṇo, tampi bhaṇati kālenā”ti yaṃ idaṃ pāḷiyaṃ vuttaṃ, **tatra tasmim vacane** vākye **yo** puggalo “kālena bhaṇatī”ti vutto, **so kīdisoti** vicāraṇāya tassa dassanatthaṃ “kālaññū hotī”tiādī pāḷiyaṃ vuttanti dassento saṅgahe āhāti yojanā.

168. Pubbuppannapaccayavipattīti tasmim attabhāve paṭhamuppannapaccayavipatti. Tesam vipatti pavattappaccayavipattīti yojanā.

173. **Tesanti** pahīnāvasiṭṭhakilesānaṃ. **Vimuttidassanameva hoti** vimuttiatthattā taṃdassanassa.

174. **Tantāvutānaṃ vatthānanti** niddhāraṇe sāmivacanaṃ.

178. **Nāmakāyoti** nāmasamūho. **Idameva ca dvayanti** sīlasaṃvarapūraṇaṃ, sājīvāvītikkamanañcāti idameva dvayaṃ. **Tatoti** sājīvāvītikkamanato. Kathāya haliddarāgādisadisatāti yojanā. Tenāha “**na puggalassā**”ti.

179. **Iti-saddenāti** “dārumāsako”ti ettha vuttaiti-saddena. **Evampakāreti** imināpi salākādike saṅgaṇhāti.

181. **Avisaṭasukhanti** avikkhepasukhaṃ.

187. **Khandhadhammesūti** saṅkhatadhammesu. **Tadalābhenāti** maggaphalālābhena. **Atthenāti** sīlādiatthena.

Catukkaniddesavaṇṇanā niṭṭhitā.

5. Pañcakaniddesavaṇṇanā

191. **Yathā tesu paṭipajjitabbanti** tesu pañcasu puggalesu yathārahaṃ upameyyopamādassanamukhena hitūpadesapaṭipattiyā yathā aññehi paṭipajjitabbanti attho. Kiriyaṃvācī ārambha-saddo adhippeto, na “ārambhakattussa kasāvapucchā”tiādīsu viya dhammavācīti āha “ārambhakiriyaṃvācako saddo”ti. “Nirujjhantī”ti vuttattā “**maggakiccavasena**”ti vuttaṃ.

192. **Gahaṇaṃ** “evameta”nti sampaṭicchanaṃ.

199. **Na evaṃ sambandho** asamānajātikattā.

Pañcakaniddesavaṇṇanā niṭṭhitā.

6. Chakkaniddesavaṇṇanā

202. **Idaṃ** saccābhisambodhādikaṃ **saṅgahitaṃ hoti** phalassa hetunā avinābhāvato. Tenāha “**sāma**”ntiādi. **Anācariyakena attanā uppādītenāti** idaṃ sabbaññūtaññāṇe vijjamānaguṇakathanāṃ, na tabbidhuradhammantaranivattanaṃ tathārūpassa aññassa abhāvato. Tenassa sācariyakatā, parato ca uppatti paṭikkhittāti imamatthamāha “**tatthā**”tiādīnā. Tattha **sācariyakattaṃ** parūpadesahetukatā, **parato uppatti** upadesena vināpi sannissāya nibbattīti ayametesāṃ viseso.

Chakkaniddesavaṇṇanā niṭṭhitā.

7. Sattakaniddesavaṇṇanā

203. **Kusalesu dhammesūti** ādhāre bhummaṃ, na visayeti dassento “**kusalesu dhammesu antogadhā**”ti āha. Idāni visayalakkhaṇaṃ etaṃ bhummaṃti dassento “**bodhipakkhiyadhammesu vā**”tiādīmāha. “**Tadupakāratāyā**”ti idaṃ kusalesu dhammesu sādhetabbesūti imamatthaṃ sandhāya vuttaṃ. **Ummujjanapaññāyāti** ummujjāpanapaññāya, ummujjanākārena vā pavattapaññāya. **Tenevāti** ummujjanamattattā eva. Yathā hi ñāṇuppādo saṅkilesapakkhato ummujjanaṃ, evaṃ saddhuppādupīti āha “**saddhāsaṅkhātameva ummujjana**”nti. **Cittavāro**ti cittappabandhavāro. Paccakaṃ ṭhānavipassanāpataraṇapatigādhappattiniṭṭhattā tesāṃ puggalānaṃ “**aneke puggalā**”ti vuttaṃ. Kasmā?

Tenattabhāvena arahattassa aggahaṇato. **Tatiyapuggalādibhāvanti** ummujiṭvā
ṭhitapuggalādibhāvaṃ.

Sattakaniddesavaṇṇanā niṭṭhitā.

10. Dasakaniddesavaṇṇanā

209. Sotāpannādayoti vuttavisesayuttā sotāpannasakadāgāmijhānānāgāmino. **Asā...pe... panāti**
ettha **pana**-saddo visesatthadīpano. Tena “ajjhattasamyojanānaṃ samucchinnatā”ti idaṃ visesaṃ
dīpetīti veditabbaṃ.

Dasakaniddesavaṇṇanā niṭṭhitā.

Puggalapaññattipakaraṇa-anuṭṭikā samattā.

Kathāvatthupakaraṇa-anuṭṭikā

Ganthārambhavaṇṇanā

Samudāye ekadesā antogadhāti samudāyo tesam adhiṭṭhānabhāvena vutto yathā “rukkhe sākhā”ti
dasseti “**kathāsamudāyassā**”tiādinā. Tattha **kathānanti** tisso kathā vādo jappo vitaṇḍāti. Tesu yena
pamaṇatakkehi pakkhapaṭipakkhānaṃ patiṭṭhāpanapaṭikkhepā honti, so **vādo**. Ekādhikaraṇā hi
aññamaññaviruddhā dhammā pakkhapaṭipakkhā yathā “hoti tathāgato paraṃ maraṇā, na hoti tathāgato
paraṃ maraṇā”ti (dī. ni. 1.65). Nānādhikaraṇā pana aññamaññaviruddhāpi pakkhapaṭipakkhā nāma na
honti yathā “aniccaṃ rūpaṃ, niccaṃ nibbāna”nti. Yena chalajātiniggahaṭṭhānehi pakkhapaṭipakkhānaṃ
patiṭṭhāpanaṃ paṭikkhepārambho, so **jappo**. Ārambhamaṭṭamevettha, na atthasiddhīti dassanatthaṃ
ārambhaggahaṇaṃ. Yāya pana chalajātiniggahaṭṭhānehi paṭipakkhapaṭikkhepāya vāyamanti, sā **vitaṇḍā**.
Tattha atthavikappupapattiyā vacanavighāto **chalaṃ** yathā “navakambaloyaṃ puriso, rājā no sakkhī”ti
evamādi. Dūsanabhāsā **jātayo**, uttarapatirūpakāti attho. **Niggahaṭṭhānāni** parato āvi bhavissanti. Evaṃ
vādajappavitaṇḍappabhedāsu tīsu kathāsu idha vādakathā “kathā”ti adhippetā. Sā ca kho
aviparītadhammatāya patiṭṭhāpanavasena, na viggāhikakathābhāvenāti veditabbaṃ.
Mātikāṭhapanenevāti uddesadesanāya eva. **Ṭhapitassāti** desitassa. Desanā hi desetabbamatthaṃ
vineyyasantānesu ṭhapanato nikkhipanato ṭhapanam, nikkhepoti ca vuccati.

Ganthārambhavaṇṇanā niṭṭhitā.

Nidānakathāvaṇṇanā

Parinibbānameva ...pe... vuttaṃ. Abhinnaśabhāvampi hi atthaṃ tadaññadhammato
viseśāvabodhanatthaṃ aññaṃ viya katvā voharanti yathā “attano śabhāvaṃ dhārentīti dhammā”ti (dha.
sa. aṭṭha. 1). **Sāti** asaṅkhatā dhātu. **Karaṇabhāvena vuttā** yathāvuttassa upasamassa
sādhakatamabhāvaṃ sandhāya. **Dhammavādī...pe... dubbalatā vuttā** tathārūpāya paññāya bhāve
tādisānaṃ pakkhabhāvābhāvato. **Laddhiyāti** “atthi puggalo saccikaṭṭhaparamatthena, parihāyati arahā
arahattā”tiādiladdhiyā. **Suttantehīti** devatāsamyuttādīhi. **Liṅgākappabhedam** parato sayameva
vakkhati.

Bhindivā mūlasaṅgahanti mūlasaṅgītiṃ vināsetvā, bhedaṃ vā katvā yathā sā ṭhitā, tato aññathā
katvā. **Saṅgahitato vā aññatrāti** mūlasaṅgītiyā saṅgahitato aññatra. Tenāha “**asaṅgahitaṃ sutta**”nti.
Nītatthaṃ yathārutavasena viññeyyatthattā. **Neyyatthaṃ** vipariṇāmadukkhatādivasena
niddhāretabbatthattā. **Tihi ṭhānehīti** “sūrā satimanto idha brahmacariyavāso”ti (a. ni. 9.21) evaṃ

vuttehi tīhi kāraṇehi. **Aññaṃ sandhāya bhaṇitanti** ekaṃ pabbajjāsāṅkhātaṃ brahmacariyavāsaṃ sandhāya bhaṇitaṃ. **Aññaṃ atthaṃ ṭhapayimsūti** sabbassapi brahmacariyavāsassa vasena “natthi devesu brahmacariyavāso” tiādikaṃ (kathā. 269) aññaṃ atthaṃ ṭhapayimsu. Suttañca aññaṃ sandhāya bhaṇitaṃ tato aññaṃ sandhāya bhaṇitaṃ katvā ṭhapayimsu, tassa atthañca aññaṃ ṭhapayimsūti evamettha yojanā veditabbā. **Suññatādīti ādi**-saddena aniccatādiṃ saṅgaṇhāti.

Gambhīraṃ ekadesaṃ mahāpadesaparivārādiṃ. **Ekacce sakalaṃ abhidhammaṃ vissajjimsu** chaḍḍayimsu seyyathāpi suttantikā. Te hi taṃ na jinavacananti vadanti. **Kathāvattussa savivādatteti**ādi heṭṭhā nidānaṭṭhakathāya āgatanayaṃ sandhāya vuttaṃ. Keci pana puggalapaññattiyāpi savivādattaṃ maññanti. “**Tatīyasāṅgītito pubbe pavattamānānaṃ vasaṇā**” ti idaṃ kasmā vuttaṃ, nanu tatīyasāṅgītito pubbepi taṃ mātīkārūpena pavattateva? Niddesaṃ vā sandhāya tathā vuttanti veditabbā. **Aññānīti** aññākārāni abhidhammapakaraṇādīni akarimsu, pavattantānīpi tāni aññathā katvā paṭṭhimsūti attho. **Mañjusirīti** idaṃ kasmā vuttaṃ. Na hi taṃ nāmaṃ piṭakattayaṃ anuvattantehi bhikkhūhi gayhati? Itarehi gayhamānampi vā sāsanikapariññehi na sāsanāvacaṃ gayhatīti katvā vuttaṃ. **Nikāyanāmaṃ** mahāsāṅghikādinikāyanāmaṃ, duttaguttādivaggaṇāmaṃca.

Saṅkantikānaṃ bhedo suttavādīti saṅkantikānaṃ anantare eko nikāyabhedo suttavādī nāma bhijjitha. **Sahāti** ekajjhaṃ katvā, gaṇiyamānāti attho.

Uppanne vāde sandhāyāti tatīyasāṅgītīkāle uppanne vāde sandhāya. **Uppajjanaketi** tato paṭṭhāya yāva saddhammantaradhānā etthantare uppajjanake. **Suttasahassāharaṇaṇcetta** paravādabhañjanatthañca sakavādapaṭiṭṭhāpanatthañca. Suttekaḍḍesopi hi “sutta”nti vuccati samudāyavohārassa avayavesupi dissanato yathā “paṭo daḍḍho, samuddo diṭṭho” ti ca. Te panettha suttapadesā “atthi puggalo attahitāya paṭipanno” tiādīnā āgatā veditabbā.

Nidānakathāvaṇṇanā niṭṭhitā.

Mahāvaggo

1. Puggalakathā

1. Suddhasaccikaṭṭho

1. Anulomapaccanīkavaṇṇanā

1. Sambarādīhi pakappitavijjā, tathābhisaṅkhatāni osadhāni ca “māyā” ti vuccanti, idha pana māyāya āhitavisesā abhūtaññeyyākārā adhippetāti dassento “**māyāya amaṇiādayo maṇiādiākārena dissamānā māyāti vuttā**” ti āha. Saccaññeva saccikaṃ, so eva attho aviparītassa ñāṇassa visayabhāvaṭṭhenāti **saccikaṭṭho**. Tenāha “**bhūtaṭṭho**” ti. Aviparītabhāvato eva paramo padhāno atthoti **paramattho**, ñāṇassa paccakkhabhūto dhammānaṃ aniddisitaḍḍasabhāvo. Tena vuttaṃ “**uttamattho**” ti.

Atthīti vacanasāmaññenāti “atthi puggalo attahitāya paṭipanno” tiādīsu (a. ni. 4.96; kathā. 22) “atthī” ti pavattavacanasāmaññena. Atthavikappupapattiyā vacanaviḥhāto chalanti vadanti. **Paṭiṭṭhaṃ pacchindantoti** hetuṃ dūseno, ahetuṃ karontoti attho. Hetu hi paṭiññāya paṭiṭṭhāpanato paṭiṭṭhā, taṃ pana hetuṃ atthamattato dassento “**yadi saccikaṭṭhenā**” tiādīmāha. Payogato pana dūsanena saddhiṃ parato āvi bhavissati. **Okāsaṃ adadamānoti** yathānurūpaṃ yuttiṃ vattuṃ avasaraṃ adento. Atha vā **paṭiṭṭhaṃ pacchindanto**, paṭiññāṃ eva parivattentoti attho. Upalabbhati puggaloti hi sakavādiṃ uddissa paravādīno paṭiññāva na yuttā appasiddhattā visesitabbassa. Tenevāha “**anupalabbhaneyyato na tava vādo tiṭṭhatīti nivattento**” ti. **Rūpaṇca upalabbhati...pe... dassetīti** etena paravādīnā

adhippetahetuno viparītatthasādhakattam dasseti.

Upalabbhamānaṃ nāma hotīti ākāro tamākāravantānaṃ anaññattāti adhippāyo. **Aññathāti** ākāra, ākāravantānaṃ bhede. **Etissāti** “tato so puggalo upalabbhati saccikaṭṭhaparamatthenā” ti evaṃ vuttāya dutiyapucchāya. **Esa visesoti** yo yathāvutto dvinnam pucchānaṃ visayassa sabhāvākārabhedo, esa dvinnam pucchānaṃ viseso. Sabhāvadharmānaṃ sāmāññalakkhaṇena abhinnānampi salakkhaṇato bhedoyevāti aññadharmassa aññenākārena na kadācīpi upalabbho bhaveyya. Yadi siyā, aññattameva na siyāti rupanādisapaccayādiākārena anupalabbhamānopi puggalo attano bhūtasabhāvattāna upalabbhatevāti vadantaṃ paravādinam pati “yo saccikaṭṭho” tiādi codanā anokāsāti dassento āha “**yathā pana...pe... niggaho ca na kātabbo**” ti. Tatha **niggahoti** “ājānāhi niggaha” nti evaṃ vuttaniggaho, parājayāropanena paravādino niggaṇhananti attho.

Svāyaṃ pana yasmā tassa vādāparādhahetuko, tasmā tam dassetuṃ aṭṭhakathāyaṃ dosāparādhapariyāyehi vibhāvito. Avajānanañhettha niggahaṭṭhānaṃ. Tathā hi paṭiññāhāni, paṭiññāntaram, paṭiññāvirodho, paṭiññāsaññāso, hetvantaram, atthantaram, niratthakam, aviññātattam, asambandhattam, appattakālam, ūnam, adhikam, punaruttam, ananubhāsanam, aviññātam, appaṭibhā, vikkhepo, matānuññā, anuyuñjitabbassa upekkhanam, ananuyuñjitabbassa anuyogo, apasiddhantaram, hetvābhāsā cāti **dvāvīsati** niggahaṭṭhānāni ñāyavādino vadanti.

Tatha visadisūdāharaṇadharmānujānaṃ paṭhamudāharaṇe **paṭiññāhāni**. Paṭiññātattapaṭisedhe tadaññatthaniddeso **paṭiññāntaram**. Paṭiññāviroddhahetukittanaṃ **paṭiññāvirodho**. Paṭiññātattāpanayanam **paṭiññāsaññāso**. Avisesavutte hetumhi paṭisiddhe visesahetukathanam **hetvantaram**. Adhikatattānupayogiatthakathanam **atthantaram**. Mātikāpāṭho viya atthahīnam **niratthakam**. Tikkhattam vuttampi sakkhipaṭivādīhi aviditam **aviññātattam**. Pubbāparavasena sambandharahitam **asambandhattam**. Avayavavipallāsavacanam **appattakālam**. Avayavavikalam **ūnam**. Adhikahetūdāharaṇam **adhikam**. Ṭhapetvā anuvādam saddatthānam punappunam vacanam atthāpannavacanañca **punaruttam**. Parisāya veditassa tīhi vuttassa apaccudāhāro **ananubhāsanam**. Yam vādinā vuttam parisāya viññātam paṭivādinā duviññātam, tam **aviññātam**. Tamvādinā vattabbe vutte paravādino paṭivacanassa anupaṭṭhānam **appaṭibhā**. Kiccantarappasaṅgena kathāvicchindanam **vikkhepo**. Attano dosānujānanaṃ parapakkhassa dosappasañjanaṃ paramatānujānaṃ **matānuññā**. Niggahappattassa niggaṇhanam **anuyuñjitabbassa upekkhanam**. Sampattaniggahassa aniggahaṭṭhāne ca niggaṇhanam **anuyuñjitabbassa anuyogo**. Ekam siddhantamanujānitvā aniyamato tadaññāsiddhantakathāppasañjanaṃ **apasiddhantaram**. Asiddhā anekantikā viruddhā ca **hetvābhāsā**, hetupatirūpakāti attho. Tesañca kathanam niggahaṭṭhānanti.

Imesu **dvāvīsatiyā** niggahaṭṭhānesu idam paṭiññāya apanayanato sayameva paccakkhānato paṭiññāsaññāso nāma niggahaṭṭhānaṃ. Tenevāha “**avajānaneneva niggaham dasseti**” ti. **Asiddhattāti** etena paccakkhato anumānato ca puggalassa anupalabbhamāha. Na hi so paccakkhato upalabbhati. Yadi upalabbheyya, vivādo eva na siyā, anumānampi tādisaṃ natthi, yena puggalam anumineyyum. Tathā hi tam sāsāniko puggalavādī vadeyya “puggalo upalabbhati, atthi puggalo” ti bhagavatā vuttattā rūpavedanādi viya. Yañhi bhagavatā “atthi” ti yadi vuttam, tam paramatthato atthi yathā tam rūpam vedanā saññā sañkhārā viññāṇam. Yam pana paramatthato natthi, na tam bhagavatā “atthi” ti vuttam yathā tam pakativādiādīnam pakatiādīti, tam micchā. Ettha hi yadi vohārato puggalassa atthibhāvo adhippeto, siddham sādhanam, atha paramatthato, asiddho hetu tathā avuttattā. Viruddho ca tassa aniccasañkhatapaṭiccasamuppannādibhāvāsādhanaṃ rūpavedanādīsu tathā diṭṭhattātiādīnā tassa ahetukabhāvasseva pākāṭabhāvato.

Yam pana bāhirakā puthu aññatitthiyā vadanti. Attheva ca paramatthato attā ñāñābhidhānassa pavattiyā nimittabhāvato rūpādi viya. Atha vā attārittapadatthantaro rūpakkhando khandhasabhāvattā yathā tam itarakkhandhā. Yañhettha padatthantaram, so puggaloti adhippāyo.

Ettha ca purimassa hetuno paññattiyā anekantikātā asiddhatā ca. Na hi asato sakavādinam pati paramatthato ñāṇabhīdhanappavattiyā nimittabhāvo sījjhati. Vohārato ce, tadasiddhasāadhanatā rūpādisabhāvavinimuttarūpopi puggalo na hotīti evamādiviruddhatthātā. Pacchimassa pana hetuno sādhetabbatthasāmaññapariggahe siddhasāadhanatā, rūpakkhandhato padatthantarato paramatthantarabhūta vedanādisambhavassa icchitattā ca. Tabbisesapariggahe ca sakavādinam pati udāharaṇābhāvo paraparikkappitajīvapadatthavirahato. Itarakkhandhānam vedanādivinimuttaubhayasiddhajīvapadatthasahitopi rūpakkhandho na hoti itarakkhandhā viyāti viruddhatthātā ca.

Yaṃ pana kāṇādā “sukhādīnam nissayabhāvato”ti anumānam vadanti, te idaṃ vattabbā – kiṃ sukhādīnam attani paṭibaddham yato sukhādīnissayatāya attā anumīyati. Yadi uppādo, evaṃ sante sabbepi sukhādayo ekato eva bhaveyyuṃ kāraṇassa sannihitabhāvato aññanirapekkhato ca. Atha aññampi kiñci indriyādīkāraṇantaramapekkhitabbaṃ, tadeva hotu kāraṇam, kimaññena adīṭṭhasāmatthiyena parikkappitena payoṇam. Atha pana tesam attādīnā vuttīti vadeyyuṃ, evampi na sījjhati udāharaṇābhāvato. Na hi rūpādivinimutto tādiso koci sabhāvadhammo sukhādīsannissayabhūto atthi, yato attano attatthasiddhiyā udāharaṇam apadiseyyuṃ. Iminā nayena asamāsapadābhīdheyyattātiādīnampi ayuttattā nivāretabbā. Tathā “aññassa saccikaṭṭhassa asiddhattā”ti iminā ca pakatiānuādīnampi bāhiraparikkappitānam asiddhatā vuttāvāti veditabbā. Kathaṃ pana tesam asiddhīti? Pamāṇena anupalabbhanato. Na hi paccakkhato pakati siddhā kapilassapi isino tassa apaccakkhabhāvassa kāpilehi anuññāyamānattā.

Yaṃ pana “atthi padhānam bhedaṇam anvayadassanato sakalalāpamattam viyā”ti te anumānam vadanti. Iminā hi bhedaṇam satvādīnam vijjāmānapadhānatā paṭiññātā. Ettha ca vuccate – sakalādīnam padhānam tabbībhāgehi kiṃ aññattam, udāhu anaññanti, kiñcettha yadi aññattam, sabbo loko padhānamayoti samavairodho siyā, saṅghānabhedena aññattha paṭijānanato na dosoti ce? Taṃ na, valayakāṭakādīsāṅghānabhedepi kanakābhedaḍassanato. Na hi saṅghānam vatthubhedanimittam tassa anupādānattā. Yaṃ yassa bhedanimittam, na taṃ tassa anupādānam yathā suvaṇṇamattikādighaṭṭādīnam suvaṇṇaghaṭṭo mattikāghaṭṭo koseyyapaṭo kappāsapaṭoti ca sādhetabbadhammarahitaṇca udāharaṇam. Na hi padhānekakāraṇapubbakattam sakalādīnam pakativādino siddham, nāpi kāpilānam kathañci aññattānujānanato. Anaññatte pana udāharaṇābhāvo. Na hi tadeva sādhetabbaṃ tadeva ca udāharaṇam yuttam, anvayadassanampi asiddham. Na hi tadeva tena anvitam yujjati. Padhānena anvayadassanampi asiddham paravādinoti guṇassa padhānassa ananujānanato. Atha yaṃ kiñci kāraṇam padhānam “padhīyati ettha phala”nti, evampi asiddhameva kāraṇe phalassa atthibhāvānanujānanato, hetuno ca asiddhanissayatāparābhīmatābhedaṇanujānanato. Atha viśesena kāraṇāyattavuttitā phalassa sādhiyati, na kiñci viruddham dhammānam yathāsakam paccayena paṭiccasamuppattiyā icchitattāti.

Apica pakativādino “satvarajataṃmasāṅkhātānam tiṇṇam guṇānam samabhāvo pakati, sā ca niccā satvādīvisamasabhāvato aniccatā mahatādivikārato anaññā”ti paṭijānanti. Sā tesam vuttappakārā pakati na sījjhati tato viruddhasabhāvato vikārato anaññattā. Na hi assassa viśāṇam dīgham, taṇca rassato govīśāṇato anaññanti vuccamānam sījjhati. Kiñca bhīyyo? Tiṇṇam ekabhāvābhāvato. Satvādīguṇattayato hi pakatiyā anaññattam icchantānam tesam satvādīnampi pakatiyā anaññattam āpajjati, na ca yuttam tiṇṇam ekabhāvoti. Evampi pakati na sījjhati. Kathaṃ? Anekadosāpattito. Yadi hi byattasabhāvato vikārato abyattasabhāvā pakati anaññā, evaṃ sante hetumantatā aniccatā abyāpitā sakiriyatā anekatā nissitatā līngatā sāvayavatā paratantratāti evamādayo aneke dosā pakatiyā āpajjanti, na jātivikārato anaññā paṭijānitabbā. Tathā ca sati samavairodhoti kappanāmatam pakatīti asiddhā sāti niṭṭhamettha gantabbaṃ.

Pakatiyā ca asiddhāya taṃnimittakabhāvena vuccamānā mahatādayopi asiddhā eva. Yathā ca pakati mahatādayo ca, evaṃ issarapajāpatipurisakālasabhāvanīyatīyadicchādayopi. Etesu hi issaro tāva na sījjhati upakārassa adassanato. Sattānañhi jātiyam mātāpitūnam bījakhettabhāvena kammassa hīnatādivibhāgakarāṇena, tato paraṇca utuāhārānam brūhanupatthambhanena, indriyānam

dassanādikiccasādhanena upakāro dissati, na, evamissarassa. Hīnatādivibhāgakaraṇamissarassāti ce? Taṃ na, asiddhattā. Yathāvutto upakāraviseso issaranimmito, na kammunāti sādhanīyametaṃ. Itararāpi samānametanti ce? Na, kammato phalanīyamasiddhattā. Sati hi katūpacite kammaṣmiṃ tattha yaṃ akusalaṃ, tato hīnatā, yaṃ kusalaṃ, tato paṇītatāti siddhametaṃ. Issaravādināpi hi na sakkā kammaṃ paṭikkhipituṃ.

Apicetassa lokavicittassa issaranimmānabhāve bahū dosā sambhavanti. Kathaṃ? Yadi sabbamidaṃ lokavicittaṃ issaranimmitaṃ, saheva vacanena pavattitabbaṃ, na kamena. Na hi sannihitakāraṇānaṃ phalānaṃ kamena uppatti yuttā, kāraṇantarāpekkhāya issarassa sāmattiyahāni. Cakkhādīnaṃ cakkhuviññānādīsu kāraṇabhāvo na yutto. Karotīti hi kāraṇanti. Issaro eva ca kārakoti sabbakāraṇānaṃ kāraṇabhāvahāni. Yehi puthuvisehehi issaro pasīdeyya, tesaṅca sayamkārātā āpajjati, tathā sabbesaṃ hetukānaṃ kāraṇabhāvo. Yañjetaṃ nimmānaṃ, tañcassa attadatthaṃ vā siyā, paratthaṃ vā siyā. Attadatthatāyaṃ attano issarabhāvahāni akatakiccatāya isitāvasitābhāvato. Tena vā nimmitena yaṃ attano kātabbaṃ, taṃ kasmā sayameva na karotī. Paratthatāyaṃ pana paro nāmettha loko evāti kimattiyāṃ tassa nirayādirogādivisādinimmānaṃ. Yā cassa issaratā, sā sayamkatā vā siyā paramkatā vā ahētukā vā. Tattha sayamkatā ce, tato pubbe anissarabhāvāpatti. Paramkatā ce, pacchāpi anissarabhāvāpatti sauttaratā ca siyā. Ahētukā ce, na kassaci anissaratāti evamissarassapi asiddhi veditabbā.

Yathā ca issaro, evaṃ pajāpati puriso ca. Nāmamattameva hettha viseso. Tehi vādīhi pakappitaṃ yadidaṃ “pajāpati puriso”ti. Tamnimittakaṃ pana lokappavattiṃ icchantānaṃ pajāpativāde purisavāde ca issaravāde viya dosā asiddhi ca vidhātabbā. Yathā cete issarādayo, evaṃ kālōpi asiddho lakkhaṇabhāvato. Paramatthato hi vijjamaṇānaṃ dhammānaṃ sabhāvasaṅkhātāṃ lakkhaṇaṃ upalabbhati. Yathā pathaviyā kathinatā, na evaṃ kālassa, tasmā natthi paramatthato kālōti. Kālavādī panāha “vattanālakkaṇo kālō”ti. So vattabbo “kā panāyaṃ vattanā”ti. So āha “samayamuhuttādīnaṃ pavatti”ti. Tampi na, rūpādīhi atthantarabhāvena aniddhāritatā. Paramatthato hi aniddhāritasabhāvassa vattanālakkaṇatāyaṃ sasavisānādīnampi taṃlakkhaṇatā āpajjeyya.

Yaṃ pana vadanti kāṇādā “aparasmīṃ aparaṃ yugapadi ciraṃ khippamiti kālalingānīti liṅgasabbhāvato atthi kālō”ti, taṃ ayuttaṃ liṅgino anupalabbhamānattā. Siddhasambandhesu hi liṅgesu liṅgamattaggahaṇena liṅgini avabodho bhavēyya. Na ca kenaci aviparītacetāsā tena liṅgena saha kadāci kālasaṅkhāto liṅgī gahitapubboti. Ato na yuttaṃ “liṅgasabbhāvato atthi kālō”ti. “Aparasmīṃ apara”ntiādīkassa visesassa nimittabhāvato yuttanti ce? Na, paṭhamajātatādīnimittakattā tassa. Na ca paṭhamajātatādī nāma koci dhammo atthi aññatra samaññāmatatoti nattheva paramatthato kālō. Kiñca bhīyyo, bahūnaṃ ekabhāvāpattito. Atītādivibhāgena hi lokasamaññāvasena bahū kālābheda. Tvañcetaṃ ekaṃ vadasīti bahūnaṃ ekabhāvābhāvato nattheva paramatthato kālō. Tathā ekassa anekabhāvāpattito. Yo hi ayaṃ ajja vattamānakālō, so hiyyo anāgato ahosi, sve atīto bhavissati. Hiyyo ca vattamāno ajja atīto ahosi, tathā sve vattamānopi aparajja. Na cekasabhāvassa anekasabhāvātā yuttāti asiddho paramatthato kālō. Dhammappavattiṃ pana upādāya kappanāmettasiddhāya lokasamaññāya atītādivibhāgato voharīyatīti vohāramattakoti daṭṭhabbo.

Sabhāvaniyatīyadicchādayopi asiddhā. Kiṃ kāraṇā? Lakkhaṇābhāvā. Na hi sabhāvato niyatīyadicchā sambhavatī. Aññathā evaṃvidho koci bhāvo atthi ce, tesaṃ sabhāvasaṅkhātēna lakkhaṇēna bhavitabbaṃ, paṭīṭhāpakahetunā ca na catthi. Kevalaṃ panete vādā vimaddīyamānā ahētuvāde eva tiṭṭhanti, na cāhetukaṃ lokavicittaṃ visesābhāvappasaṅgato. Ahētukabhāve hi pavattiyā yvāyaṃ narasuranirayatiracchānādīsu indriyādīnaṃ viseso, tassa abhāvo āpajjati, na cāyaṃ paṇḍitehi icchito. Kiñca? Diṭṭhabhāvato. Diṭṭhā hi cakkhādīto cakkhuviññānādīnaṃ bījādīto ankurādīnaṃ pavatti, tasmāpi hetutovāyaṃ pavatti. Tathā pure pacchā ca abhāvato. Yato yato hi paccayasāmaggito yaṃ yaṃ phalaṃ nibbattati, tato pubbe pacchā ca na tassa nibbatti sambhavatī, kiñca bahunā. Yadi ahētuto pavatti siyā, ahētukā pavattīti imāpi vācā yathāsakapaccayasamavāyato pure pacchā ca bhavēyyuṃ, na ca bhavanti aladdhappaccayattā, majjhe eva ca bhavanti laddhappaccayattā. Evaṃ sabbepi saṅkhatā

dhammāti na sījhati ahētuvādo. Tasmiñca asiddhe pavattiyā ahētubhāvo viya ahētupariyāyavisesabhūtā sabhāvanīyatīyadicchādayopi asiddhā eva hontīti vedītabbā.

Yaṃ pana kāṇādā “paramāṇavo niccā, tehi dvīaṇukādīphalaṃ nibbattati, tañca aniccaṃ, tassa vasenetaṃ lokavīcitta’nti vadanti, tampi micchāparīkappamattaṃ. Na hi paramāṇavo nāma santi aññatra bhūtasāṅghātā. So pana aniccova, na ca niccato aniccassa nibbatti yuttā tassa kāraṇabhāvānupattito tathā adassanato ca. Yadi ca so kassaci kāraṇabhāvaṃ gaccheyya, anicco eva siyā vikārapattito. Na cāyaṃ sambhavo atthi, yaṃ vikāraṃ anāpajjantameva kāraṇaṃ phalaṃ nibbatteyyāti. Vikārañce āpajjati, kutassa niccatāvākāso, tasmā vuttappakārā paramāṇavo sattā aniccā, aññepi niccādībhāvena bāhirakehi parīkappitā asiddhā evāti vedītabbaṃ. Tena vuttaṃ **“dhammappabhedato pana aññassa saccikaṭṭhassa asiddhattā”**ti.

Etthāha “yadi paramatthato puggalo na upalabbhati, evaṃ pana puggale anupalabbhamāne atha kasmā bhagavā ‘atthi puggalo attahitāya paṭipanno’ti (a. ni. 4.95; kathā. 22), ‘cattārome, bhikkhave, puggalā santo saṃvijjamaṇā lokasmi’nti (a. ni. 4.95; kathā. 22) ca tattha tattha puggalassa atthībhāvaṃ pavedesī’ti. Vineyyajjhāsaya vasena. Tathā tathā vinetabbānañhi puggalānaṃ ajjhāsaya vasena vineyyadamanakusalo satthā dhammaṃ desento lokasamaññānurūpaṃ tattha tattha puggalaggahaṇaṃ karoti, na paramatthato puggalassa atthībhāvato.

Apica **aṭṭhahi** kāraṇehi bhagavā puggalakathaṃ katheti hīrottappadīpanatthaṃ, kammassakatādīpanatthaṃ, paccattapurīsakārādīpanatthaṃ, ānantariyādīpanatthaṃ, brahmavīhārādīpanatthaṃ, pubbenivāsādīpanatthaṃ, dakkhiṇāvisuddhīdīpanatthaṃ, lokasammutiyā appahānatthañcāti. “Khandhā dhātū āyatanāni hīriyanti ottappantī”ti hi vutte mahājano na jānāti, sammohaṃ āpajjati, paṭisattu vā hoti “kimidaṃ khandhā dhātū āyatanāni hīriyanti ottappanti nāmā”ti. “Itthī hīriyati ottappati, puriso, khattiyo, brāhmaṇo”ti pana vutte jānāti, na sammohaṃ āpajjati, na paṭisattu hoti, tasmā bhagavā **hīrottappadīpanatthaṃ** puggalakathaṃ katheti. “Khandhā kammassakā, dhātuyo āyatanāni”ti vuttepi ese va nayo. Tasmā **kammassakatādīpanatthampi** puggalakathaṃ katheti. “Veḷuvanādayo mahāvīhārā khandhehi kārapitā, dhātūhi, āyatanehi”ti vuttepi ese va nayo. Tathā “khandhā mātaraṃ jīvītā voropenti, pitaraṃ, arahantaṃ, ruhiruppādakammaṃ, saṅghabhedakammaṃ karonti, dhātuyo, āyatanāni”ti vuttepi, “khandhā mettāyanti, dhātuyo, āyatanāni”ti vuttepi, “khandhā pubbenivāsaṃ anussaranti, dhātuyo, āyatanāni”ti vuttepi ese va nayo. Tasmā bhagavā **paccattapurīsakārādīpanatthaṃ ānantariyādīpanatthaṃ brahmavīhārādīpanatthaṃ pubbenivāsādīpanatthañca** puggalakathaṃ katheti. “Khandhā dānaṃ paṭiggaṇhanti, dhātuyo, āyatanāni”ti vuttepi mahājano na jānāti, sammohaṃ āpajjati, paṭisattu vā hoti “kimidaṃ khandhā dhātū āyatanāni paṭiggaṇhanti nāmā”ti. “Puggalo paṭiggaṇhātī”ti pana vutte jānāti, na sammohaṃ āpajjati, na paṭisattu hoti, tasmā bhagavā **dakkhiṇāvisuddhīdīpanatthaṃ** puggalakathaṃ katheti. Lokasammutiñca buddhā bhagavanto nappajahanti lokasamaññāya lokābhīlāpe ṭhitāyeva dhammaṃ desenti, tasmā bhagavā **lokasammutiyā appahānatthampi** puggalakathaṃ kathetīti imehi **aṭṭhahi** kāraṇehi bhagavā puggalakathaṃ katheti, na paramatthato puggalassa atthībhāvato vedītabbaṃ.

Dhammappabhedākārenevāti yathāvuttarūpādīdhammappabhedato aññassa saccikaṭṭhassa asiddhattā rūpādīdhammappabhedākāreneva puggalassa upaladdhiyā bhavītabbanti attho. Tena “kim tava puggalo upalabbhamāno ruppanākārena upalabbhati, udāhu anubhavanasañjānanābhīsaṅkharāṇavijjānanesu aññatarākārenā”ti dasseti tabbinimuttassa sabhāvadhammassa loke abhāvato. Avīsesavīsehehi puggalūpalabbhassa paṭīññāpaṭīkkhepapakkhā anujānanāvajānanapakkhā. Yadi pime dvepi pakkhā anulomapaṭīlomanayesu labbhanti, ādīto pana paṭhamaṃ ṭhapetvā pavatto paṭhamaṇayo, itaro dutīyanti imaṃ nesamaṃ vīsesamaṃ dassento **“anujānanā... pe... vedītabbo”**ti āha. Yathādhīkatāya laddhiyā anulomanato cettha paṭhamaṇayo **anulomapakkho**, tabbīlomanato itaro **paṭīlomapakkhō**ti vuttoti vedītabbanti.

Tena vata reti ettha tenāti kāraṇavacanaṃ. Yena puggalūpalabbho paṭīṭṭhapīyati, tena hetunā.

Svāyaṃ hetu sāsānikassa bāhirakassa ca vasena heṭṭhā dassito eva. Hetupatirūpake cāyaṃ hetusamaññā paramatthassa adhippetattā. Heṭṭhā “ājānāhi niggaha”nti niggahassa saññāpanamattam katam, tam idāni “yaṃ tattha vadesī”tiādinā nigamanarūpena micchābhāvadassanena ca vibhāvīyamānaṃ pākaṭabhāvakaraṇato āropitaṃ paṭiṭṭhāpitaṃ hotīti aṭṭhakathāyaṃ “āropitattā”ti vuttam.

Ettha ca “puggalo upalabbhati”ti **paṭiññāvayavo** sarūpeneva dassito. “Tenā”ti iminā sāmāññato **hetāvayavo** dassito. Yvāyaṃ yasmā paṭiññādhammo hutvā sadisapakkhe vijjāmano, visadisapakkhe avijjāmano yeva hetu lakkhaṇūpapanno nāma hoti, na itaro, tasmā yattha so vijjati na vijjati ca, so sadisāsadisabhāvabhinnō duvidho **diṭṭhantāvayavo**. Yathā rūpādi upalabbhati, tathā puggalo. Yathā ca sasavisānaṃ na upalabbhati, na tathā puggaloti **upanayo**. Svāyaṃ “vattabbe kho puggalo upalabbhati saccikaṭṭhaparamatthenā”ti imāya pāliya dīpito, yo aṭṭhakathāyaṃ saddhiṃ hetudāharaṇehi “pāpanā”ti vutto. **Nigamanam** pāliyaṃ sarūpeneva āgataṃ, yā aṭṭhakathāyaṃ “ropanā”ti vuttāti. Evaṃ porāṇena ñāyakkamena sādhanāvayavā niddhāretvā yojetabbā.

Idāni vattanena parapakkhupalakkhite hetudāharaṇe anvayabyatirekadassanavasena niddhāretvā sādhanapayogo yojetabbo. **Kāraṇam vattabbanti** kimettha vattabbaṃ. Hetudāharaṇehiyeva hi saparapakkhānaṃ sādhanam dūsanam vā, na paṭiññāya, tassā sādhetabbādibhāvato. Tam pana dvayaṃ “tena vata re”tiādi pāliya vibhāvitaṃ. Aṭṭhakathāyaṃ pāpanāropanāsīsenā dassitam. Paṭiññāṭṭhapanā pana tesam visayadassanaṃ kathāyaṃ taṃmūlatāyāti veditabbaṃ. Tenāha “**yaṃ pana vakkhati**”tiādi. Teneva ca aṭṭhakathāyaṃ “idaṃ anuloma...pe... ekaṃ catukkaṃ veditabba”nti vakkhati. Tathā cāha “**yathā pana tatthā**”tiādi. **Niggahova visum vutto**, na paṭikammanti adhippāyo. Visum vuttoti ca pāpanāropanāhi asammissaṃ katvā visum āngabhāvena vutto, na tadaññataro viya tadantogadhabhāvena vutto, nāpi ṭhapanā viya aḡaṇanupagabhāvenāti attho. **Ye panāti** padakāre sandhāyāha. **Dutiye...pe... āpajjati** tattha niggahassa ayathābhūtattā paṭikammaṃ ca yathābhūtābhāvatoti adhippāyo.

2. Paramatthato puggalaṃ nānujānāti, vohārato pana anujānātīti sakavādimattaṃ jānantenapi paravādinā chalavasena vibhāgaṃ akatvā “puggalo nupalabbhati saccikaṭṭhaparamatthenā”ti pucchāya katāya sakavādī tattha ayaṃ puggalavādī, imassa laddhi paṭikkhipitabbāti paramatthasaccaṃ sandhāyāha “āmanta”ti. “Na upalabbhati”ti hi vuttam hoti. Puna itaro sammūtisaccaṃ sandhāya “yo saccikaṭṭho”tiādimāha. Tassattho – yo lokavohārasiddho saccikaṭṭho, tato eva kenaci apaṭikkhipitabbato paramatthato tato so puggalo nupalabbhatīti. Puna sakavādī pubbe paramatthasaccavasena puggale paṭikkhitte idāni sammūtisaccavasenāyaṃ pucchāti mantvā tam appaṭikkhipanto “na hevaṃ vattabbe”ti āha. Tenāha “**attanā adhippetam saccikaṭṭhamevāti sammūtisaccaṃ sandhāyāti adhippāyo**”ti. Evamavaṭṭhite “**yadi paravādinā...pe... nārabhitabbā**”ti idaṃ na vattabbaṃ paṭhamapucchāya paramatthasaccassa saccikaṭṭhoti adhippetattā. “**Atha sakavādinā...pe... āpajjati**”ti idampi na vattabbaṃ dutiyapucchāya sammūtisaccassa saccikaṭṭhoti adhippetattā.

Yadi ubhayaṃ adhippetanti idaṃ yadi paṭhamapuccham sandhāya, tadayuttam tassā paramatthasaccasseva vasena pavattattā. Atha dutiyapuccham sandhāya, tassā sammūtisaccavasena paṭhamattham vatvā puna missakavasena vuttam “**sammūtisaccaparamatthasaccāni vā ekato katvāpi evamāhā**”ti vuttattā tampi na vattabbameva. **Dvepi saccānīti** sammūtiparamatthasaccāni. Tesu paramatthasaccasseva nippariyāyena saccikaṭṭhaparamatthabhāvo, itarassa upacārena. Tathā ca vuttam “māyā marīci...pe... uttamaṭṭho”ti. Tasmā sammūtisaccavasena upaladdhiṃ icchantenapi paramatthasaccavasena anicchanato “puggalo upalabbhati saccikaṭṭhaparamatthenā”tiādinā anuyogo yutto. “Padhānappadhānesu padhāne kiccāsiddhī”ti eteneva “**na ca saccikaṭṭhekadesena anuyogo**”tiādi nivattitaṇca hoti saccikaṭṭhekadesabhāvasseva asiddhattā. **Nāssa paramatthasaccatā anuyuñjitabbāti** assa saccikaṭṭhassa paramatthasaccatā paravādinā na anuyuñjitabbā “puggalo nupalabbhati saccikaṭṭhaparamatthenā”ti sakavādinopi saccikaṭṭhaparamatthato tassa icchitabbattāti adhippāyo. **Voharitasaccikaṭṭhassa attanā adhippetasaccikaṭṭhatāpi** yuttā tassa tena adhippetattā. Svāyamatto heṭṭhā dassitoyeva. **Vuttanayova dosoti** “dvepi saccānī”tiādinā anantameva vuttam

sandhāyāha. Tassa pana adosabhāvo dassitoyeva. **Atha na** iti atha na bhūtasabhāvatthena upalabbheyyāti yojanā. **Vattabboti** yadettha vattabbaṃ, taṃ “yo lokavohārasiddho” tiādinā vuttameva, tasmā ettha “paramatthato puggalaṃ nānujānāti” tiādinā adhippāyamaggaṃ daṭṭhabbaṃ.

Anuññeyyametaṃ siyāti etaṃ anupalabbhanaṃ paṭhamapucchāyaṃ viya dutiyapucchāyampi anujānitabbaṃ siyā. **Na vā kiñci vattabbanti** atha vā kiñci na vattabbaṃ ṭhapanīyattā pañhassa. Tathā hissa ṭhapanīyākāraṃ dassento “**yathā hī**” tiādimāha. Ettha ca kāmaṃ saccadvayākārena puggalo nupalabbhati, sammutiyākārena pana nupalabbhatīti upalabbhanabhāvassa vasena paṭikkhepo katoti ayamettha adhippāyo daṭṭhabbo. **Anuññātaṃ paṭikkhitañcāti** paṭhamapucchāyaṃ anuññātaṃ, dutiyapucchāyaṃ paṭikkhitaṃ. **Etaṃ chalavādaṃ nissāyāti** etaṃ ekaṃyeva vatthum uddissa anujānanapaṭikkhipanākāraṃ chalavacanaṃ nissāya. Tvaṃ niggahetabboti yojanā. **Sambhavantassa sāmāññenāti** niggahaṭṭhānabhāvena sambhavantassa anulomanayena anujānanapaṭikkhepassa samānabhāvena. **Asambhavantassa kappananti** paccanīkanayena tassa niggahaṭṭhānabhāvena asambhavantassa tathā kappanaṃ samvidhānaṃ chalavādo bhavituṃ arahati. “Atthavikappupapattiyā vacanavighāto chala” nti vuttovāyamattho. **Tenāti** yathāvuttakappanaṃ chalavādoti vuttattā. Vacanasāmāññamattaṃ kappitaṃ chalaṃ vadati etenāti chalavādo. Tena vuttaṃ “**chalavādassa kāraṇattā chalavādo**” ti. **Vacanasāmāññamattaṃ** atthabhūtaṃ tadatthaṃ chalavādaṃ nissāya. “**Vicāretabba**” nti vuttaṃ, kimettha vicāretabbaṃ. Yadihi pakkhassa ṭhapanāmūlakam anujānanāvajānanānaṃ micchābhāvadassanaṃ tabbisayattā, pāpanāropanāhi eva pana so vibhāvīyati, na ṭhapanāyāti pākaṭoyamattho.

4-5. Tenāti sakavādinā. **Tena niyāmenāti** yena niyāmena sakavādinā catūhi pāpanāropanāhissa niggaho kato, tena niyāmena nayena. So niggaho dukkaṭo aniggahoyevāti dassento āha “**aniggahabhāvassa vā upagamitattā**” ti, pāpitattāti attho. **Evamevāti** yathā “tayā mama kato niggaho” tiādinā aniggahabhāvūpanayo vutto, evameva. **Etassāti** “tena hī” tiādinā imāya pāḷiyā vuttassa.

Anulomapaccanīkavaṇṇanā niṭṭhitā.

2. Paccanīkānulomavaṇṇanā

7-10. Aññenāti sammutisaccabhūtena. **Parassāti** sakavādino. So hi paravādinā paro nāma hoti. Paṭiññāpaṭikkhepanaṃ bhinnavisayattā “**avirodhitattā**” ti vuttaṃ. Abhinnādhikaraṇaṃ viya hi abhinnavisayameva viruddhaṃ nāma siyā, na itaranti adhippāyo. Tamevatthaṃ vibhāvetuṃ “**na hi... pe... āpajjati**” ti āha. Yadi evaṃ kathamidaṃ niggahaṭṭhānaṃ jātanti āha “**attano panā**” tiādi. Tena paṭiññāntaraṃ nāma aññamevetam niggahaṭṭhānanti dasseti.

Paccanīkānulomavaṇṇanā niṭṭhitā.

Suddhasaccikaṭṭhavaṇṇanā niṭṭhitā.

2. Okāsasaccikaṭṭho

1. Anulomapaccanīkavaṇṇanā

11. Sāmāññena vuttaṃ visesaniviṭṭhaṃ hotīti āha “**sabbatthāti sabbasmim sarīreti ayamattho**” ti. Sāmāññajotanaṃ hi visese avatiṭṭhatīti visesatthinā viseso anupayujjitabboti. **Etenāti** desavasena sabbattha paṭikkhepavacanena.

3. Kālasaccikaṭṭho

1. Anulomapaccanīkavaṇṇanā

12. Majjhimajātikāleti paccuppannattabhāvakāle. Attabhāvo hi idha “jātī”ti adhippeto. Tato atīto purimajātikālo, anāgato pacchimajātikālo. **Imesu tīsūti** sabbattha, sabbadā, sabbesūti imesu tīsu nayesu. Pāṭhassa saṃkhittatā suviññeyyāti taṃ ṭhapetvā atthassa sadisatam vibhāvento “**idhāpi hi...pe...yojetabba**”nti āha. Etthāpi “na kenaci sabbhāvena puggalo upalabbhatī”ti ayamatto vutto hoti. Na hi kenaci sabbhāvena upalabbhamānassa sakalekadesavinimutto pavattikālo nāma atthīti.

4. Avayavasaccikaṭṭho

1. Anulomapaccanīkavaṇṇanā

13. Tatiyanaye na sabbekadhammavinimuttaṃ pavattiṭṭhānaṃ nāma atthīti yojetabbaṃ.

Okāsādisaccikaṭṭho

2. Paccanīkānulomavaṇṇanā

14. Anulomapañcakassātiādīmhi aṭṭhakathāvacane. Puna **tatthāti** yathāvutte aṭṭhakathāvacane, tesu vā anulomapañcakapaccanīkesu. **Sabbattha puggalo nupalabbhatī**tiādikassa pāṭhappadesassa attho “sarīraṃ sandhāyā”tiādīnā aṭṭhakathāyaṃ vuttanayena veditabbo attho. **Paṭikammādipālīnti** paṭikammaniggahaupanayanānigamanapāliṃ. **Tīsu mukhesūti** “sabbatthā”tiādīnā vuttesu tīsu vādamukhesu. Paccanīkassa pāli vuttāti sambandho. **Tanti** pāliṃ. Saṅkhipitvā āgatattā **sarūpena avutte. Suddhika...pe...vuttaṃ hoti** tattha “sabbatthā”tiādīnā sarīrādino parāmasanaṃ natthi, idha atthīti ayameva viseso, aññāṃ samānanti.

Saccikaṭṭhavaṇṇanā niṭṭhitā.

5. Suddhikasamsandanavaṇṇanā

17-27. Saccikaṭṭhassa, saccikaṭṭhe vā saṃsandanaṃ saccikaṭṭhasamsandananti samāsadvayaṃ bhavatīti dassento “**saccikaṭṭhassā**”tiādīmāha. Tattha **saccikaṭṭhassa puggalassāti** saccikaṭṭhasabhāvassa paramatthato vijjamaṇasabhāvassa puggalassa. **Rūpādīhi saddhim saṃsandananti** saccikaṭṭhatāsāmaññena rūpādīhi samīkaraṇaṃ. **Saccikaṭṭheti** saccikaṭṭhahetu, tattha vā taṃ adhiṭṭhānaṃ katvā. “Tulyayoge samuccayo”ti samuccayatthattā eva ca-kārassa saccikaṭṭhena upaladdhisāmaññena idha rūpamāhaṭanti tassa udāhaṭabhāvo yuttoti “**yathārūpa**”nti **nidassanavasena attho vutto**, aññathā idha rūpassa āharaṇameva kimatthiyaṃ. Evaṃ sesadhammesupi. Yā panettha aññattapucchā, sāpi nidassanattaṃ upabrūheti aññattanibandhanattā tassa. Opammasaṃsandane pana nidassanatto gāhīyatīti imasmiṃ suddhikasamsandane kevalaṃ samuccayavaseneva atthadassanaṃ yuttanti adhippāyo. Rūpādīni upādāpaññattimattattā puggalassa so tehi añño, anañño cāti na vattabboti ayaṃ sāsanakkamoti āha “**rūpādīhi...pe...samayo**”ti. **Anuññāyamāneti** tasmiṃ samaye sutte ca appaṭikkhipiyamāne. Ayañca attho sāsanikassa paravādino vasena vuttoti veditabbaṃ.

“**Ājānāhi niggaha**”nti **pāṭho diṭṭho bhavissati**, aññathā “paṭilomapañcakāni dassitāni, paṭikammacatukkādīni saṃkhittānī”ti na sakkā vattunti adhippāyo. Codanāya vinā paravādino paṭijānāpanaṃ natthīti vuttaṃ “**paṭijānāpanatthanti...pe...codanattha**”nti. Codanāpubbakañhi tassa paṭijānāpanaṃ. Tena phalavohārena kāraṇaṃ vuttanti dasseti. **Abyākatattāti** abyākaraṇīyattā, bhagavatā vā na byākatattā. **Yadi ṭhapanīyattā paṭikkhipitabbanti** imasmiṃ paccanīkanaye ṭhapanīyattā pañhassa sakavādīnā paṭikkhipitabbaṃ. **Parenapīti** paravādīnāpi ṭhapanīyattā laddhimeva nissāya anulomanaye paṭikkhepo katoti **ayamettha** suddhikasamsandanāya **adhippāyo yutto** anulomepi

rūpādīhi aññattacodanāyameva paravādinā paṭikkhepassa katattāti adhippāyo.

Suddhikasamsandanavaṇṇanā niṭṭhitā.

6. Opammasamsandanavaṇṇanā

28-36. Upaladdhisāmaññena aññattapucchā cāti iminā dvayampi uddharati upaladdhisāmaññena aññattapucchā, upaladdhisāmaññena pucchā cāti. Tattha pacchimaṃ sandhāyāha “**dvinnam samānatā**”tiādi. Tassattho – dvinnam rūpavedanānaṃ viya rūpapuggalānaṃ saccikatṭhena samānatā tesam aññattassa kāraṇaṃ yuttaṃ na hoti. **Atha kho...pe... upalabbhanīyatāti** idañca samsandanaṃ vicāretabbaṃ. Ayaṃ hettha adhippāyo – yadi saccikatṭhasāmaññena rūpapuggalānaṃ upaladdhisāmaññaṃ icchitaṃ, teneva nesam aññattampi icchitabbaṃ. Atha paramatthavohārabhedato tesam aññattaṃ na icchitaṃ, tato eva upaladdhisāmaññaṃ na icchitabbanti.

37-45. Upaladdhīti puggalassa upaladdhi vijjamaṇatā. “Paṭikkammaṇcaka”nti viññāyatīti yojanā.

Opammasamsandanavaṇṇanā niṭṭhitā.

7. Catukkanayasamsandanavaṇṇanā

46-52. Ekadhammatopīti sattapaññāsāya saccikatṭhesu ekadhammatopi. Etena tato sabbatopi puggalassa aññattānanujanānaṃ dasseti. Tenāha aṭṭhakathāyaṃ “sakalaṃ paramatthasaccaṃ sandhāyā”ti. **Rūpādiekekadhammasena nānuyuñjitabbo** avayavabyatirekena samudāyassa abhāvato. Yasmā pana samudāyāvayavā bhinnasabhāvā, tasmā “**samudāyato...pe... niggahāraho siyā**”ti paravādinō āsaṅkamāha. **Etam vacanokāsanti** yadipi sattapaññāsadhammasamudāyato puggalassa aññattaṃ na icchati tabbinimuttassa saccikatṭhassa abhāvato, tadekadesato panassa anaññattampi na icchateva. Na hi samudāyo avayavo hotīti. Tasmā “taṃ paṭikkhipato kiṃ niggahaṭṭhānanti vuttaṃ mā labbhetthā”ti dassetuṃ “**ayañcā**”tiādi vuttaṃ. Rūpādidhammappabhedavibhāgamukheneva anavasesato puggaloti gahaṇākāradassanavasena pavatto paṭhamavikappo, dutiyo pana avibhāgato paramatthasaccabhāvasāmaññenāti ayaṃ imesaṃ dvinnam vikappānaṃ viseso. **Itīti** vuttappakāraparāmasananti āha “**eva**”nti.

Sabhāvavinibbhogototi sabhāvena vinibbhujjitabbato. Sabhāvabhinno hi dhammo tadaññadhammato vinibbhogaṃ labhati. Tenāha “**rūpato aññasabhāgattā**”ti. **Rūpavajjeti** rūpadhammavajje. **Tisupīti** “rūpasmim puggalo, aññatra rūpā, puggalasmim rūpa”nti imesu evaṃ pavattesu tisupī anuyogesū. Sāsaniko evāyaṃ puggalavādīti katvā āha “**na hi so sakkāyadīṭṭhim icchati**”ti. “Rūpavā”ti iminā rūpena sakiñcanatāva ñāpīyati, na rūpāyattavuttitāti āha “**aññatra rūpāti ettha ca rūpavā puggaloti ayamattho saṅgahito**”ti.

Catukkanayasamsandanavaṇṇanā niṭṭhitā.

Niṭṭhitā ca samsandanakathāvaṇṇanā.

8. Lakkhaṇayuttivaṇṇanā

54. Lakkhaṇayuttikathāyaṃ “chalavasena pana vattabbaṃ ājānāhi niggaha”nti pāṭho gahetabbo.

Lakkhaṇayuttivaṇṇanā niṭṭhitā.

9. Vacanasodhanavaṇṇanā

55-59. Padadvayassa atthato ekatteti padadvayassa ekattatthe satīti attho.

Parikappavacanañhetam dosadassanatham “evam sante ayam doso”ti. Tayidam ekattam upalabbhati evāti pacchimapadāvadhāraṇam veditabbam. “Kehici puggalo kehici na puggalo”ti byabhicāradassanato parena na sampatiçchitanti katvā tameva asampatiçchitattam vibhāvento “**puggalassa hī**”tiādīmāha. Tattha **avibhajitabbatanti** “upalabbhati cā”ti evam avibhajitabbatam. **Vibhajitabbatanti** “puggalo ca tadaññaṇca upalabbhatī”ti evam vibhajitabbatam. Etena “puggalo upalabbhati evā”ti pacchimapadāvadhāraṇam veditabbam, na “puggalo eva upalabbhatī”ti imamattham dasseti. **Tam vibhāganti** yathāvuttam vibhajitabbāvibhajitabbam vibhāgam **vadato** sakavādino, aññaṣṣa vā kassaci. **Etassāti** paravādino. **Yathāvuttavibhāganti** “puggalo upalabbhati...pe... kehici na puggalo”ti evam pāḷiyam vuttappakāram vibhāgam. **Yathāpāditenāti** “puggalo upalabbhatīti padadvayassa atthato ekatte”tiādīnā āpāditappakārena. **Na bhavitabbanti** yadipi tena puggalo upalabbhati eva vuccati, upalabbhatīti pana puggalo eva na vuccati, atha kho añño, tasmā yathāvuttena pasaṅgena na bhavitabbam. Tenāha “**maggitabbo ettha adhippāyo**”ti.

60. Atthato puggalo natthīti vuttam hoti attasuññatādassanena anattalakkaṇassa vihitattā.

Vacanasodhanavaṇṇanā niṭṭhitā.

10. Paññattānuyogavaṇṇanā

61-66. Rūpakāyāviraḥam sandhāya āha, na rūpataṇhāsabbhāvaṃ. Tathā sati anekantikattā paṭikkhipitabbameva siyā, na anujānitabbanti. “Atthitāyā”ti āhāti sambandho. **Kāmībhāvassa anekantikattā** kassaci kāmādhātūpapannassa **kāmādhātuyā āyattattābhāvato ca** kadāci bhāvassevāti yojanā.

67. Kāyānupassanāyāti kāyānupassanādesanāya. Sā hi kāyakāyānupassīnam vibhāgaggahaṇassa kāraṇabhūtā, kāyānupassanā eva vā. **Evaṃladdhikattāti** añño kāyo añño puggaloti evaṃladdhikattā. **Āhacca bhāsīti** tñānakaraṇāni āhantvā kathitam, bhagavatā sāmaṃ desīti attho.

Paññattānuyogavaṇṇanā niṭṭhitā.

11. Gatianuyogavaṇṇanā

69-72. Yānissa suttāni nissāya laddhi uppannā, tesam dassanato parato “tena hi puggalo sandhāvati”tiādīnā pāḷi āgatā, purato pana “na vattabbam puggalo sandhāvati”tiādīnā, tasmā vuttam “**dassento...pe... bhavitabba**”nti. **Dassetvāti vā vattabbanti** “yānissa...pe... tāni dassetvā ‘tena hi puggalo sandhāvati’tiādīmāhā”ti vattabbanti attho. **Dassentoti vā** idaṃ dassanakiriyāya na vattamānatāmattavacanam, atha kho tassā lakkhaṇatthavacanam, hetubhāvavacanam vāti na koci doso.

91. So vattabboti so jīvasarīraṇam anaññatāpajjanākāro vattabbo, natthīti adhippāyo. “Rūpī attā”ti imissā laddhiyā vasena “yena rūpasāṅkhātena attano sabhāvabhūtena sarīrena saddhiṃ gacchatī”ti evam pana atthe satī so ākāro vutto eva hoti, tathā ca satī “rūpaṃ puggaloti ananuññatattā”ti evampi vuttam na sakkā. Yasmā pana “idha sarīranikkhepā”ti anantaram vakkhati, tasmā “so vattabbo”ti vuttam. **Nirayūpagassa puggalassa antarābhavam na icchatīti** idaṃ purātanānam antarābhavavādīnam vasena vuttam. Adhunātānaṃ pana “uddhampādo tu nārako”ti vadantā tassapi antarābhavam icchanteva, keci pana asaṅgānūpagānam. Arūpūpagānam pana sabbepi na icchanti. Tattha ye “saññuppādā ca pana te devā tamhā kāyā cavanti”ti suttassa attham micchā gahetvā cutūpapātakālesu asaṅgīnam saññā atthīti antarābhavatova asaṅgīnūpapattiṃ icchanti, tadaññesaṃ vasena “savedano...pe... paṭikkhipatī”ti dassento “**ye panā**”tiādīmāha. Ke panevam icchanti? Sabbatthivādīsu ekacce.

92. Nevasaññānāsaññāyataneti nevasaññānāsaññāyatane bhavē, acittuppāde vā saññā atthīti icchantīti na vattabbanti sambandho. Yato so saññābhavena asaṅgahito, bhavantarabhāvena ca saṅgahito.

93. Indhanupādāno aggi viya indhanena rūpādiupādāno puggalo rūpādinā vinā natthīti ettha ayamadhippāyavibhāvanā – yathā na vinā indhanena aggi paññāpīyati, na ca taṃ aññaṃ indhanato sakkā paṭijānituṃ, nāpi anaññaṃ. Yadi hi aññaṃ siyā, na uñhaṃ indhanaṃ siyā, atha anaññaṃ, nidāhitabbaṃyeva dāhakaṃ siyā, evaṃ na vinā rūpādīhi puggalo paññāpīyati, na ca tehi añño, nāpi aññaṃ sassatucchedabhāvappasaṅgoti paravādino adhippāyo. Tattha yadi aggindhanopamā lokavohārena vuttā, apaḷittaṃ kaṭṭhādīindhanaṃ nidāhitabbañca, paḷittaṃ bhāsuruñhaṃ aggidāhakañca, tañca ojaṭṭhamakarūpaṃ pabandhavasena pavattaṃ aniccaṃ saṅkhatam paṭiccasamuppannam. Yadi evaṃ puggalo rūpādīhi añño anicco ca āpanno, atha paramatthato ca, tasmīyeva kaṭṭhādīsaññīte rūpasaṅkhātapaḷitte yaṃ usumaṃ so aggi taṃsahajātāni tīṇibhūtāni indhanaṃ. Evampi siddham lakkhaṇabhedato aggindhanānaṃ aññattanti aggi viya indhanato rūpādīhi añño puggalo anicco ca āpajjatīti.

Gatīnuyogavaṇṇanā niṭṭhitā.

12. Upādāpaññattānuyogavaṇṇanā

97. Nīlaguṇayogato nīlo, nīlo eva nīlako, tassa, ayaṃ panassa nīlapaññatti nīlarūpupādānāti āha “**nīlam...pe... paññattī**”ti. Evaṃ pana pāthe ṭhite nīlam upādāya nīloti kathamayaṃ paduddhāroti āha “**nīlam rūpaṃ...pe... ettha yo puṭṭho nīlam upādāya nīlo**”ti. **Etthāti** etasmīṃ vacane. **Tadādīsūti** “pītaṃ rūpaṃ upādāya”tiādīkaṃ aṭṭhakathāyaṃ **ādi**-saddena gahitameva tadatthadassanavasena gaṇhāti.

98. Vuttanti “maggakusalo”tiādīsū chekaṭṭham sandhāya vuttaṃ. **Kusalapaññattim** kusalavohāraṃ.

112. Pubbapakkaṃ dassetvā uttaramāhāti paravādī pubbapakkaṃ dassetvā sakavādissa uttaramāha.

115. “Rūpaṃ rūpavā”tiādinayappavattaṃ paravādivādaṃ bhindituṃ “yathā na nīgaḷo negaḷiko”tiādinā sakavādivādo āraddhoti āha “**yassa rūpaṃ so rūpavāti uttarapakke vuttaṃ vacanaṃ uddharitvā**”ti.

118. Viññāṇanissayabhāvūpagamananti cakkhuviññāṇassa nissayabhāvūpagamaṃ. Tayidaṃ viśesaṃ **cakkhussāti** imināva siddhanti na kataṃ daṭṭhabbaṃ.

Upādāpaññattānuyogavaṇṇanā niṭṭhitā.

13. Purisakārānuyogavaṇṇanā

123. Kammānanti kusalākusalakammānaṃ. Taggahaṇeneva hi taṃtaṃkiccakaraṇīye kiriyānampi saṅgaho daṭṭhabbo. **Nipphādakappayojakabhāvenāti** kārakakārāpakabhāvena.

125. Kammakārakassa puggalassa **yo** añño puggalo kārako. **Tenapīti** kārakakārakenapi. **Tassāti** kārakakārakassa. **Aññanti** aññaṃ kammaṃ. **Evanti** iminā vuttappakārena. Tehi tehi kārakehi puggalā viya aññāni kammāni karīyantīti dasseti. Tenāha “**kammavaṭṭassa anupacchedam vadantī**”ti. Evaṃ sante puggalassa kārako, kammaṃ kārakoti ayaṃ vibhāgo idha anāmaṭṭho hoti, tathā ca sati

kāraḥaparamparāya vacanaṃ virujjheyyāti āha “**puggalassa...pe... vicāretabbameta**”nti. **Tassa kārakanti** puggalassa kārakam. **Idaṅcāti** na kevalaṃ puggalakārakassa kammakāratāpattiyeva doso, atha kho idaṃ kammakāratāya kāraḥaparamparāpajjanampi vicāretabbam, na yujjatīti attho. Puggalānañhi paṭipāṭiyā kārakabhāvo kāraḥaparamparā.

170. Eko antoti “gāho”ti sassatagāhasaṅkhāto antoti attho.

176. Siyā añño, siyā anañño, siyā na vattabbo “aññoti vā anaññoti vā”ti, evaṃ pavattanigaṅṭhavādasadisattā so eva eko neva so hoti, na aññoti laddhimattaṃ. Tenāha “**idaṃ pana natthevā**”ti. **Parassa icchāvasenevāti** paravādino laddhivaseneva. **Ekaṃ anicchantassāti** ekaṃ “so karoti, so paṭisaṃvedetī”ti gahaṇaṃ sassatadiṭṭhibhayena paṭikkhipantassa **itaraṃ** ucchedaggahaṇaṃ āpannaṃ. Tañca paṭikkhipantassa aññaṃ missakaṃ niccāniccaggahaṇaṃ, vikkheppaggahaṇaṃ āpannaṃ. **Kāraḥavedakicchāya thatvāti** sveva kārako vedako cāti imasmiṃ ādāye thatvā. **Taṃtaṃanicchāyāti** tassa tassa vādassa asaṃpaṭicchanaena. **Āpannavasenaṃpīti** āpannagāhavasenaṃpi ayaṃ anuyogo vuttoti yojanā. **Sabbesaṃ āpannattāti** heṭṭhā vuttanayena sabbesaṃ vikappānaṃ anukkamena āpannattā nāyamanuyogo katoti yojanā. **Ekekassevāti** tesu viṣuṃ viṣuṃ ekekas seva āpannattā. Tantivasena pana te vikappā ekajjhaṃ dassetvāti adhippāyo. **Ekato yojetabbam** catunnampi pañhānaṃ ekato puṭṭhattā.

Purisakārānuyogavaṇṇanā niṭṭhitā.

Kalyāṇavaggo niṭṭhito.

14. Abhiññānuyogavaṇṇanā

193. Vikubbatīti ettha **iti**-saddo ādiattho, pakārattho vā. Tena “dibbāya sotadhātuyā saddaṃ suṇātī”tiādikaṃ saṅgaṇhāti. Abhiññānuyogo daṭṭhabboti yojanā. **Tadabhiññāvato** āsavakkhayābhiññāvato. **Arahato sādhananti** arahato saccikaṭṭhaparamatthena puggalattābhāvasādhanam. **Tabbhāvassāti** arahattassa. Arahattadhārānañhi khandhā nāma puggalattaṃ tassapi hotīti.

Abhiññānuyogavaṇṇanā niṭṭhitā.

15-18. Ñātakānuyogādivaṇṇanā

209. Tatiyakoṭibhūtassāti tatiyakoṭisabhāvassa saṅkhatāsaṅkhatavinimuttasabhāvassa. **Sabhāvassāti** ca sabhāvadhammassa. **Laddhiṃ nigūhitvāti** puggalo neva saṅkhato, nāsaṅkhatoti laddhiṃ avibhāvetvā.

Ñātakānuyogādivaṇṇanā niṭṭhitā.

19. Paṭivedhānuyogādivaṇṇanā

218. Pajānaṃ nāma na hoti nibbidādīnaṃ appaccayattā. Paricchedanasamatthatañca dassetīti sambandho.

228. Saharūpabhāvo rūpena samaṅgitā, **vinārūpabhāvo** tato vinissaṭatāti tadubhayaṃ rūpassa abhantaragamaṇaṃ bahinikkhamanañca hoti. Tasmā taṃ dvayaṃ saharūpabhāvavinārūpabhāvānaṃ lakkhaṇavacananti vuttaṃ.

237. Oḷārikoti thūlo. Āhito ahaṃ māno etthāti **attā**, attabhāvo. So eva yathāsakaṃ kammunā paṭilābhitaḃbato **paṭilābho**. Padadvayenapi kāmāvacarattabhāvo kathito. **Manomayo attapaṭilābho** rūpāvacarattabhāvo. So hi jhānāmanena nibbattatā manomayo. **Arūpo attapaṭilābhoti** arūpāvacarattabhāvo. So hi rūpena amissittatā arūpoti evamettha attho veditabbo. “Attā”ti pana jīve lokavohāro niruḷho, asatipi jīve tathāniruḷhaṃ lokavohāraṃ gahetvā sammāsambuddhāpi voharantīti dassento “**iti imā lokassa samaññā, yāhi tathāgato voharati**”ti vatvā idāni yathā voharanti, taṃ pakāraṃ vibhāvento “**aparāmasa**”ntiādimāha.

Paccattasāmaññalakkhaṇavasenāti kakkhaḷaphusanādisalakkhaṇavasena aniccatādisāmaññalakkhaṇavasena ca. **Imināti** “paccattasāmaññalakkhaṇavasenā”tiādinā vuttena paramatthato puggalābhāvavacanena. **Ito purimāti** tattha tattha sakavādipaṭikkhepādivibhāvanavasena pavattā ito atthasaṃvaṇṇanato purimā. **Imināti** vā “yathā rūpādayo dhammā”tiādinā aṭṭhakathāyaṃ vuttavacanena. **Yathā cāti** ettha **ca**-saddo samuccayattho. Tena samaññānatidhāvanāṃ sampiṇḍeti. Idaṃ vuttaṃ hoti – yathā parāmāso ca na hoti janapadaniruttīyā abhinivisitabbato, yathā ca samaññātidhāvanāṃ na hoti, evaṃ ito purimā ca atthavaṇṇanā yojetabbā. Samaññātidhāvane hi sati sabbalokavohārūpacchedo siyāti.

Tasmā saccanti yasmā tattha paramatthākāraṃ anāropetvā samaññāṃ nātidhāvanto kevalaṃ lokasammutiyāva voharati, tasmā saccāṃ paresaṃ avisaṃvādanato. **Tathakāraṇanti** tatho avitatho dhammasabhāvo kāraṇaṃ pavattihetu etassāti tathakāraṇaṃ, paramatthavacanāṃ, aviparītadhammasabhāvavisaṃyanti attho. Tenāha “**dhammānaṃ tathatāya pavatta**”nti.

Paṭivedhānuyogādivaṇṇanā niṭṭhitā.

Puggalakathāvaṇṇanā niṭṭhitā.

2. Parihānikathā

1. Vādayuttiparihānikathāvaṇṇanā

239. Idaṃ suttanti idaṃ lakkhaṇamattaṃ datṭhabbaṃ. “Pañcime, bhikkhave, dhammā samayavimuttassa bhikkhuno parihānāya saṃvattanti”ti (a. ni. 5.149-150) idampi hi suttaṃ anāgāmiādīnaṃyeva parihāninissayo, na arahato. **Samayavimuttoti** aṭṭhasamāpattilābhino sekkhassettaṃ nāmaṃ. Yathāha –

“Katamo ca puggalo samayavimutto? Idhekacco puggalo kālena kālaṃ samayena samayaṃ aṭṭha vimokkhe kāyena phusitvā viharati, paññāya cassa disvā ekacce āsavā parikkhīṇā honti. Ayaṃ vuccati puggalo samayavimutto”ti (pu. pa. 1).

“Parihānidhammo”ti ca puthujjano ca ekacco ca sekkho adhippeto, na arahāti. **Tasmāti** yasmā yathādassitāni suttāni anāgāmiādīnaṃ parihāniladdhiyā nissayo, na arahato, tasmā. Taṃ nissāya taṃ apekkhitvā yasmā “arahatopi”ti ettha arahatopi parihāni, ko pana vādo anāgāmiādīnanti ayamattho labbhati, tasmā pi-saddasampiṇḍitamattaṃ dassento “**arahatopi...pe... yojetabba**”nti āha. Yasmā vā kāmāñcettaḃ dutiyasuttaṃ sekkhavasena āgataṃ, paṭhamatatiyasuttāni pana asekkhavasenapi āgatānīti tesāṃ laddhi, tasmā “arahatopi”ti aṭṭhakathāyaṃ vuttaṃ. Tenāha “**idaṃ suttam arahato**”tiādi.

Tatiyasminti “sabbesaññeva arahantānaṃ parihāni”ti etasmiṃ pañhe. So hi “sabbeva arahanto”tiādinā āgatesu tatiyo pañho. **Tesanti** mudindriyānaṃ. **Tatiyasmimpīti** pi-saddo vuttatthasamuccayo. Tena paṭhamapañhaṃ samuccinoti “tatthapi tikkhindriyā adhippetā”ti.

Soyeva na parihāyatīti sotāpannoyeva sotāpannabhāvato na parihāyatīti attho. Na cettha sakadāgāmbhāvāpattiyā sotāpannabhāvāpagamo parihāni hoti visesādhigamabhāvato. Pattavisesato hi parihānīti. **Itareti** sakadāgāmiādikā. **Uparimaggatthāyāti** uparimaggattayapaṭilābhatthāya “niyato”ti vuttamattham aggahevā.

Vādayuttiparihānikathāvaṇṇanā niṭṭhitā.

2. Ariyapuggalasamsandanaparihānikathāvaṇṇanā

241. Tatoti arahattato. **Tatthāti** dassanamaggaphale. **Vāyāmenāti** vipassanussāhanena. **Tadanantaranti** sotāpattiphalānantaram. Paṭhamam dassanamaggaphalānantaram arahattam pāpuṇāti, tato parihāno puna vāyamanto tadanantaram na arahattam pāpuṇātīti kā ettha yuttīti adhippāyo. Paravādī nāma yuttampi vadati ayuttampīti kiṃ tassa vāde yuttigavesanāyāti pana daṭṭhabbam. Aparihānasabhāvo bhāvanāmaggo ariyamaggatā dassanādassanamaggo viya. Na cettha asiddhatāsankā lokuttaramaggassa parassapi ariyamaggabhāvassa siddhattā, nāpi lokiyamaggena anekantikātā ariyasaddena visesitattā. Tathā na viruddhatā dutiyamaggādīnam bhāvanāmaggabhāvassa oḷārikakilesappahānādīnañca parassapi āgamato siddhattā.

Ariyapuggalasamsandanaparihānikathāvaṇṇanā niṭṭhitā.

3. Suttasādhanaparihānikathāvaṇṇanā

265. Puggalapaññattiatṭhakathāyam “patti, phusanā”ti ca paccakkhato adhigamo adhippetoti vuttam “**pattabbam vadatīti āha phusanāraha**”nti.

267. Katasanniṭṭhānassāti imasmiṃ sattāhe māse utumhi antovasse vā aññaṃ ārādhessāmīti katanicchayassa.

Suttasādhanaparihānikathāvaṇṇanā niṭṭhitā.

Parihānikathāvaṇṇanā niṭṭhitā.

3. Brahmācariyakathā

1. Suddhabrahmacariyakathāvaṇṇanā

269. Heṭṭhāpīti paranimmitavasavattidevehi heṭṭhāpi. **Maggabhāvanampi na icchantīti viññāyati** “idha brahmācariyavāso”ti iminā “dvepi brahmācariyavāsā natthi devesūti upaladdhivasenā”ti vuttattā.

270. Tassevāti paravādino eva. **Puggalavasenāti** “gihīnañceva ekaccānañca devāna”nti evam puggalavasena. **Tassāti** paravādino. **Paṭikkhepo na yuttoti** evam puggalavasena atthayojanā na yuttīti adhippāyo. Puggalādhiṭṭhānena pana katāpi atthavaṇṇanā okāsavasena paricchijjatīti nāyam doso. **Tassāyam adhippāyoti** ayam “gihīnañceva”tiādīnā vutto tassa paravādino yadi adhippāyo, evam saññāya paravādino sakavādīnā samānādāyoti na niggahāraho siyā. Tenāha “**saka...pe... tabbo**”ti. Paṭhamam pana anujānitvā pacchā paṭikkhepeveva niggahetabbatā veditabbā. Keci “yattha natthi pabbajjā, natthi tattha brahmācariyavāsoti pucchāya ekaccānam manussānam maggappaṭivedham sandhāya paravādino paṭikkhepo. Yadi so devānam maggappaṭilābham na icchati, sambhavantaṃ pana sabbam dassetuṃ aṭṭhakathāyam ‘gihīna’micceva avatvā ‘ekaccānañca devāna’nti vutta”nti vadanti, tam na sundaram “sandhāyā”ti vuttattā, purimoyevattho yutto.

Suddhabrahmacariyakathāvaṇṇanā niṭṭhitā.

2. Saṃsandanabrahmacariyakathāvaṇṇanā

273. Rūpāvacaramaggenāti rūpāvacarajjhānena. Tañhi rūpabhavūpapattiyā upāyabhāvato maggoti vutto. Yathāha “rūpupapattiyā maggaṃ bhāveti”ti (dha. sa. 160). **Idanti** idaṃ rūpāvacarajjhānaṃ. “Idhavihāyaniṭṭhahetubhūto rūpāvacaramaggo”tiādikaṃ dīpentam vacanaṃ anāgāmimagassa tabbhāvadīpakena “idha bhāvitamaggo”tiādikena kathaṃ sametīti codetvā yathā sametī, taṃ dassetuṃ “**pubbe panā**”tiādi vuttaṃ. Tattha “**pubbe**”ti iminā “idha bhāvitamaggo”tiādikaṃ vadanti, idhāpi pana “rūpāvacaramaggenā”tiādikaṃ. Tattha **anāgāmī evāti** anāgāmiphalaṭṭho eva. **Jhānānāgāmīti** asamucchinnajjhattasamyojanopi rūpabhava uppajjitvā anāvattidhammaggaṃ bhāvetvā tattheva parinibbāyanato. **Adhippāyoti** yathāvutto dvinnam aṭṭhakathāvacanānaṃ avirodhadīpako adhippāyo.

Idhāti kāmaloke. **Tatthāti** brahmaloke. Ettha ca paravādī evaṃ pucchitabbo “tīhi, bhikkhave, ṭhānehī”ti suttaṃ kiṃ yathārutavasena gahetabbatthaṃ, udāhu sandhāyabhāsītanti? Tattha jānamāno sandhāyabhāsītanti vadeyya. Aññathā “paranimmitavasavattideve upādāyā”tiādi vattum na sakkā “deve ca tāvatimse”ti vuttattā. Yathā hi tassa “seyyathāpi devehi tāvatimsehi saddhiṃ mantetvā”tiādīsu viya sakkam devarājānaṃ upādāya kāmāvacaradevesu tāvatimsadevā pākaṭā paññātāti tesam gahaṇam, na teyeva adhippetāti suttapadassa sandhāyabhāsītatthaṃ sampañcchitabbaṃ, evaṃ “idha brahmacariyavāso”ti ethāpi anavajjasukhaabyāsekasukhanekhammasukhādisannissayabhāvena mahānisamsatāya sāsane pabbajjā “idha brahmacariyavāso”ti imasmim sutte adhippetā. Sā hi uttarakurukānaṃ devānañca anokāsabhāvato dukkarā dullabhā ca. Tattha sūriyaparivattādīhipi devesu maggapaṭilābhāya atthitā vibhāvetabbā, uttarakurukānaṃ pana visesānadhigamabhāvo ubhinnampi icchito evāti.

Saṃsandanabrahmacariyakathāvaṇṇanā niṭṭhitā.

Brahmacariyakathāvaṇṇanā niṭṭhitā.

3. Odhisokathāvaṇṇanā

274. Odhisoti bhāgaso, bhāgenāti attho. Bhāgo nāma yasmā ekadeso hoti, tasmā “**ekadesena ekadesenā**”ti vuttaṃ. Tattha yadi catunnam maggānaṃ vasena samudayapakkhikassa kilesagaṇassa catubhāgehi pahānaṃ “odhiso pahāna”nti adhippetam, icchitamevetam sakavādissa “tīṇam samyojanānaṃ parikkhayā diṭṭhigatānaṃ pahānāyā”ti ca ādivacanato. Yasmā pana maggo catūsu saccesu nānābhisamayavasena kiccakaro, na ekābhisamayavasenāti paravādino laddhi, tasmā yathā “maggo kālena dukkham parijānāti, kālena samudayaṃ pajahati”tiādinā nānakkhaṇavasena saccesu pavattatīti icchito, evaṃ paccekampi nānakkhaṇavasena pavatteyya. Tathā sati dukkhādīnaṃ ekadesaekadesameva parijānāti pajahatīti dassetuṃ pāḷiyam “sotāpatti...pe... ekadesa pajahati”tiādi vuttaṃ. Sati hi nānābhisamaye paṭhamamaggādīhi pahātabbānaṃ samyojanattayādīnaṃ dukkhadassanādīhi ekadesaekadesappahānaṃ siyāti ekadesasotāpattimaggaṭṭhādītā, tato eva ekadesasotāpannādītā ca āpajjati anantaraphalattā lokuttarakusalānaṃ, na ca taṃ yuttaṃ. Na hi kālabhedena vinā so eva sotāpanno, asotāpanno cāti sakkā viññātuṃ. Tenāha “**ekadesam sotāpanno, ekadesam na sotāpanno**”tiādi.

Apicāyam nānābhisamayavādī evaṃ pucchitabbo “maggañānaṃ saccāni paṭivijjhantaṃ kiṃ ārammaṇato paṭivijjhati, udāhu kiccato”ti. Yadi ārammaṇatoti vadeyya, tassa vipassanāññānaṃ viya dukkhasamudayānaṃ accantaparicchedasamucchedā na yuttā tato anissaṭṭā, tathā maggadassanaṃ. Na hi sayameva attānaṃ ārabha pavattatīti yuttaṃ, maggantaraparikkappanāyam anavaṭṭhānaṃ āpajjatīti, tasmā tīṇi saccāni kiccato, nirodham kiccato ārammaṇato ca paṭivijjhantīti evamasammohato paṭivijjhantassa maggañānaṃ nattheva nānābhisamayo. Vuttañhetam “yo, bhikkhave, dukkham

passati, dukkhasamudayampi so passati”tiādi. Na cetam kālantaradassanam sandhāya vuttam. “Yo nu kho, āvuso, dukkham passati, dukkhasamudayampi so passati, dukkhanirodhampi...pe... dukkhanirodhagāminipaṭipadampi so passati”ti (saṃ. ni. 5.1100) ekasaccadassanasamaṅgino aññasaccadassanasamaṅgibhāvavicāraṇāyaṃ tadatthasādhanattham āyasmatā gavampatittherena ābhatattā paccekañca saccattayadassanassa yojitattā. Aññathā purimadiṭṭhassa puna adassanato samudayādidassane dukkhādidassanamayojanīyaṃ siyā. Na hi lokuttaramaggo lokiyamaggo viya katakārībhāvena pavattati samucchadakattā. Tathā yojane ca sabbam dassanam dassanantaraparanti dassanānuparamo siyā. Evaṃ āgamato yuttito ca nānābhīsamayassa asambhavato paccekam maggānam odhiso pahānam natthīti niṭṭhamettha gantabbam.

Odhisokathāvaṇṇanā niṭṭhitā.

4. Jahatikathāvaṇṇanā

1. Nasuttāharaṇakathāvaṇṇanā

280. Yadipi pāliyaṃ “tayo magge bhāvetī”ti vuttam, maggabhāvanā pana yāvadeva kilesasamucchindanattāti ñatvā “**kiccasabbhāvanti tīhi pahātābassa pahīnata**”nti āha. Tattha **tīhīti** heṭṭhimehi tīhi ariyamaggehi **pahātābassa** ajjhattasamyojanassa pahīnataṃ samucchindananti attho. **Taṃ pana kiccanti** adhobhāgiyasamyojanesu maggassa pahānābhīsamayakiccaṃ. **Teneva maggenāti** anāgāmi maggeneva. **Etam na sametīti** evaṃ magguppādato pageva kāmarāgabyāpādā pahīyantīti laddhikittanam iminā maggassa kiccasabbhāvakathanena na sameti na yujjati. **Tasmāti** iminā yathāvuttameva virodham paccāmasati. **Pahīnānanti** vikkhambhitānam. Yo hi jhānalābhī jhānena yathāvikkhambhite kilese maggena samucchindati, so idhādhippeto. Tenāha “**dassanamagge...pe... adhippāyo**”ti.

Jahatikathāvaṇṇanā niṭṭhitā.

5. Sabbamatthītikathāvaṇṇanā

1. Vādayuttivaṇṇanā

282. **Sabbam atthīti** ettha yasmā paccuppannam viya atītānāgatampi dharamānasabhāvanti paravādino laddhi, tasmā **sabbanti** kālavibhāgato atītādībhedaṃ sabbam. So pana “yampi natthi, tampi atthi”ti kālavimuttassa vasena anuyogo, taṃ atippasaṅgadassanavasena paravādipaṭiññāya dosāropanam. Nayadassanam vā atītānāgatānam natthibhāvassa. **Atthīti** pana ayaṃ atthibhāvo yasmā desakālākāradhammehi vinā na hoti, tasmā taṃ tāva tehi saddhiṃ yojetvā anuyogaṃ dassetuṃ “sabbattha sabbamatthī”tiādinā pāli pavattā. Tattha yadipi **sabbatthāti** idaṃ sāmāññavacanam, taṃ pana yasmā visesaniviṭṭham hoti, parato ca **sabbesūti** dhammā vibhāgato vuccanti, tasmā oḷārikassa pākaṭassa rūpadhammasamudāyassa vasena attham dassetuṃ atthakathāyaṃ “sabbatthāti sabbasmim sarīre”ti vuttam, nidassanamattam vā etam daṭṭhabbam. Tathā ca kāṇādakāpilehi paṭiññāyamānā ākāsakālādisattapakatipurisā viya paravādinā paṭiññāyamānam sabbam sabbabyāpīti āpannameva hotīti. “Sabbattha sarīre”ti ca “tile tela”nti viya byāpane bhummanti sarīrapariyāpannena sabbena bhavitabbanti vuttam “**sirasi pādā...pe... attho**”ti.

Sabbasmim kāle sabbamatthīti yojanā. Etasmim pakkhēyevassa aññāvādo paridīpito siyā “yaṃ atthi, attheva taṃ, yaṃ natthi, nattheva taṃ, asato natthi sambhavo, sato natthi vināso”ti. Evaṃ sabbenākārena sabbam sabbesu dhammesu sabbam atthīti atthoti sambandho. Imehi pana pakkhehi “sabbam sabbasabhāvaṃ, anekasattinicitābhāvā asato natthi sambhavo”ti vādo paridīpito siyā. **Yogarahitanti** kenaci yuttāyuttalakkhaṇasamyojarahitam. **Taṃ pana ekasabhāvanti** samyojarahitam nāma atthato ekasabhāvaṃ, ekadhammoti attho. Etena devavādīnam brahmadassanam athevātivādo

paridīpito siyā. **Atthīti pucchatīti** yadi sabbamatthīti tava vādo, yathāvuttāya mama diṭṭhiyā sammādiṭṭhibhāvo atthīti ekantena tayā sampañcchitabbo, tasmā “kiṃ so atthī”ti pucchatīti attho.

Vādayuttivaṇṇanā niṭṭhitā.

2. Kālasaṃsandanakathāvaṇṇanā

285. Atītā ...pe... karitvāti etthāyaṃ saṅkhepattho – atītaṃ anāgatanti rūpassa imaṃ visesaṃ, evaṃ visesaṃ vā rūpaṃ aggahetvā paccuppannatāvisesavisitṭharūpameva appiyaṃ paccuppannarūpabhāvānaṃ samānādhikaraṇatā etasmimyeva visaye appetabbaṃ, vacīgocaraṃ pāpetabbaṃ satipi nesaṃ visesanavisesitabbatāsāṅkhāte vibhāge tathāpi avibhajitabbaṃ katvāti. Yasmā pana pāliyaṃ “paccuppannanti vā rūpanti vā”ti paccuppannarūpasaddehi tadatthassa vattabbākāro itisaddehi dassito, tasmā “**paccuppannasaddena...pe... vuttaṃ hotī**”ti āha. **Rūpapaññattīti** rūpāyatanapaññatti. Sā hi sabhāvadhammupādānā tajjāpaññatti. Tenevāha “**sabhāvaparicchinne pavattā vijjamaṇapaññatti**”ti. **Rūpasamūhaṃ upādāyāti** taṃtaṃattapaññattiyā upādānabhūtānaṃ abhāvavibhāvanākārena pavattamānānaṃ rūpadhammānaṃ samūhaṃ upādāya. Upādānupādānampi hi upādānamevāti. **Tasmāti** samūhupādāyādhīnatāya avijjamaṇapaññattibhāvato. **Vigamāvattabbatāti** vigamassa vatthabhāvāpagamassa avattabbatā. Na hi odātāvīgamena avatthaṃ hotī. Na pana yuttā rūpabhāvassa vigamāvattabbatāti yojanā. **Rūpabhāvoti** ca rūpāyatanasabhāvo cakkhuviññāṇassa gocarabhāvo. Na hi tassa paccuppannabhāvavīgame vigamāvattabbatā yuttā.

Kālasaṃsandanakathāvaṇṇanā niṭṭhitā.

Vacanasodhanavaṇṇanā

288. Anāgataṃ vā paccuppannaṃ vāti ettha vā-saddo aniyamattho yathā “khadire vā bandhitabbaṃ palāse vā”ti. Tasmā “hutvā hotī”ti ettha hoti-saddo anāgatapaccuppannesu yaṃ kiñci padhānaṃ katvā sambandhaṃ labhatīti dassento “**anāgataṃ...pe... daṭṭhabba**”nti āha. Tattha **paccuppannaṃ hontanti** paccuppannaṃ jāyamānaṃ paccuppannabhāvaṃ labhantaṃ. Tenāha “**taññeva anāgataṃ taṃ paccuppannanti laddhivasenā**”ti. **Tampi hutvā hotīti** yaṃ anāgataṃ hutvā paccuppannabhāvappattiyā “hutvā hotī”ti vuttaṃ, kiṃ tadapi puna hutvā hotīti pucchati. **Tabbhāvāvīgamatotī** paccuppannabhāvato hutvāhotibhāvānupagamato. **Paccuppannābhāvatoti** paccuppannatāya abhāvato.

Vacanaṃ arahatīti iminā vacanamatte na koci dosoti dasseti. Idaṃ vuttaṃ hotī – yadipi tassa puna hutvā bhūtassa puna hutvāhotibhāvo natthi, punappunaṃ ñāpetabbatāya pana dutiyaṃ tato parampi tathā vattabbataṃ arahatīti “āmantā”ti paṭijānātīti. **Dhammeti** sabhāvadhamme. Tappaṭikkhepatto **adhamme** abhāvadhamme. Tenāha “**sasavisāṇe**”ti.

Paṭikkhittanayenāti “hutvā hotī, hutvā hotī”ti ettha pubbe yadetam tayā “anāgataṃ hutvā paccuppannaṃ hotī”ti vadatā “taṃyeva anāgataṃ taṃ paccuppanna”nti laddhivasena “anāgataṃ vā paccuppannaṃ vā hutvā hotī”ti vuttaṃ, “kiṃ te tampi hutvā hotī”ti pucchite yo paravādīnā hutvā bhūtassa puna hutvāabhāvato “na hevā”ti paṭikkhepo kato, tena paṭikkhittanayena. Svāyaṃ yadeva rūpādi anāgataṃ, tadeva paccuppannanti satipi atthābhede anāgatapaccuppannanti pana attheva kālabhedoti taṃkālabhedavirodhāya paṭikkhepo pavattoti āha “**paṭikkhittanayenāti kālanānattenā**”ti. Tena hi so ayañca paṭikkhepo nīto pavattitoti. **Paṭiññātanayenāti** idampi yathāvuttapaṭikkhepānantaraṃ yaṃ paṭiññātaṃ, taṃ sandhāyāha. Yathā hi sā paṭiññā atthābhedenā nīta pavattitā, tathāyampi. Tenevāha “**atthānānattenā**”ti, anāgatādippabhedāya kālapaññattiyā upādānabhūtassa atthassa abhedenāti attho. Yathā upādānabhūtārūpādiatthābhedepe tesam khaṇattayānāvatti taṃsamaṅgitā anāgatapaccuppannabhāvāvattitā, tathā tattha vuccamānā hutvāhotibhāvā yathākkamaṃ purimacchimesu pavattitā purimacchimakiriyāti katvāti imamatthaṃ dassento “**atthānānattaṃ...**

pe... paṭijānāti’ti vatvā puna “**atthānānattameva hī**”tiādīnā tameva atthaṃ samattheti. Yathā pana “taṃ jīvaṃ taṃ sarīra”nti paṭijānantassa jīvova sarīraṃ, sarīrameva jīvoti jīvasarīraṇaṃ anaññattaṃ āpajjati, evaṃ “taññeva anāgataṃ taṃ paccuppanna”nti ca paṭijānantassa anāgatapaccuppannānaṃ anaññattaṃ āpananti paccuppannānāgatesu vuttā hotibhāvahutvābhāvā anāgatapaccuppannesupi āpajjeyyunti vuttaṃ aṭṭhakathāyaṃ “evaṃ sante anāgatampi hutvāhoti nāma, paccuppannampi hutvāhotiyeva nāmā”ti.

Anuññātapañhassāti “taññeva anāgataṃ taṃ paccuppannanti? Āmantā”ti evaṃ atthānānattaṃ sandhāya anuññātassa atthassa. Ñātuṃ icchito hi attho pañho. **Doso vuttoti** anāgataṃ hutvā paccuppannabhūtassa puna anāgataṃ hutvā paccuppannabhāvāpattisañkhāto doso vutto purimanaye. Pacchimanaye pana anāgatapaccuppannesu ekekassa hutvāhotibhāvāpattisañkhāto doso vuttoti attho. **Paṭikkhittapañhanti** “taṃyeva anāgataṃ taṃ paccuppannanti? Na hevaṃ vattabbe”ti evaṃ kālanānattaṃ sandhāya paṭikkhittapañhaṃ. **Tenāti** anāgatapaccuppannānaṃ hotihutvābhāvapaṭikkhepena. **Codetīti** anāgataṃ tena hoti nāma, paccuppannaṃ tena hutvā nāma, ubhayampi anaññattā ubhayasabhāvanti codeti. **Etthāti** “hutvā hoti”ti etasmiṃ pañhe **kathaṃ hoti dosoti** codetīti. “**Tassevā**”ti pariharati. Kathaṃ katvā codanā, kathañca katvā parihāro? Anujānanaṃ paṭikkhepanānaṃ bhinnavisayatāya codanā, atthābhedaḥkālābhedavisayatā abhinnādhāratāya tesam parihāro. **Tassevāti** hi paravādīno evāti attho.

Tadubhayaṃ gahetvāti “taṃ anāgataṃ taṃ paccuppanna”nti ubhayaṃ ekajjhaṃ gahetvā. **Ekekanti** tesu ekekaṃ. **Ekekamevāti** ubhayaṃ ekajjhaṃ aggahetvā ekekameva visuṃ visuṃ imasmiṃ pakkhe tathā na yuttanti attho. **Esa nayoti** atidesaṃ katvā saṃkhittattā taṃ dubbhiññeyyanti “**anāgatassa hī**”tiādīnā vivarati. **Paṭijānitabbaṃ siyā** anāgatapaccuppannānaṃ yathākkamaṃ hotihutvābhāvatoṭi adhippāyo. “Yadetaṃ tayā”tiādīnā pavatto saṃvaṇṇanāyayo **purimanayo**, tattha hi “yadi te anāgataṃ hutvā”tiādīnā hutvāhotibhāvō codito. “Aparo nayo”tiādiko **dutīyanayo**. Tattha hi “anāgatassa...pe... hutvāhotiyeva nāmā”ti anāgatādīsu ekekassa hutvāhotināmatā coditā.

Vacanasodhanavaṇṇanā niṭṭhitā.

Atītaññādikathāvaṇṇanā

290. Kathaṃ vuccatīti kasmā vuttaṃ. **Tenāti** hi iminā dutīyapucchāya “atītaṃ ñāṇa”nti idaṃ paccāmaṭṭhaṃ, tañca paccuppannaṃ ñāṇaṃ, atītadhammārammaṇatāya atītanti vuttaṃ. Tenāha aṭṭhakathāyaṃ “puna puṭṭho atītārammaṇaṃ paccuppannaṃ ñāṇa”ntiādi.

Atītaññādikathāvaṇṇanā niṭṭhitā.

Arahantādikathāvaṇṇanā

291. “Arahaṃ khīṇāsavo”tiādīnā suttavirodho pākaṭoṭi idameva dassento “**yuttivirodho...pe... daṭṭhabbo**”ti āha. Tattha **anānattanti** aviseso. **Evamādikoti ādi**-saddena katakiccatābhāvō anohitabhāratāti evamādinā saṅgaho daṭṭhabbo.

Arahantādikathāvaṇṇanā niṭṭhitā.

Padasodhanakathāvaṇṇanā

295. Yo atītasaddābhidheyyo attho, so atthisaddābhidheyoti dvepi samānādhikaraṇatthāti katvā vuttaṃ “**atītaatthisaddānaṃ ekatthattā**”ti, na, atītasaddābhidheyasseva atthisaddābhidheyattā. Tenāha “**atthisaddatthassa ca nvātītabhāvato**”ti. Tena kiṃ siddhanti āha “**atītaṃ nvātītaṃ,**

nvātītañca atītaṃ hotī”ti. Idaṃ vuttaṃ hoti – yadi tava matena atītaṃ atthi, atthi ca nvātītanti atītañca no atītaṃ siyā, tathā atthi no atītaṃ atītañca no atītaṃ atītaṃ siyāti, yathā “atītaṃ atthi”ti ettha atītameva atthīti nāyaṃ niyamo gahetabbo anatītassapi atthibhāvassa icchitattā. Tenevāha “**atthi siyā atītaṃ, siyā nvātīta**”nti. Yena hi ākārena atītassa atthibhāvo paravādinā icchito, tenākārena anatītassa anāgatassa paccuppannassa ca so icchito. Kena pana ākārena icchitoti? Sañkhatākārena. Tena vuttaṃ “tenātītaṃ nvātītaṃ, nvātītaṃ atīta”nti. Tasmā atītaṃ atthiyevāti evamettha niyamo gahetabbo. Atthibhāve hi atītaṃ niyamaṃ, na atīte atthibhāvo niyamito, “na pana nibbānaṃ atthi”ti ettha pana nibbānameva atthīti ayampi niyamo sambhavaṃ so eva gahetabbo. Yadihi hi nibbānaṃ paramatthato atthibhāvaṃ upādāya uttarapadāvadhāraṇaṃ labbhati tadaññassapi abhāvato, tathāpi asañkhatākārena aññassa anupalabbhanato tathā nibbānameva atthīti purimapadāvadhāraṇe atthe gayhamāne “atthi siyā nibbānaṃ, siyā no nibbāna”nti codanā anokāsā. Atītādīsu pana purimapadāvadhāraṇaṃ paravādinā na gahitanti natthettha atippasaṅgo. Aggahaññācassa pālīto eva viññāyati. Evamettha atītādīnaṃ atthitaṃ vadantassa paravādissevāyaṃ iṭṭhaviḥhātadosāpatti, na pana nibbānassa atthitaṃ vadantassa sakavādissāti. **Paṭipādanā** patiṭṭhāpanā veditabbā.

Etthāha “atītaṃ atthi”tiādīnā kiṃ pañāyaṃ atītānāgatānaṃ paramatthato atthibhāvo adhippeto, udāhu na paramatthato. Kiñcetta – yadi tāva paramatthato, sabbakālaṃ atthibhāvato sañkhārānaṃ sassatabhāvo āpajjati, na ca taṃ yuttaṃ āgamavirodhato yuttivirodhato ca. Atha na paramatthato, “sabbamatthi”tiādīkā codanā niratthikā siyā, na niratthikā. So hi paravādī “yaṃ kiñci rūpaṃ atītānāgata”ntiādīnā atītānāgatānaṃ khandhabhāvassa vuttattā asati ca atīte kusalākusalassa kammassa āyatīṃ phalaṃ kathaṃ bhaveyya, tattha ca pubbenivāsaññādi anāgate ca anāgatamaññādi kathaṃ pavatteyya, tasmā attheva paramatthato atītānāgatanti yaṃ paṭijānāti, taṃ sandhāya ayaṃ katāti. Ekantena cetāṃ sampaṭicchitabbāṃ. Yepi “sabbāṃ atthi”ti vadanti atītaṃ anāgataṃ paccuppannañca, te sabbatthivādāti.

Catubbidhā cete te sabbatthivādā. Tattha **keci bhāvaññattikā**. Te hi “yathā suvaṇṇabhājanassa bhinditvā aññathā kariyamānassa sañṭhānasseva aññathattaṃ, na vaṇṇādīnaṃ, yathā ca khīraṃ dadhibhāvena pariṇamantaṃ rasavīriyavipāke pariccajati, na vaṇṇaṃ, evaṃ dhammāpi anāgataddhuno paccuppannaddhaṃ sañkamantā anāgatabhāvameva jahanti, na attano sabhāvaṃ. Tathā paccuppannaddhuno atītaddhaṃ sañkame”ti vadanti. **Keci lakkhaṇaññattikā**, te pana “tīsu addhāsu pavattamāno dhammo atīto atītalakkhaṇayutto, itaralakkhaṇehi ayutto. Tathā anāgato paccuppanno ca. Yathā puriso ekissā itthiyā ratto aññāsu aratto”ti vadanti. **Aññe avatthaññattikā**, te “tīsu addhāsu pavattamāno dhammo taṃ taṃ avatthaṃ patvā añño aññaṃ niddisīyati avatthantarato, na sabhāvato. Yathā ekaṃ akkhaṃ ekaṅge nikkhittaṃ ekanti vuccati, sataṅge satanti, sahassaṅge sahassanti, evaṃsampaḍamida”nti. **Apāre aññathaññattikā**, te pana “tīsu addhāsu pavattamāno dhammo taṃ taṃ apekkhitvā tadaññasabhāvena vuccati. Yathā taṃ ekā itthi mātāti ca vuccati dhīta”ti ca. Evamete cattāro sabbatthivādā.

Tesu paṭhamo pariṇāmavādītāya kāpilapakkhikesu pakkhipitabboti. Dutiyassapi kālasaṅkaro āpajjati sabbassa sabbalakkhaṇayogato. Catutthassapi saṅkaro. Ekasseva dhammassa pavattikkhaṇe tayopi kālā samodhānaṃ gacchanti. Purimapacchimakkhaṇā hi atītānāgatā, majjhimo paccuppannoti. Tatiyassa pana avatthaññattikassa natthi saṅkaro dhammakiccena kālavavatthānato. Dhammo hi sakiccakkhaṇe paccuppanno, tato pubbe anāgato, pacchā atītoti.

Tattha yadi atītampi dharamānasabhāvātāya atthi anāgatampi, kasmā taṃ atītanti vuccati anāgatanti vā, nanu vuttaṃ “dhammakiccena kālavavatthānato”ti. Yadi evaṃ paccuppannassa cakkhussa kiṃ kiccaṃ, anavasesapaccayasamavāye phaluppādanaṃ. Evaṃ sati anāgatassapi cassa tena bhavitabbāṃ atthibhāvatoṭi lakkhaṇasaṅkaro siyā. Idañcetta vattabbāṃ, teneva sabhāvena sato dhammassa kiccaṃ, kiccakaraṇe ko vibandho, yena kadāci karoti kadāci na karoti paccayasamavāyabhāvato, kiccassa samavāyābhāvatoṭi ce? Taṃ na, niccaṃ atthibhāvassa icchitattā. Tato eva ca addhunaṃ avavatthānaṃ. Dhammo hi teneva sabhāvena vijjamāno kasmā kadāci atītoti vuccati kadāci anāgatoti kālassa

vavatthānaṃ na siyā. Yo hi dhammo ajāto, so anāgato. Yo jāto na ca niruddho, so paccuppanno. Yo niruddho, so atīto. Idamevettha vattabbaṃ. Yadi yathā vattamānaṃ atthi, tathā atītaṃ anāgatañca atthi, tassa tathā sato ajātataṃ niruddhatā ca kena hotīti. Teneva hi sabhāvena sato dhammassa kathamidaṃ sijjhati ajātoti vā niruddhoti vā. Kiṃ tassa pubbe nāhosi, yassa abhāvato ajātoti vuccati, kiñca pacchā natthi, yassa abhāvato niruddhoti vuccati. Tasmā sabbathāpi addhattayaṃ na sijjhati, yadi ahutvā saṅgati hutvā ca vinassatīti na sampāṭicchanti. Yaṃ pana vuttaṃ “saṅkhatalakkaṇayogato na sassatabhāvappasaṅgo”ti, tayidaṃ kevalaṃ vācāvattumattaṃ udayavayāsambhavato, atthi ca nāma sabbadā so dhammo, na ca niccoti kutoyaṃ vācāyutti.

Sabhāvo sabbadā atthi, nicco dhammo na vuccati;
Dhammo sabhāvato nāñño, aho dhammesu kosalaṃ.

Yañca vuttaṃ “yaṃ kiñci rūpaṃ atītānāgata”ntiādinā atītānāgatānaṃ khandhabhāvassa vuttattā atthevāti, vadāma. Atītaṃ bhūtapubbaṃ, anāgataṃ yaṃ sati paccaye bhavissati, tadubhayassapi ruppanādisabhāvānātivattanato rūpakkhandhādibhāvo vutto. Yathā dhammasabhāvānātivattanato atīta dhammā anāgatā dhammāti, na dharamānasabhāvātāya. Ko ca evamāha “paccuppannaṃ viya taṃ atthi”ti. Kathaṃ panetaṃ atthīti? Atītānāgatasabhāvena. Idaṃ pana taveva upaṭṭhitaṃ, kathaṃ taṃ atītaṃ anāgatañca vuccati, yadi niccakālaṃ atthīti.

Yaṃ pana “na tāva kālaṃ karoti, yāva na taṃ pāpaṃ byantī hotī”ti (ma. ni. 3.250) sutte vuttaṃ, taṃ yasmiñca santāne kammaṃ katūpacitaṃ, tattha tenāhitaṃ taṃ phaluppādanasamatthataṃ sandhāya vuttaṃ, na atītaṃ kammaṃ dharamānasabhāvattā. Tathā sati sakena bhāvena vijjamānaṃ kathaṃ taṃ atītaṃ nāma siyā. Itthañcetāṃ evaṃ sampāṭicchitabbaṃ, yaṃ saṅkhārā ahutvā sambhavanti, hutvā pativenti tesāṃ udayato pubbe vayato ca pacchā na kāci ṭhiti nāma atthi, yato atītānāgataṃ atthīti vucceyya. Tena vuttaṃ –

“Anidhānagatā bhaggā, puñjo natthi anāgate;
Uppannā yepi tiṭṭhanti, ārage sāsapūpamā”ti. (mahāni. 10, 39);

Yadi cānāgataṃ paramatthato siyā, ahutvā sambhavantīti vuttaṃ na sakkā. Paccuppannakāle ahutvā sambhavantīti ce? Na, dhammappavattimattattā kālassa. Atha attano sabhāvena ahutvā sambhavantīti, siddhametaṃ anāgataṃ paramatthato natthīti. Yañca vuttaṃ “asati atīte kusalākusalassa kammaṃ āyatim phalaṃ kathaṃ bhavēyyā”ti, na kho panettha atītakammato phaluppatti icchitā, atha kho tassa katattā tadāhitavisesato santānato. Vuttañhetāṃ bhagavatā “kāmāvacarassa kusalassa kammaṃ katattā upacitattā vipākaṃ cakkhuvīññānaṃ uppannaṃ hotī”ti (dha. sa. 431). Yassa pana atītānāgataṃ paramatthato atthi, tassa phalaṃ niccaveva atthīti kiṃ tattha kammaṃ sāmattiyaṃ. Uppādane ce, siddhamidaṃ ahutvā bhavatīti. Yaṃ pana vuttaṃ “asati atītānāgate kathaṃ tattha ñānaṃ pavatteyyā”ti, yathā taṃ ālambaṇaṃ, taṃ tathā atthi, kathañca taṃ ālambaṇaṃ, ahosi bhavissati cāti. Na hi koci atītaṃ anussaranto atthīti anussarati, atha kho ahosīti. Yathā pana vattamānaṃ ārammaṇaṃ anubhūtaṃ, tathā taṃ atītaṃ anussarati. Yathā ca vattamānaṃ bhavissati, tathā buddhādīhi gayhati. Yadi ca taṃ tatheva atthi, vattamānameva taṃ siyā. Atha natthi, siddhaṃ “asantaṃ ñānaṃ ārammaṇaṃ hotī”ti. Vijjamānaṃ vā hi cittasaññātaṃ avijjamānaṃ vā ārammaṇaṃ etesaṃ atthīti ārammaṇā, cittacetāsikā, na vijjamānaṃyeva ārabha pavattanato, tasmā paccuppannameva dharamānasabhāvaṃ na atītānāgatanti na tiṭṭhati sabbatthivādo. Keci pana “na atītādīnaṃ atthitāpaṭiññāya sabbatthivādā, atha kho āyatanaṃ sabbassa atthitāpaṭiññāyā”ti vadanti, tesāṃ matena sabbeva sāsānikā sabbatthivādā siyunti.

Padasodhanakathāvaṇṇanā niṭṭhitā.

Sabbamatthītikathāvaṇṇanā niṭṭhitā.

6. Atītakhandhādīkathā

1. Nasuttasādhanakathāvaṇṇanā

297. “Atītaṃ anāgataṃ paccuppanna”nti ayaṃ kālavibhāgaparicchinno vohāro dhammānaṃ taṃ taṃ avatthāvisesaṃ upādāya paññatto. Dhammo hi sakiccakkhaṇe paccuppanno, tato pubbe anāgato, pacchā atītoti vuttovāyamattho. Tattha yadipi dhammā aniccatāya anavaṭṭhitā, avatthā pana tesam yathāvuttā vavatthitāti tadupādānā kālapaññattipi vavatthitā eva. Na hi atītādi anāgatādibhāvena voharīyati, khandhādipaññatti pana anapekkhitakālavisesā. Tīsupi hi kālesu rūpakkhandho rūpakkhandhova, tathā sesā khandhā āyatanadhātuyo ca. Evamavaṭṭhite yasmā paravādī “atthī”ti imaṃ paccuppannaniyataṃ vohāraṃ atītānāgatesupi āropeti, tasmā so addhasaṅkaraṃ karoti. Paramatthato avijjamāne vijjamāne katvā voharatīti tato vivecetum **“atītaṃ khandhā”**tiādikā ayaṃ kathā āradhā.

Yasmā pana ruppanādisabhāve atītādibhedabhinne dhamme ekajjhaṃ gahetvā tattha rāsaṭṭhaṃ upādāya khandhapaññatti, cakkhurūpādīsu kāraṇādiatthaṃ suññataṭṭhaṇca upādāya āyatanapaññatti dhātupaññatti ca, tasmā sā addhattayasādhāraṇā, na atītādipaññatti viya addhavisesaḍhiṭṭhānāti āha **“khandhādibhāvāvijahanato atītānāgatāna”**nti. Te panete atītādi ke khandhādi ke viya sabhāvadhammato sañjānanto paravādī “atthī”ti paṭijānātīti āha **“atītānāgatānaṃ atthitaṃ icchantassā”**ti. Sesamettha yaṃ vattabbaṃ, taṃ heṭṭhā vuttanayameva.

“Tayome, bhikkhave, niruttipathā”ti suttaṃ **niruttipathasuttaṃ**. Tattha hi paccuppannasseva atthibhāvo vutto, na atītānāgatānaṃ. Tena vuttaṃ **“atthitāya vāritattā”**ti. Yadi evaṃ “atthi, bhikkhave, nibbāna”nti idaṃ kathanti? Taṃ sabbadā upaladdhito vuttaṃ nicasabhāvañāpanatthaṃ asaṅkhatadhammassa, idha pana saṅkhatadhammānaṃ khaṇattayasamaṅgitāya atthibhāvo na tato pubbe pacchā cāti paññāpanatthaṃ “yaṃ, bhikkhave, rūpaṃ...pe... na tassa saṅkhā bhavissatī”ti vuttaṃ. Etena “atthī”ti samaññāya anupādānato atītaṃ anāgataṃ paramatthato natthīti dassitaṃ hoti. **Imināvūpāyenāti** “khandhādibhāvāvijahanato”ti evaṃ vuttena hetunā. Upapattisādhanayutti hi idha “upāyo”ti vuttā.

Nasuttasādhanakathāvaṇṇanā niṭṭhitā.

2. Suttasādhanakathāvaṇṇanā

298. Ete dhammāti ete khandhaāyatanadhātudhammā. **Suttāharaṇanti** niruttipathasuttāharaṇaṃ. **Nesanti** atītānāgatānaṃ.

Suttasādhanakathāvaṇṇanā niṭṭhitā.

Atītakhandhādikathāvaṇṇanā niṭṭhitā.

7. Ekaccaṃatthītikathā

1. Atītādiekaccakathāvaṇṇanā

299. Ye katūpacitā kusalākusalā dhammā vipākadānāya akatokāsā, katokāsā ca ye “okāsakatuppannā”ti vuccanti. Ye ca vippakatavipākā, te sabbepi “avipakkavipākā”ti veditabbā. Tesam vipākadānasāmatthiyaṃ anapagatanti adhippāyena paravādī atthitaṃ icchati. Ye pana paravādī sabbena sabbam vipakkavipākā kusalākusalā dhammā, tesam apagatanti natthitaṃ icchati. Tenāha “atthīti ekaccaṃ atthi ekaccaṃ natthī”tiādi. Evaṃ icchantassa pana paravādino yathā avipākesupi ekaccaṃ natthīti āpajjati, evaṃ vipakkavipākesu avipakkavipākesu ca āpajjatevāti dassetum “avipakkavipākā dhammā ekacce”tiādinā pāḷi pavattā. Tena vuttaṃ **“tiṇṇaṃ rāsīnaṃ vasesā”**tiādi. **Vohāravasenāti** phalassa anuparamavohāravasena, hetukiccaṃ pana anuparataṃ anupacchinnaṃ atthīti laddhiyaṃ ṭhitattā codetabbova. Avicchedavasena pavattamānañhi phalassa pabandhavohāraṃ paravādī

vohārato atthīti icchati, hetu panassa kammaṃ paramatthato ca kammūpacayavādibhāvato pattiappattisabhāvatādayo viya cittavippayutto kammūpacayo nāma eko saṅkhāradhammo avipanno, sopi tasseva vevacananti paravādī. Yaṃ sandhāyāha –

“Nappacayanti kammāni, api kappasahassato;
Patvā paccayasāmaggiṃ, kāle paccanti pāṇina’nti.

Yañca sandhāya parato paribhogamayapuññakathāya “paribhogamayaṃ pana cittavippayuttaṃ uppajjatīti laddhiyā paṭijānātī”ti vakkhati.

Ekaccaṃatthītikathāvaṇṇanā niṭṭhitā.

8. Satipaṭṭhānakathāvaṇṇanā

301. Paramatthasatipaṭṭhānattāti etena lokuttarāya eva sammāsatiyā tatthāpi maggabhūtāya nippariyāyena satipaṭṭhānabhāvo niyyānikattā itarāya pariyāyenāti dasseti. Maggaphalasammāsatiyā dhammānussatibhāvapariyāyo atthīti “**lokiyalokuttarasatipaṭṭhānasamudāyabhūtassā**”ti vuttaṃ. **Satisamudāyabhūtassa** na satigocarabhūtassāti adhippāyo. Satigocarassa hi satipaṭṭhānataṃ codetum pāḷiyāṃ “cakkhāyatanam satipaṭṭhāna”nti āradham. Tena vuttaṃ “**sabbadhammānaṃ pabhedapucchāvasena vutta**”nti. Suttasādhanaṃ pana paṭhamam lokiyasatipaṭṭhānavasena, dutiyam missakavasena, tatiyam lokuttaravasena dassitanti vedītabbam.

Satipaṭṭhānakathāvaṇṇanā niṭṭhitā.

9. Hevatthikathāvaṇṇanā

304. Hevatthikathāyaṃ “sabbo dhammo sakabhāvena atthi parabhāvena natthī”ti pavatto paravādīvādo yathā vibhajja paṭipucchā vā na byākātabbo, evaṃ ekaṃsato na byākātabbo visesābhāvato, kevalam ṭhapanīyapakkhe tiṭṭhatīti adhippāyenāha “**avattabbuttarenā**”ti. Yathā hi sabbe vādā sappatīvādāvāti paṭiññā bhūtakathanattā avattabbuttarā upekkhitabbā, evamayampīti vedītabbam. Tenāha “**upekkhitabbena**”ti. Atha vā avattabbam uttaram **avattabbuttaram**. Yathā aniccavādinam pati anicco saddo paccayādhīnavuttitoti, uttaram na vattabbam siddhasādhanaabhāvato, evaṃ idhāpi daṭṭhabbam. Siddhasādhanañhi daḍḍhassa ḍahanasadisattā niratthakameva siyā, atṭhakathāyaṃ pana yasmā paravādinā yena sabhāvena yo dhammo atthi, teneva sabhāvena so vinā kālābhedādirāmasanena natthīti paṭiṭṭhāpīyati, tasmā “**ayoniso paṭiṭṭhāpitattā**”ti vuttaṃ.

Ettha ca “hevatthi, hevaṃ natthī”ti paṭijānanta paravādinā yathā sapaṇabhāvehi rūpādīnam atthitā paṭiññātā, evaṃ kāladesādibhedehipi sā paṭiññātā eva. Tenevāha “**atītaṃ anāgatapaccuppannavasena, anāgatapaccuppannāni vā atītādivasena natthī**”ti. Evaṃ sati nigaṇṭhācelakavādo paridīpito siyā. Te hi “siyā atthi, siyā natthi, siyā atthi ca natthi cā”tiādīnā sabbapadatthesu pattabhāge paṭijānanti. Tattha yadi vatthuno sabhāveneva, desakālasantānavasena vā natthitā adhippetā, taṃ siddhasādhanaṃ sakavādinopi icchitattā. Yassa hi dhammassa yo sabhāvo, na so tato aññathā upalabbhati. Yadi upalabbheyya, añño eva so siyā. Na cettha sāmāññalakkhaṇam nidassetabbam salakkhaṇassa adhippetattā tassa natthibhāvassa abhāvato. Yathā ca parabhāvena natthitāya na vivādo, evaṃ desakālantaṃsupi ittarakālattā saṅkhārānaṃ. Na hi saṅkhārā desantaram, kālantaram vā saṅkamanti khaṇikabhāvato. Eteneva pariyāyantarena natthitāpi paṭikkhattā vedītabbā. Yathā ca atthitā, natthitā vinā kālābhedena ekasmiṃ dhamme paṭiṭṭham na labhanti aññamaññāviruddhattā, evaṃ sabbadāpi nīcattā.

Yaṃ pana te vadanti “yathā suvaṇṇam kaṭakādirūpena ṭhitam rucakādhīvaṃ āpajjatīti nīcāniccam. Tañhi suvaṇṇabhāvāvijāhanato nīcāṃ kaṭakādhīvahānito anīcāṃ, evaṃ

sabbadhammā”ti. Te idaṃ vattabbā “kiṃ kaṭakabhāvo kaṭakassa, udāhu suvaṇṇassā”ti. Yadi kaṭakassa, suvaṇṇanirapekkho siyā tadaññabhāvo viya. Atha suvaṇṇassa, niccakālaṃ tattha upalabbheyya suvaṇṇabhāvo viya. Na ca sakkā ubhinnaṃ ekabhāvoti vattuṃ kaṭakavināsepi suvaṇṇāvināsato. Atha matam, suvaṇṇakaṭakādīnaṃ pariyāyīpariyāyabhāvato nāyaṃ dosoti. Yathā hi kaṭakapariyāyanirodhena rucakapariyāyuppādepi pariyāyī tatheva tiṭṭhati, evaṃ manussapariyāyanirodhe devapariyāyuppādepi pariyāyī jīvadhrabyaṃ tiṭṭhatīti niccāniccam, tathā sabbadrabyānīti. Tayidaṃ ambaṃ puṭṭhassa labujabyākaraṇaṃ. Yaṃ sveva nicco aniccoti vā vadanto aññattha niccataṃ aññattha aniccataṃ paṭijānāti, atha pariyāyapariyāyīnaṃ anaññatā icchitā, evaṃ sati pariyāyopi nicco siyā pariyāyino anaññatā pariyāyasarūpaṃ viya, pariyāyī vā anicco pariyāyato anaññatā pariyāyasarūpaṃ viyāti. Atha nesam aññā anaññatā, evaṃ sati vuttadosadvayānavattī. Apica koyaṃ pariyāyo nāma, yadi saṅghānaṃ, suvaṇṇo tāva hotu, kathaṃ jīvadhrabye arūpibhāvato. Yadi tassapi saṅghānavantaṃ icchitaṃ, tathā satissa ekasmimpi sattasantāne bahutā āpajjati sarūpatā ca saṅghānavantesupi pīlakādīsu tathādassanato. Atha pavattiviseso, evampi bahutā khaṇikatā ca āpajjati, tasmā pariyāyasarūpameva tāva paṭiṭṭhapetabbam.

Yaṃ pana vuttaṃ “suvaṇṇaṃ kaṭakādirūpena ṭhita”nti, tattha sampattiyogato viññāyamānesu visitṭhesu rūpagandharasaphoṭṭhabbesu kiṃ ekaṃ, udāhu tesam samudāyo, tabbinimuttaṃ vā dhammantaraṃ suvaṇṇanti? Tattha na tāva rūpādīsu ekekaṃ suvaṇṇaṃ tena suvaṇṇakiccāsiddhito, nāpi tabbinimuttaṃ dhammantaraṃ tādīsassa abhāvato. Atha samudāyo, taṃ pana paññattimattanti na tassa niccatā, nāpi aniccata sambhavati. Yathā ca suvaṇṇassa, evaṃ kaṭakassapi paññattimattattāti. Tayidaṃ nidassanaṃ paravādino jīvadhrabyassapi paññattimattaṃ tasseva sādhetīti kuto tassa niccāniccatāti alamatippapañcena.

Hevatthikathāvaṇṇanā niṭṭhitā.

Mahāvaggavaṇṇanā niṭṭhitā.

2. Dutiyavaggo

1. Parūpahāraṇṇanā

307. Vikkhambhitarāgāva avikkhambhitarāgānaṃ adhimānikatāya asambhavatoti yāva adhimānikaṃ, tāva sampajānā niddaṃ okkamantīti adhippāyo. “Adhimānikāna”nti idaṃ bhūtapubbagatiyā vuttanti āha “**adhimānikapubbā adhippetā siyu**”nti.

308. Yaṃ vimatigāhakāraṇaṃ vuccamānaṃ, taṃ “handā hī”ti paraṃ jotetīti adhippāyenāha “**kāraṇattheti yutta**”nti. Vimatigāhassa pana nicchitataṃ “handā hī”ti paraṃ jotetīti vuttaṃ “**vacasāyatthe**”ti.

Parūpahāraṇṇanā niṭṭhitā.

5. Vacībhedaṭṭhāvaṇṇanā

326. Soti paṭhamamaggaṭṭho. **Tasmāti** yasmā “virajaṃ vītamalaṃ dhammacakkhuṃ udapādi ‘yaṃ kiñci samudayadhammaṃ, sabbam taṃ nirodhadhamma’”nti suttassa atthaṃ aññathā gahetvā udayabbayānupassanānissandena maggakkhaṇepi dukkhanti vipassanā upaṭṭhāti, tasmā “so dukkhamicceva vācaṃ bhāsati”ti vadanti.

328. Icchiteti paravādinā sampatīcchite. **Āropiteti** yuttiniddhāraṇena tasmim atthe paṭiṭṭhāpīte yujjati, vacīsamuṭṭhāpanakkhaṇato pana pacchā taṃ saddaṃ suṇātīti icchite na yujjati sotaviññāṇassa paccuppanārammaṇattāti adhippāyo. Yasmā pana attanā nicchāritaṃ saddaṃ attanāpi suṇāti, tasmā

sotaviññāṇaṃ “yena taṃ saddaṃ suṇāti”ti aṭṭhakathāyaṃ vuttanti daṭṭhabbaṃ.

332. Lokuttaramaggakkhaṇeti paṭhamajjhānikassa paṭhamamaggassa khaṇe. **Abhibhūsuttāharaṇe adhippāyo vattabboti** etena tadāharaṇassa asambandhataṃ dasseti. Tenāha “**tasmā asādhaka**”nti.

Vacībheda-kathāvaṇṇanā niṭṭhitā.

7. Cittaṭṭhitikathāvaṇṇanā

335. Evanti “ekacittaṃ yāvatāyukaṃ tiṭṭhati”ti vuttākārena. **Aññatthāti** arūpabhavato aññasmiṃ. **Etenāti** “ekameva cittaṃ āruppe tiṭṭhati, yāvatāyukaṃ tiṭṭhati”ti evaṃvādinā **dutiyaṃ adḍhakathā passitabbā** paṭhamakathāya cirakālāvaṭṭhānavacanassa aññadatthu bhāvavibhāvanatoti adhippāyo. **Purimāyāti** “yāvatāyukaṃ tiṭṭhati”ti pañhato purimāya. Tattha hi “vassasataṃ tiṭṭhati”ti pucchāya “āmantā”ti anuññā katā, pacchimāyaṃ pana “manussānaṃ ekaṃ cittaṃ yāvatāyukaṃ tiṭṭhati”ti “na hevaṃ vattabbe”ti paṭikkhepo kato. **Avirodho vibhāvetabbo**, yato tattheva anuññā katā, na pacchāti adhippāyo. **Vassasatādīti** ca **ādi**-saddena na kevalaṃ “dve vassasatānī”ti evamādiyeva saṅgahitaṃ, atha kho “ekaṃ cittaṃ divasaṃ tiṭṭhati”ti evamādiṇi daṭṭhabbaṃ. “**Muhuttaṃ muhuttaṃ uppajjati pañho sakavādinā pucchito viya vutto**”ti idaṃ vicāretabbaṃ. “Muhuttaṃ muhuttaṃ uppajjati”ti pañho paravādissa. “Uppādavayadhammino”tiādisuttatthavasena paṭiññā sakavādissāti hi vuttaṃ.

Cittaṭṭhitikathāvaṇṇanā niṭṭhitā.

9. Anupubbābhisamayakathāvaṇṇanā

339. “Tāni vā cattāripi ñāṇāni eko sotāpattimaggoyevāti paṭijānāti”ti imaṃ sandhāyāha “**atha vā**”tiādi. **Catunnaṃ ñāṇānanti** dukkheññādināṃ catunnaṃ ñāṇānaṃ. **Ekamaggabhāvatoti** sotāpattiādiekamaggabhāvato. Kamena pavattamānānīpi hi tāni ñāṇāni taṃtaṃmaggakicassa sādhanato ekoyeva maggo hotīti adhippāyo. Tenāha “**ekamaggassa...pe... paṭijānāti**”ti.

344. Dassaneti maggadassane.

345. Dhammatthānaṃ hetuphalabhāvato dhammatthapaṭisambhidānaṃ siyā sotāpatti-phalāhetutā, tadabhāvato na itarapaṭisambhidānanti āha “**nirutti...pe... vicāretabba**”nti. Sabbāsampi pana paṭisambhidānaṃ paṭhamaphalacchikiriyaṃhetutā vicāretabbā maggādhigameneva laddhabbattā phalānaṃ viya, tasmā “aṭṭhahi ñāṇehi”ti ettha nikkhepakaṇḍe āgatanayena dukkhādiññānaṃ pubbantādiññānaṃ vasena “aṭṭhahi ñāṇehi”ti yuttaṃ viya dissati.

Anupubbābhisamayakathāvaṇṇanā niṭṭhitā.

10. Vohārakathāvaṇṇanā

347. Visayavisayīsūti rūpacakkhādike sandhāyāha. Te hi rūpakkhandhapariyāpannattā ekantena lokiyā. **Visayassevāti** saddasseva. So hi voharitabbato vohāra-karaṇatāya ca “vohāro”ti pāḷiyaṃ vutto. **Natthettha kāraṇaṃ** visayīnaṃ visayassapi āsavādiānārammaṇatābhāvato. **Asiddhalokuttarabhāvassa** ekantasāsavattā **tassa** saddāyatanassa yathā lokuttaratā tava matenāti adhippāyo.

Paṭihaññeyyāti idaṃ parikappavacanāṃ. Parikappavacanaṃ ayāthāvanti āha “**na hi...pe...**”

atthī”ti. Na hi jalaṃ analanti parikkappitaṃ dahati pacati vā. Kiṃ lokiyena ñāṇena jānitabbato lokiyo rūpāyatanādi viya, udāhu lokuttaro paccavekkhiyamānamaggādi viyāti evamettha hetussa **anekantabhāvo** veditabbo. Tenāha “**lokiye lokuttare ca sambhavato**”ti.

Vohārakathāvaṇṇanā niṭṭhitā.

11. Nirodhakathāvaṇṇanā

353. Yesaṃ dvinnanti yesaṃ dvinnaṃ dukkhasaccānaṃ. **Dvīhi nirodhehīti** appaṭisaṅkhāpaṭisaṅkhāsāṅkhātehi dvīhi nirodhehi. Tattha dukkhādīnaṃ paṭisaṅkhāti paṭisaṅkhā, paññāviseso. Tena vattabbo nirodho paṭisaṅkhānirodho. Yo sāsavehi dhammehi viṣaṃyogoti vuccati, yo paccayavekallena dhammānaṃ uppādassa accantavibandhabhūto nirodho, so paṭisaṅkhāya navattabbato appaṭisaṅkhānirodho nāmāti paravādino laddhi. **Paṭisaṅkhāya vinā niruddhāti** paccayavekallena anuppattiṃ sandhāya vuttaṃ. Tenāha “**na uppajjitvā bhaṅgā**”ti. Anuppādopi hi nirodhoti vuccati yato “imassuppādā idaṃ uppajjati”ti lakkhaṇuddesassa paṭilome “imassa nirodhā idaṃ nirujjhati”ti dassito. **Tenāti** paṭisaṅkhāya nirodhassa khaṇikanirodhassa ca idha nāhippetattā.

Nirodhakathāvaṇṇanā niṭṭhitā.

Dutiyavaggavaṇṇanā niṭṭhitā.

3. Tatiyavaggo

1. Balakathāvaṇṇanā

354. Niddesatoti “aṭṭhānametaṃ anavakāso”tiādīnā niddiṭṭhappakārato. So pana yasmā vitthāro hoti, tasmā vuttaṃ “**vitthārato**”ti. **Sabbam** kilesāvaraṇādīṃ, tameva paccekam pavattiākārabhedato **sabbākāram**. “Sabba”nti hi idaṃ sarūpato gahaṇaṃ, “sabbākārato”ti pavattiākārabhedato. Bhagavā hi dhamme jānanto tesam ākārabhede anavasesetvāva jānāti. Yathāha “sabbe dhammā sabbākārato buddhassa bhagavato ñāṇamukhe āpāthaṃ āgacchantī”ti (mahāni. 156; cūḷani. mogharājamāṇavapucchāniddeśa 85; paṭi. ma. 3.5). **Uddesatoti** ekadesato. Ekadeso ca vitthāro na hotīti āha “**saṅkhepato**”ti. Yathā jānantīti sambandho. **Uddesamattenapīti** diṭṭhigatayathābhūtañāṇādippabhedānaṃ āsayādīnaṃ uddesamattenapī. Tenāha “**indriyānaṃ tikkhamudubhāvajānanamattaṃ sandhāyā**”ti. **Therenāti** anuruddhattherena. **Evamevāti** uddesato ṭhānādīmatattajānanākāreneva. Svāyamattho sakavādīnāpi icchitoyevāti āha “**kathamayaṃ codetabbo siyā**”ti.

356. Sesesūti indriyaparopariyattañāṇato sesesu. **Paṭikkhepoti** asādhāraṇatāpaṭikkhepo. Nanu ca sesānaṃ asādhāraṇatāpi atthīti codanaṃ sandhāyāha “**ṭhānā...pe... adhippāyo**”ti.

Balakathāvaṇṇanā niṭṭhitā.

2. Ariyantikathāvaṇṇanā

357. Saṅkhāre sandhāya paṭijānantassāti diṭṭhiyā parikkappitena sattena suññe saṅkhāre sandhāya “suññatāñca manasi karotī”ti pucchāya “āmanta”ti paṭijānantassa. **Dvinnam phassānaṃ samodhānaṃ kathaṃ āpajjati** ṭhānāṭhānabhūte saṅkhāre vuttanayena suññataṃ manasi karontassāti adhippāyo. **Yathāvuttanayenāti** “diṭṭhiyā parikkappitena sattena suññā pañcakkhandhā”ti pakārena nayena. Atha vā **yathāvuttanayenāti** “ṭhānāṭhānāmanasikāro saṅkhārāmmaṇo, suññatāmanasikāro nibbānāmmaṇo”ti evaṃ vuttanayena. “Saṅkhāre sandhāya paṭijānantassā”ti vuttattā “**dvinnam**

phassānaṃ samodhānaṃ kathaṃ āpajjati’ti āha. Sattasuññatāya suññattepi saṅkhārānaṃ añño va ṭhānāṭhānāmanasikāro, añño suññatāmanasikāroti yujjateva dvinnaṃ phassānaṃ samodhānāpatticodanā, saṅkhāre sandhāya paṭijjanantassa pana kathaṃ ariyabhāvasiddhi ṭhānāṭhānaññādīnanti vicāretabbaṃ. Kiṃ vā etāya yutticintāya. Ummattakapaccchisadiso hi paravādivādo. Aññesu paṭhānesu īdisesu eseva nayo. **Āropetvāti** itthipurisādiākāraṃ, sattākārameva vā asantaṃ rūpādiupādāne āropetvā. Abhūtāropanañhettha paṇidahananti adhippetam. Tenāha **“parikappanavasena”**’ti. Soti yathāvutto paṇidhi. **Ekasmimpi** khandhe.

Ariyantikathāvaṇṇanā niṭṭhitā.

4. Vimuccamānakathāvaṇṇanā

366. Maggakkhaṇe cittaṃ ekadesena vimuttaṃ ekadesena avimuttanti ayaṃ “vimuttaṃ vimuccamāna”’nti laddhiyā doso. Tathā hi vuttaṃ **“ekadesaṃ vimuttaṃ, ekadesaṃ avimutta”**’nti. Aṭṭhakathāyañca “tañhi tadā samucchadavimuttiyā vimuttekaadesena vimuccamānantissa laddhi”’ti dassitovāyamattho. **Vippakataniddeseti** vimuccanakiriyāya apaniyositatāniddese. Yaṃ sandhāyāha **“vimuttaṃ vimuccamānanti vippakatabhāvena vuttattā”**’ti. **Tenāti** paravādinā. **Vimucca...pe...vuttaṃ** vimuccamānassa vimuttabhāvābhāvato, vimuttabhedenā pana tathā vuttanti adhippāyo. Sati ca dose vippakataniddeseti ānetvā yojetabbaṃ. **Ekadeso visesanaṃ hoti** nippadesavimuttiyā avicchinnaṃ. **Phalacittenti** paṭhamaphalacittena uppanna.

Vimuccamānakathāvaṇṇanā niṭṭhitā.

5. Aṭṭhamakakathāvaṇṇanā

368. Pahīnā nāma bhavēyyuṃ, na paḥiyamānāti adhippāyo.

Aṭṭhamakakathāvaṇṇanā niṭṭhitā.

6. Aṭṭhamakassa indriyakathāvaṇṇanā

371. Lokuttarānaṃyeva saddhādīnaṃ indriyabhāvo, na lokiyananti paravādinā adhippāyavasenaṃ **“appaṭiladdhindriyattā”**’tiādi. Tatha **niyyānikāni bhāventoti** yathā niyyānikā honti, evaṃ uppādentō brūhento vā. Indriyabhāvaṃ pana pattesu tesu puna bhāvanākiccaṃ natthīti tassa adhippāyoti dassento āha **“na pana indriyāni bhāvento”**’ti.

Aṭṭhamakassa indriyakathāvaṇṇanā niṭṭhitā.

7. Dibbacakkhukathāvaṇṇanā

373. Visinoti visesena bandhati visayīnaṃ attapaṭibandhaṃ karotīti **visayo**, ārammaṇaṃ, anubhavati etenāti **ānubhāvo**, sāmattiyaṃ, balanti attho, gocarakaṇaṃ **gocaro**, visaye ānubhāvagocarā **visaya...pe... carāti**. Tehi yathā viṣiṭṭhaṃ visesaṃ hoti, tathā paccayabhūtena jhānadhammena āhitabalaṃ **katabalādhānaṃ**. Visayaggahaṇaṃcetha ānubhāvagocarakaṇaṇaṃ pavattiṭṭhānadassanaṃ yatthassa tehi upatthaddhattā balādhānaṃ pākaṭaṃ hoti. Tenāha **“yādise visaye”**’tiādi. Balādhānañca uttarimanussadhammato mahaggatadhammavisesato uppannehi paṇītehi cittajarūpehi visesāpatti. Yaṃ nissāya parāvuttīti eke vadanti. **Purimaṃ maṃsacakkhumattamevāti** yathāvuttabalādhānato purimaṃ maṃsacakkhumattameva. **Vadanto** saṅgahakāro. **Visayaggahaṇaṃ** pāliyaṃ kataṃ. **Na visayavisesadassanatthanti** na visayassa visesadassanattham. Yato ubhinnaṃpi rūpāyatanameva visayoti visayassa sadisaṭaṃ avisesaṃ āha, sadisassa vā visesaṃ dīpetīti yojanā.

Dhammupatthaddha ...pe... **adhippāyo**, aññathā laddhiyeva na siyāti bhāvo. **Maggoti** upāyo, kāraṇanti attho. Pakaticakkhumato eva hi dibbacakkhu uppajjati. Kasmā? Kasiṇālokaṃ vaḍḍhetvā dibbacakkhuñāṇassa uppādanam, so ca kasiṇamaṇḍale uggahanimittena vinā natthi, tasmā vuttaṃ “**maṃsacakkhupaccayatādassanatthameva vutta**”nti. **Tenāti** “maggo”ti vacanena. **Rūpāvacarajjhānapaccayenāti** rūpāvacarajjhānena paccayabhūtena **uppannāni** rūpāvacarajjhānacittasamuṭṭhitāni. Jhānakammasamuṭṭhitesu vattabbameva natthi. Tassa hesā laddhi.

374. Yena dibbacakkhuno paññācakkhubhāvassa icchanena paṭijānanena. **Tiṇi cakkhūni** maṃsadbhapaññācakkhūni **cakkhantarabhāvaṃ vadato bhaveyyuṃ**, tasmā taṃ na icchatīti attho.

Dibbacakkhukathāvaṇṇanā niṭṭhitā.

9. Yathākammūpagatañāṇakathāvaṇṇanā

377. Dibbacakkhupādakattā “**yathākammūpagatañāṇassa upanissaye dibbacakkhumhī**”ti vuttaṃ, **na yathākammūpagatajānanakiccake dibbacakkhumhi** tassa taṃkiccatābhāvato. Yato yaṃ anaññaṃ, tampi tato anaññaṃevāti āha “**iminā...pe... bhavitabba**”nti. Tattha **atthantarabhāvaṃ nivāreti**ti dibbacakkhuñāṇassa pakkhikattā yathākammūpagatañāṇassa tato atthantarabhāvaṃ nivāreti. Tassa hi taṃ paribhaṇḍañāṇam. **Dibbacakkhussa yathākammūpagatañāṇato atthantarabhāvaṃ na nivāreti** atappakkhikattāti adhippāyo. Dibbacakkhussa yathākammūpagatañāṇakiccatā paravādinā icchitā, na yathākammūpagatañāṇassa dibbacakkhukiccatāti tamatthaṃ “yathākammūpagatañāṇameva dibbacakkhu”nti ettha yojetvā dassento “**eva-saddo cā**”tiādimaḥa.

Yathākammūpagatañāṇakathāvaṇṇanā niṭṭhitā.

10. Saṃvarakathāvaṇṇanā

379. Āṭṇāṭṭiyasutte “santi, bhikkhave, yakkhā yebhuyena paṇātipātā appaṭiviratā”ti (dī. ni. 3.276, 286) āgatattā cātumahārājikānaṃ saṃvarāsaṃvarasabbhāvo avivādasiddho. Yattha pana vivādo, tameva dassentena tāvatimsādayo gahitāti imamatthaṃ dassetuṃ “**cātumahārājikāna**”nti vuttaṃ. **Evaṃ satīti** yadi tāvatimsesu saṃvarāsaṃvaro natthi, evaṃ sante. **Surāpānanti** etthāpi “suyyati”ti padaṃ ānetvā sambandhitabbaṃ. Kathaṃ suyyatīti? Vuttañhettaṃ **kumbhajātaka** –

“Yaṃ ve pivitvā pubbadevā pamattā,
Tidivā cutā sassatiyā samāyā;
Taṃ tādisaṃ majjamimaṃ niratthaṃ,
Jānaṃ mahārāja kathaṃ piveyyā”ti. (jā. 1.16.58);

Tattha **pubbadevā** nāma asurā. Te hi tāvatimsānaṃ uppattito pubbadevāti paññāyimsu. **Pamattāti** surāpānena pamādaṃ āpannā. **Tidivāti** manussacātumahārājikaloke upādāya tatiyalokabhūtā devaṭṭhānā, nāmameva vā etaṃ tassa devaṭṭhānassa. **Sassatiyāti** kevalaṃ dīghāyukataṃ sandhāya vadati. **Samāyā** saha attano asuramāyāya, asuramantehi saddhiṃ cutāti attho. **Aṭṭhakathāyañca** vuttaṃ “āgantukadevaputtā āgatāti nevāsikā gandhapānaṃ sajjayimsu. Sakko sakaparisāya saññamadāsī”ti. Tenāha “**tesaṃ surāpānaṃ asaṃvaro na hofīti vattabbaṃ hotī**”ti. Ettha ca tāvatimsānaṃ pātubhāvato paṭṭhāya surāpānampi tattha nāhosi, pageva paṇātipātādayoti viraṃmitabbābhāvato eva tāvatimsato paṭṭhāya upari devalokesu samādānasampattavirativasena puretabbā saṃvarā na santi, lokuttarā pana santiyeva. Tathā tehi pahātabbā asaṃvarā. Na hi appahīnānusayānaṃ maggavajjhā kilesā na santīti.

Saṃvarakathāvaṇṇanā niṭṭhitā.

Tatīyavaggavaṇṇanā niṭṭhitā.

4. Catutthavaggo

1. Gihissa arahātikathāvaṇṇanā

387. Gihichandarāgasampayuttatāyāti gihibhāve kāmabhogibhāve chandarāgasahitatāya.

Gihissa arahātikathāvaṇṇanā niṭṭhitā.

4. Samannāgatakathāvaṇṇanā

393. Pattinti adhigamo. Adhigamo nāma samannāgamo hotīti pāḷiyaṃ catūhi phassādīhi samannāgamo coditoti daṭṭhabbaṃ.

Samannāgatakathāvaṇṇanā niṭṭhitā.

5. Upekkhāsamannāgatakathāvaṇṇanā

397. Sabbam yojetabbanti ettha yadi te arahā catūhi khandhehi viya chahi upekkhāhi samannāgato, evaṃ sante cha upekkhā paccekaṃ phassādisahitāti “chahi phassādīhi samannāgato”tiādīnā yojetabbam.

Upekkhāsamannāgatakathāvaṇṇanā niṭṭhitā.

6. Bodhiyābuddhotikathāvaṇṇanā

398. Pattidhammavasenāti “pattidhammo nāmā”tiādīnā vuttassa cittavippayuttassa saṅkhārassa vasena. “Bodhiyā buddho”ti **pucchā**. “Bodhiyā niruddhāya viḡatāya paṭippassaddhāya abuddho hotī”ti **anuyogo**. Evamaññatthāpi pucchānuyogā veditabbā.

Bodhiyābuddhotikathāvaṇṇanā niṭṭhitā.

7. Lakkhaṇakathāvaṇṇanā

402. Tasmāti yasmā abodhisattassapi cakkavattino lakkhaṇehi samannāgamo bodhisattassapi carimabhavato aññattha asamannāgamo hoti, tasmā lakkhaṇasamannāgato bodhisattovāti imassatthassa asādhakam. Tenāha “**ābhatampi anābhatasadisamevā**”ti.

Lakkhaṇakathāvaṇṇanā niṭṭhitā.

8. Niyāmokkantikathāvaṇṇanā

403. Pāramīpūraṇanti idaṃ bodhicariyāya upalakkhaṇam, na pāramīnam puṇṇabhāvadassanam. Tena tesam ārambhasamādānādinampi saṅgaho katoti daṭṭhabbam. Mahābhinihārato paṭṭhāya hi mahāsattā niyatāti vuccanti. Yathāha – “evaṃ sabbaṅgasampannā, bodhiyā niyatā narā”ti, “dhuvaṃ buddho bhavissatī”ti ca, na niyāmassa nāma kassaci dhammassa uppannattā byākaronti, atha kho ekaṃsenāyaṃ pāramiyo pūretvā buddho bhavissatīti katvā byākarontīti paravādīparikappitaṃ dhammantaram paṭisedheti, na bodhiyā niyatattaṃ. Tenāha “**kevalaṇhi na**”ntiādi.

Niyāmokkantikathāvaṇṇanā niṭṭhitā.

10. Sabbasaṃyojanappahānakathāvaṇṇanā

413. Satipi kesañci saṃyojanānaṃ heṭṭhimamaggehi pahīnatte “pañcannaṃ orambhāgiyānaṃ saṃyojanānaṃ parikkhayā” tiādīsu viya vaṇṇabhaṇaṇamukhena anavaśesatañca sandhāya sabbasaṃyojanappahānakittanaṃ pariyāyavacananti āha “**imaṃ pariyāyaṃ aggahetvā**” ti. **Arahattamaggena pajahanato evāti gaṇhātī**ti aggamaggo eva sabbasaṃyojanāni pajahatīti laddhiṃ gaṇhātīti **vadanti** padakārā. **Evaṃ satī**ti yadi anavaśesatāmattena tathā paṭijānāti.

Sabbasaṃyojanappahānakathāvaṇṇanā niṭṭhitā.

Catutthavaggavaṇṇanā niṭṭhitā.

5. Pañcamavaggo

1. Vimuttikathāvaṇṇanā

418. Phalaññaṃ na hoti, sesāni vipassanāmaggapaccavekkhaṇaṇāñāni vimuttānīti na vattabbānīti sambandho. **Etthā**ti etesu catūsū ñāṇesu. **Vipassanāggahaṇena gahitaṃ** maggādikiccavidūrakiccattā vipassanāpariyosānattā ca.

Vimuttikathāvaṇṇanā niṭṭhitā.

2. Asekhaññakathāvaṇṇanā

421. Asekhe ārabba pavattattā asekhaññanti parassa laddhi, na asekhe asekhadhamme pariyāpannanti imamattamāha “**etena...pe... dasseti**” ti.

Asekhaññakathāvaṇṇanā niṭṭhitā.

3. Viparītakathāvaṇṇanā

424. Asive sivāti vohāraṃ viya **aññāṇe...pe... vadati**.

Viparītakathāvaṇṇanā niṭṭhitā.

4. Niyāmakathāvaṇṇanā

428-431. Yanti yaṃ ñāṇaṃ. **Saccānulomanti** saccapaṭivedhānukūlaṃ. **Viparītānuyogato pabhuti gaṇetvā “catuttha”nti āha** na aniyatassa niyāmagamanāyāti aviparītānuyogato pabhuti gaṇetvā, tathā sati pañcamabhāvato viśesabhāvato ca.

Niyāmakathāvaṇṇanā niṭṭhitā.

5. Paṭisambhidākathāvaṇṇanā

432-433. **Sabbaṃ ñāṇanti** idaṃ “ariyāna”nti iminā na viśesitanti adhippāyenāha “**anariyānampi hi ñāṇaṃ ñāṇamevā**” ti. Atha vā pāḷiyaṃ avisesena sabbaṃ ñāṇanti vuttaṃ gaṇetvā evamāha. Ariyassa ce ñāṇanti, so pana paṭikkhepeyyāti āha “**anariyassa etaṃ ñāṇaṃ sandhāyā**” ti.

Paṭisambhidākathāvaṇṇanā niṭṭhitā.

7. Cittārammaṇakathāvaṇṇanā

436-438. Vattabbapaṭiññāti phassārammaṇe ñāṇaṃ vattabbaṃ cetopariyaññānti evaṃ pavattā paṭiññā.

Cittārammaṇakathāvaṇṇanā niṭṭhitā.

8. Anāgataññakathāvaṇṇanā

439-440. Anantarānāgatepi citte ñāṇaṃ icchanti, tattha pana khaṇapaccuppanne viya tādīsena parikammaena kadāci ñāṇaṃ uppajjeyya. Tenāha “**anantare ekanteneva ñāṇaṃ natthi**”ti.

Anāgataññakathāvaṇṇanā niṭṭhitā.

9. Paṭuppannaññakathāvaṇṇanā

441-442. “Sabbasaṅkhāresu aniccato diṭṭhesū”ti vutte yaṃ dassanabhūtaṃ ñāṇaṃ, tampi saṅkhārasabhāvattā tathādiṭṭhaṃ siyāti atthato āpajjati, evaṃbhūtaṃ vacanaṃ sandhāyāha “**atthato āpannaṃ vacana**”nti. Taṃ pana yasmā “tampi ñāṇaṃ aniccato diṭṭhaṃ hoti”ti paṭijānavasena pavattaṃ, tasmā “**anujānavacana**”nti vuttaṃ. **Bhaṅgānupassanānaṃ** pabandhavasena pavattamānānaṃ.

Paṭuppannaññakathāvaṇṇanā niṭṭhitā.

10. Phalaññakathāvaṇṇanā

443-444. Phalaparopariyattaṃ phalassa uccāvocatā. **Balenāti** ñāṇabalena.

Phalaññakathāvaṇṇanā niṭṭhitā.

Pañcamavaggavaṇṇanā niṭṭhitā.

Mahāpaṇṇāsako samatto.

6. Chaṭṭhavaggo

1. Niyāmakathāvaṇṇanā

445-447. Etassa ariyassa puggalassa.

Niyāmakathāvaṇṇanā niṭṭhitā.

2. Paṭiccasamuppādakathāvaṇṇanā

451. Kāraṇaṭṭhena ṭhitatāti kāraṇabhāvena byabhicaraṇābhāvamāha. Yo hi dhammo yassa dhammassa yadā kāraṇaṃ hoti, na tassa tadā aññathābhāvo atthi, sā ca atthato kāraṇabhāvoyevāti “**kāraṇabhāvoyevā**”ti āha.

Paṭiccasamuppādakathāvaṇṇanā niṭṭhitā.

5. Nirodhasamāpattikathāvaṇṇanā

457-459. Sabhāvadhammatam paṭisedheti tadubhayalakkhaṇarahitassa sabhāvadhammassa abhāvā. “Vodānampi vuṭṭhāna”nti vacanato “**vodānaṅca vuṭṭhānapariyāyovā**”ti āha. Sabhāvadhammatte siddhe saṅkhatavidūratāya asaṅkhatam siyāti āha “**sabhāvadhammattāsādhakattā**”ti.

Nirodhasamāpattikathāvaṇṇanā niṭṭhitā.

Chaṭṭhaviggavaṇṇanā niṭṭhitā.

7. Sattamavaggo

1. Saṅgahitakathāvaṇṇanā

471-472. Saṅgahitāti saṅgahaṇādivasena saddhiṃ gahitā. Te pana yasmā ekavidhatādisāmaññaena bandhā viya hontī, tasmā āha “**sambandhā**”ti.

Saṅgahitakathāvaṇṇanā niṭṭhitā.

2. Sampayuttakathāvaṇṇanā

473-474. Anuppavisitabbānuppavisanabhāvo tesam bhede sati yujjeyya, nāññathāti upamābhindanena upameyyassa bhinnatam dassento “**nānattavavatthā...pe... dasseti**”ti āha.

Sampayuttakathāvaṇṇanā niṭṭhitā.

3. Cetasikakathāvaṇṇanā

475-477. Phassikādayoti ettha ādi-saddo vavatthāvācī. Tena cittuppādadesanāyam dassitappabhedā vedanādayo gayhanti, na taṃsamuṭṭhānā rūpadhammāti āha “**ekuppādatādivirahitā saḥajātā natthī**”ti.

Cetasikakathāvaṇṇanā niṭṭhitā.

4. Dānakathāvaṇṇanā

479. Phaladānabhāvadīpanatthanti phaladānasabbhāvadīpanattham. **Phaladānam vuttam viya hotī**ti cittena phaladānam padhānabhāve vuttam viya hotīti attho. Aññathā dānabhāvoti na sakkā vuttam. Dānabhāvopi hi “dānam aniṭṭhaphala”ntiādinā vuttoyevāti. **Tannivāraṇatthanti** phaladānanivāraṇattham. **Etanti** “dānam aniṭṭhaphala”ntiādivacanam. Bhesajjādivasena ābādhāniṭṭhatā deyyadhammassa aniṭṭhaphalatāpariyāyo daṭṭhabbo.

Katham tatheva suttam sakavādīparavādivādesu yujjati codanāya “**na pana ekenatthenā**”ti vuttam vibhāvetum “**deyyadhammova dāna**”ntiādi vuttam. Tattha nivattanapakkeyyeva eva-kāro yutto, na sādhanapakke dvinnampi dānabhāvassa icchitattā. Tenāha “**cetasikovāti attho daṭṭhabbo, deyyadhammovā**”ti ca. Tenevāha “**dvinnāñhi dānānantiādi. Saṅkarabhāvamocanatthanti** satipi dānabhāve sabhāvasaṅkaramocanattham. Tenāha “**cetasikassā**”tiādi.

Dānakathāvaṇṇanā niṭṭhitā.

5. Paribhogamayapuññakathāvaṇṇanā

485. Tassā laddhiyāti pañcannaṃ viññāṇānaṃ samodhānaṃ hotīti laddhiyā. **Etesanti** vattamānacittaparibhogamayapuññānaṃ.

486. Ayaṃ vādo hīyati paribhogasseva abhāvato. **Cāgacetanāya eva puññabhāvo**, na cittavippayuttassa. **Evanti** iminā pakārena, aparibhutte deyyadhamme puññabhāvenāti attho. Aparibhutte deyyadhamme puññabhāvato eva hi puthujjanakāle dinnāṃ arahā hutvā paribhuñjante tampi puthujjane dānamevāti nicchitaṃ. Paravādīpaṭikkhepamukhena sakavādaṃ paṭiṭṭhāpeti paṭṭhamo atthavikappo, dutiyo pana ujukameva sakavādaṃ paṭiṭṭhāpetīti ayametesam viseso.

Paribhogamayapuññakathāvaṇṇanā niṭṭhitā.

6. Itodinnakathāvaṇṇanā

488-491. Teneva cīvarādīdānenāti anumodanaṃ vinā dāyakena pavattitacīvarādīdānena. Tenāha “**sayaṃkatena kammunā vināpī**”ti. **Iminā kāraṇenāti** anumoditattāva tesam tatha bhogā uppajantīti etena kāraṇena. **Yadi yantiādi** paravādino laddhipaṭiṭṭhāpanākāradassanaṃ. Tatha **yadi na yāpeyyuṃ, kathaṃ anumodeyyuṃ, cittaṃ pasādeyyuṃ, pītiṃ uppādeyyuṃ, somanassaṃ paṭilabheyyunti** ekacce aññe pete anumodanādīni katvā yāpente disvā anumodanādīni karonti, tasmā te ito dinnena yāpentīti adhippāyo.

Itodinnakathāvaṇṇanā niṭṭhitā.

7. Pathavīkammavipākotikathāvaṇṇanā

492. Attavajjehīti phassavajjehi. Na hi so eva tena sampayutto hoti. **Soti** phassameva paccāmasati. **Sāvajjaneti** āvajjanasahite, āvajjanaṃ purecārikaṃ katvā eva pavattanaketi attho. **Kammūpanissayabhūtamevāti** yena kammunā yathāvuttā phassādayo nibbattitā, tassa kammassa upanissayabhūtameva. **Dukkhasāti** āyatiṃ uppajjanakadukkhasa. “Mūlatanḥā”ti dassētīti yojanā, tathā “**upanissayabhūta**”nti etthāpi. Kammāyūhanassa kāraṇabhūtā purimasiddhā taṇhā kammassa **upanissayo**, katūpacite kamme bhavādīsu namanavasena pavattā hi vipākassa upanissayo.

493. Okāsakatuppannaṃ akhepetvā parinibbānabhāvo **sakasamayavasena codanāya yujjamānatā**.

494. Kamme satīti iminā kammassa pathavīdīnaṃ paccayatāmattamāha, na janakattaṃ. Tenāha “**tamsamvattanikaṃ nāma hotī**”ti.

Pathavīkammavipākotikathāvaṇṇanā niṭṭhitā.

8. Jarāmaṇaṃvipākotikathāvaṇṇanā

495. Ekārammaṇāti idaṃ anārammaṇatāsādhanavasena sampayogalakkhaṇābhāvassa uddhaṭattā vuttaṃ, na tasseva sampayogalakkhaṇattā.

496. Abyākatānanti vipākābyākatānaṃ. Itarattha vattabbameva natthi.

497. Tanti “aparisuddhavaṇṇatā jarāyevā”ti vacanaṃ.

Jarāmarāṇaṃvipākotikathāvaṇṇanā niṭṭhitā.

10. Vipākovipākadhammadhammotikathāvaṇṇanā

501. Vipāko vipākassa paccayo honto aññaṃaññapaccayo hotīti adhippāyenāha “yassa vipākassa vipāko aññaṃaññapaccayo hotī”ti. “Tappaccayāpi aññassa vipākassa uppattiṃ sandhāyā”tiādivacanato pana jātijarāmarāṇādīnaṃ upanissayapaccayoti sakkā viññātuṃ. **Purimapaṭiññāyāti** “vipāko vipākadhammadhammo”ti paṭiññāya. **Imassa codanassāti** “vipāko ca vipākadhammadhammo cā”tiādinā pavattassa codanassa.

Vipākovipākadhammadhammotikathāvaṇṇanā niṭṭhitā.

Sattamavaggavaṇṇanā niṭṭhitā.

8. Aṭṭhamavaggo

1. Chagatikathāvaṇṇanā

503-504. Vaṇṇā eva nīlādivasena nibhātīti **vaṇṇanibhā**, vaṇṇāyatananti attho. **Sanṭhānaṃ** dīghādi.

Chagatikathāvaṇṇanā niṭṭhitā.

2. Antarābhavakathāvaṇṇanā

505. **Antaraṭṭhānānīti** antarikaṭṭhānāni. Nivārakaṭṭhānāni bhinditvā ca ākāsenā ca gamanato. **Yadi so bhavānaṃ antarā na siyāti** so antarābhavo kāmaḥbhavādīnaṃ bhavānaṃ antare yadi na bhavēyya. **Na nāma antarābhavoti** “sabbena sabbam natthi nāma antarābhavo”ti evaṃ pavattassa sakavādivacanassa **paṭikkhepe kāraṇaṃ natthi**, tassa paṭikkhepe kāraṇaṃ hadaye ṭhapetvā na paṭikkhipati, atha kho tathā anicchanto kevalaṃ laddhiyā paṭikkhipatīti attho.

506. Jātīti na icchatīti sambandho.

507. **Evaṃ taṃ tattha na icchatīti** kāmaḥbhavādīsu viya taṃ cutipaṭisandhiparamparaṃ tattha antarābhavāvattāya na icchati. So hi tassa bhāvibhavanibbattakakammato eva pavattiṃ icchati, tasmā jātijarāmarāṇāni aniccato kuto cutipaṭisandhiparamparā. Ayañca vādo antarābhavavādīnaṃ ekaccānaṃ vutto. Ye “appakena kālena sattāheneva vā paṭisandhiṃ pāpuṇātī”ti vadanti, ye pana “tattheva cavivā āyātīti sattaṭṭhānī”ti vadanti, tehi anuññātāva cutipaṭisandhiparamparāti te adhunātanā daṭṭhabbā pāliyaṃ “antarābhavē satta jāyanti jīyanti mīyanti cavanti upapajantīti? Na hevaṃ vattabbe”ti āgatattā. Yathā cetam, evaṃ nirayūpagādibhāvampissa adhunātanā paṭijānanti. Tathā hi te vadanti “uddhaṃpādo tu nārako”tiādi. Tattha yaṃ nissāya paravādī antarābhavaṃ nāma parikappeti, taṃ dassetuṃ aṭṭhakathāyaṃ “antarāparinibbāyīti suttapadaṃ ayoniso gahetvā”ti vuttaṃ. Imassa hi “avīhādīsu tattha tattha āyuvemajjhaṃ anatikkamitvā antarā aggamaggādhiḡamena anavasesakilesaparinibbānena parinibbāyati, antarāparinibbāyī”ti suttapadassa ayamattho, na antarābhavabhūtoti. Tasmā vuttaṃ “antarāparinibbāyīti suttapadaṃ ayoniso gahetvā”ti.

Ye pana “sambhavesīti vacanato attheva antarābhavo. So hi sambhavaṃ upapattiṃ esatīti sambhavesī”ti vadanti, tepi ye bhūtāva na puna bhavissanti, te khīṇāsavā “bhūtānaṃ vā sattānaṃ ṭṭhitiyā”ti ettha “bhūtā”ti vuttā. Tabbidhuratāya sambhavamēsaṇṭīti sambhavesino,

appahīnabhavasamyojanattā sekkhā puthujjanā. Catūsu vā yonīsu aṇḍajajalābujā sattā yāva aṇḍakosaṃ vatthikosañca na bhindanti, tāva **sambhavesī** nāma, aṇḍakosato vatthikosato ca nikkhantā **bhūtā** nāma. Saṃsedajaopapātikā ca paṭhamacittakkhaṇe **sambhavesī** nāma, dutiyacittakkhaṇato paṭṭhāya **bhūtā** nāma. Yena vā iriyāpathena jāyanti, yāva tato aññaṃ na pāpuṇanti, tāva **sambhavesī** nāma, tato paraṃ **bhūtā** nāmāti evaṃ ujuke pāḷianugate atthe sati kiṃ aniddhāritassa patthiyena antarābhavena attabhāvena parikkappitena payojananti paṭikkhipitabbā.

Yaṃ paneke “santānavasena pavattamānānaṃ dhammānaṃ avicchedena desantaresu pātubhāvo diṭṭho. Yathā taṃ vīhiādiaviññāṇakasantāne, evaṃ saviññāṇakasantānepi avicchedena desantare pātubhāvena bhavitabbaṃ. Ayañca nayo sati antarābhāve yujjati, nāññathā”ti yuttiṃ vadanti, tehi iddhimato cetovasippattassa cittānugatikāṃ kāyaṃ adhiṭṭhahantassa khaṇena brahmalokato idhūpasāṅkamane ito vā brahmalokūpagamane yutti vattabbā. Yadi sabbattheva vicchinnadesa dhammānaṃ pavatti na icchitā, yadipi siyā “iddhimantānaṃ iddhivisayo acinteyyo”ti, taṃ idhāpi samānaṃ “kammavipāko acinteyyo”ti vacanato, tasmā taṃ tesāṃ matimattameva. Acinteyyasabhāvā hi sabhāvadhammā, te katthaci paccayavasena vicchinnadesa pātubhavanti, katthaci avicchinnadesa ca. Tathā hi mukhaghosādīhi paccayehi aññaṣmiṃ dese ādāsapabbatapadesādike paṭibimbapaṭighosādikaṃ nibbattamānaṃ diṭṭhanti.

Etthāha – paṭibimbaṃ tāva asiddhattā asadisattā ca na nidassanaṃ. Paṭibimbañhi nāma aññaḍeva rūpantaraṃ uppajjati asiddhametaṃ. Siddhiyampi asadisattā na nidassanaṃ siyā ekasmiṃ ṭhāne dvinnaṃ sahaṭhānābhāvato. Yattheva hi ādāsarūpaṃ paṭibimbarūpañca dissati, na ca ekasmiṃ dese rūpadvayassa sahabhāvo yutto nissayabhūtaḍesato, asadisāñcetāṃ sandhānato. Na hi mukhassa paṭibimbāsandhānabhūtaṃ ādāsāsandhānasambandhattā sandhānaṃ uddissa avicchedena desantare pātubhāvo vuccati, na asantānanti asamānameva tanti.

Tattha yaṃ vuttaṃ “paṭibimbaṃ nāma aññaḍeva rūpantaraṃ uppajjati asiddham ekasmiṃ ṭhāne dvinnaṃ sahaṭhānābhāvato”ti, tayidaṃ asantānameva sahaṭhānaṃ coditaṃ bhinnanissayattā. Na hi bhinnanissayānaṃ sahaṭhānaṃ atthi. Yathā anekesaṃ maṇidīpādīnaṃ pabhārūpaṃ ekasmiṃ padese pavattamānaṃ acchitamānatāya nirantarātāya ca abhinnaṭṭhānaṃ viya paññāyati, bhinnanissayattā pana bhinnaṭṭhānameva taṃ, gahaṇavisesena tathābhinnaṭṭhānamattaṃ, evaṃ ādāsarūpapaṭibimbarūpesupi daṭṭhabbaṃ. Tādisapaccayasamavāyena hi tattha taṃ uppajjati ceva vigacchati ca, evañcetāṃ sampaṭicchitabbaṃ cakkhuvīññāṇassa gocarabhāvūpagamanato. Aññathā ālokena vināpi paññāyeyya, cakkhuvīññāṇassa vā na gocaro viya siyā. Tassa pana sāmaggīyā so ānubhāvo, yaṃ tathā dassanaṃ hotīti. Acinteyyo hi dhammānaṃ sāmattiyabhedoti vadantenapi ayamevattho sādhitō bhinnanissayassapi abhinnaṭṭhānassa viya upaṭṭhānato. Eteneva udakādīsu paṭibimbarūpābhāvācodanā paṭikkhittā veditabbā.

Siddhe ca paṭibimbarūpe tassa nidassanabhāvo siddhoyeva hoti hetuphalānaṃ vicchinnadesatāvibhāvanato. Yaṃ pana vuttaṃ “asadisattā na nidassana”nti, tadayuttaṃ. Kasmā? Na hi nidassanaṃ nāma nidassitabbena sabbadā sadisameva hoti. Cutikkhandhādhanato vicchinnadesa upapattikkhandhā pātubhavanti etassa atthassa sādhanatthaṃ mukharūpato vicchinne ṭhāne tassa phalabhūtaṃ paṭibimbarūpaṃ nibbattati ettha tassa nidassanatthassa adhippetattā. Etena asantānacodanā paṭikkhittā veditabbā.

Yasmā vā mukhapaṭibimbarūpānaṃ hetuphalabhāvo siddho, tasmāpi sā paṭikkhittāva hoti. Hetuphalabhāvasambandhesu hi santānavohāro. Yathāvuttadvīhikāraṇehi paṭibimbaṃ uppajjati bimbato ādāsato ca, na cevaṃ upapattikkhandhānaṃ vicchinnadesuppatti. Yathā cettha paṭibimbarūpaṃ nidassitaṃ, evaṃ paṭighosadīpamuddādayopi nidassitabbā. Yathā hi paṭighosadīpamuddādayo saddādihetukā honti, aññaṭra agantvā honti, evameva idaṃ cittanti.

Apicāyaṃ antarābhavavādī evaṃ pucchitabbo – yadi “dhammānaṃ vicchinnadesuppatti na

yuttā’’ti antarābhavo parikkappito, rāhuādīnaṃ sarīre kathamanekayojanasahassantarikesu pādatṭhānahadayaṭṭhānesu kāyaviññāmanoviññānuppatti vicchinnadese yuttā. Yadi ekasantānabhāvato, idhāpi taṃsamānaṃ. Na cettha arūpadhamabhāvato alaṃ parihārāya pañcavokāre rūpārūpadhamānaṃ aññamaññaṃ sambandhattā. Vattamānehi tāva paccayehi vicchinnadese phalassa uppatti siddhā, kimaṅgaṃ pana atītehi pañcavokārabhavehi. Yattha vipākaviññānaṃ paccayo, tatthassa nissayabhūtaṃ vattussa sahabhāvīnaṃ khandhānaṃ sambhavoti laddhokāseṇa kammunā nibbattiyamānaṃ avasesapaccayantarasaḥitassa vipākaviññānaṃ uppattiyam nālaṃ vicchinnadesatā vibandhāya. Yathā ca anekakappasahassantarikāpi cutikkhandhā upapattikkhandhānaṃ anantarapaccayoti na kāladūratā, evaṃ anekayojanasahassantarikāpi te tesam anantarapaccayo hontīti na desadūratā. Evaṃ cutikkhandhanirodhānantaraṃ upapattiṭṭhāne paccayantarasaṃvāyena paṭisandhikkhandhā pātubhavantīti nattheva antarābhavo. Asati ca tasmīṃ yaṃ tassa keci ‘‘bhāvibhavanibhattakakammuno tato eva bhāvipurimakālabhavākāro sajātisuddhadibbacakkhugocaro ahīnindriyo kenaci appaṭihatagamaṇo gandhāhāro’’ti evamādikāraṇākārādiṃ vaṇṇenti, taṃ vañjhātanayassa rassadīghasamātaḍḍivivādasadisanti veditaḅbaṃ.

Antarābhavakathāvaṇṇanā niṭṭhitā.

3. Kāmaguṇakathāvaṇṇanā

510. Sabbepīti kusalākusalakkhandhādayopi. Tesampi hi ālambanattikatālakkhaṇassa kattukamyatāchandassa vasena siyā kamaṇaṭṭhatāti adhippāyo. Dhātukathāyaṃ ‘‘kāmabhavo pañcahi khandhehi ekādasahi āyatanehi sattarasahi dhātūhi saṅgahito. Katihi asaṅgahito? Na kehici khandhehi ekenāyatanena ekāya dhātuyā asaṅgahito’’ti āgatattā āha ‘‘**upādinnakkhandhānameva kāmabhavabhāvo dhātukathāyaṃ dassito**’’ti. **Pañcāti** gaṇanaparicchedo, tadaññagaṇananiṃvattanattoti ‘‘pañca kāmaguṇā’’ti vacanaṃ tato aññesaṃ tabbhāvaṃ nivattetīti āha ‘‘**pañceva kāmakoṭṭhāsā kāmoti vuttā**’’ti. Tato eva **kāmadhātūti vacanaṃ na aññassa nāmaṃ**, tesameva nāmantīti attho. Tayidaṃ paravādino matimattanti vuttaṃ ‘‘**iminā adhippāyenā**’’ti. **Evaṃ vacanamattanti** evaṃ ‘‘pañcime kāmaguṇā’’ti vacanamattaṃ nissāya, na panatthassa aviparītaṃ atthanti attho.

Kāmaguṇakathāvaṇṇanā niṭṭhitā.

5. Rūpadhātukathāvaṇṇanā

515-516. Rūpadhātūti vacanatoti ‘‘kāmadhāturūpadhātuarūpadhātū’’ti ettha rūpadhātūti vuttattā. **Rūpīdhammehevāti** ruppanasabhāvehiyeva dhammehi. ‘‘**Tayome bhavā**’’tiādinā **paricchinnāti** tayome bhavā, tisso dhātuyoti ca evaṃ paricchinnā. ‘‘Dhātuyā āgataṭṭhāne bhavena paricchinditaḅbaṃ, bhavassa āgataṭṭhāne dhātuyā paricchinditabba’’nti hi vuttaṃ, tasmā kāmarūpārūpāvacaradhammāva taṃtaṃbhummabhāvena paricchinnā evaṃ vuttā.

Rūpadhātukathāvaṇṇanā niṭṭhitā.

6. Arūpadhātukathāvaṇṇanā

517-518. Purimakathāyanti rūpadhātukathāyaṃ. **Avisesenāti** pavattiṭṭhānavasena visesaṃ akatvā.

Arūpadhātukathāvaṇṇanā niṭṭhitā.

7. Rūpadhātuyāāyatanakathāvaṇṇanā

519. Okāsabhāvenāti vatthubhāvena. **Tathāvidhanti** ghānādiākāraṃ.

Rūpadhātuyāāyatanakathāvaṇṇanā niṭṭhitā.

8. Arūperūpakathāvaṇṇanā

524-526. **Nissaraṇaṃ** nāma nissaritaḥ sati hoti, na asati, tasmā “**arūpabhava sukhumarūpaṃ atthi, yato nissaraṇaṃ taṃ āruppa**”nti āha.

Arūperūpakathāvaṇṇanā niṭṭhitā.

9. Rūpaṃkammantikathāvaṇṇanā

527-537. **Pakappayamānā**ti pakārehi kappayamānā attano sampayuttānañca kiccaṃ samatthayamānā. Tenāha “**sampayuttesu adhikaṃ byāpāraṃ kurumānā**”ti.

Rūpaṃkammantikathāvaṇṇanā niṭṭhitā.

10. Jīvitindriyakathāvaṇṇanā

540. **Antaṃ gahetvā vadatī** “atthi arūpadhammānaṃ āyu ṭhiti yapaṇā yāpaṇā iriyaṇā vattaṇā pālaṇā, atthi arūpajīvitindriya”nti tasmiṃ pañhe “atthi arūpajīvitindriya”nti imaṃ antaṃ pariyoṣānaṃ gahetvā vadati. **Vattaṃ yutto** samudāyassa icchanta tadavayavassa icchatī. Na hi avayavehi vinā samudāyo nāma atthi.

541. **Tamevā**ti arūpaṃ cittavippayuttameva.

542. **Tadāpī**ti samāpajjanavuṭṭhānakālepi.

544-545. **So yutto** dvinnaṃ rūpārūpajīvitindriyānaṃ sakasamaye icchitattā.

Jīvitindriyakathāvaṇṇanā niṭṭhitā.

11. Kammahetukathāvaṇṇanā

546. “Pāṇātipātakammaṃsa hetū”tiādikassa parihānikathāyaṃ anāgatattā yo tattha āgatanayo, tameva dassento “**sesanti...pe... vadati**”ti āha. **Sampaṭicchana**vacaṇanti sampaṭicchāpanavacaṇaṃ. **Taṃ** paravādiṃ. Taṃtaṃladdhisampaṭicchāpanaṃ vā gāhāpananti dassento “**pakkha**”ntiādimāha.

Kammahetukathāvaṇṇanā niṭṭhitā.

Aṭṭhamavaggavaṇṇanā niṭṭhitā.

9. Navamavaggo

1. Ānisaṃsadassāvīkathāvaṇṇanā

547. Daṭṭhabbassa ādīnavato ānisaṃsato ca yadipi paravādinā pacchā nānācittavasena paṭiññātaṃ, pubbe pana ekato katvā paṭijāni, na ca taṃ laddhiṃ pariccaji. Tenassa **adhippāyamaddanaṃ yuttanti** daṭṭhabbaṃ. Tenevāha “**anicca...pe... paṭiññātattā**”ti. **Ārammaṇavasena**ti ārammaṇakaraṇavasena, na kiccaṇipphattivasenaṇāti adhippāyo. **Idaṃ** ānisaṃsakathānuyūñjanaṃ ānisaṃsadassanañca. **Ñāṇaṃ vipassanā** paṭivedhaññassa viya anubodhaññassapi yathārahaṃ pavattinivattīsu kiccakaraṇaṃ yuttanti

adhippāyo.

Ānisaṃsadassāvīkathāvaṇṇanā niṭṭhitā.

2. Amatārammaṇakathāvaṇṇanā

549. Evamādinā suttabhayenāti ettha ādi-saddena “anāsavañca vo, bhikkhave, dhammaṃ desessāmi anāsavagāminiñca paṭipada”ntiādīni suttapadāni saṅgaṇhāti.

Amatārammaṇakathāvaṇṇanā niṭṭhitā.

3. Rūpaṃsārammaṇantikathāvaṇṇanā

552-553. “Tadappatiṭṭhaṃ anārammaṇa”ntiādīsu paccayattho ārammaṇa-saddo. “Rūpāyatanaṃ cakkhuvīññādhātuyā taṃsappayuttakānañca dhammānaṃ ārammaṇapaccayena paccayo”tiādīsu olubbhaṭṭhoti āha “**paccayaṭṭho olubbhaṭṭho**”ti. **Evam vibhāge vijjāmāneti** tattha paccayaṭṭhavuttitā paccayaṭṭho, daṇḍarajjuādi viya dubbalassa cittacetasiṅgānaṃ ālambitabbatāya upatthambhanaṭṭho olubbhaṭṭho. **Visesābhāvaṃ** paccayabhāvasāmaññena kappetvā vā.

Rūpaṃsārammaṇantikathāvaṇṇanā niṭṭhitā.

4. Anusayānārammaṇāntikathāvaṇṇanā

554-556. “Imasmiṃ satī”ti iminā maggena aniruddhatāpi saṅgahitāti āha “**appahīnattāva atthīti vuccatī**”ti. **Na pana vijjāmānattā**ti avadhāraṇena nivattitaṃ dasseti, vijjāmānattā dharmānattā khaṇattayasamaṅgibhāvatoti attho.

Anusayānārammaṇāntikathāvaṇṇanā niṭṭhitā.

5. Ñāṇaṃanārammaṇantikathāvaṇṇanā

557-558. Yassa adhiḡatattā arahato pariññeyyādīsu anavasesato sammoho vigato, taṃ aggamaḡgañāṇaṃ sandhāya “**maggañāṇassa**”ti vadanti. Yasmā tassa sabbassa satokāritā viya sampajānakāritā, tasmā tena ñāṇena so ñāṇī. Satipaññāvepullappatto hi so uttamapuriso.

Ñāṇaṃanārammaṇantikathāvaṇṇanā niṭṭhitā.

7. Vitakkānupatitakathāvaṇṇanā

562. Dvīhipīti dvīhi visesehi, visesena visesaṃ akatvāti attho.

Vitakkānupatitakathāvaṇṇanā niṭṭhitā.

8. Vitakkavipphārasaddakathāvaṇṇanā

563. Sabbasoti sabbappakāro, so pana pakāro pavattiṭṭhānakālavasena gahetabboti āha “**sabbattha sabbadā vā**”ti. Te ca ṭhānakālā “vitakkayato”tiādivacanato cittavisesavasena gahetabbāti vuttaṃ “**savitakkacittesū**”ti. “Vitakketvā vācaṃ bhindatī”ti suttapadaṃ ayoniso gahetvā “vitakkavipphāramattaṃ saddo”ti āha.

Vitakkavipphārasaddakathāvaṇṇanā niṭṭhitā.

9. Nayathācittassavācātikathāvaṇṇanā

565. Musāvādo na hotīti vuttaṃ anāpattīti sambandho.

Nayathācittassavācātikathāvaṇṇanā niṭṭhitā.

11. Atītānāgatasamannāgatakathāvaṇṇanā

568-570. **Samannāgatapaññattiyāti** samaṅgibhāvapaññattiyā. Tenevāha “**paccuppannadhammasamaṅgī samannāgatoti vuccatī**”ti. **Paṭilābhapaññattiyāti** adhigamanapaññattiyā. **Ayanti** “samannāgato”ti vuccamānapuggalassa yo tathā vattabbākāro, ayaṃ samannāgatapaññatti nāma. Esa nayo sesesupi.

Atītānāgatasamannāgatakathāvaṇṇanā niṭṭhitā.

Navamavaggavaṇṇanā niṭṭhitā.

10. Dasamavaggo

1. Nirodhakathāvaṇṇanā

571-572. Sakasamaye “purimacittassa nirodhānantaraṃ pacchimacittaṃ uppajjati”ti icchitaṃ, paravādī pana “yasmim̐ khaṇe bhavaṅgacittaṃ, tasmim̐yeva khaṇe kiriyamayacittaṃ uppajjati”ti vadati. Evaṃ sati purimacchimacittānaṃ **sahabhāvopi** anuññāto hoti. Tenāha “**bhaṅgakkhaṇena sahevā**”ti. Tathā ca sati vipākakiriyakkhandhānaṃ viya kiriyavipākakkhandhānaṃ vipākavipākakkhandhānaṃ kiriyakiriyakkhandhānaṃca vuttanayena sahabhāvo vattabboti imamatthaṃ dassento “**bhavaṅgacittassā**”tiādimāha. Tattha upapattibhavabhāvena esiyā icchitabbāti upapattesiyā vipākakkhandhā, te ca yebhuyyena bhavaṅgapariyāyakāti aṭṭhakathāyaṃ vuttaṃ “upapattesiyanti saṅkhaṃ gatassa bhavaṅgacittassā”ti. Ādipariyosānamattañhi tassa paṭisandhicutticittaṃ, tadārammaṇaṃ bhavaṅgantveva vuccatīti. **Cakkhuvīññāṇādīnaṃ** kiriyāvemajjhe patitattā **kiriyācatukkhandhaggahaṇena gahaṇaṃ yuttanti** vuttaṃ. **Cakkhuvīññāṇādīnanti** hi ādi-saddena na sotaviññāṇādīnaṃyeva gahaṇaṃ, atha kho sampañcchanasantīraṇānaṃpīti datṭhabbaṃ.

Nirodhakathāvaṇṇanā niṭṭhitā.

3. Pañcaviññāṇasamaṅgissamaggakathāvaṇṇanā

576. **Lakkhaṇanti** pañcaviññāṇānaṃ uppannārammaṇatādiavitathekappakāratālakkhaṇaṃ. Kāmaṃ manoviññāṇaṃ avatthukampi hoti, savatthukatte pana tampi uppannavatthukameva. Tathā hi pāḷiyaṃ ṭhapanāyaṃ “hañci pañcaviññāṇā uppannārammaṇā”tveva vuttaṃ. Manoviññāṇassapi uppannavatthukatāpariyāyo atthīti “pañca viññāṇā”ti avatvā “cha viññāṇā uppannavatthukā”ti vutte “no ca vata re vattabbe pañcaviññāṇasamaṅgissa atthi maggabhāvanā”ti vuttaṃ na sakkāti dassento āha “**cha viññāṇā...pe... adhippeta**”nti.

577. “Animittaṃ suññataṃ appaṇihita”nti nibbānassa te pariyāyā. Cakkhuvīññāṇassa animittagāhibhāve suññatārammaṇatāpī siyāti vuttaṃ “**tadeva suññatanti adhippāyo**”ti.

Pañcaviññāṇasamaṅgissamaggakathāvaṇṇanā niṭṭhitā.

5. Pañcaviññāṇāsābhogātikathāvaṇṇanā

584-586. Sā pana namitvā pavatti. **Ārammaṇappakāraggahaṇanti** ārammaṇassa iṭṭhāniṭṭhappakārassa gahaṇaṃ. **Yena** ārammaṇappakāraggahaṇena kusalacittassa **alobhādīhi sampayogo** akusalacittassa **lobhādīhi sampayogo hoti**, so ābhogoti dasseti.

Pañcaviññāṇāsābhogātikathāvaṇṇanā niṭṭhitā.

6. Dvīhisīlehītikathāvaṇṇanā

587-589. Appavattinirodhanti anuppādanirodhaṃ. Sīlassa vītikkamoyeva nirodho **sīlavītikkamanirodho. Ninnānaṃ** khaṇikanirodhaṃ sallakkhento.

Dvīhisīlehītikathāvaṇṇanā niṭṭhitā.

7. Sīlaṃacetāsikantikathāvaṇṇanā

590-594. Ṭhitena avinaṭṭhena. **Upacayenāti** sīlabhūtena kammūpacayena. **“Dānaṃ acetāsika”nti kathāyaṃ vuttanayenāti** yathā “na vattabbaṃ cetāsiko dhammo dānanti? Āmantā. Dānaṃ aniṭṭhaphalanti...pe... tena hi cetāsiko dhammo dāna’nti pāḷi pavattā, evaṃ tadanusārena “na vattabbaṃ cetāsikaṃ sīlanti? Āmantā. Sīlaṃ aniṭṭhaphala’ntiādinā sīlassa cetāsikabhāvasādhakāni suttapadāni ca ānetvā tadatthadassanavasena acetāsiko rūpādidhammo āyatimaṃ vipākaṃ deti. Yadi so sīlaṃ bhaveyya, vinā saṃvarasamādānena vinā viratiyā sīlavā nāma siyā. Yasmā pana samādānacetaṇā virati saṃvaro sīlaṃ, tasmā “sīlaṃ iṭṭhaphalaṃ kantaphala’ntiādinā yojanā kātabbāti imamattaṃ sandhāya vuttaṃ **“vuttanayenā”**ti, vuttanayānusārenāti attho. Yasmā pana pāḷiyaṃ yathā “sīlaṃ acetāsika’nti kathā āgatā, tathā “dānaṃ acetāsika’nti visuṃ āgatā kathā natthi, tasmā **“sā pana kathā maggitabbā”**ti vuttaṃ.

Sīlaṃacetāsikantikathāvaṇṇanā niṭṭhitā.

9. Samādānahetukathāvaṇṇanā

598-600. Samādānahetukathāyaṃ “phasso detī’nti ārabhitvā yāva kaṇhasukkasappaṭṭibhāgā dhammā sammukhībhāvaṃ āgacchantīti ārāmaropādisuttāharaṇaṇcāti ettakameva paribhogakathāya sadisanti āha **“samādāna...pe... daṭṭhabbā”**ti.

Samādānahetukathāvaṇṇanā niṭṭhitā.

11. Aviññattidussīlyantikathāvaṇṇanā

603-604. Mahābhūtāni upādāya pavatto aññacittakkhaṇepi labbhamāno kusalākusalānubandho aviññattīti ayaṃ vādo “cittavippayutto apuññūpacayo’nti iminā saṅgahitoti tato aññānubandhāyaṃ “āṇattiyā’ntiādi vuttanti taṃ dassetuṃ **“āṇattiyā...pe... adhippāyo”**ti vuttaṃ. Tattha āṇatto yadā āṇattabhāvena vihiṃsādikiriyaṃ sādheti, tadā āṇattiyā pāṇātipātādīsu aṅgabhāvo veditabbo. Sā panāṇatti pārivāsikabhāvena viññattirahitā nāma hotīti paravādino adhippāyo, taṃ dassetuṃ **“ekasmim divase”**tiādi vuttaṃ.

Aviññattidussīlyantikathāvaṇṇanā niṭṭhitā.

Dasamavaggavaṇṇanā niṭṭhitā.

Dutiyo paṇṇāsako samatto.

11. Ekādasamavaggo

4. Ñāṇakathāvaṇṇanā

614-615. “Andhakā”ti vuttā pubbaseliyaaparaseiyarājagirikasiddhatthikāpi yebhuyyena mahāsaṅghikā evāti vuttaṃ “**pubbe...pe... bhaveyyu**”nti. Tattha aññeti vacanaṃ dvinnam kathānaṃ ujuvipaccanīkabhāvato. Purimakānañhi cakkhuvīññādisamaṅgī “ñāṇī”ti vuccati, imesaṃ so eva “ñāṇī”ti na vattabboti vutto. **Rāgavigamo** rāgassa samucchindanaṃ, tathā **aññānavigamo**. Yathā samucchinnāvijjo “ñāṇī”ti, paṭipakkhato “aññāṇī”ti, evaṃ asamucchinnāvijjo “aññāṇī”ti, paṭipakkhato “ñāṇī”ti vutto. **Aññāṇassa vigatattā so “ñāṇī”ti vattabbaṃ** āpajjati, na pana satataṃ samitaṃ ñāṇassa pavattanatoti adhippāyo.

Ñāṇakathāvaṇṇanā niṭṭhitā.

7. Iddhibalakathāvaṇṇanā

621-624. Yasmiṃ āyukappe kammakkhayena maraṇaṃ hoti, taṃ sandhāya vuttaṃ “**kamassa vipākavasena**”ti, yasmiṃ pana āyukkayena maraṇaṃ hoti, taṃ sandhāya “**vassagaṇanāyā**”ti. Tattha “na ca tāva kālaṃ karoti, yāva na taṃ pāpakammaṃ byantī hoti”ti (ma. ni. 3.250; a. ni. 3.36) vacanato yebhuyyena niraye kammakkhayena maraṇaṃ hotīti āha “**kamassa vipākavasena vāti nirayaṃva sandhāya vutta**”nti. “Vassasataṃ vassasahassaṃ vassasatasahassānī”tiādinaṃ manussānaṃ devānañca āyuparicchedavacanato yebhuyyena tesam āyukkayena maraṇaṃ hotīti vuttaṃ “**vassagaṇanāyā vāti manusse cātumahārājikādideve ca sandhāyā**”ti. “Vutta”nti ānetvā yojetabbaṃ.

Iddhibalakathāvaṇṇanā niṭṭhitā.

8. Samādhikathāvaṇṇanā

625-626. Samaṃ ṭhapanatṭhenāti samaṃ visamaṃ līnuddhaccādiṃ paṭibāhitvā, vikkhepameva vā viddhamsetvā ṭhapanatṭhena. “Cittasantati samādhī”ti vadantena tassa cetasikabhāvo paṭikkhitto hotīti āha “**cetasikantaraṃ atthīti aggahetvā**”ti. Bhāvanāyā āhitavisesāya ekaggatāya vijjamānavisesapaṭikkhepo **chalaṃ**, so panassa anāhitavisesāya ekaggatāya sāmāññenāti āha “**sāmāññamattenā**”ti.

Samādhikathāvaṇṇanā niṭṭhitā.

9. Dhammatṭhitatākathāvaṇṇanā

627. Avijjāya yā ṭhitatāti avijjāya saṅkhārānaṃ anantarapaccayabhāve yā niyatatā dhammaniyāmatāsāṅkhātā, yā ṭhitasabhāvataṃ nipphannā, na dhammamattatātṭhitatāya nipphannāya vasena, **anantarapaccayabhāvasāṅkhātā ṭhitatā** paccayatā hotīti attho. **Aññamaññapaccayabhāvarahitassāti** idaṃ saḥajātanissayādipaccayānaṃ paṭikkhepapadaṃ datṭhabbaṃ, na aññamaññapaccayatāmattassa. **Sabbo tādisoti** iminā samanantaraanantarūpanissayanatthivigatāsevanādikaṃ saṅgaṇhāti. **Aññamaññapaccayatañcāti** etthāpi vuttanayena attho vedītabbo. Ettha pana paccayuppannassapi paccayabhāvato saṅkhārānampi vasena yojetabbaṃ. Tenāha “**tassā ca itarā**”ti.

Dhammatṭhitatākathāvaṇṇanā niṭṭhitā.

10. Aniccatākathāvaṇṇanā

628. Rūpādīnaṃ aniccatā rūpādike sati hoti, asati na hotīti iminā pariyāyena tassā tehi saha uppādanirodho vutto, uppādādīsu tīsu lakkhaṇesu aniccatāvohāro hotīti yathā tayo daṇḍe upādāya pavatto tidaṇḍavohāro tesu sabbesu hoti, evaṃ jātijarāmarañadhammo na nicco anicco, tassa jātiādīpakatitā aniccatāsaddena vuccatīti uppādādīsu lakkhaṇesu aniccatāvohāro sambhavatīti vuttaṃ “**tīsu...pe... hotī**”ti. **Vibhāgānuyuñjanavasenā**ti pabhedānuyuñjanavasena. Tattha yathā jarābhaṅgavasena aniccatā pākāṭā hoti, na tathā jātivasenāti pāḷiyaṃ jarāmarañavaseneva aniccatāvibhāgo dassitoti daṭṭhabbaṃ.

Aniccatākathāvaṇṇanā niṭṭhitā.

Ekādasamavaggavaṇṇanā niṭṭhitā.

12. Dvādasamavaggo

1. Saṃvarokammantikathāvaṇṇanā

630-632. Sabbassapī manaso manodvārabhāvato “**vipākadvāranti bhavaṅgamaṇaṃ vadatī**”ti āha.

Saṃvarokammantikathāvaṇṇanā niṭṭhitā.

2. Kammakathāvaṇṇanā

633-635. Savipākāpī dassitāyeva nāma hoti vuttāvasiṭṭhā savipākāti atthasiddhattā.

Kammakathāvaṇṇanā niṭṭhitā.

4. Saḷāyatanakathāvaṇṇanā

638-640. Manāyatane kadesassa vipākassa atthitāya “**avisesenā**”ti vuttaṃ.

Saḷāyatanakathāvaṇṇanā niṭṭhitā.

5. Sattakkhattuparamakathāvaṇṇanā

641-645. Assāti imassa sattakkhattuparamassa. Tenāha “**sattakkhattuparamabhāve ca niyāmaṃ icchasi**”ti. **Yena** ānantariyakammena. **Antarā**ti satta bhava anibbattvā tesam antareyeva. **Kecī**ti abhayagirivāsino. **Apareti** padakārā. **Tassāti** yo sattakkhattuparamoti vā, kolaṃkoloti vā, ekabījīti vā bhagavatā nīṇena paricchindivā byākato, tassa yathāvuttaparicchedā antarā uparimaggādhigamo natthi avitathadesanattā. Yathāparicchedameva tassa abhisamayo, svāyaṃ vibhāgo tesameyeva puggalānaṃ indriyaparopariyattena vedītabbo bhavaniyāmena tādisassa kassaci abhāvato. Yasmā kassaci mudukānīpi indriyāni paccayavisesena tikkhabhāvaṃ āpajjeyyūṃ, tasmā tādisaṃ sandhāya “**bhabboti vuccati, na so abhabbo nāmā**”ti ca vuttaṃ. Yasmā pana bhagavā na tādisaṃ “sattakkhattuparamo”tiādīnā niyamevā byākaroti, tasmā āha “**na pana antarā abhisametum bhabbatā vuttā**”ti. Ayañca nayo ekantena icchitabbo. Aññathā puggalassa saṅkaro siyāti dassento “**yadi cā**”tiādīmāha.

Sattakkhattuparamakathāvaṇṇanā niṭṭhitā.

Dvādasamavaggavaṇṇanā niṭṭhitā.

13. Terasamavaggo

1. Kappaṭṭhakathāvaṇṇanā

654-657. “Heṭṭhā vuttādhippāyamevā”ti idaṃ iddhibalakathāyaṃ yaṃ vuttaṃ “atītaṃ anāgatanti idaṃ avisesena kappam tiṭṭheyyāti paṭiññātattā codetī”tiādi, taṃ sandhāya vuttanti āha “**heṭṭhāti iddhibalakathāya**”nti. Tattha “dve kappe”tiādiyuparicchedātikkamasamattatācodanāvasena āgatā, idha pana saṅghabhedako āyukappameva aṭṭhatvā yadi ekaṃ mahākappam tiṭṭheyya, yathā ekaṃ, evaṃ anekepi kappe tiṭṭheyyāti codanā kātabbā.

Kappaṭṭhakathāvaṇṇanā niṭṭhitā.

4. Niyatassaniyāmakathāvaṇṇanā

663-664. Appattaniyāmānanti ye anuppannicchattasammattaniyatadhammā puggalā, tesam dhamme. Ke pana te? Yathāvuttapuggalasantānapariyāpannā dhammā. Te hi bhūmittayapariyāpannatāya “**tebhūmakā**”ti vuttā. Ye pana pattaniyāmānaṃ santāne pavattā aniyatadhammā, na tesamettha saṅgaho kato. Na hi tehi samannāgadena aniyatatā atthi. Tenevāha “**tehi samannāgatopi aniyatoyevā**”ti. **Imaṃ vohāramattanti** iminā niyāmo nāma koci dhammo natthi, upacitasambhāratāya abhisambujjhitaṃ bhabbatāva tathā vuccatīti dasseti. Niyatoti vacanassa kāraṇabhāvena vuttoti yojanā. **Ubhayassapīti** niyato niyāmaṃ okkamatīti vacanadvayassa.

Niyatassaniyāmakathāvaṇṇanā niṭṭhitā.

8. Asātarāgakathāvaṇṇanā

674. **Evam pavattamānoti** “aho vata me bhaveyyā”ti evaṃ patthanākārena pavattamāno. **Aññathāti** nandanādiākārena.

Asātarāgakathāvaṇṇanā niṭṭhitā.

9. Dhammatanḥāabyākatātikathāvaṇṇanā

676-680. **Gahetvāti** etena gahaṇamattameva taṃ, na pana sā tādisī atthīti dasseti. Na hi lokuttarārammaṇā abyākatā vā taṇhā atthīti. **Tīhi koṭṭhāsehīti** kāmabhavavibhavataṇhākoṭṭhāsehi. Rūpataṇhādibhedā **chapi taṇhā**.

Dhammatanḥāabyākatātikathāvaṇṇanā niṭṭhitā.

Terasamavaggavaṇṇanā niṭṭhitā.

14. Cuddasamavaggo

1. Kusalākusalapaṭisandahanakathāvaṇṇanā

686-690. Anantarapaccayabhāvoyevettha paṭisandhānaṃ ghaṭanañcāti āha “**anantaram uppādetī**”ti.

Kusalākusalapaṭṭisandahanakathāvaṇṇanā niṭṭhitā.

2. Saḷāyatanuppattikathāvaṇṇanā

691-692. Keci vādinoti kāpile sandhāyāha. Te hi abhibyattavādino vijjamānameva kāraṇe phalaṃ anabhibyattaṃ hutvā ṭhitaṃ pacchā abhibyattiṃ gacchatīti vadantā bijāvatthāya vijjamānāpi rukkhādīnaṃ na aṅkurādayo āvibhavanti, bijamattaṃ āvibhavaṃ gacchatīti kathenti.

Saḷāyatanuppattikathāvaṇṇanā niṭṭhitā.

3. Anantarapaccayakathāvaṇṇanā

693-697. Anantaruppattiṃ sallakkhentoti cakkhuvīññāṇānantaraṃ sotaviññāṇuppattiṃ maññamāno. **Sotaviññāṇanti** vacaneneva tassa cakkhusannissayatā rūpārammaṇatā ca paṭikkhittā, paṭiññātā ca sotasannissayatā saddārammaṇatā cāti āha “**na so cakkhumhi saddārammaṇa**”nti. Tattha **saddārammaṇanti** “sotaviññāṇaṃ icchatī”ti ānetvā sambandhitabbaṃ. Tayidaṃ cakkhuvīññāṇassa anantaraṃ sotaviññāṇaṃ uppajjatīti laddhiyā evaṃ ñāyatīti āha “**anantarūpaladdhivasena āpannattā**”ti.

Anantarapaccayakathāvaṇṇanā niṭṭhitā.

4. Ariyarūpakathāvaṇṇanā

698-699. Sammāvācādīti sammāvācākammantā. Tattha sammāvācā saddasabhāvā, itaro ca kāyaviññattisabhāvo, ubhayampi vā viññattīti adhippāyena rūpantissa laddhi.

Ariyarūpakathāvaṇṇanā niṭṭhitā.

5. Aññoanusayotikathāvaṇṇanā

700-701. Tasmim samayeti kusalābyākatacittakkhaṇe. **So hīti** pacchimapāṭho.

Aññoanusayotikathāvaṇṇanā niṭṭhitā.

6. Pariyuṭṭhānaṃcittavippayuttantikathāvaṇṇanā

702. Teti rāgādayo. Tasmāti yasmā vipassantassapi rāgādayo uppajjanti, tasmā.

Pariyuṭṭhānaṃcittavippayuttantikathāvaṇṇanā niṭṭhitā.

7. Pariyāpannakathāvaṇṇanā

703-705. Kilesavatthuokāsavasenāti kilesakāmaavatthukāmabhūmivasena. **Rūpadhātusahagatavasena anusetīti** kāmarāgo yathā kāmavitakkasaṅkhātāya kāmadhātuyā saha paccayasamavāye uppajjanāraho, tameva rūpadhātuyāpīti attho. Rāgādikāraṇalābhe uppattiarahatā hi anusayanaṃ.

Pariyāpannakathāvaṇṇanā niṭṭhitā.

8. Abyākatakathāvaṇṇanā

706-608. Sabbathāpīti avipākabhāvenapi sassatādibhāvenapi.

Abyākatakathāvaṇṇanā niṭṭhitā.

9. Apariyāpannakathāvaṇṇanā

709-710. Tasmā diṭṭhi lokiypariyāpannā na hotīti atthaṃ vadanti, evaṃ sati atippasaṅgo hoti vītadosādivohārabhāvatoti. Tato aññathā atthaṃ vadanto “**rūpaditṭhiyā**”tiādimāha. Tattha **ādi**-saddena arūpaditṭhiādiṃ saṅgaṇhāti. Paravādiadhippāyavasena ayamattavibhāvanāti āha “**yadi ca pariyāpannā siyā**”ti. **Tathā ca satīti** diṭṭhiyā kāmadhātupariyāpannatte satīti attho. **Tasmāti** “vītadiṭṭhiko”ti evaṃ vohārabhāvato. **Na hi sā tassa avigatā diṭṭhi**, yato so vītadiṭṭhikoti na vuccati. **Yenāti** kāmadiṭṭhibhāvena.

Apariyāpannakathāvaṇṇanā niṭṭhitā.

Cuddasamavaggavaṇṇanā niṭṭhitā.

15. Pannarasamavaggo

1. Paccayatākathāvaṇṇanā

711-717. Vavatthitoti asaṅkiṇṇo. Yo hi dhammo yena paccayabhāvena paccayo hoti, tassa tato aññenapi paccayabhāve sati paccayatā saṅkiṇṇā nāma bhaveyya. Viruddhāsambhavīnaṃ viya tabbidhurānaṃ paccayabhāvānaṃ sahabhāvaṃ paṭikkhipati.

Paccayatākathāvaṇṇanā niṭṭhitā.

2. Aññamaññapaccayakathāvaṇṇanā

718-719. Sahajātāti vuttattā na saṅkhārapaccayā ca avijjāti vuttattāti adhippāyo. Anantarādināpi hi saṅkhārā avijjāya paccayā hontiyeva. Aññamaññānantaraṃ avatvā avigatānantaraṃ sampayuttassa vacanaṃ **kamabhedo, atthiggahaṇeneva gahito** atthipaccayabhūtoyeva dhammo nissayapaccayo hotīti. **Asādhāraṇatāyāti** padantarāsādhāraṇatāya. Tenāha “**vakkhati hi**”tiādi.

Aññamaññapaccayakathāvaṇṇanā niṭṭhitā.

9. Tatiyasaññāvedayitakathāvaṇṇanā

732. Yadipi sesaṃ nāma gahitato aññaṃ, tathāpi pakaraṇaparicchinnamevettha taṃ gayhatīti dassento “**yesaṃ...pe... adhippāyo**”ti vatvā puna anavasesameva saṅgaṇhanto “**asaññasattānampi cā**”tiādimāha. Tattha sabbasatte sandhāyāti adhippāyoti yojanā. Pāṇisamphassāpi kamantītiādikaṃ sarīrapakatīti sambandho.

733-734. Pañcahi viññāṇehi na cavati, na upapajjatīti vādaṃ paravādī nānujānātīti āha “**sutta... pe... vattabba**”nti.

Tatiyasaññāvedayitakathāvaṇṇanā niṭṭhitā.

10. Asaññasattupikākathāvaṇṇanā

735. Yathā vitakkavicārapītisukhavirāgavasena pavattā samāpatti vitakkādirahitā hoti, evaṃ saññāvirāgavasena pavattāpi saññārahitāva siyāti tassa laddhīti dassento āha “**sāpi asaññitā...pe... dasseti**”ti.

736. Yadi catutthajjhānasamāpatti kathaṃ asaññasamāpattīti codanaṃ sandhāyāha “**saññāvirāgavasena samāpannattā asaññitā, na saññāya abhāvato**”ti.

Asaññasattupikākathāvaṇṇanā niṭṭhitā.

11. Kammūpacayakathāvaṇṇanā

738-739. “Kammūpacayo kammaena sahajāto”ti puṭṭho sampayuttasahajātataṃ sandhāya paṭikkhipati, vippayuttasahajātataṃ sandhāya paṭijjānātīti. Vippayuttassapi hi atthi sahajātata cittasamuṭṭhānarūpassa viyāti adhippāyo.

741. **Tiṇṇanti** kammakammūpacayakammavipākānaṃ.

Kammūpacayakathāvaṇṇanā niṭṭhitā.

Pannarasamavaggavaṇṇanā niṭṭhitā.

Tatiyo paṇṇāsako samatto.

16. Soḷasamavaggo

3. Sukhānuppadānakathāvaṇṇanā

747-748. **Na tassāti** yassa taṃ anuppadissati, na tassa. Yo hi anuppadeti, yassa ca anuppadeti, tadubhayavinimuttā idha pareti adhippetā.

Sukhānuppadānakathāvaṇṇanā niṭṭhitā.

4. Adhigayhamanasikārakathāvaṇṇanā

749-753. **Taṃcittatāyāti** ettha manasikaronto yadi sabbasaṅkhāre ekato manasi karoti, yena cittena manasi karoti, sabbasaṅkhārantogadhattā tasmimyeva khaṇe taṃ cittaṃ manasi kātabbaṃ etassāti taṃcittatā nāma doso āpajjatīti dassento āha “**tadeva ārammaṇabhūta**”ntiādi. Etena tasseva tena manasikaraṇāsambhavamāha, **taṃ vāti**ādīnā pana sasaṃvedanāvādāpattinti ayametesam vireso.

Adhigayhamanasikārakathāvaṇṇanā niṭṭhitā.

Soḷasamavaggavaṇṇanā niṭṭhitā.

17. Sattarasamavaggo

1. Atthiarahatopuññūpacayakathāvaṇṇanā

776-779. **Kiriyacittaṃ abyākataṃ anādiyitvāti** “kiriyacittaṃ abyākata”nti aggahetvā, dānādīpavattanena dānamayādīpuññattena ca gahetvāti attho.

Atthiarahatopuññūpacayakathāvaṇṇanā niṭṭhitā.

2. Natthiarahatoakālamaccūtikathāvaṇṇanā

780. Aladdhavipākavārānanti vipākadānaṃ pati aladdhokāsānaṃ. **Byantībhāvanti** vigatantataṃ, vigamaṃ avipākanti attho.

781. Tato paranti byatirekena atthasiddhi, na kevalena anvayenāti āha “**tāva na kamati, tato paraṃ kamatīti laddhiyā paṭikkhipatī**”ti. Tattha **tato paranti** pubbe katassa kammaṃ parikkhayagamanato paraṃ. **Natthi pāṇātipāto** pāṇātipātalakkhaṇābhāvatoti adhippāyo. Tameva lakkhaṇābhāvaṃ dassetuṃ “**pāṇopāṇasaññitā**”tiādi vuttaṃ. Tattha **na tenāti** yo parena upakkamo kato, tena upakkamena na mato, dhammatāmarāṇeṃeva matoti **dubbiññeyyaṃ** avisesavidūhi, dubbiññeyyaṃ vā hotu suviññeyyaṃ vā, aṅgapāripūriyāva pāṇātipāto.

Natthiarahatoakālamaccūtikathāvaṇṇanā niṭṭhitā.

3. Sabbamidamaṅkamatotikathāvaṇṇanā

784. Abijatoti sabbena sabbamaṃ abijato aññabijato ca. **Tanti** deyyadhammaṃ, gilānapaccayanti attho.

Sabbamidamaṅkamatotikathāvaṇṇanā niṭṭhitā.

4. Indriyabaddhakathāvaṇṇanā

788. Vināpi aniccaṭṭhenāti aniccaṭṭhaṃ ṭhapetvāpi aṭṭhapetvāpīti attho, na aniccaṭṭhavirahenāti. Na hi aniccaṭṭhavirahitaṃ anindriyabaddhaṃ atthi.

Indriyabaddhakathāvaṇṇanā niṭṭhitā.

7. Navattabbaṃsaṅghodakkhiṇaṃvisodhetītikathāvaṇṇanā

793-794. Appaṭiggahaṇatoti paṭiggāhakattābhāvato.

Navattabbaṃsaṅghodakkhiṇaṃvisodhetītikathāvaṇṇanā niṭṭhitā.

11. Dakkhiṇāvisuddhikathāvaṇṇanā

800-801. Paṭiggāhakanirapekkhāti paṭiggāhakassa guṇavisesanirapekkhā, tassa dakkhiṇeyyabhāvena vināti attho. Tenāha “**paṭiggāhakena paccayabhūtena vinā**”ti. **Saccametanti** laddhikittanena vuttabhāvameva paṭijānāti. Paṭiggāhakassa **vipākanibbattaṃ** dānacetanāya mahāphalatā. Paccayabhāvoyeva hi tassa, na tassā kāraṇattaṃ. Tenāha “**dānacetanānibbattanena yadi bhaveyyā**”tiādi.

Dakkhiṇāvisuddhikathāvaṇṇanā niṭṭhitā.

Sattarasamavaggaṇṇanā niṭṭhitā.

18. Aṭṭhārasamavaggo

1. Manussalokakathāvaṇṇanā

802-803. **Gahaṇanti micchāgahaṇaṃ.**

Manussalokakathāvaṇṇanā niṭṭhitā.

2. Dhammadesanākathāvaṇṇanā

804-806. **Tassa ca nimmitabuddhassa desanaṃ sampañcchitvā āyasmatā ānandena sayameva ca desito.**

Dhammadesanākathāvaṇṇanā niṭṭhitā.

6. Jhānasaṅkantikathāvaṇṇanā

813-816. **Vitakkavicāresu virattacittatā tattha ādīnavamanasikāro, tadākāro ca dutiyajjhānūpacāroti āha “vitakkavicārā ādīnavato manasi kātabbā, tato dutiyajjhānena bhavitabba”nti.**

Jhānasaṅkantikathāvaṇṇanā niṭṭhitā.

7. Jhānantarikakathāvaṇṇanā

817-819. **Na paṭhamajjhānaṃ vitakkābhāvato, nāpi dutiyajjhānaṃ vicārasabbhāvato ti jhānametaṃ na hotīti dassento āha “paṭhamajjhānādīsu aññatarabhāvābhāvato na jhāna”nti.**

Jhānantarikakathāvaṇṇanā niṭṭhitā.

9. Cakkhunārūpampassatītikathāvaṇṇanā

826-827. **“Cakkhunā rūpaṃ disvā”ti iminā cakkhuviññāṇena paṭijānanassa aggahaṇe aruciṃ sūcento āha “manoviññāṇapaṭijānanam kira sandhāyā”ti. Tenevāha “manoviññāṇapaṭijānanam panā”tiādi. Tasmāti manoviññāṇapaṭijānanasseva adhippetattāti attho. Evaṃ santeti yadi rūpena rūpaṃ paṭivijānāti, rūpaṃ paṭivijānantampi manoviññāṇam rūpavijānanam hoti, na rūpadassananti āha “manoviññāṇapaṭijānanam pana rūpadassanam katham hoti”ti.**

Cakkhunārūpampassatītikathāvaṇṇanā niṭṭhitā.

Aṭṭhārasamavaggavaṇṇanā niṭṭhitā.

19. Ekūnavīsativavaggo

1. Kilesapajahanakathāvaṇṇanā

828-831. **Te panāti ye ariyamaggena pahīnā kilesā, te pana. Kāmañcetha maggena pahātabbakilesā maggabhāvanāya asati uppajjanārahā khaṇattayaṃ na āgatāti ca anāgatā nāma siyuṃ, yasmā pana te na uppajjissanti, tasmā tathā na vuccantīti daṭṭhabbam. Tenevāha “nāpi bhavissanti”ti.**

Kilesapajahanakathāvaṇṇanā niṭṭhitā.

2. Suññatakathāvaṇṇanā

832. Yena avasavattanaṭṭhena paraparikkappito natthi etesaṃ attano visayanti anattāti vuccanti sabhāvadhammā, svāyaṃ anattatāti āha “**avasavattanākāro anattatā**”ti. Sā panāyaṃ yasmā atthato asārakatāva hoti, tasmā tadekadesena taṃ dassetuṃ “**atthato jarāmarañamevā**”ti āha. Evaṃ sati lakkhaṇasaṅkaro siyā, tesam panidaṃ adhippāyakittananti daṭṭhabbaṃ. Arūpadhammānaṃ avasavattanākāratāya eva hi anattalakkhaṇassa saṅkhārakkhandhapariyāpannatā.

Suññatakathāvaṇṇanā niṭṭhitā.

3. Sāmaññaphalakathāvaṇṇanā

835-836. Pattidhammanti heṭṭhā vuttaṃ samannāgamamāha.

Sāmaññaphalakathāvaṇṇanā niṭṭhitā.

5. Tathatākathāvaṇṇanā

841-843. Rūpādīnaṃ sabhāvatāti etena rūpādayo eva sabhāvatāti imamattaṃ paṭikkhipati. Yato taṃ paravādī rūpādīsu apariyāpannaṃ icchati. Tenāha “**bhāvaṃ hesa tathatāti vadati, na bhāvayoga**”nti. Tattha **bhāvanti** dhammamattaṃ, pakatīti attho “jātidhamma”ntiādīsu viya. Rūpādīnañhi ruppanādīpakati tathā asaṅkhatāti ca paravādino laddhi. Tena vuttaṃ “**na bhāvayoga**”nti. Yena hi bhāvo sabhāvadhammo yujjati, ekībhāvameva gacchati, taṃ ruppanādīlakkhaṇaṃ bhāvayogo. Taṃ pana rūpādīto anaññaṃ, tato eva saṅkhatam, aviparītaṭṭhena pana “tatha”nti vuccati.

Tathatākathāvaṇṇanā niṭṭhitā.

6. Kusalakathāvaṇṇanā

844-846. Anavajjabhāvamatteneva kusalanti yojanā. **Tasmāti** yasmā avajjarahitaṃ anavajjaṃ, anavajjabhāvamatteneva ca kusalam, tasmā nibbānaṃ kusalanti.

Kusalakathāvaṇṇanā niṭṭhitā.

7. Accantaniyāmakathāvaṇṇanā

847. Yaṃ “ekavāraṃ nimuggo tathā nimuggova hoti, etassa puna bhavato vuṭṭhānaṃ nāma natthī”ti aṭṭhakathāyaṃ āgataṃ, so pana ācariyavādo, na aṭṭhakathānayoṭi dassento “**tāya jātiyā...pe... maññaṃāno**”ti āha. Tattha **tāya jātiyāti** yassaṃ jātiyaṃ puggalo kammāvaraṇādīvaraṇehi samannāgato hoti, tāya jātiyā. **Saṃsārakhāṇukabhāvo** vassabhaññādīnaṃ viya makkhaliādīnaṃ viya ca daṭṭhabbo. So ca ahētukādīmicchādassanassa phalabhāveneva vedītabbo, na accantaniyāmassa nāma kassaci atthibhāvato. Yathā hi vimuccantassa koci niyāmo nāma natthi ṭhapetvā maggena bhavaparicchedaṃ, evaṃ avimuccantassapī koci saṃsāranīyāmo nāma natthi. Tādīssassa pana micchādassanassa balavabhāve aparimitakappaparicchede cirataraṃ saṃsārappabandho hoti, apāyūpapatti ca yattha saṃsārakhāṇusamañña.

Yaṃ paneke vadanti “attheva accantaṃ saṃsaritā anantattā sattaniyāyassā”ti, tampi apuññabahulaṃ sattaśāntānaṃ sandhāya vuttaṃ siyā. Na hi mātuḡhātākādīnaṃ tenattabhāvena sammattaniyāmokkamanantarāyabhūto micchattaniyāmo viya śāntānaṃ vimuttantarāyakaro saṃsāranīyāmo nāma natthi. Yāva pana na maggaḡphalassa upanīssayo upalabbhati, tāva saṃsāro aparicchinno. Yādā ca so upaladdho, tadā so paricchinno evāti daṭṭhabbaṃ.

Yathā niyatasammādhassanaṃ, evaṃ niyatamicchādhassanaṃ saviṣaye ekamsagāhavasena ukkamsagatena bhavitabbanti tena samannāgatassa puggalassa sati accantaniyāme kathaṃ tasmim̐ abhinivesaviṣaye anekamsagāho uppajjeyya, abhinivesantaraṃ vā viruddhaṃ yadi uppajjeyya, accantaniyāmo eva na siyāti pāḷiyaṃ vicikicchuppattiniyāmantaruppatticodanā katā. Na hi vicikicchā viya sammattaniyatapuggalānaṃ yathākkamaṃ micchattasammattaniyatapuggalānaṃ sammattamicchattaniyatā dhammā kadācipi uppajjanti, aviruddhaṃ pana niyāmantarameva hotīti ānantarikantaraṃ viya micchādhassanantaraṃ samānajātikaṃ na nivattetīti viruddhaṃyeva dassetuṃ pāḷiyaṃ vicikicchā viya sassatucchedadiṭṭhiyo eva uddhaṭā. Evamettha vicikicchuppattiniyāmantaruppattīnaṃ niyāmantaruppattinivattakabhāvo vedītabbo, accantaniyāmo ca nivattissatīti ca viruddhametanti pana “**vicāretvāva gahetabbā**”ti vuttaṃ siyā.

Accantaniyāmakathāvaṇṇanā niṭṭhitā.

8. Indriyakathāvaṇṇanā

853-856. Yathā lokuttarā saddhādayo eva saddhindriyādīni, evaṃ lokiyāpi. Kasmā? Tatthāpi adhimokkhalakkhaṇādīnā indaṭṭhasabbhāvato. Saddheyyādivatthūsu saddahanādimattameva hi tanti imamatthaṃ dassento āha “**lokuttarānaṃ...pe... daṭṭhabbo**”ti.

Indriyakathāvaṇṇanā niṭṭhitā.

Ekūnavīsativavaggavaṇṇanā niṭṭhitā.

20. Vīsativavaggo

2. Nānakathāvaṇṇanā

863-865. Kāmaṃ pubbhāgepi attheva dukkhapariññā, atthasādhikā pana sā maggakkhaṇikā evāti ukkamsagataṃ dukkhapariññāṃ sandhāya avadhārento āha “**dukkhaṃ...pe... maggaññameva dīpeti**”ti. Taṃ pana avadhāraṇaṃ na ñāṇantaraniyattanaṃ, atha kho ñāṇantarassa yathādhigatakiccaniyattanaṃ daṭṭhabbaṃ. Tenāha “**na tasseva ñāṇabhāva**”ntiādi.

Nānakathāvaṇṇanā niṭṭhitā.

3. Nirayapālakathāvaṇṇanā

866-868. Nerayike niraye pārenti, tato niggantaṃ appadānavasena rakkhantīti **nirayapālā**. Nirayapālatāya vā nerayikānaṃ narakadukkheṇa pariyonaddhāya alaṃ samatthāti **nirayapālā**. Kiṃ panete nirayapālā nerayikā, udāhu anerayikāti. Kiñcetha – yadi tāva nerayikā, nirayasamvattaniyena kammena nibbattāti sayampi nirayadukkhaṃ paccanubhaveyyuṃ, tathā sati aññesaṃ nerayikānaṃ yātanāya asamatthā siyuṃ, “ime nerayikā, ime nirayapālā”ti vavatthānañca na siyā. Ye ca ye yātentī, tehi samānarūpabalappamañehi itaresaṃ bhayasantāsā na siyuṃ. Atha anerayikā, tesam̐ tattha kathaṃ sambhavoti? Vuccate – anerayikā nirayapālā anirayagatisamvattaniyakammaṇibhattā. Nirayūpapattisamvattaniyakammato hi aññeneva kammunā te nibbattanti rakkhasajātikattā. Tathā hi vadanti –

“Kodhanā kurūrakammantā, pāpābhirucino tathā;
Dukkhesu ca nandanti, jāyanti yamarakkhasā”ti.

Tattha yadeke vadanti “yātanādukkhassa appaṭisaṃvedanato, aññathā puna aññamaññaṃ

yāteyyu’’nti ca evamādi, tayidaṃ ākāsaromaṭṭhanaṃ nirayapālānaṃ nerayikabhāvasseva abhāvato. Ye pana vadeyyuṃ – yadipi anerayikā nirayapālā, ayomayāya pana ādittāya sampajjalitāya sajotibhūtāya nirayabhūmiyā parivattamānā kathaṃ nāma dukkhaṃ nānubhavantīti? Kammānubhāvato. Yathā hi iddhimanto cetovasippattā mahāmogallānādayo nerayike anukampantā iddhibalena nirayabhūmiṃ upagatā tattha dāhadukkheṇa na bādhiyanti, evaṃ sampadamidaṃ daṭṭhabbaṃ.

Taṃ iddhivisayassa acinteyyabhāvatoti ce? Idampi taṃsamānaṃ kammavipākassa acinteyyabhāvato. Tathārūpeṇa hi kammunā te nibbattā yathā nirayadukkheṇa abādhitā eva hutvā nerayike yānti, na cettakena bāhiravisayābhāvo vijjati iṭṭhāniṭṭhatāya paccekaṃ dvārapurisesu vibhattasabhāvattā. Tathā hi ekaccassa dvārassa purisassa iṭṭhaṃ ekaccassa anīṭṭhaṃ, ekaccassa ca anīṭṭhaṃ ekaccassa iṭṭhaṃ hoti. Evañca katvā yadeke vadanti “natthi kammavasena tejasā parūpatāpana’’ntiādi, tadapāhataṃ hoti. Yaṃ pana vadanti “anerayikānaṃ tesam kathaṃ tattha sambhavo’’ti nerayikānaṃ yātakabhāvato. Nerayikasattayātanāyoggañhi attabhāvaṃ nibbattentaṃ kammaṃ tādisanikantivīnāmitaṃ nirayattāhāneyeva nibbatteti. Te ca nerayikehi adhikatarabalārohapariṇāhā ativiya bhayānakasantāsakurūratarapayogā ca honti. Eteneva tattha kākasunakhādīnampi nibbatti saṃvaṇṇitāti daṭṭhabbaṃ.

Kathamaññagatikhehi aññagatikabādhananti ca na vattabbaṃ aññatthāpi tathā dassanato. Yaṃ paneke vadanti “asattasabhāvā nirayapālā nirayasunakhādayo cā’’ti, taṃ tesam matimattaṃ aññattha tathā adassanato. Na hi kāci atthi tādisī dhammapavatti, yā asattasabhāvā, sampatisatthehi appayojitā ca atthakiccaṃ sādhentī diṭṭhapubbā. Petānaṃ pānīyanivārakānaṃ daṇḍādihatthapurisānampi asattabhāve visesakāraṇaṃ natthi. Supinūpaghātopi atthakiccasamatthātāya appamāṇaṃ dassanādimittenapi tadatthasiddhito. Tathā hi supine āhārūpabhogādīnā na atthasiddhi atthi, nimmānarūpaṃ panettha laddhāparihāraṃ iddhivisayassa acinteyyabhāvato. Idhāpi kammavipākassa acinteyyabhāvatoti ce? Taṃ na, asiddhattā. Nerayikānaṃ kammavipāko nirayapālāti asiddhametaṃ, vuttanayena pana nesam sattabhāvo eva siddho. Sakkā hi vattuṃ sattasaṅkhātā nirayapālāsāññitā dhammapavatti sābhisandhikā parūpaghāti atthakiccasabbhāvato ojhārādīrakkhasasantati viyāti. Abhisandhipubbakatā cettha na sakkā paṭikkhipituṃ tathā tathā abhisandhiyā yātanato, tato eva na saṅghāṭapabbatādīhi anekantikātā. Ye pana vadanti “bhūtavisesā eva te vaṇṇasaṅghānādivisesavanto bheravākārā narakapālāti samaññaṃ labhanti’’ti, tadasiddhaṃ. Ujukameva pāliyaṃ “atthi niraye nirayapālā’’ti vādassa patiṭṭhāpitattā.

Apica yathā ariyavinaye narakapālānaṃ bhūtamattatā asiddhā, tathā paññattimattavādinopi tesam bhūtamattatā asiddhāva. Na hi tassa bhūtāni nāma santi. Yadi paramatthaṃ gahetvā voharati, atha kasmā vedanādike eva paṭikkhipatīti? Tiṭṭhatesā anavaṭṭhitatakkānaṃ appahīnasammohavipallāsānaṃ vādavīmaṃsā, evaṃ attheva nirayapālāti niṭṭhamettha gantabbaṃ. Sati ca nesam sabbhāve, asatipi bāhire visaye narake viya desādiniyamo hotīti vādo na sijjhati evāti daṭṭhabbaṃ.

Nirayapālakathāvaṇṇanā niṭṭhitā.

4. Tiracchānakathāvaṇṇanā

869-871. Tassāti erāvaṇṇanāmakassa devaputtassa. Tahiṃ kīḷanakāle hatthivaṇṇena vikubbaṇaṃ sandhāya “**hatthināgassā**’’ti vuttaṃ. **Dibbayānassāti** etthāpi eseva nayo. Na hi ekantasukhappaccayaṭṭhāne sagge dukkhādhiṭṭhānassa akusalakammamasamuṭṭhānassa attabhāvassa sambhavo yutto. Tenāha “**na tiracchānagatassā**’’ti.

Tiracchānakathāvaṇṇanā niṭṭhitā.

6. Nāṇakathāvaṇṇanā

876-877. “Dvādasavatthukaṃ ñāṇaṃ lokuttara’’nti ettha dvādasavatthukassa ñāṇassa lokuttaratā

patiṭṭhāpīyatīti dassento paṭhamavikappaṃ vatvā puna lokuttaraññassa dvādasavattukatā patiṭṭhāpīyatīti dassetuṃ “**taṃ vā...pe... attho**”ti āha. **Pariññeyyanti** ettha **iti-saddo** ādiattho, pakārattho vā. Tena “pahātabba”nti evamādiṃ saṅgaṇhāti. **Pariññātanti** etthāpi eseva nayo. “Pariññeyyaṃ pariññāta”ntiādinā parijānanādikiriyāya nibbattetabbatā nibbattitatā ca dassitā, na nibbattiyamānatāti. Yena pana sā hoti, taṃ dassetuṃ “**saccaññaṃ panā**”tiādi vuttaṃ. Tattha **saccaññanti** dukkhādisaccasabhāvāvabodhakaṃ ñāṇaṃ, yaṃ sandhāya “idaṃ dukkha”ntiādi vuttaṃ. **Maggakkhaṇepīti** api-saddena tato pubbāparabhāgepīti daṭṭhabbaṃ. **Parijānanādikiccasādhavasena hoti** asammohato visayato cāti adhippāyo.

Ñāṇakathāvaṇṇanā niṭṭhitā.

Vīsativavaggavaṇṇanā niṭṭhitā.

Catuttho paṇṇāsako samatto.

21. Ekavīsativavaggo

1. Sāsanakathāvaṇṇanā

878. Samudāyāti “sāsaṇaṃ navaṃ kata”ntiādinā pucchāvasena pavattā vacanasamudāyā. **Ekadesānanti** tadavayavānaṃ. “Tīsipi pucchāsū”ti evaṃ **adhikaraṇabhāvena vuttā**.

Sāsanakathāvaṇṇanā niṭṭhitā.

4. Iddhikathāvaṇṇanā

883-884. Adhippāyavasenati tathā tathā adhimuccanādhippāyavasena.

Iddhikathāvaṇṇanā niṭṭhitā.

7. Dhammakathāvaṇṇanā

887-888. Rūpasabhāvo rūpaṭṭhoti āha “**rūpaṭṭho nāma koci rūpato añño natthi**”ti. Yaṃ pana yato aññaṃ, na taṃ taṃsabhāvanti āha “**rūpaṭṭhato aññaṃ rūpañca na hoti**”ti, rūpameva na hotīti attho. Etena byatirekato tamatthaṃ sādheti. **Tasmāti** yasmā rūpato añño rūpaṭṭho natthi, rūpaṭṭhato ca aññaṃ rūpaṃ, tasmā **rūpaṃ rūpameva** rūpasabhāvamevāti **eva-kārena** nivattitaṃ dasseti “**na vedanādisabhāva**”nti. **Adhippāyenāti** rūparūpaṭṭhānaṃ anaññattādhippāyena. **Aññathāti** tesam aññatte rūpaṭṭhena niyamena rūpaṃ niyatanti vattabbanti yojanā. **Dassitoyeva hoti** atthato āpannattā. Na hi abhinne vatthusmiṃ pariyāyantarabhedaṃ karoti. **Aññattanti** rūpasabhāvānaṃ rūparūpaṭṭhānañca. Sasāminiddesasiddhābheda “silāputtakassa sarīra”nti viya, kappanāmatto cāyaṃ bhedo, na paramatthatoti āha “**gahetvā viya pavatto**”ti. **Vedanādīhi nānattamevāti** vedanādīhi aññattameva. **So sabhāvoti** so rūpasabhāvo. **Nānattasaññāpanatthanti** rūpassa sabhāvo, na vedanādīnanti evaṃ bhedassa ñāpanatthaṃ. **Tañca vacananti** “rūpaṃ rūpaṭṭhena na niyata”nti vacanaṃ. **Vuttappakārenāti** “rūpaṭṭhato aññassa rūpassa abhāvā”tiādinā vuttākārena. Yadi sadosaṃ, atha kasmā paṭijānātīti yojanā.

Vuttameva kāraṇanti “rūpaṃ rūpameva, na vedanādisabhāva”nti evaṃ vuttameva yuttim. **Parena coditanti** “na vattabbaṃ rūpaṃ rūpaṭṭhena niyata”ntiādinā paravādino codanaṃ sandhāyāha. **Tameva kāraṇaṃ dassetvāti** tameva yathāvuttaṃ yuttim “ettha hī”tiādinā dassetvā. **Codanaṃ nivattetīti** “atha kasmā paṭijānātī”ti vuttaṃ codanaṃ nivatteti. Yamatthaṃ sandhāya “ito aññathā”ti vuttaṃ, taṃ dassetuṃ “**rūpādi**”tiādi vuttaṃ.

Dhammakathāvaṇṇanā niṭṭhitā.

Ekavīsativavaggaṇṇanā niṭṭhitā.

22. Bāvīsativavaggo

2. Kusalacittakathāvaṇṇanā

894-895. Purimajavanakkhaṇeti parinibbānacittato anantarātītapurimajavanavārakkhaṇe.

Kusalacittakathāvaṇṇanā niṭṭhitā.

3. Āneñjakathāvaṇṇanā

896. Hetusarūpārammaṇasampayuttadhammārammaṇādito bhavaṅgasadisattā **cuticittam** “bhavaṅgacitta”nti āha.

Āneñjakathāvaṇṇanā niṭṭhitā.

5-7. Tissopikathāvaṇṇanā

898-900. Arahattappattipi gabbheyeva atthīti maññati. Sattavassikā hi sopākasāmaṇerādayo arahattam pattā. Sattavassikopi gabbho atthīti paravādino adhippāyo. Ākāseṇa gacchanto viya supinaṃ **ākāsasupinaṃ**. Tam abhiññānibbattam maññatīti nidassanaṃ katvā dassento āha “**ākāsagamanādiabhiññā viyā**”ti. Heṭṭhimānaṃ catunnaṃ vā maggānaṃ adhigamena dhammābhisamayo aggaphalādhigamena arahattappatti ca supine atthīti maññatīti yojanā.

Tissopikathāvaṇṇanā niṭṭhitā.

9. Āsevanapaccayakathāvaṇṇanā

903-905. **Bījaṃ catumadhurabhāvaṃ na gaṇhātīti** idaṃ sakasamayavasena vuttam, parasamaye pana rūpadhammāpi arūpadhammehi samānakkhaṇā eva icchitā. Tenevāha “**sabbe dhammā khaṇikā**”ti. Khaṇikattepi vā acetanesupi anindriyabaddharūpesu bhāvanāviseso labbhati, kimaṅgaṃ pana sacetanesūti dassetuṃ “**yathā bījaṃ catumadhurabhāvaṃ na gaṇhātī**”ti nidassananti daṭṭhabbaṃ. **Āsevento nāma koci dhammo natthi** ittaratāya anavaṭṭhānatoti adhippāyo. Ittarakhaṇatāya eva pana āsevanaṃ labbhati. Kusalādhivāseva hi attasadisassa payogena karaṇīyassa punappunaṃ karaṇappavattanaṃ attasadisatāpādanaṃ vāsaṇaṃ vā āsevanaṃ pure paricitaṅgatho viya pacchimassāti.

Āsevanapaccayakathāvaṇṇanā niṭṭhitā.

10. Khaṇikakathāvaṇṇanā

906-907. **Pathaviyādirūpesūti** anekakalāpasamudāyabhūtesu sasambhārapathaviyādirūpesu. Tattha hi kesuci purimuppannesu ṭhitesu kesañci tadaññesaṃ uppādo, tato purimantaruppannaṃ kesañci nirodho hoti ekekakalāparūpesu samānuppādanirodhattā tesam. **Evam patīṭṭhānanti** evam vuttappakāreṇa asamānuppādanirodhena pabandhena patiṭṭhānapavattīti attho. Sā panāyaṃ yathāvuttā pavatti kasmā rūpasantatiyā evāti āha “**na hi rūpāna**”ntiādi. Tassattho – yadi sabbe saṅkhatadhammā samānakkhaṇā, tathā sati arūpasantatiyā viya rūpasantatiyāpi anantarādipaccayena vidhinā pavatti siyā, na cetam atthi. Yadi siyā, cittakkhaṇe cittakkhaṇe pathaviyādīnaṃ uppādanirodhehi bhavitabbanti.

Khaṇīkathāvaṇṇanā niṭṭhitā.

Bāvīsativavaggavaṇṇanā niṭṭhitā.

23. Tevīsativavaggo

1. Ekādhippāyakathāvaṇṇanā

908. Eka-saddo aññatthopi hoti “ittheke abhivadantī” tiādīsu viya, aññattañcettha rāgādhippāyato veditabbaṃ, puthujjanassa pana sachandarāgaparibhogabhāvato āha “**rāgādhippāyato aññādhippāyovāti vuttaṃ hotī**” ti. Ko pana so aññādhippāyoti? Karuṇādhippāyo. Tena vuttaṃ “**karuṇādhippāyena ekādhippāyo**” ti. Ayañca nayo itthiyā jīvitarakkhaṇatthaṃ kāruṇṇena manorathaṃ pūrentassa bodhisattassa saṃvaravināso na hotīti evaṃvādināṃ paravādiṃ sandhāya vutto, paṇidhānādhippāyavādināṃ pana sandhāya “**eko adhippāyoti etthā**” tiādī vuttaṃ. Puttamukhadassanādhippāyopi ettheva saṅgahaṃ gatoti daṭṭhabbaṃ. **Ekatobhāveti** sahabhāve.

Ekādhippāyakathāvaṇṇanā niṭṭhitā.

3-7. Issariyakāmakārikākathāvaṇṇanā

910-914. Issariyenāti cittissariyena, na cetovasibhāvenāti attho. **Kāmakārikaṃ** yathicchitanipphādanāṃ. **Issariyakāmakārikāhetūti** issariyakāmakāribhāvanimittāṃ, tassa nibbattanatthanti attho. **Micchādiṭṭhiyā karīyatīti** micchābhiniveseneva yā kāci dukkarakārikā karīyatīti attho.

Issariyakāmakārikākathāvaṇṇanā niṭṭhitā.

8. Patirūpakathāvaṇṇanā

915-916. Mettādayo viyāti yathā mettā karuṇā muditā ca sinehasabhāvāpi araṇjanasabhāvattā asaṃkiliṭṭhattā ca na rāgo, evaṃ rāgapatirūpako koci dhammo natthi ṭhapetvā mettādayo, aññacittassa siniyhanākāro rāgasseva pavattiākāroti attho. Tenevāha “**rāgameva gaṇhātī**” ti. **Evaṃ dosepīti** ettha issādayo viya na doso dosapatirūpako koci atthīti dosameva gaṇhātīti yojetabbaṃ. ṭhapetvā hi issādayo aññacittassa dussanākāro dosasseva pavattiākāroti.

Patirūpakathāvaṇṇanā niṭṭhitā.

9. Aparinipphannakathāvaṇṇanā

917-918. Aniccādiko bhāvoti aniccasaṅkhārapaṭiccasamuppannatādiko bhāvo dhammo pakati etassāti attho. **Dukkhaññeva parinipphannanti** “dukkhasaccaṃ sandhāya pucchā katā, na dukkhatāmatta” nti ayamattho viññāyati “na kevalañhi paṭhamasaccameva dukkha” nti vacanena. Tathā satī paravādinā cakkhāyatanādīnaṃ aññesañca taṃsarikkhānāṃ dhammānaṃ parinipphannatā nānujānitabbā siyā. Kasmā? Tesampi hi dukkhasaccena saṅgaho, na itarasaccehi. Yañhi samudayasaccato nibbattaṃ, taṃ nippariyāyato dukkhasaccaṃ, itaraṃ saṅkhāradukkhatāya dukkhanti imamatthaṃ dassento “**na kevalañhi**” tiādīmāha. Tattha **na hi anupādinnānti** iminā cakkhāyatanādīnaṃ samudayasaccena saṅgahābhāvamāha. **Lokuttarānti** iminā nirodhamaggasaccehi. Yadi evamettha yutti vattabbā, kimettha vattabbāṃ? Sabhāvo hesa paravādivādassa, yadidaṃ pubbenāparamasaṃsandanaṃ. Tathā hi so viññūhi paṭikkhitto. Tathā ceva taṃ amhehi tattha tattha vibhāvitaṃ. **Etanti** “rūpaṃ aparinipphannaṃ, dukkhaññeva parinipphanna” nti yadetaṃ tayā vuttaṃ,

etaṃ no vata re vattabbe. Kasmā? Rūpassa ca dukkhattā. Rūpañhi aniccaṃ dukkhādhiṭṭhānañca. Tena vuttaṃ “yadaniccaṃ taṃ dukkhaṃ. Saṃkhittena pañcupādānakkhandhā dukkhā”ti ca.

Aparinipphannakathāvaṇṇanā niṭṭhitā.

Tevīsatimavaggavaṇṇanā niṭṭhitā.

Kathāvatthupakaraṇa-anuṭṭikā samattā.

Namo tassa bhagavato arahato sammāsambuddhassa

Yamakapakaraṇa-anuṭṭikā

Ganthārambhavaṇṇanā

Saṅkhepenevāti uddeseneva. Yam “mātikāṭhapana”nti vuttaṃ. **Dhammesūti** khandhādidhammesu kusalādidhammesu ca. Aviparītato gahitesu dhammesu mūlayamakādivasena pavattiyamānā desanā veneyyānaṃ nānappakāraḥkosallāvahā pariññākiccasādhani ca hoti, na viparītatoti āha “**viparītaggahaṇaṃ...pe... āraddha**”nti. Etena kathāvatthupakaraṇadesanānantaraṃ yamakapakaraṇadesanāya kāraṇamāha. Tattha **viparītaggahaṇanti** puggalapariggahaṇādimiticchāgāhaṃ. **Dhammapuggalokāsādinissayānanti** “ye keci kusalā dhammā, sabbe te kusalamūlā”tiādinā (yama. 1.mūlayamaka.1) dhamme, “yassa rūpakkhandho uppajjati, tassa vedanākkhandho uppajjati”tiādinā (yama. 1.khandhayamaka.50) puggalaṃ “yattha rūpakkhandho uppajjati, tattha vedanākkhandho uppajjati”tiādinā (yama. 1.khandhayamaka.51) okāsaṃ nissāya ārabha pavattānaṃ. **Ādi**-saddena puggalokāsauppādanirodhatadubhayapariññādīnaṃ saṅgaho daṭṭhabbo. **Sanniṭṭhānasamsayānanti** pāḷigatipaṭivacanasarūpadassanapaṭikkhipanapaṭisedhananayehi yathāpucchitassa atthassa nicchayakaraṇaṃ sanniṭṭhānaṃ, tadabhāvato saṃsayanaṃ saṃsayo. Tesam sanniṭṭhānasamsayānaṃ.

Kāmañcetha dhammapaṭiggāhakānaṃ saṃsayapubbakaṃ sanniṭṭhānanti paṭhamam saṃsayo vattabbo, desentassa pana bhagavato sanniṭṭhānapubbako saṃsayoti dassanattam ayaṃ padānukkamo kato. Sabbañhi pariññeyyaṃ hatthāmalakaṃ viya paccakkaṃ katvā ṭhitassa dhammasāmino na katthaci saṃsayo, vissajjetukāmatāya pana vineyyajjhāsayaḡataṃ saṃsayam dassento saṃsayitavasena puccham karotīti evaṃ vissajjanapucchanasena na sanniṭṭhānasamsayā labbhantīti ayamatto dassito, nicchitasamsayadhammasenasena panettha sanniṭṭhānasamsayā vedītabbā. Tenāha **aṭṭhakathāyaṃ** “kusalesu kusalā nu kho, na nu kho kusalāti sandehābhāvato”tiādi. Teneva ca “sanniṭṭhānasamsayāna”nti, “sanniṭṭhānasamsayavasenā”ti ca paṭhamam sanniṭṭhānaggahaṇaṃ kataṃ.

Tanti yamakapakaraṇaṃ. Tassa ye samayādayo vattabbā, te kathāvatthupakaraṇadesanānantaro desanāsamayo, tāvatimsabhavanameva desanādeso, kusalākusalāmūlādiyamakākārena desanāti vibhāgato “saṅkhepenevā”tiādigāthāhi vibhāvītā nimittena saddhiṃ saṃvaṇṇanapaṭiññā cāti imamattham dassento “**samayadesadesanāvāsenā**”tiādimāha. Nimittañhetam idha saṃvaṇṇanāya, yadidaṃ kamānuppatti āgatabhāravāhitā ca paṇḍitānaṃ paṇḍitakiccabhāvato. Tattha anuppattam dassetvāti sambandho.

Tatthāti tasmim samayādidassane. Yamaṃ uparamananti yamo maraṇanti āha “**jātiyā sati maraṇaṃ hotīti...pe... visayo**”ti. Tattha yathā “jātiyā sati maraṇaṃ hotī”ti jāti yamassa visayo, evaṃ “upādānakkhandhesu santesu maraṇaṃ hotī”ti upādānakkhandhā yamassa visayoti yojetabbaṃ. Te hi maraṇadhamminoti. Anuppattamarāṇaṃyeva kibbisakāriṇaṃ puggalaṃ yamapurisā vividhā kammakāraṇā karonti, na appattamarāṇanti maraṇaṃ yamassa visayo vutto. **Āṇāpavattitṭhānanti** idaṃ visaya-saddassa atthavacanaṃ. **Desam vāti** kāmādidhātuttayadesam sandhāyāha. Dhātuttayissaro hi

maccurājā. Pañcānantariyāni aññasatthāruddeso ca, tena vā saddhiṃ pañca verāni **cha abhabbatthānāni. Āvattāti padakkhiṇāvattā. Tanuruhāti lomā.**

Ganthārambhavaṇṇanā niṭṭhitā.

1. Mūlayamakam

Uddesavāraṇṇanā

1. Yamakasamūhassāti mūlayamakādikassa yamakasamūhassa. Mūlayamakādayo hi pakaraṇāpekkhāya avayavabhūtāpi niccāvayavāpekkhāya yamakasamūhoti vutto. Tenāha **“taṃsamūhassa ca sakalassa pakaraṇassā”**ti.

Kusalākusalāmūlavisesānanti dutiyapucchāya vuttānaṃ saṃsayapadasaṅgahitānaṃ kusalasaṅkhātānaṃ, tathā paṭhamapucchāya vuttānaṃ kusalamūlasaṅkhātānaṃ visesānaṃ atthayamakabhāvassa vuttattāti yojanā. Yathā hi paṭhamapucchāya visesavantabhāvena vuttāyeva kusaladhammā dutiyapucchāyaṃ visesabhāvena vuttā, evaṃ paṭhamapucchāyaṃ visesabhāvena vuttāyeva kusalamūladhammā dutiyapucchāyaṃ visesavantabhāvena vuttā. Vattuvacanicchāvasena hi dhammānaṃ visesavisesavantatāvibhāgā hontīti. **Kusalāmūlakusalavisesehi** saṃsayitapadasaṅgahitehi kusalakusalāmūlānaṃ visesavantānanti adhippāyo. Ettha ca visesavantāpekkhavisavasena paṭhamo atthavikappo vutto, dutiyo pana visesāpekkhavisavantavasenāti ayametesam viseso. Tenāha **“ñātum icchitānaṃ hi”**tiādi.

Tattha **ñātum icchitānanti** pucchāya visayabhūtānanti attho. **Visesānanti** kusalakusalāmūlavisesānaṃ. **Visesavantāpekkhānanti** kusalamūlakusalasaṅkhātehi visesavantehi sāpekkhānaṃ. **Visesavatanti** kusalamūlakusalānaṃ. **Visesāpekkhānanti** kusalakusalāmūlavisesehi sāpekkhānaṃ. **Etthāti** etasmiṃ mūlayamake. **Padhānabhāvoti** paṭhamavikappe tāva saṃsayitappadhānattā pucchāya visesānaṃ padhānabhāvo veditabbo. Te hi saṃsayitānaṃ visesavantoti. Dutiyavikappe pana visesā nāma visesavantādhīnāti visesavantānaṃ tattha padhānabhāvo daṭṭhabbo. Dvinnam pana ekajjam padhānabhāvo na yujjati. Sati hi appadhāne padhānaṃ nāma siyā. Tenāha **“ekekāya pucchāya ekeko eva attho saṅgahito hoti”**ti. Evañcetam sampañcchitabbam, aññathā vinicchitavisesitabbabhāvehi idha padhānabhāvo na yujjatevāti. **Na dhammavācakoti** na sabhāvadhammavācako. Sabhāvadhammopi hi atthoti vuccati “gambhīrapaññaṃ nipuṇatthadassi”ntiādīsu (su. ni. 178). “Hetuphale ñānaṃ atthapaṭisambhidā”tiādīsu (vibha. 720) attha-saddassa hetuphalavācakatā daṭṭhabbā. **Ādi-saddenassa** “atthābhisamayā”tiādīsu (saṃ. ni. 1.129) āgatā hitādivācakatā saṅgayhati. **Tenevāti** pāliatthavācakatā eva.

Tīpi padānīti ettha pi-saddo samuccayatto, samuccayo ca tulyayoge siyā. Kiṃ nāma-padena anavasesato kusalādīnaṃ saṅgahoti āsaṅkāya tadāsāṅkānivattanatthamāha **“tīpi...pe... saṅgāhakatta”**nti. Tattha **saṅgāhakattamattanti matta-saddo** visesanivattiatthoti. Tena nivattitam visesaṃ dassetuṃ **“na niravasesasaṅgāhakatta”**nti vuttam. Na hi rūpaṃ nāma-padena saṅgayhati. Kusalādiyeva nāmanti niyamo daṭṭhabbo, na nāmaṃyeva kusalādīti imameva ca niyamaṃ sandhāyāha **“kusalādīnaṃ saṅgāhakattamattameva sandhāya vutta”**nti. Yadipi nāma-padaṃ na niravasesakusalādīsaṅgāhakaṃ, kusalādīsaṅgāhakaṃ pana hoti, tadatthameva ca taṃ gahitanti nāmassa kusalattikapariyāpannatā vuttāti dassento āha **“kusalādi...pe... vutta”**nti.

Uddesavāraṇṇanā niṭṭhitā.

Niddesavāraṇṇanā

52. Dutiyayamaketi ekamūlayamake. **Evamidhāpīti** yathā ekamūlayamake “ye keci

kusalā’’iceva pucchā āradhā, evaṃ idhāpi aññamaññamūlayamakepi ‘‘ye keci kusalā’’iceva pucchā ārabhitabbā siyā. Kasmā? **Purimayamaka...pe... appavattattāti.** Idañca dutiyayamakassa tathā appavattattā vuttaṃ, tatiyayamakam pana tatheva pavattaṃ. **Kecīti** padakārā. Te hi yathā paṭhamadutiyaayamakesu purimapucchā eva parivattanavasena pacchimapucchā katāti pacchimapucchāya purimapucchā samānā ṭhapetvā paṭilomabhāvaṃ, na tathā aññamaññayamake. Tattha hi dvepi pucchā aññamaññavisadisā. Yadi tatthāpi dvīhipi pucchāhi sadisāhi bhavitabbaṃ, ‘‘ye keci kusalā’’ti paṭhamapucchā ārabhitabbā, pacchimapucchā vā ‘‘sabbe te dhammā kusalamūlena ekamūlā’’ti vattabbā siyā. Evaṃ pana avatvā paṭhamadutiyaayamakesu viya purimapacchimapucchā sadisā akatvā tatiyayamake tāsam visadisatā ‘‘ye keci kusalā’’ti anāradhattā, tasmā paṭilomapucchānurūpāya anulomapucchāya bhavitabbanti imamatthaṃ sandhāya ‘‘ye keci kusalāti apucchitvā’’ti vuttanti vadanti.

Atthavasenāti sambhavantānaṃ nicchitasamṣayitānaṃ atthānaṃ vasena. **Tadanurūpāyāti** tassā purimapucchāya atthato byañjanato ca anucchavikāya. Purimañhi apekkhitvā pacchimāya bhavitabbaṃ. **Tenāti** tasmā. Yasmā anulome samṣayacchede jātepi paṭilome samṣayo uppajjati, yadi na uppajjeya, paṭilomapucchāya payoanameva na siyā, tasmā na pacchimapucchānurūpā purimapucchā, atha kho vuttanayena purimapucchānurūpā pacchimapucchā, tāya ca anurūpatāya atthādivasena dvinnam padānaṃ sambandhattā atthādiyamakatā vuttā. Desanākkamato cettha anulomapaṭilomatā veditabbā ‘‘kusalā kusalamūlā’’ti vatvā ‘‘kusalamūlā kusalā’’ti ca vuttattā. Sesayamakesupi eseva nayo. Visavantavisesa, visavisesavantaggahaṇato vā idha anulomapaṭilomatā veditabbā. Paṭhamapucchāyañhi ye dhammā visavanto, te nicchayādhiṭṭhāne katvā dassento ‘‘ye keci kusalā dhammā’’ti vatvā tesu yasmiṃ viseso samṣayādhiṭṭhāno, taṃdassanattam ‘‘sabbe te kusalamūlā’’ti pucchā katā. Dutiyaapucchāyaṃ pana tappaṭilomato yena visesena te visavanto, taṃ visesaṃ sannīṭṭhānaṃ katvā dassento ‘‘ye vā pana kusalamūlā’’ti vatvā te visavante samṣayādhiṭṭhānabhūte dassetuṃ ‘‘sabbe te dhammā kusalā’’ti pucchā katā. Aniyatavatthukā hi sannīṭṭhānasamṣayā anekajjhāsayaṭṭā sattānaṃ.

Imināpi byañjanenāti ‘‘ye keci kusalamūlena ekamūlā’’ti imināpi vākyena. **Evaṃ na sakkā vattuntī** yenādhippāyena vuttaṃ, tamevādhippāyaṃ vivarati ‘‘**na hī**’’tiadinā. Tattha **tenevāti** kusalabyañjanatthassa kusalamūlena ekamūlabyañjanatthassa bhinnattā eva. **Vissajjananti** vibhajaṇaṃ. **Itarathāti** kusalamūlena ekamūlabyañjanena pucchāya katāya. **Tāni vacanānīti** kusalavacanaṃ kusalamūlena ekamūlavacanañca. Kusalacittasamutṭhānarūpavasena cassa abyākatadīpanatā daṭṭhabbā. **Etthāti** ‘‘imināpi byañjanena tassevatthassa sambhavato’’ti etasmiṃ vacane. **Ye keci kusalā...pe... sambhavatoti** etena kusalānaṃ kusalamūlena ekamūlatāya byabhicārābhāvaṃ dasseti. Tenevāha ‘‘**na hi...pe... santi**’’ti. **Vuttabyañjanatthasseva sambhavatoti** hi iminā avuttabyañjanatthassa sambhavābhāvavacanaṃ svāyamadhippāyamatto vibhāvito. Yathā hi kusalamūlena ekamūlabyañjanattho kusalabyañjanatthaṃ byabhicarati, na evaṃ taṃ kusalabyañjanattho. Kathaṃ katvā codanā, kathañca katvā parihāro? Kusalamūlena ekamūlā kusalā evāti codanā katā, kusalamūlena ekamūlā eva kusalāti pana parihāro pavattoti veditabbaṃ. **Dutiyaayamake viya apucchitvāti** ‘‘ye keci kusalā’’ti apucchitvā. **Kusalamūlehīti** kusalehi mūlehi. **Teti** kusalamūlena ekamūlā.

Ekato uppajjantīti ettha **iti**-saddo ādiattho pakārattho vā. Tena ‘‘kusalamūlāni ekamūlāni ceva aññamaññamūlāni cā’’tiādipālisesaṃ dasseti. Yaṃ sandhāya ‘‘**heṭṭhā vuttanayeneva vissajjanaṃ kātabbaṃ bhaveyyā**’’ti vuttaṃ. Tattha **heṭṭhāti** anulomapucchāvissajjane. **Vuttanayenāti** ‘‘mūlāni yāni ekato uppajjantī’’tiadinā vuttanayena. **Tampīti** ‘‘kusalamūlenā’’tiādi aṭṭhakathāvacaṇampi. **Tathāti** tena pakārena, anulomapucchāyaṃ viya vissajjanaṃ kātabbaṃ bhaveyyāti iminā pakārenāti attho. Yena kāraṇena ‘‘na sakkā vattu’’nti vuttaṃ, taṃ kāraṇaṃ dassetuṃ ‘‘**ye vā panā**’’tiādīmāha. Tattha ‘‘**āmantā**’’iceva **vissajjanena bhavitabbanti** ‘‘sabbe te dhammā kusalā’’ti pucchāyaṃ viya ‘‘sabbe te dhammā kusalamūlena ekamūlā’’ti pucchitepi paṭivacaṇavissajjanaṃ eva labbhati, na anulomapucchāyaṃ viya sarūpadassanavissajjanaṃ vibhajitvā dassetabbassa abhāvato. Ye hi dhammā kusalamūlena ekamūlā, na te dhammā kusalamūlena aññamaññamūlāva. Ye pana kusalamūlena aññamaññamūlā, te kusalamūlena ekamūlāva. Tenāha ‘‘**na hi...pe... vibhāgo kātabbo bhaveyyā**’’ti.

Tattha **yenāti** yena aññamaññamūlesu ekamūlassa abhāvena. **Yatthāti** yasmimñāṇasampayuttacittuppāde. Aññamaññamūlakattā ekamūlakattā cāti adhippāyo. Dvinnaṃ dvinnañhi ekekena aññamaññamūlakatte vutte tesam ekekena ekamūlakattampi vuttameva hoti samānattho ekasaddoti katvā. Tenevāha “**yattha pana...pe... na ekamūlāni**”ti. Tayidaṃ micchā, dvīsupi ekekena itarassa ekamūlakattam sambhavati evāti. Tenāha “**etassa gahaṇassa nivāraṇattha**”ntiādi. “Ye dhammā kusalamūlena aññamaññamūlā, te kusalamūlena ekamūlā”ti imamattham vibhāventena idha “āmantā”ti padena yattha dve mūlāni uppajjanti, tattha ekekena itarassa ekamūlakattam pakāsitamevāti āha “**āmantāti imināva vissajjanena taṃgahaṇanivāraṇato**”ti. **Nicchitattāti** ettha ekato uppajjamānānaṃ tiṇṇannaṃ tāva mūlānaṃ nicchitam hotu aññamaññekamūlakattam, dvinnaṃ pana kathanti āha “**aññamaññamūlānaṃ hī**”tiādi. **Samānamūlatā evāti** avadhāraṇena nivattitattam dassetuṃ “**na aññamaññasamānamūlatā**”ti vuttam. Tena aññamaññamūlānaṃ samānamūlatā mattavacanicchāya ekamūlaggahaṇam, na tesam aññamaññapaccayatāvisiṭṭhasamānamūlatādassanattanti imamattham dasseti. **Dvinnaṃ mūlānanti** dvinnaṃ ekamūlānaṃ ekato uppajjamānānaṃ. Yathā tesam samānamūlatā, tam dassetuṃ “**tesu hī**”tiādi vuttam. **Taṃmūlehi aññehīti** itaramūlehi mūladvayato aññehi sahaṇatadhammehi.

Idāni yena adhippāyena paṭilome “kusalā”icceva pucchā katā, na “kusalamūlena ekamūlā”ti, tam dassetuṃ “**aññamaññamūlatte pana...pe... katāti daṭṭhabba**”nti āha. Na hi kusalamūlena aññamaññamūlesu kiñci ekamūlam na hotīti vuttovāyamattho. **Mūlayuttatameva vadati**, na mūlehi ayuttanti adhippāyo. Aññathā pubbenāparaṃ virujjheyya. **Tenevāti** mūlayuttatāya eva vuccamānattā. **Ubhayatthāpīti** aññamaññamūlā ekamūlāti dvīsupi padesu. “**Kusalamūlenā**”ti vuttam, kusalamūlena sampayuttenāti hi attho. Yadi ubhayampi vacanaṃ mūlayuttatameva vadati, atha kasmā anulomapucchāyameva ekamūlaggahaṇam katam, na paṭilomapucchāyanti ubhayatthāpī tam gahetabbaṃ na vā gahetabbaṃ. Evañhi mūlekamūlayamakadesanāhi ayaṃ aññamaññayamakadesanā samānarasā siyāti codanaṃ manasi katvā āha “**tatthā**”tiādi.

Tattha **tatthāti** tasmimñaññamaññayamake. Yadipe ekamūlā aññamaññamūlāti idaṃ padadvayaṃ vuttanayena mūlayuttatameva vadati, tathāpī sāmāññavisesalakkhaṇe attheva bhedoti dassetuṃ “**mūlayogasāmaññe**”tiādi vuttam. Samūlakānaṃ samānamūlatā ekamūlattanti ekamūlavacanaṃ tesu avisesato mūlasabbhāvamattaṃ vadati, na aññamaññamūlasaddo viya mūlesu labbhamānaṃ visesaṃ, na ca sāmāññe nicchayo visese saṃsayam vidhamatīti imamatthamāha “**mūlayogasāmaññe...pe... pavattā**”ti iminā. Visese pana nicchayo sāmāññe saṃsayam vidhamanto eva pavattatīti āha “**mūlayogavisepe pana...pe... nicchitameva hotī**”ti. **Tasmāti** vuttasseva tassa hetubhāvena parāmasanaṃ, visesanicchayeneva avinābhāvato, sāmāññassa nicchitattā tattha vā saṃsayābhāvato ti attho. Tenāha “**ekamūlāti puccham akatvā**”ti. **Kusalabhāvadīpakaṃ na hotīti** kusalabhāvasseva dīpakaṃ na hoti tadanñajātīkassapi dīpanato. Tenāha “**kusalabhāve saṃsayasabbhāvā**”ti. **Aññamaññamūlavacananti** kevalam aññamaññamūlavacananti adhippāyo. **Kusalādhikārassa anuvattamānattāti** iminā “sabbe te dhammā kusalā”ti kusalaggahaṇe kāraṇamāha. Ekamūlaggahaṇe hi payoṇābhāvo dassito, kusalassa vasena cāyaṃ desanāti.

53-61. Mūlanaye vutte eva attheti mūlanaye vutte eva kusalādidhamme. Kusalādayo hi sabhāvadhammā idha pāḷiatthātāya atthoti vutto. Kusalamūlabhāvena, mūlassa visesanena, mūlayogadīpanena ca pakāsetuṃ. Kusalamūlabhūtā mūlā kusalamūlamūlāti samāsayoṇā. Mūlavacanañhi nivattetabbagahetabbasādhāraṇam. Akusalābyākatāpī mūladhammā atthīti kusalamūlabhāvena mūladhammā visesitā. Mūlaggahaṇena ca mūlavantānaṃ mūlayogo dīpito hoti. Samānena mūlena, mūlassa visesanena, mūlayogadīpanena ca pakāsetuṃ “ekamūlamūlā”ti, aññamaññassa mūlena mūlabhāvena, mūlassa visesanena, mūlayogadīpanena ca pakāsetuṃ “aññamaññamūlamūlā”ti mūlamūlanayo vuttoti yoṇā. Tīsupi yamakesu yathāvuttavisesanamevettha pariyaṇantaram daṭṭhabbaṃ.

Mūlayogaṃ dīpetunti mūlayogameva padhānaṃ sātisayañca katvā dīpetunti adhippāyo. Yathā hi

kusalāni mūlāni etesanti kusalamūlakānīti bāhiratthasamāse mūlayogo padhānabhāvena vutto hoti, na evaṃ “kusalasaṅkhātā mūlā kusalamūlā”ti kevalaṃ, “kusalamūlamūlā”ti savisesanaṃ vā vutte uttarapadatthappadhānasamāse. Tenāha “**aññapadattha...pe... dīpetu**”nti. **Vuttappakārovāti** “kusalamūlabhāvena mūlassa visenanā”tiādinā mūlamūlanaye ca, “aññapadatthasamāsantena kakārenā”tiādinā mūlakanaye ca vuttappakāro eva. **Vacana-pariyāyo** mūlamūlakanaye ekajjhaṃ katvā yojetabbo.

74-85. Na ekamūlabhāvaṃ labhamānehīti abyākatamūlena na ekamūlakaṃ tathāvattabbataṃ labhamānehi aṭṭhārasaahetukacittuppādāhetukasamuṭṭhānarūpanibbānehi ekato alabbhamānattā. Yathā hi yathāvuttacittuppādādayo hetupaccayavirahitā ahetukavohāraṃ labhanti, na evaṃ sahetukasamuṭṭhānaṃ rūpaṃ. Tenāha “**ahetukavohārarahitaṃ katvā**”ti. Ettha ca “sabbhaṃ rūpaṃ na hetukameva, ahetukamevā”ti vuttattā kiñcāpi sahetukasamuṭṭhānampi rūpaṃ ahetukaṃ, “abyākato dhammo abyākatassa dhammassa hetupaccayena paccayo, vipākābyākatā kiriyābyākatā hetū sampayuttakānaṃ khandhānaṃ cittasamuṭṭhānānañca rūpānaṃ hetupaccayena paccayo”ti (paṭṭhā. 1.1.403) pana vacanato hetupaccayayogena sahetukasamuṭṭhānassa rūpassa ahetukavohārābhāvo vutto. Keci pana “**abbohārikaṃ katvāti** sahetukavohārena abbohārikaṃ katvāti atthaṃ vatvā aññathā ‘ahetukaṃ abyākatam abyākatamūlena ekamūla’nti na sakkā vattu’nti vadanti. Tattha yaṃ vattabbaṃ, taṃ vuttameva ahetukavohārābhāvena sahetukatāpariyāyassa atthasiddhattā. Apica hetupaccayasabbhāvato tassa sahetukatāpariyāyo labbhateva. Tenāha “**na vā sahetukaduke viya...pe... abbohārikaṃ kata**”nti. Ettha **etthāti** etasmiṃ ekamūlakaduke. **Hetupaccayayogāyogavasenāti** hetupaccayena yogāyogavasena, hetupaccayassa sabbhāvāsabbhāvavasenāti attho. **Sahetukavohārameva labhati** paccayabhūtahetusabbhāvato.

Apāre pana bhaṇanti “sahetukacittasamuṭṭhānaṃ rūpaṃ ahetukaṃ abyākatanti iminā vacanena saṅgahaṃ gacchantampi samūlakattā ‘abyākatamūlena na ekamūla’nti na sakkā vattuṃ, satipi samūlakatte nipariyāyena sahetukaṃ na hotīti ‘abyākatamūlena ekamūla’nti ca na sakkā vattuṃ, tasmā ‘ahetukaṃ abyākatam abyākatamūlena na ekamūlaṃ, sahetukaṃ abyākatam abyākatamūlena ekamūla’nti dvīsupi padesu anavarodhato abbohārikaṃ katvāti vutta’nti, taṃ tesam matimattaṃ “sahetukaabyākatasamuṭṭhānaṃ rūpaṃ abyākatamūlena ekamūlaṃ hoti”ti **aṭṭhakathāyaṃ** tassa ekamūlabhāvassa nicchitattā, tasmā vuttanayeneva cettha attho veditabbo.

86-97. Kusalākusalābyākatārāsito namanānāmanasaṅkhātēna visesena arūpadhammānaṃ gahaṇaṃ niddhāraṇaṃ nāma hotīti āha “**nāmānaṃ niddhāritattā**”ti. Tena tesam adhikabhāvamāha viññāyamānameva pakaraṇena aparicchinnattā. Yadi evaṃ “ahetukaṃ nāmaṃ sahetukaṃ nāma”nti pāṭhantare kasmā nāmaggaṇaṃ katanti āha “**supākaṭabhāvattā**”nti, paribyaṭṭhaṃ katvā vutte kiṃ vattabbanti adhippāyo.

Niddesavāraṇaṇā niṭṭhitā.

Mūlayamakavaṇaṇā niṭṭhitā.

2. Khandhayamakam

1. Paṇṇattivāro

Uddesavāraṇaṇā

2-3. Khandhayamake ...pe... pariññā ca vattabbāti idaṃ padhānabhāvena vattabbadassanaṃ. Abhiññeyyakathā hi abhidhammo, sā ca yāvadeva pariññattāti pariññāsu ca na vinā tīraṇapariññāya pahānapariññā, tīraṇaṇca sampuṇṇaparānuggahassa adhippetattā kālappuggalokāsavibhāgamukhena khandhānaṃ visuṃ saha ca uppādanirodhalakkhaṇapariggahavasena sātisayaṃ sambhavati, nāññathāti

imamattham dassento “**chasu kālabbhedesu...pe... pariññā ca vattabbā**”ti padhānam vattabbam uddharati. Tattha pana yathā na tīraṇapariññāya vinā pahānapariññā, evaṃ tīraṇapariññā vinā ñātāpariññāya. Sā ca sutamayaññānamūlikāti desanākusalo sathā anvayato byatirekato ca samudāyāvayavapadattahādivibhāgadassanamukhena khandhesu pariññāppabhedam pakāsetukāmo “pañcakkhandhā”tiādīnā desanam ārabhīti dassento “**te pana khandhā**”tiādīmāha. **Pañcahi padehīti** pañcahi samudāyapadehi.

Tatthāti tesu samudāyāvayavapadesu. **Dhammoti** ruppanādiko ñeyyadhammo. **Samudāyapadassāti** rūpakkhandhādisamudāyapadassa. Yadi pi avayavavinimutto paramatthato samudāyo nāma natthi, yathā pana avayavo samudāyo na hoti, evaṃ na samudāyopi avayavoti satipi samudāyāvayavānam bhede dvinnam padānam samānādhikaraṇabhāvato atthevābhedoti padadvayassa samānatthātāya siyā āsānkāti āha “**etasmim samsayaṭṭhāne**”ti. “Cakkhāyatanaṃ rūpakkhandhagaṇanam gacchati, viññāṇakkhandho tajjā manoviññāṇadhātū”tiādīsu ekadeso samudāyapadatto vutto, “yaṃ kiñci rūpaṃ...pe... yaṃ vuccati rūpakkhandho”tiādīsu (vibha. 2) pana sakaloti āha “**rūpādi...pe... attho**”ti. Avayavapadānañcetta visesanavisesitabbavisayānam samānādhikaraṇātāya samudāyapadattatā vuttā, tato eva samudāyapadānampi avayavapadattatā. Na hi visesanavisesitabbānam atthānam accantaṃ bhedo abhedo vā icchito, atha kho bhedaḍbhedo, tasmā abhedadassanavasena paṭhamanayo vutto, bhedadassanavasena dutiyanayo. Yo hi ruppanādisānkāto rāsaṭṭho avayavapadehi rūpādisaddehi ca khandhasaddena ca visesanavisesitabbabhāvena bhinditvā vutto, svāyaṃ atthato rāsibhāvena apekkhito ruppanādiattho evāti.

Yathā avayavapadehi vuccamānopi samudāyapadassa attho hoti, evaṃ samudāyapadehi vuccamānopi avayavapadassa atthoti “rūpakkhandho rūpañceva rūpakkhandho ca, rūpakkhandho rūpanti? Āmantā”tiādīnā padasodhanā katāti dassento āha “**rūpādiavayavapadehi...pe... padasodhanavāro vutto**”ti. Tattha ekaccassa avayavapadassa aññattha vuttiyā avayavapadattassa samudāyapadattatāya siyā anekantikātā, samudāyapadassa pana taṃ natthīti samudāyapadattassa avayavapadattatāya byabhicārābhāvo “rūpakkhandho rūpanti? Āmantā”ti **pāḷiyā** pakāsītoti vuttaṃ “**rūpādi...pe... dassetu**”nti.

“Rūpakkhandho”tiādīsu khandhatthassa visesitabbattā vuttaṃ “**padhānabhūtassa khandhapadassā**”ti. **Vedanādiupapadattassa ca sambhavato** “vedanākkhandho”tiādīsu. **Rūpāvayavapadena vuttassāti** rūpasānkātena avayavapadena visesanabhāvena vuttassa khandhatthassa rūpakkhandhabhāvo hoti. Tena vuttaṃ “rūpakkhandho rūpanti? Āmantā”ti. **Tatthāti** tasmim rūpakkhandhapade. Padhānabhūtena visesitabbattā khandhāvayavapadena vuttassa ruppanaṭṭhassa kiṃ vedanākkhandhādibhāvo hotīti yojanā. Samāne avayavapadābhiddheyabhāve appadhānena padena yo attho viññāyati, so kasmā padhānena na viññāyatīti adhippāyo. **Khandhāvayavapadena vutto dhammoti** rāsaṭṭhamāha. Tattha **kocīti** ruppanaṭṭho. **Kenaci samudāyapadenāti** rūpakkhandhapadena, na vedanākkhandhādīpadena. Tenāha “**na sabbo sabbenā**”ti. Esa nayo vedanākkhandhādīsu. Rūparūpakkhandhādiavayavasamudāyapadasodhanamukhena tattha ca catukkhandhavasena pavattā pāḷigati **padasodhanamūlacakkavāro. Evañca dassentenāti** iminā yvāyaṃ rūpādiavayavapadehi rūpakkhandhādisamudāyapadehi ca dassitākāro atthaviseso, taṃ paccāmasati. **Visesanabhāvo** bhedakatāya sāmāññato avacchedakattā, **visesitabbabhāvo** abhedayogena bhedantarato avicchinditabbattā, **samānādhikaraṇabhāvo** tesam bhedaḍbhedaṇam ekavatthusannissayattā.

Tenāti yathāvuttana visesanavisesitabbabhāvena. **Etthāti** etasmim samānādhikaraṇe. **Tenāti** vā samānādhikaraṇabhāvena. **Etthāti** rūpakkhandhapade. Yathā nīluppapade uppavisesanabhūtam nīlam visitṭhameva hoti, na yaṃ kiñci, evamidhāpi khandhavisesanabhūtam rūpampi visitṭhameva siyāti dassento “**kiṃ khandhato...pe... hoti**”ti āha. Tathā “rūpañca taṃ khandho cā”ti samānādhikaraṇabhāveneva yaṃ rūpaṃ, so khandho. Yo khandho, taṃ rūpanti ayampi āpanno evāti āha “**sabbeva...pe... visesitabbā**”ti. Visenanena ca nāma niddhāritarūpena bhavitabbaṃ avacchedakattā,

na aniddhāritarūpenāti āha “**kiṃ pana ta**”ntiādi, tasseva gahitattā na piyarūpasātarūpassāti adhippāyo. Na hi taṃ khandhavisesanabhāvena gahitaṃ, vissajjanaṃ kataṃ tassevāti yojanā. **Na khandhato aññaṃ rūpaṃ atthīti** idaṃ ruppanattho rūpanti katvā vuttaṃ, na hi so khandhavinimutto atthī. **Tenevāti** yathāvuttarūpassa khandhavinimuttassa abhāvene. “Piyarūpaṃ sātarūpaṃ, dassentenappaka”nti ca ādisu atadattassa rūpasaddassa labbhamānattā “tena rūpasaddenā”ti visesetvā vuttaṃ. **Vuccamānaṃ** bhūtipādāyampi bhedaṃ dhammajātaṃ. **Suddhenāti** kevalena, rūpasaddena vināpīti attho. Tayidaṃ pakaraṇādiavacchinnataṃ sandhāya vuttaṃ, samānādhikaraṇataṃ vā. Yo hi rūpasaddena samānādhikaraṇo khandhasaddo, tena yathāvuttarūpasaddena viya tadattho vuccateva. Tenāha “**khandhā rūpakkkhandho**”ti. Yadi pi yathāvuttaṃ rūpaṃ khandho eva ca, khandho pana na rūpamevāti āha “**na ca sabbe...pe... visesitabbā**”ti. **Tenevāti** arūpasabhāvassa khandhassa atthibhāvene. **Teti** khandhā. **Vibhajitabbāti** “khandhā rūpakkkhandho”ti padaṃ uddharitvā “rūpakkkhandho khandho ceva rūpakkkhandho ca, avasesā khandhā na rūpakkkhandho”tiādinā vibhāgena dassetabbā.

Khandhānaṃ rūpavisēsa...pe... saṃsayo hotīti ettha kiṃ khandhato aññāpi vedanā atthī, yato vinivattā vedanā khandhavisēsaṃ hoti, sabbe ca khandhā kiṃ khandhavisēsanabhūtāya vedanāya visesitabbāti evaṃ yojanā veditabbā. **Kecīti** anubhavanādippakārā. **Kenaci visēsaṇenāti** vedanādinā visēsaṇena.

Ettha ca rūpādipaṇṇatti khandhapaṇṇatti ca “rūpaṃ khandho, khandhā rūpakkkhandho”tiādinā visuṃ saha ca ruppanādike atthe pavattamānā kadāci avayavabhūte pavattati, kadāci samudāyabhūte, tassā pana tathā pavattanākāre niddhārite yasmā rūpādikkhandhā padato atthato ca visodhitā nāma honti tabbisayakaṅkhāpanodanato, tasmā “rūpakkkhandho rūpañceva rūpakkkhandho ca, rūpakkkhandho rūpanti? Āmantā”tiādinayappavattena paṭhamavārena rūpādiavayavapadehi avayavattho viya samudāyatthopi vuccati, tathā samudāyapadehipīti ayamatto dassito. “Rūpaṃ rūpakkkhandho, khandhā vedanākkhandho”tiādinayappavattena pana dutiyavārena visesavācī viya rūpādiavayavapadehi sāmāññabhūtenapi taṃtaṃvisiṭṭhena khandhāvayavapadena so so eva samudāyattho vuccati, na sabboti ayamatto dassito. Khandhavinimuttassa yathādhippetassa abhāvā yadi pi khandhoyeva rūpaṃ, so pana na sabbo rūpaṃ, atha kho tadekadeso, tathā vedanādayopīti ayamatto “rūpaṃ khandho, khandhā rūpa”ntiādinayappavattena tatiyavārena dassito. “Rūpaṃ khandho, khandhā vedanākkhandho”tiādinayappavattena pana catutthavārena “rūpaṃ khandho”ti rūpassa khandhabhāve nicchite khandho nāmāyaṃ na kevalaṃ rūpameva, atha kho vedanādi cāti vedanādīnampi khandhabhāvappakāsane na sabbe khandhā vedanādivisēsavanto, kecīdeva pana tena tena visēsaṇena tathā vuccantīti ayamatto dassito. Evaṃ dassenti cesā pālī khandhānaṃ yathāvuttapaṇṇattisodhanamukhena sarūpāvadhāraṇāya saṃvattati, tañca tesam yāvadeva uppādādinicchayatthanti dassento “**evaṃ yesaṃ...pe... veditabbo**”ti āha.

Ekadesepi samudāyavohāro dissati yathā paṭo daḍḍho, samuddo diṭṭhoti āha “**cakkāvayavabhāvato cakkānīti yamakāni vuttāni**”ti. **Bandhitvāti** yamakabhāvena bandhitvā, yamakamūlabhāvene vā. Mūlabhāvena gahaṇaṃ sambandhabhāvo, taṃsambandhatā ca mūlapadādīnaṃ nābhīdisadisatā daṭṭhabbā. Apubbassa vattabbassa abhāvato nayidha desanā maṇḍalabhāvene sambajjhatīti āha “**na maṇḍalabhāvena sambajjhanato**”ti. Yadi pi rūpakkkhandhamūlake apubbaṃ natthi, vedanākkhandhādīmūlakesu pana saññādīmukhena desanappavattiyam apubbavaseneva gato siyā maṇḍalabhāvena sambandho, na tathā pāṭho pavattoti āha “**vedanākkhandha...pe... sambandhenā**”ti. Pacchimassa purimena asambajjhanameva hi heṭṭhimasodhanaṃ. **Suddhakkhandhalābhamattameva gahetvāti** “khandhā rūpa”nti ettha khandhāti khandhasaddena labbhamānaṃ rūpādīhi asammissaṃ khandhatthamattameva uddesavasena gahetvā. Yadi pi uddese khandhavisēsaṃ rūpādi “khandhā rūpa”nti suddharūpādīmattameva gahitaṃ, tathāpi visēsahitassa sāmāññassa abhāvato tattha **suddharūpādīmattatāya aṭṭhatvā**. **Khandhavisēsanabhāvasaṅkhātanti** yathādhigataṃ khandhānaṃ visēsaṇabhāvena kathitaṃ ruppanādikaṃ visēsaṇattham dassetuṃ. Kevalameva taṃ aggaṇhanto khandhasaddena saha yojetvā...

pe... vibhattattā suddhakkhandhavāroti vuttoti yojanā.

Uddesavāraṇṇanā niṭṭhitā.

1. Paṇṇattivāro

Niddesavāraṇṇanā

26. **Evam vuttanti** evaṃ dvārālabanehi saddhiṃ dvārappavattadhammavibhāgavasena vuttam. Piyasabhāvaṃ piyajātikam “katham rūpena kho, āvuso”tiādīsu viya piyasabhāvaṭṭhena rūpaṃ, na ruppanaṭṭhena vuttam **“piyarūpaṃ...pe... rūpaṃ na rūpakkhando”**ti. Ruppanaṭṭhena rūpakkhandhapariyāpannampi cakkhādi piyasabhāvamattavacanicchāvasena piyarūpameva anuppavisati, na rūpakkhandhanti āha **“piyasabhāva...pe... na rūpakkhando vutta”**nti. “Yo pana yattha viseso”ti vutto visesasaddo nānuvattatīti adhippāyena āha **“vacanaseso”**ti. Na hi adhikāro labbhamānassa ajjhāharaṇakiccaṃ atthi. Diṭṭhisaññāti vā paduddhāroyaṃ veditabbo. Visatā panassā “visesaṃ vaṇṇayissāmā”ti paṭiññāya eva pākāṭā. “Avasesā saṅkhārā”ti etthāpi eseva nayo. Saṃyojanavasena jānāti abhinivisatīti saññā diṭṭhīti āha **“diṭṭhi eva saññā”**ti. **Diṭṭhi cāti ca-saddena** avasiṭṭham papañcaṃ saṅgaṇhāti. Tathā hi “papañcasaññāsaṅkhā”ti ettha **papañcasūdaniyaṃ** (ma. ni. aṭṭha. 1.201) vuttam “saññānāmena vā papañcā eva vuttā”ti.

28. “Khandhā vedanākkhandho”ti etasmim anulome yathā sarūpadassanena vissajjanaṃ labbhati, na evaṃ “na khandhā na vedanākkhandho”ti paṭilome, idha pana paṭivacanena vissajjananti tadattham vivaranto **“khandhasaddappavattiyā ca abhāve vedanākkhandhasaddappavattiyā ca abhāvo”**ti āha. Tena sattāpaṭisedhe ayaṃ na-kāroti dasseti. Saddaggaṇaṇcetha saddanibandhanattā paññattiyā saddasabhāgataṃ vā sandhāya kataṃ. Paṇṇattisodhanañhetam. Tenāha **“paṇṇattisodhanamattameva karoti”**ti. Tena niddhāretabbassa dhammantarassa abhāvaṃ dasseti. Yato vuttam **“na aññadhammasabbhāvo evettha pamāṇa”**nti. **Evañca katvāti**adinā yathāvuttamattham pāṭhantarena samattheti. Kāmaṃ katthaci satipi khandhe natthi vedanākkhandho, akhandhattasabhāvā pana natthi vedanāti “na khandhā na vedanākkhandhoti? Āmantā”ti vuttanti evaṃ vā etaṃ daṭṭhabbam. Tenāha **aṭṭhakathāyaṃ** “paññattinibbānasāṅkhātā”tiādi.

39. “Rūpato aññe”ti ettha bhūtopādāya dhammo viya piyasabhāvopi rūpasaddābhidheyatāsāmaññena gahitoti āha **“lokuttarā vedanādayo daṭṭhabbā”**ti. **Appavattimattamevāti** khandhasaddappavattiyā abhāve rūpasaddappavattiyā ca abhāvoti paṇṇattisodhanamattatameva sandhāya vadati, tathā cāha **“evañca katvā”**tiādi. Tenetaṃ dasseti – yathā cakkhuto aññassa sabbassapi sabhāvadhammassa āyatanaggahaṇena gahitattā tadubhayavinimuttam kiñci natthīti kevalam paññattisodhanattham tameva abhāvaṃ dassetuṃ “cakkhuñca āyatane ca ṭhapetvā avasesā na ceva cakkhu na ca āyatana”nti vuttam, evamidhāpi tadatthameva ubhayavinimuttassa abhāvaṃ dassetuṃ “rūpañca khandhe ca ṭhapetvā avasesā na ceva rūpaṃ na ca khandhā”ti vuttanti. Visamopaññāso. “Cakkhuñca āyatane ca ṭhapetvā”ti ettha hi avasesaggahaṇena gayhamānaṃ kiñci natthīti sakkā vattum āyatanavinimuttassa sabhāvadhammassa abhāvā. Tenāha **“yadi siyā”**ti. “Rūpañca khandhe ca ṭhapetvā”ti ettha pana na tathā sakkā vattum khandhavinimuttassa sabhāvadhammassa atthibhāvato. Yadi pana tādisaṃ khandhagataṃ dhammajātam natthīti evamidam vuttam siyā, evaṃ sati yuttametam siyā. Tathā hi **“aṭṭhakathāyaṃ panā”**tiādinā paññattiggahaṇameva uddharīyati. Taṇhāvattu ca na siyā avasesaggahaṇena gayhamānanti ānetvā sambandho. Khandho ca siyāti yojanā.

Niddesavāraṇṇanā niṭṭhitā.

2. Pavattivāraṇṇanā

50-205. Missakakālabhedeṣu yamakesu padānaṃ bhinnakālattā siyā atthavisesoti āha “**amissakakālabhedeṣu vāresu atthavisesābhāvato**”ti. Idāni tamevatthaṃ “**purimassa hī**”tiādinaṃ vivarati. **Tena**ti atthavisesābhāvena. **Etthā**ti etasmim̐ pavattivārapāṭhe, etissaṃ vā pavattivāraṇṇanāyaṃ. **Cha eva vuttā**, na navāti adhippāyo. Tenāha “**atītenā**”tiādi. **Ete pana tayoti** attanā visuṃ anantaraṃ dassite sandhāyāha. **Yathādassitā**ti aṭṭhakathāyaṃ niddhāretvā dassitabbākārā paccuppannēnātītādayo ye pāḷiyaṃ ujukameva āgatā. “**Na visuṃ vijjantī**”ti vuttamevatthaṃ “**tattha tattha hī**”tiādinaṃ pākāṭataraṃ karoti. Tattha **paṭilomapucchāhī**ti “yassa vā pana vedanākkhandho uppajjittha, tassa rūpakkhandho uppajjati”ti evamādikāhi paṭhamapade vuttassa paṭilomavasena pavattāhi. **Tenevā**ti nayato yojetuṃ sakkuṇeyyattā eva. **Missakakālabhedeṣu cāti** na kevalaṃ amissakakālabhedeṣuyeva, atha kho missakakālabhedeṣu cāti attho. Na yojanāsukaratāya eva purime ayojanā, atha kho sukhaggahaṇatthampīti dassento āha “**amissaka...pe... vuttānī**”ti.

Yena kāraṇenāti yena ekapadadvayasaṅgahitānaṃ khandhānaṃ uppādassa nirodhassa lābhasaṅkhātena kāraṇena. Yathākkamaṃ purepañho pacchāpañhoti ca nāmaṃ vuttaṃ. Ca-saddena purepacchāpañhoti ca nāmaṃ vuttanti niddhāretvā yojetabbaṃ. Tattha pana “ekapadadvayasaṅgahitāna”nti idaṃ ekajjhaṃ katvā gahetabbaṃ. Tamevatthampi vivarati “**yassa hī**”tiādinaṃ. Tattha **yassā**ti yassa pañhassa. “Pañho”ti cettha pucchānavasena pavattaṃ vacanaṃ veditabbaṃ. Tenevāha “**paripūretvā vissajjetabbatthasaṅgaṇhanato**”ti. Taṃ sarūpadassanena vissajjanaṃ taṃvissajjanaṃ, taṃ vā yathāvuttaṃ vissajjanaṃ etassāti taṃvissajjano, tassa **taṃvissajjanassa**. **Purimakoṭṭhāsena**ti purimena uddesapadena. Tena hi vissajjanapadassa samānatthatā idha sadisatthatā. **Ekena padenā**ti ekena padhānāppadhānena yamakapadena, na paṭhamapadenevāti attho. **Uppādanirodhalābhasāmaññamattenā**ti uppādassa vā nirodhassa vā labbhamānatāya samānatāmattena. **Sanniṭṭhānapada...pe... yuttanti** idaṃ aṭṭhakathāyaṃ “yattha rūpakkhandho nuppajjati”tiādinaṃ purepañhassa dassitattā vuttaṃ. Yadi pi tattha “uppajjati”ti vissajjitattā vedanākkhandhassa uppādo labbhatīti vuttaṃ, yo pana sanniṭṭhānapadasaṅgahito rūpakkhandhassa anuppādo pāḷiyaṃ anuññātarūpena ṭhito, tassa vasena purepañho yuttoti adhippāyo. Evañhi purimakoṭṭhāsena sadisatthatā hoti.

“Yassa rūpakkhandho nuppajjittha, tassa vedanākkhandho nuppajjitthā”ti ettha rūpakkhandhassa anuppannapubbatāpaṭikkhepamukhena itarassa paṭikkhipiyatīti rūpakkhandhasseva yathāvuttapaṭikkhepo padhānabhāvena vutto. Eseva nayo aññesupi edisesu ṭhānesūti āha “**sanniṭṭhānatthasseva paṭikkhipanaṃ paṭikkhepo**”ti. “Yassa rūpakkhandho uppajjati, tassa vedanākkhandho nirujjhati”ti ettha pana rūpakkhandhassa uppādalakkhaṇaṃ katvā vedanākkhandhassa nirodho pucchīyatīti so eva “no”ti paṭisedhīyati. Esa nayo aññesupi edisesu ṭhānesūti vuttaṃ “**samsayatthanivāraṇaṃ paṭisedho**”ti. “Na-kāravirahita”nti etena paṭisedhassa paṭisedhitamāha. Yadi evaṃ pāḷigatipaṭisedhavissajjanānaṃ ko visesoti āha “**tattha uppattī**”tiādi.

Tadekadesapakkhepavasenati tesam̐ catunnaṃ pañhānaṃ pañcannañca vissajjanānaṃ ekadesassa pakkhipanavasena. Tenāha **aṭṭhakathāyaṃ** “paṭhame ṭhāne paripuṇṇapañhassa purimakoṭṭhāse sarūpadassanēnā”tiādi. Yo panettha pañhesu vissajjanesu ca sattavīsatiyā ṭhānesu pakkhepaṃ labhati, taṃ dassetuṃ “**paripuṇṇapañho evā**”tiādi vuttaṃ. **Pāḷivavatthānadassanādī**toti ettha **ādi**-saddena pucchāvibhaṅgo vissajjanāṭṭhānāni ekasmim̐ pañhe yojanānayoti imesaṃ saṅgaho daṭṭhabbo.

Suddhāvāsānantiādi pāḷiyā padaṃ uddharitvā atthadassanatthaṃ āradhamaṃ. “Yassa yattha rūpakkhandho nuppajjittha, tassa tattha vedanākkhandho nuppajjitthā”ti imassa vissajjanaṃ hoti “suddhāvāsānaṃ tesam̐ tatthā”ti. Tattha **ekabhūmiyaṃ dutiyā upapattī natthī**ti ekissā bhūmiyā ekassa ariyapuggalassa dutiyavāraṃ paṭisandhiggahaṇaṃ natthīti attho. Tatiyavārādīsu vattabbameva natthi. Svāyamattho yathā nīpito hoti, taṃ dassetuṃ “**paṭisandhito pabhuti hi...pe... pavattā**”ti vuttaṃ. Tena addhāpaccuppannavasenāyaṃ desanā pavattāti dasseti. Ādānanikkheparicchinnaṃ kammajasantānaṃ ekattena gahetvā tassa vasena uppādanirodhesu vuccamānesu akammajesu kusalādīsu kathanti codanāyaṃ tepi idha taṃnissitā eva katāti dassento āha “**tasmiñhi...pe... dassitā**”ti. **Tenevā**ti

kammajasantānena. **Tasmāti** ekakammanibbattassa vipākasantānassa ekattena gahitattā. **Tassāti** kammajasantānassa. Pañcasu suddhāvāsesu yathā paccekam “ekissā bhūmiyā dutiyā upapatti natthī”ti yathāvuttapāliyā viññāyati, evaṃ “suddhāvāsāna”nti avisesavacanato sakalepi suddhāvāse sā natthīti tāya kasmā na viññāyatīti codanaṃ samuṭṭhāpetvā sayameva pariharitum **“kasmā panā”**tiādimāha. Tattha suddhāvāsesu heṭṭhābhūmikassa asati indriyaparipāke uparibhūmisamuppatti na sakkā paṭisedhetum uddhamṣotavacanato. Uddhamassa taṇhāsotaṃ vaṭṭasotañcāti hi uddhamṣoto. Tenāha **“uddhamṣotapālisabbhāvā”**ti. **Samṣandetabbāti** yathā na virujjhanti, evaṃ netabbā. Tathā ceva saṃvaṇṇitaṃ.

Etena sannitṭhānenāti aṅkitokāsabhāvirūpuppādasannissayena nicchayena. **Visesitā** tathābhāvirūpabhāvino. **Asaññasattāpīti** na kevalaṃ pañcavokārā eva, atha kho asaññasattāpī. **Te eva** asaññasatte eva gahetvā purimakotṭhāseti adhippāyo. **Tena ye sannitṭhānena vajjitāti** tena yathāvuttasannitṭhānena ye virahitā, te tathā na vattabbāti attho. Idāni **“te tato”**tiādinā dasseti. **Tatoti** asaññābhavato. **Pacchimabhavikānanti** ettha pacchimabhavaṃ sarūpato dassetuṃ **“kiṃ pañcavokārādī”**tiādi vuttaṃ. Apacchimabhavikānampi arūpānaṃ arūpabhava yathā rūpakkhandho nuppādi, evaṃ tattha pacchimabhavikānaṃ vedanākkhandhopīti āha **“etenā sannitṭhānena saṅgahitattā”**ti. Tenāha **“tesaṃ...pe... āhā”**ti. Tattha **tesanti** pacchimabhavikānaṃ. **Tatthāti** arūpabhava. **Itarānuppattibhāvañcāti** itarassa vedanākkhandhassa anuppajjanasabbhāvampi. Sappaṭisandhikānampi suddhāvāsānaṃ khandhabhedassa parinibbānapariyāyo oḷārikadosappahānato kilesūpasamasāmaññena vuttoti veditabbaṃ.

Sabbesañhi tesanti taṃtaṃbhūmiyaṃ ṭhitānaṃ sabbesaṃ suddhāvāsānaṃ. **Yathā panātiādinā** vuttamevatthaṃ pākāṭataraṃ karoti. **Anantā lokadhātuyoti** idaṃ okāsassa paricchedābhāvaṃyeva dassetuṃ vuttaṃ. Puggalavasena samānādhāratāya samānakālattena asambhavanto okāsavasena pana sambhavanto saṃkiṇṇā viya hontīti āha **“saṃkiṇṇatā hoti”**ti.

Pavattivāraṇṇanā niṭṭhitā.

3. Pariññāvāraṇṇanā

206-208. Tassāpīti puggalokāsavārassapi. **Okāse puggalassevāti** yathāgahite okāse yo puggalo, tasseva okāsavisiṭṭhapuggalassevāti attho. Yathā pana puggalavāre labbhamāne puggalokāsavāropi labbhati, evaṃ okāsavāropi labbheyyāti codanaṃ sandhāyāha **“okāsavāropi cā”**ti. **Tasmāti** yasmā vuccamānopi okāso puggalassa visesabhāveneva vucceyya, na viṣuṃ, tasmā.

Aññathāti pavattivāre viya ādānanikkhepaparicchinnam kammajasantānaṃ ekattena gahetvā tassa uppādanirodhavasena pariññāvācane. “Yo rūpakkhandhaṃ parijānāti”ti sannitṭhānapadasaṅgahitattābhāvadassanamukhena itarassapi abhāvaṃ dassetuṃ **“rupakkhandhaparijānanassa abhāvā”**ti vuttaṃ. “Āmantā”ti ca kataṃ, tasmā pavatte cittakkhaṇavasenevettha tayo addho labbhantīti attho. “Aggamaggasamaṅgiṇca arahantañcā”ti dvinnam padānaṃ “rūpakkhandhañca na parijānanti vedanākkhandhañca na parijānitthā”ti dvīhi padehi yathākkamaṃ sambandho. “Ṭhapetvā avasesā puggalā”ti pana paccekam yojetabbaṃ. **Aggamagga... pe... natthīti** iminā arahattamaggañāsseva pariññāmatthakappattiyā pariññākkiccaṃ sātisayaṃ, tadabhāvā na itaresanti dasseti. Yato tasseva vajirūpamatā vuttā, sesānañca vijjūpamatā. **Tenāti** tena yathāvuttena vacanena. **Tadavasesasabbapuggaleti** tato aggamaggasamaṅgito avasesasabbapuggale. Imaṃ pana yathāvuttadosaṃ pariharantā **“puthujjanādayo sandhāyā”**ti vadanti.

Pariññāvāraṇṇanā niṭṭhitā.

Khandhayamakavaṇṇanā niṭṭhitā.

3. Āyatanayamakam

1. Paṇṇattivāro

Uddesavāraṇṇanā

1-9. Vuttanayenāti “avayavapadehi vutto ekadeso sakalo vā samudāyapadānaṃ attho, samudāyapadehi pana vutto ekantena avayavapadānaṃ attho”tiādinā vuttana nayena. Etena yathāvuttaatthavaṇṇanāyadassanatāya sabbapaṇṇattivārādīsu yathārahaṃ attho netabboti dasseti.

Uddesavāraṇṇanā niṭṭhitā.

Niddesavāraṇṇanā

10-17. Vāyanam savisayaṃ byāpetvā pavattanaṃ, tayidaṃ yathā gandhāyatane labbhati, evaṃ sīlādīsupīti pāliyaṃ “sīlagandho”tiādi vuttaṃ “sīlādiyeva gandho”ti katvā. Tenāha aṭṭhakathāyaṃ “sīlagandho...pe... nāmānī”ti. Yasmā pana savisayaabyāpanaṃ tattha pasaṭabhāvo pākaṭabhāvo vā hoti, tasmā “pasāraṇaṭṭhena pākaṭabhāvaṭṭhena vā”ti vuttaṃ. Attano vatthussa sūcanaṃ vā **vāyanam**. “Devakāyā samāgatā (dī. ni. 2.332; saṃ. ni. 1.37), paṇṇattidhammā”tiādīsu (dha. sa. dukamātikā 108) samūhapaññattīsūpi kāyadhammasaddā āgatāti “**sasabhāva**”nti viseseti. **Kāyavacanena...pe... natthīti** idaṃ “na dhammo nāyatana”nti ettha dhammasaddassa vinivattavisesasabbasabhāvadhammavācakatam sandhāya vuttaṃ, na dhammāyatanasankhātadhammavisesavācakatanti daṭṭhabbaṃ.

Niddesavāraṇṇanā niṭṭhitā.

2. Pavattivāraṇṇanā

18-21. Etasminti pavattivāre. Pucchāmattalābhenāti moghapucchābhāvamāha. **Ekekanti** “yassa cakkhāyatanaṃ uppajjati, tassa saddāyatanaṃ uppajjati”tiādikaṃ ekekaṃ. **Pañcāti** “yassa saddāyatanaṃ uppajjati, tassa gandhāyatanaṃ uppajjati”tiādīni pañca. Pucchāmattalābhena saṅgahaṃ anujānanto “**vissajjanavasena hāpetabbānī**”ti āha. “**Vakkhati hī**”tiādinā yathāvuttamatthaṃ aṭṭhakathāya samattheti.

Sadisavissajjananti sāmāñnavacanaṃ visesaniviṭṭhameva hotīti taṃ visesaṃ dassento “puggalavārameva sandhāya vutta”nti vatvā tassā pana sadisavissajjanatāya abyāpitattā yattha sadisaṃ, tatthāpi vissajjitanti dassento “**okāsavāre pana...pe... vissajjita**”nti āha. Tattha **tanti** dutiyaṃ. **Puggalavārepīti** yattha sadisaṃ vissajjanaṃ, tattha puggalavārepi vissajjitaṃ, pageva okāsavārepi adhippāyo. **Virattakāmakammanibbattassāti** bhāvanābalena viratto kāmo etenāti virattakāmaṃ, rūpāvacarakammaṃ, tato nibbattassa. Paṭisandhi eva bījaṃ **paṭisandhibījaṃ**, tassa. “**Evamsabhāvattā**”ti etena ekantato kāmataṇhānidānakammahetukāni ghānādīnīti dasseti. **Gandhādayo ca na santīti** sabbena sabbam tesampi abhāvaṃ sandhāya vadati. Tattha yaṃ vattabbaṃ, taṃ heṭṭhā vuttameva.

“**Sacca**”nti yathāvuttavasena gahetabbaṃ codakena vuttamatthaṃ sampaṭicchitvā puna yenādhippāyena tāni yamakāni sadisavissajjanāni, taṃ dassetuṃ “**yathā panā**”tiādi vuttaṃ. Tatrāyaṃ saṅkhepattho – tattha cakkhāyatanaṃ mulakesu ghānāyatanaṃ yamakena “sacakkhukānaṃ aghānāyanaṃ upapajjantāna”ntiādinā nayena jivhākāyāyatanaṃ yamakāni yathā sadisavissajjanāni, tathā idha ghānāyatanaṃ mulakesu ghānāyatanaṃ yamakena tāni jivhākāyāyatanaṃ yamakāni “yassa ghānāyatanaṃ uppajjati, tassa jivhāyatanaṃ uppajjati”tiādinā nayena sadisavissajjanānīti. Evamettha

ubhayesaṃ viṣuṃ aññamaññaṃ sadisavissajjanatāya idaṃ vuttaṃ, na ekajjhaṃ aññamaññaṃ sadisavissajjanatāya. Tenāha “**tasmā tattha tattheva sadisavissajjanatā pāḷianāruḷhatāya kāraṇa**”nti. Evañca sati cakkhāyatanamūlaggahaṇaṃ kimatthiyanti āha “**nidassanabhāvenā**”tiādi. Tattha **nidassanabhāvenā**ti nidassanabhūtānaṃ aññamaññasadisavissajjanatāsaṅkhātena nidassanabhāveneva, na pana tesāṃ nidassitabbehi sabbathā sadisavissajjanatāyāti adhippāyo. “**Yebhuyyatāyā**”ti vuttaṃ yebhuyyataṃ dassetuṃ “**tesu hī**”tiādi vuttaṃ.

Evanti iminā “**āmantā**”ti paṭivacanavissajjanena yathāvuttavacanasseva vissajjanabhāvānujānaṃ kattabbanti imamattaṃ ākaḍḍhati. **Sāti** dutiyapucchā. **Ghānāyatanayamakenā**ti cakkhāyatanamūlakesu ghānāyatanayamakeneva. **Taṃsesānī**ti tena ghānāyatanamūlakakāyāyatanayamakena saddhiṃ sesāni. **Sadisavissajjanattā anāruḷhānī**ti ettha “**anāruḷhānī**”ti ettakameva **tathā**-saddena anukaḍḍhiyati, na “**sadisavissajjanattā**”ti dassento “**tathāti...pe... samaññenā**”ti vatvā idāni “**kāraṇasāmaññenā**”ti vuttassa sadisavissajjanattassa tattha abhāvaṃ dassetuṃ “**ghānajivhākāyāyatanānaṃ panā**”tiādi vuttaṃ. Tattha **agabbhaseyyakesu pavattamānānanti** etthāpi “**sahacāritāyā**”ti padaṃ ānetvā sambandhitabbaṃ, **tathā** “**gabbhaseyyakesu ca pavattamānāna**”nti. **Itarāni** ghānāyatanamūlakāni jivhākāyāyatanayamakāni **dve** na vissajjīyanti, ghānāyatanamūlakesu ca yamakesu vissajjitesu **itaradvayamūlakāni** jivhākāyāyatanamūlakāni na vissajjīyanti avisesattā appavisesattā cāti yojetabbaṃ. Tattha kāyāyatanayamake dutiyapucchāvasena appaviseso, itaravasena aviseso veditabbo. **Rūpāyatanamanāyatanehi saddhinti** idaṃ rūpāyatanamūlakamanāyatanavasena vuttanti āha “**rūpāyatana...pe... adhippāyo**”ti. Tenevāha “**rūpāyatanamūlakesu hī**”tiādi. **Yamakānanti** rūpāyatanamūlakagandharasaphoṭṭhabbāyatanayamakānaṃ. **Dutiyapucchānanti** yathāvuttayamakānaṃyeva dutiyapucchānaṃ. **Vuttanayenā**ti “**sarūpakānaṃ acittakāna**”ntiādinā vuttana nayena. **Ādipucchānanti** tesāṃyeva yamakānaṃ paṭhamapucchānaṃ.

Heṭṭhimehīti idaṃ avisesavacanampi yesu sadisavissajjanatā sambhavati, tadapekkhanti āha “**gandharasa...pe... attho**”ti. Uddiṭṭhadhammesu uddesānurūpaṃ labbhamānavisesakathanāṃ vissajjanaṃ, yo tattha na sabbena sabbāṃ uddesānurūpaṇena upalabbhati, tassa akathanampi atthato vissajjanameva nāma hotīti āha “**avissajjaneneva alabbhamānatādassanena vissajjitāni nāma hontī**”ti.

Cakkhuvikalasotavikalā viya cakkhusotavikalopi labbhatīti so pana aṭṭhakathāyaṃ pi-saddena saṅgahitoti dassento “**jaccandhampi...pe... veditabbo**”ti āha. Paripuṇṇāyatanameva opapātikaṃ sandhāya vuttanti ettha aṭṭhānappayutto **eva**-saddoti tassa ṭhānaṃ dassento “**vuttamevāti attho**”ti vatvā tena paripuṇṇāyatanassa tattha aniyatattā aparipuṇṇāyatanassapi saṅgaho siddhoti dassento “**tena jaccandhabadhiraṃpi sandhāya vuttatā na nivāritā hotī**”ti āha.

22-254. Tasmim puggalassa anāmaṭṭhattāti kasmā vuttaṃ, yāvatā “**rūpībrahmalokaṃ pucchati**”ti imināpi okāsoyeva āmaṭṭhoti. “**Āmantā**”ti paṭiññāya kāraṇavibhāvanādhippāyeneva “**kasmā paṭiññāta**”nti codanaṃ samuṭṭhāpetvā taṃ kāraṇaṃ dassetukāmo “**nanū**”tiādimāha. **Gabbhaseyyakabhāvaṃ gantvā parinibbāyissatī**ti pacchimabhavikaṃ sandhāyāha. **Tadavatthassāti** pacchimabhāvavattassa. **Bhavissantassāti** bhāvino. **Paṭiññātabbattāti** “**uppajjissati**”ti paṭiññātabbattā.

Atha kasmāti etthāyaṃ saṅkhepattho – yadi “**yassa rūpāyatanāṃ uppajjissati, tassa cakkhāyatanāṃ uppajjissati**”ti pucchāyaṃ vuttana vidhinā paṭiññātabbaṃ, atha kasmā atha kena kāraṇena paṭilome “**yassa vā pana rūpāyatanāṃ nuppajjissati, tassa cakkhāyatanāṃ nuppajjissati**”ti pucchāya “**āmantā**”ti paṭiññātaṃ, nanu idaṃ aññamaññaṃ viruddhanti? **Nanū**tiādināpi codako tameva virodhaṃ vibhāveti. **No ca nuppajjissati** uppajjissati evāti attho. “**Tasmim bhave**”tiādi tassa parihāro. Tattha **tasmim bhaveti** yasmim bhave “**rūpāyatanāṃ nuppajjissati**”ti vuttaṃ pavattamānattā, tasmim bhave. **Anāgatabhāvena avacanatotī** bhāvībhāvena avattabbato āraddhuppādabhāvena pavattamānattāti

adhippāyo. Tenevāha “**bhavantare hī**”tiādi. Na pana vuccatīti sambandho. **Evañca katvāti**ādīnā pāṭhantarena yathāvuttamatthaṃ samattheti.

Yasmiṃ attabhāve yehi āyatanehi bhavitabbaṃ, **taṃtaṃāyatananibbattakakammena avassambhāvīāyatanassa** sattassa, santānassa vā, “yassa vā pana rūpāyatanam uppajjissati, tassa cakkhāyatanam uppajjissatīti? Āmantā, yassa vā pana rūpāyatanam nuppajjissati, tassa cakkhāyatanam nuppajjissatīti? Āmantā”ti ca evaṃ pavattaṃ pucchādvayavissajjanam āyatanapaṭilābhassa jātibhāvato suṭṭhu upapannaṃ bhavati. **Pacchimabhavikādayoti** ettha **ādi**-saddena arūpe uppajjitvā parinibbāyanakā saṅgayhanti. **Idampi** vissajjanam. **Abhinanditabbattāti** “āmantā”ti sampañcchitabbattā.

Yaṃ pana aghānakānam kāmāvacaram upapajjantānanti vuttanti sambandho. Yassa vipāko ghānāyatanuppattito puretameva upacchijjissati, taṃ ghānāyatananibbattakakammanti vuttaṃ. Kathaṃ panīdisaṃ kammaṃ atthīti viññāyatīti āha “**yassa yatthā**”tiādi. Evampi gabbhaseyyako eva idha aghānakoti adhippetoti kathamidam viññāyatīti codanāya “**na hī**”tiādiṃ vatvā tamatthaṃ sādhetum “**dhammahadayavibhaṅge**”tiādi vuttaṃ. Avacanattampi hi yathādhammasāsane abhidhamme paṭikkhepoyevāti. **Idhāti** imasmiṃ āyatanayamake. **Yathādassitāsūti** “yassa vā pana sotāyatanam nuppajjissati, tassa cakkhāyatanam nuppajjati, yassa yattha ghānāyatanam na nirujjhati, tassa tattha rūpāyatanam na nirujjhissati”ti ca dassitappakārāsu pucchāsu. **Āmantāti vuttanti** atha kasmā na viññāyatīti yojanā. Etāsu pucchāsu kasmā paṭivacanena vissajjanam na katanti adhippāyo. **Sanniṭṭhānena gahitathassāti** “yassa vā pana sotāyatanam nuppajjissati, yassa yattha ghānāyatanam na nirujjhissati”ti ca evamādikena sanniṭṭhānapadena gahitassa atthassa. **Ekadese saṃsayatthassa sambhavenāti** ekadese saṃsayitabbassa atthassa sambhavana sanniṭṭhānatthapaṭiyogabhūtasamsayatthassa paṭivacanassa akaraṇato “āmantā”ti paṭivacanavissajjanassa akattabbato atthassa abhinditvā ekajjham katvā avattabbato. Tenāha “**bhinditabbēhi na paṭivacanavissajjanam hotī**”ti.

Yadi siyāti bhinditvā vattabbepi atthe yadi paṭivacanavissajjanam siyā, **paripuṇṇavissajjanameva na siyā** anokāsabhāvato bhinditabbato cāti attho. Tathā hi “pañcavokāre parinibbantānam, arūpe pacchimabhavikānam, ye ca arūpaṃ upapajjitvā parinibbāyissanti, tesam cavantānam tesam sotāyatanañca nuppajjissati, cakkhāyatanañca nuppajjati”ti ca, tathā “rūpāvacare parinibbantānam, arūpānam tesam tattha ghānāyatanañca na nirujjhati, rūpāyatanañca na nirujjhissati”ti ca tattha vibhāgavasena pavatto pāṭhaseso. **Atha kasmāti** yadi abhinditabbe paṭivacanavissajjanam, na bhinditabbe, evaṃ sante “yassa vā pana somanassindriyam uppajjati, tassa cakkhundriyam uppajjati? Āmantā”ti iminā paṭivacanavissajjanena gabbhaseyyakānam somanassapaṭisandhi natthīti kasmā na viññāyati, bhinditabbe na paṭivacanavissajjanam hotīti sampañcchitabbanti? Taṃ na, aññāya pāliyā tadatthassa viññāyamānattāti dassento “**kāmadhātuyā**”tiādimāha.

“Yaṃ cittam uppajjati, na nirujjhati, taṃ cittam nirujjhissati, nuppajjissatīti? Āmantā”ti tasseva cittassa nirodho anāgatabhāvena tassa uppādakkhaṇe yathā vutto, evaṃ tasseva kammajasantānassa nirodho tassa uppāde anāgatabhāvena vattabbo. Tenetaṃ dasseti “ekacittassa nāma uppādakkhaṇe nirodho anāgatabhāvena vuccati, kimaṅgam pana ekasantānassā”ti. **Sabbattha** sabbasmiṃ anāgatavāre. Upapajjantānam eva vasena **so** nirodho **tathā** anāgatabhāvena vutto, kasmā panettha nirodho upapannānam vasena na vuttoti āha “**uppannānam panā**”tiādi. **Tasseva** yathāpavattassa kammajasantānassa eva. **Tasmāti** yasmā uppādakkhaṇato uddham nirodho āradhho nāma hoti, tasmā. **Bhede satipi** kālabhedāmasanassa kāraṇe satipi. Anāgatakālāmasanavaseneva nirodhasseva vasena vissajjanadvayam **upapannameva** yuttameva hotīti. Aññesaṃ vasena nirodhasseva vuttum asakkuṇeyyatā “**arahata**”nti vuttaṃ.

Yadi upapattiantaram nirodho āradhho nāma hoti, atha kasmā cutiyā nirodhavacananti codanam sandhāyāha “**tanniṭṭhānabhāvato pana cutiyā nirodhavacana**”nti. **Tanniṭṭhānabhāvato**ti tassa

santānassa niṭṭhānabhāvato. **Pavatteti**ādi vuttassevatthassa pākātakaraṇaṃ. Tattha **tassāti** santānassa. **Vakkhatī**tiādi pi pavatte nirodhaṃ anādiyitvā cutinirodhasseva gahitatāya kāraṇavacanaṃ. **Tenāti** tena yathāvuttena pāthantaravacanaena. **Etthāti** etasmiṃ “yassa cakkhāyatanaṃ nirujjhissatī”tiādike āyatanayamake. Yadi pavatte niruddhassapī cutiyā eva nirodho icchito, “sacakkhukāna”ntiādi kathanti āha “**sacakkhukānantiādisu ca paṭiladdhacakkhukānantiādinā attho viññāyatī**”ti. Teti arūpe pacchimabhavikā. Acakkhukavacanañca sāvasesanti yojanā.

Pavattivāraṇaṇā niṭṭhitā.

Āyatanayamakavaṇṇanā niṭṭhitā.

4. Dhātuyamakam

1-19. Saddadhātusambandhānanti idaṃ yāni cakkhudhātādīmūlakesu saddayamakāni, sabbāni ca saddadhātumūlakāni, tāni sandhāya vuttaṃ. Na hi tāni cakkhuviññāṇadhātādisambandhāni viya cutipaṭisandhivasena labbhanti, eteneva āyatanayamakepi pavattivāre saddadhātusambandhānaṃ yamakānaṃ alabbhamānatā ca veditabbā.

Dhātuyamakavaṇṇanā niṭṭhitā.

5. Saccayamakam

1. Paṇṇattivāraṇanā

10-26. Soti dukkhasaddo. Aññatthāti saṅkhāradukkhavipariṇāmadukkhadukkhādhiṭṭhānesu. **Aññanirapekkhoti** saṅkhārādipadantarānapekkho. **Tenāti** aññanirapekkhadukkhapadaggahaṇato. **Tasmiṃ dukkhadukkhe** visayabhūte. **Esa dukkhasaddo** “dukkhaṃ dukkhasacca”nti ettha paṭhamo dukkhasaddo. **Tañca** dukkhadukkhaṃ. “Dukkhaṃ dukkhasacca”nti ettha dukkhameva dukkhasaccanti nayidaṃ avadhāraṇaṃ icchitabbāṃ, dukkhaṃ dukkhasaccamevāti pana icchitabbanti āha “**ekantena dukkhasaccamevā**”ti. **Saccavibhaṅge vuttesu samudayesu koci phaladhammesu natthīti** saccavibhaṅge pañcadhā vuttesu samudayesu ekopi phalasabhāvesu natthi, phalasabhāvo natthīti attho. “Phaladhammo natthī”ti ca pāṭho. **Maggasaddo ca phalaṅgesūti** sāmāññaphalaṅgesu sammādiṭṭhiādisu “maggaṅgaṃ maggapariyāpanna”ntiādinā (vibha. 492, 495) āgato maggasaddo **maggaphalattā pavattati** kāraṇūpacārenāti adhippāyo. Tenāha “**na maggakiccasabbhāvā**”tiādi. **Tasmāti** yasmā saccadesanāya pabhavādisabhāvā eva dhammā samudayādipariyāyena vuttā, na appabhavādisabhāvā, tasmā. Ettha ca tebhūmakadhammānaṃ yathārahaṃ dukkhasamudayasaccantogadhattā asaccasabhāve sabhāvadhamme ca uddharanto phaladhamme eva uddhari. Nanu ca maggasampayuttāpi dhammā asaccasabhāvāti tepi uddharitabbāti? Na, tesam maggagatikattā. “Phaladhammesū”ti ettha dhammaggaṇaṇena vā phalasampayuttadhammānaṃ viya tesampi gahaṇaṃ daṭṭhabbaṃ.

Padasodhanena...pe... idha gahitāti etena asaccasabhāvānaṃ dhammānaṃ pakaraṇena nivattitamaṃ āha. **Tesanti** dukkhādīnaṃ. **Tabbisesanayogavisesanti** tena dukkhādivisesanayogena viṣiṭṭhataṃ. Saccavisesanabhāveneva dukkhādīnaṃ pariññeyyatādibhāvo siddhoti āha “**ekantasaccattā**”ti. **Yathā cetthāti** yathā etasmiṃ saccayamake suddhasaccavāre saccavisesanabhūtā eva dukkhādayo gahitā. **Evaṃ khandhayamakādīsūpīti** na suddhasaccavāre eva ayaṃ nayo dassitoti attho. Padasodhanavāre taṃmūlacakkavāre ca “rūpaṃ rūpakkhando”tiādinā samudāyapadānaṃyeva vuttattā vattabbameva natthīti “**suddhakkhandhādivāresū**”ti vuttaṃ. Tathā cetthāpi suddhavāre eva ayaṃ nayo dassito. Yadi suddhakkhandhādivāresu khandhādivisesanabhūtānameva rūpādīnaṃ gahaṇena bhavitabbāṃ, atha kasmā khandhādivisesanato aññesampi rūpādīnaṃ vasena attho dassitoti codanaṃ sandhāyāha “**aṭṭhakathāyaṃ panā**”tiādi. Purimo eva attho yutto, yuttito pāṭhova balavāti.

Paṇṇattivāraṇṇanā niṭṭhitā.

2. Pavattivāraṇṇanā

27-164. Dukkhapariññā yāva dukkhasamatikkamanatthāti sappadesaṃ pavattāpi sā tadatthāvahā bhaveyyāti kassaci āsaṅkā siyāti dassento āha “**ariyattā...pe... katvā vutta**”nti. Keci panettha “antimabhava ṭhitattā”ti kāraṇaṃ vadanti, taṃ na yujjati upapattiyā dukkhavicārattā, na ca sabbe suddhāvāsā antimabhavikā uddhaṃsotavacanato. “Yassa dukkhasaccaṃ uppajjati”ti uppādāvattā. Avisesena dukkhasaccapariyāpannā dhammā sambandhībhāveneva taṃsamaṅgī ca puggalo vuttoti dassento “**sabbe upapajjantā**”tiādiṃ vatvā svāyamattho yasmā nicchayarūpena gahito, nicchitasseva ca atthassa vibhāgadassanena bhavitabbaṃ, tasmā “**tesveva...pe... upapannamevā**”ti āha. Tattha tesveva keci dassiyantīti sambandho. **Ekakoṭṭhāsuppattisamaṅginoti** dukkhakoṭṭhāsuppattisamaṅgino. **Tesūti** sannīṭṭhānena gahitesu. **Maggaphaluppādasamaṅgīsūti** maggaphaluppādasamaṅgīnaṃ, ayameva vā pāṭho.

Ettha cātiadinā “sabbesa”ntiādiṃpāḷiyā piṇḍatthaṃ dasseti. Tattha **samudayasaccuppādavomissassa dukkhasaccuppādassāti** idaṃ anādare sāmivacanaṃ. Katthaci samudayasaccuppādavomissepi dukkhasacce taṃrahitassa samudayasaccuppādarahitassa dukkhasaccuppādassa dassanavasena vuttanti yojanā. Keci pana “samudayasaccāvomissassā”ti paṭhanti, tesam “**taṃrahitassā**”ti idaṃ purimapadassa atthavivaraṇaṃ vedītabbaṃ. **Taṃsahitassāti** samudayasaccuppādasahitassa dukkhasaccuppādassa dassanavasena vuttanti yojanā. **Tesanti** asaṅgāsattānaṃ, **pavattiyam dukkhasaccassa uppādo** “pavatte”tiādinā vuttasu dvīsipi koṭṭhāsesu na gahitoti attho. Paṭisandhiyaṃ pana tesam uppādassa paṭhamakoṭṭhāsesena gahitatā dassitā eva. **Tathā nirodho cāti** yathā asaṅgāsattānaṃ paṭisandhiyaṃ dukkhasaccassa uppādo paṭhamakoṭṭhāsesena gahito, pavattiyam pana so dvīhi koṭṭhāsehi na gahito, tathā tesam dukkhasaccassa nirodhopīti attho. Tathā hi “sabbesaṃ cavantānaṃ pavatte taṃhāvippayuttacittassa bhaṅgakkhaṇe”tiādinā (yama. 1.saccayamaka.88) nirodhavāre pāḷi pavattā. **Eseva nayoti** yvāyaṃ “ettha cā”tiādinā samudayasaccayamake pāḷiyā atthanayo vutto, maggasaccayamakepi eseva nayo, evameva tatthāpi attho netabboti attho. Tathā hi “sabbesaṃ upapajjantāna”ntiādinā tattha pāḷi pavattā.

Evañca satīti evaṃ khaṇavasena okāsaggahaṇe satīti yathāvuttamatthaṃ ananujānanavasena paccāmasati. **Etassa vissajjaneti** etassa yamakapadassa vissajjane. “Aggamaggassa uppādakkhaṇe, arahantānaṃ cittassa uppādakkhaṇe, yassa cittassa anantarā aggamaggaṃ paṭilabhissanti, tassa cittassa uppādakkhaṇe, asaṅgāsattaṃ upapajjantānaṃ tesam tattha dukkhasaccaṃ uppajjati, no ca tesam tattha samudayasaccaṃ uppajjissati”ti (yama. 1.saccayamaka.71) purimakoṭṭhāsassa āgatattā virodho natthīti “**pacchimakotṭhāse**”tiādi vuttaṃ. Tattha **tasmāti** yasmā na upapatticittuppādakkhaṇo bhāvino samudayapaccuppādassa ādhāro, atha kho kāmāvacarādiokāso, tasmā. **Puggalokāsavāro hesāti** yasmā puggalokāsavāro esa, tasmā “tesam tatthā”ti ettha okāsavasena tattha-saddassa attho vedītabbo. Yadi puggalokāsavāre kāmāvacarādiokāsavaseneva attho gahetabbo, na khaṇavasena, atha kasmā “sabbesaṃ upapajjantāna”ntiādinā okāsaṃ anāmasitvā tattha vissajjanaṃ pavattanti codanaṃ sandhāyāha “**tattha...pe... so evā**”ti. Tattha **tatthāti** okāsavāre. **Puggalavisesadassanattanti** puggalasaṅkhātavisesadassanattam. **Yattha teti** yasmim kāmāvacarādiokāse te puggalā.

Kecīti dhammasiritttheraṃ sandhāyāha. So hi “pavatte cittassa bhaṅgakkhaṇe dukkhasaccaṃ nuppajjati”ti ettha cittajarūpameva adhippetam cittapaṭibaddhavuttittāti kāraṇaṃ vadati. Apare “arūpeti imaṃ purimāpekkhampi hotīti tena pavattaṃ visesetvā arūpabhavavasena ayamattho vutto, tasmā ‘yassa vā pana samudayasaccaṃ nirujjhati, tassa dukkhasaccaṃ uppajjati’? No’tiādisipi evamattho vedītabbo”ti vadanti. **Puggalo na cittaṃ apekkhitvāva gahitoti** idaṃ cittassa anadhikatattā vuttaṃ. Yattha pana samudayasaccassa uppādanicchayo, tattheva tassa anuppādanicchayenapi bhavitabbaṃ cittena ca vinā puggalasseva anupalabbhanatoti “yassa samudayasaccaṃ nuppajjati”ti ettha samudayasaccādhāraṃ cittaṃ atthato gahitamevāti sakkā viññātuṃ. Apica indriyabaddhepi na sabbo

rūpuppādo ekantena cittuppādādhīnoti sakkā vattum cittuppattiyā vināpi tattha rūpuppattidassanato, tasmā cittajarūpameva cittassa uppādakkhaṇe uppajjati, na itaraṃ, itaraṃ pana tassa tīsupi khaṇesu uppajjati ti nīṭhamettha gantabbaṃ. Vibhajitabbā avibhattā nāma natthīti siyāyaṃ pasaṅgo paṭhamavāre, dutiyavāre pana vibhajanā eva sāti nāyaṃ pasaṅgo labbhati, paṭhamavārepi vā nāyaṃ pasaṅgo. Kasmā? Esā hi yamakassa pakati, yadidaṃ yathālābhavasena yojanā.

Dutiye citte vattamāneti ettha “paṭhamaṃ bhavaṅgaṃ, dutiyaṃ citta”nti vadanti. Bhavanikantiyā āvajjanampi vipākappavattito visadisattā “dutiya”nti vattum sakkā, tato paṭṭhāya pubbe tassa tattha samudayasaccaṃ nuppajjitthāti vattabbāti apare. Bhavanikantiyā pana sahaṅgamaṃ paṭhamaṃ cittaṃ idha dutiyaṃ cittanti adhippetam. Tato pubbe pavattaṃ sabbam abyākatabhāvena samānājatikattā ekanti katvā tato paṭṭhāya heṭṭhā tassa tattha samudayasaccaṃ nuppajjitthevāti. Tenāha “**sabbantimena paricchedenā**”tiādi. **Tasminti** dutiye citte. **Tena samānāgatikattāti** tena yathāvuttadutiyacittena ca taṃsamaṅgino vā dukkhasaccaṃ uppajjittha, no ca samudayasaccanti vattabbabhāvena samānāgatikattā. **Evañca katvāti** tena samānāgatikatāya dassittā eva. **Yathāvuttāti** dutiyākusalacittato purimasabbacittasamaṅgino aggahitā honti itarabhāvābhāvato. Vuttamevatthaṃ pāṭhantarena samatthetum “**yathā**”tiādi vuttam. **Teti** catuvokārā. **Vajjetabbāti** “itaresa”nti visesanena nivattetabbā. **Pañcavokārā viya yathāvuttā suddhāvāsāti** dutiyacittakkhaṇasamaṅgibhāvena vuttappakārā yathā suddhāvāsasaṅkhātā pañcavokārā pubbe vuttā santi, evaṃ catuvokārā pubbe vuttā na hi santīti yojanā.

“Yassa yatthā”ti puggalokāsā ādheyyādhārabhāvena apekkhitāti āha “**puggalokāsā aññamaññaṃ paricchinnā gahitā**”ti. **Kāmāvacare...pe... upapannāti** ettha kāmāvacare abhisametāvino rūpāvacaraṃ upapannā, rūpāvacare abhisametāvino arūpāvacaraṃ upapannā, vā-saddena kāmāvacare abhisametāvino arūpāvacaraṃ upapannāti ca yojetabbaṃ. **Tatthāti** upapannokāse. **Abhisamayoti** uparimaggābhisamayo yāva upapanno na bhavissati, tāva **te** tattha upapannapuggalā **ettha** etasmim “abhisametāvīna”ntiādinā vutte dutiyakoṭṭhāse **na gayhanti** puggalokāsānaṃ aññamaññaṃ paricchinnattā. Yadi evaṃ kiṃ te imasmim yamake asaṅgahitāti āha “**te panā**”tiādi. Tattha yaṃ vuttam “samānāgatikāti viṣum na dassitā”ti, taṃ pākaṭataraṃ katum “**anabhisametāvīna**”ntiādi vuttam. Tassattho – “anabhisametāvīna”nti iminā paṭhamapadena gahitā sabbattha magguppattirahe sampattibhave tattha suddhāvāse ye anabhisametāvino, tesu dvippakāresu suddhāvāsā yasmim kāle tattha anabhisametāvīnoti gahetabbā, tattha nesam tathā gahetabbakālassa visesanattham “suddhāvāsānaṃ dutiye citte vattamāne”ti vuttanti.

Etenāti etena vacanena. Vodānacittam nāma maggacittānaṃ anantarapaccayabhūtam cittam, idha pana aggamaggacittassa. **Tatoti** yathāvuttavodānacittato **purimataracittasamaṅgino**, anulomaññaṃ sampayuttacittasamaṅgino, avasiṭṭhavuṭṭhānagāminivipassanācittādisamaṅginopi. Tenāha “**yāva sabbantimatāṇhāsampayuttacittasamaṅgī, tāva dassitā**”ti.

Paṭisandhicutticittānaṃ bhaṅguppādakkhaṇā pavatte cittassa bhaṅguppādakkhaṇehi dukkhasaccādīnaṃ nuppādādīsu samānāgatikāti katvā vuttam “**pavatte cittassā**”tiādi. Tattha cuticittassapi uppādakkhaṇassa gahaṇam daṭṭhabbanti yojanā. **Dvīsupi koṭṭhāsesūti** samudayasaccassa bhāvino nirodhassa appaṭikkhepapaṭikkhepavasena pavattesu purimacchimakoṭṭhāsesu. **Na visesitanti** yathāvutte appaṭikkhepe ca satipi visesetvā na vuttanti attho. **Ekassapi** puggalassa tādisassa **maggassa ca phalassa ca bhaṅgakkhaṇasamaṅgino** purimakoṭṭhāsasseva abhajanato koṭṭhāsadvayasambhavābhāvato attho. Idāni tamevatthaṃ vivaritum “**yassa dukkhasacca**”ntiādi vuttam. **Kesañci** puggalānaṃ. Niddhāraṇe cetam sāmivacanam. “Maggassa ca phalassa cā”ti vuttamaggaphalāni dassento “**tiṇṇam phalānaṃ dvinnānaṃ maggāna**”nti āha. Tāni pana heṭṭhimāni tīṇi phalāni majjhe ca dve maggā veditabbā. **Nirantaram anuppādetvāti** paṭipakkhadhammehi avokiṇṇam katvā saha vipassanāya maggaṃ uppādentena yā sātaccakiriya katabbā, taṃ akatvāti attho. Tenāha “**antarantarā...pe... uppādetvā**”ti. “Arūpe maggassa ca phalassa ca bhaṅgakkhaṇe”ti avisesato vutte kathamayam viseso labbhatīti āha “**sāmaññavacanenapī**”tiādi. Tena apavādivisayapariyāyena upasaggā abhinivisanti ti lokasiddhoyam nīyoti dasseti.

Pavattivāraṇṇanā niṭṭhitā.

3. Pariññāvāraṇṇanā

165-170. Etthevāti imasmiṃ saccayamake eva. **Apariññeyyatādassanattanti** ettha a-kāro na pariññeyyābhāvavacano, nāpi pariññeyyapaṭipakkhacano, atha kho tadaññavacanoti yathārahaṃ saccesu labbhamānaṃ pahātabbatādīnampi dassane āpanneyeva samayavāro dassanaparo, yesañca na dassanaparo, tesu kesuci saccesu labbhamānaṃ kesañci visesānaṃ ayaṃ vāro na dassanaparoti dassento “**sacchikaraṇa...pe... dassanattañcā**”ti āha. **Samudaye pahānapariññāva vuttā, na tīraṇapariññāti** yuttaṃ tāvettaṃ samudayassapi tīretabbasabhāvattā, “**dukkhe tīraṇapariññāva vuttā, na pahānapariññā**”ti idaṃ pana kasmā vuttaṃ, nanu dukkhaṃ appahātabbamevāti? Samudayasaccavibhaṅge vuttānaṃ kesañci samudayakoṭṭhāsānaṃ dukkhasacce saṅghaṇato dukkhasamudaye vā asaṅkaratova gahetvā bhūtakathanamettaṃ daṭṭhabbaṃ. **Ubhayatthāti** dukkhe samudaye ca vuttā. Kasmā? Tesam sādharmaṇāti. Evaṃ sādharmaṇāsādharmaṇabhedabhinnaṃ yathāvuttaṃ pariññākiccaṃ pubbhāge nānakkhaṇe labbhamānaṃ maggakkāle ekakkhaṇe eva labbhati ekaññākiccattāti dassettaṃ “**maggāññañhi**”tiādi vuttaṃ.

Pariññāvāraṇṇanā niṭṭhitā.

Saccayamakavaṇṇanā niṭṭhitā.

6. Saṅkhārayamakam

1. Paṇṇattivāraṇṇanā

1. Satipi kusalamūlādīnampi vibhattabhāve khandhādivibhāgo tato sātisayoti dassento “**khandhādayo viya pubbe avibhattā**”ti āha. Pakārattho vā ettha ādi-saddo “bhūvādayo”tiādīsu viyāti kusalamūlādīnampi saṅgho daṭṭhabbo. **Aviññātattā** nisāmentehi. Hetuattho vā ettha luttaniddiṭṭho aviññāpitattāti attho. Yadi kāsasaṅkhārānaṃ vikappadvayepi hetuphalabhāvoyeva icchito, sāmivacanaṃ rūpāvibhūto pana attheva atthabhedoti dassento “**kāyassa...pe... kattuatthe**”ti āha. **So panāti** kattuattho.

2-7. Suddhikaekapakadavasenati “kāyo saṅkhāro”tiādīsu dvīsu dvīsu padesu aññamaññaṃ asammissaekapakadavasena. **Atthābhāvato**ti yathādhīpetatthābhāvato. Aññathā karajakāyādiko attho attheva. Tenevāha “**padasodhana...pe... avacanīyattā**”ti. Idāni tameva atthābhāvaṃ byatirekavasena dassento “**yathā**”tiādimāha. Kasmā pana ubhayattha samāne samāsapadabhāve tattha attho labbhati, idha na labbhatīti? Bhinnalakkhaṇattā. Tattha hi rūpakkhandhādīpadāni samānādhikaraṇānīti padadvayādhiṭṭhāno eko attho labbhati, idha pana kāsasaṅkhārādīpadāni bhinnādhikaraṇānīti tathārūpo attho na labbhatīti. Tenāha “**yathādhīpetatthābhāvato**”ti.

Viṣuṃ adīpetvāti “kāyasaṅkhāro”tiādinā saha vuccamānopi kāsasaṅkhārasaddo viṣuṃ viṣuṃ attano atthaṃ ajotetvā ekaṃ atthaṃ yadi dīpetīti parikappavasena vadati. Tena kāsasaṅkhārasaddānaṃ samānādhikaraṇataṃ ullīngeti. “**Kāyasaṅkhārasaddo kāyasaṅkhāratthe vattamāno**”ti kasmā vuttaṃ, “saṅkhārasaddo saṅkhārattheva vattamāno”ti pana vattabbaṃ siyā. Evañhi sati khandhatthe vattamāno khandhasaddo viya rūpasaddena kāyasaddena visesitabboti idaṃ vacanaṃ yujjeyya, kāsasaṅkhārasaddānaṃ pana samānādhikaraṇatte na kevalaṃ saṅkhārasaddoyeva saṅkhāratthe vattati, atha kho kāyasaddopīti imamatthaṃ dassettaṃ “**kāyasaṅkhārasaddo kāyasaṅkhāratthe vattamāno**”ti vuttaṃ siyā, kāyasaddena samānādhikaraṇenāti adhippāyo. Byadhikaraṇena pana saṅkhārasa visesitabbatā atthevāti.

Imassa vārasāti suddhasaṅkhāravārassa. **Padasodhanena dassitānanti** ettakeva vuccamāne tattha

dassitabhāvasāmaññaena suddhakāyādīnampi gahaṇaṃ āpajjeyyāti taṃnivāraṇatthaṃ
“yathādhīppetānamevā”ti āha. **Kāyādīpadehi aggahitattā**ti suddhakāyādīpadehi aggahitattā. **Idha panā**ti aṭṭhakathāyaṃ. Suddhasaṅkhārāvāraṃ sandhāya vuttampi suddhasaṅkhārāvāramevettha ananujānanto sakalasaṅkhārayamakavisayanti āha **“idha pana saṅkhārayamake”**ti.
Adhippetatthapariccāgoti assāsapassāsādīkassa adhippetatthassa aggahaṇaṃ cetanākāyaabhisāṅkharāṇasaṅkhārādi **anadhippetatthapariggaho**. Yadi **“kāyo saṅkhāro”**tiādīnā suddhasaṅkhārataṃmūlacakkavārā atthābhāvato idha na gahetabbā, atha kasmā pavattivārameva anārabhitvā aññathā desanā āraddhāti āha **“padasodhanāvāratamūlacakkavārehī”**tiādi. **Samsayo hoti** saṅkhārasaddavacanīyatāsāmaññaato kāyasaṅkhārādīpadānaṃ byadhikaraṇabhāvato ca. Tenevāha **“asamānādhikaraṇehi...pe... dassitāyā”**ti.

Paṇṇattivāraṇaṇā niṭṭhitā.

2. Pavattivāraṇaṇā

19. Saṅkhārānaṃ puggalānañca okāsattāti sampayuttānaṃ nissayapaccayatāya, saṅkhārānaṃ samāpajjītatthāya puggalānaṃ jhānassa okāsatā veditabbā, bhūmi pana yadaggena puggalānaṃ okāso, tadaggena saṅkhārānaṃ okāso. **“Dutiye jhāne tatiye jhāne”**tiādīnā **jhānaṃ**, **“kāmāvacare rūpāvacare”**tiādīnā **bhūmi** ca viṣuṃ okāsabhāvena gahitā. **Itīti** hetuattho, yasmā jhānampi okāsabhāvena gahitaṃ, tasmāti attho. **Puggalavāre ca okāsavasena puggalaggahaṇeti** puggalavāre ca yadā puggalokāsasaṅkhārādīnaṃ okāsabhāvena gayhati, tadā tesam dvinnaṃ okāsānaṃ vasena gayhanaṃ hotīti yattha so puggalo, yañca tasmim puggale jhānaṃ upalabbhati, tesam dvinnaṃ bhūmijhānasāṅkhātānaṃ okāsānaṃ vasena yathārahaṃ kāyasaṅkhārādīnaṃ gahaṇaṃ kathanāṃ hotīti. **Tasmāti** yasmā etadeva, tasmā. **Dutiyatatiyajjhānokāsavasena**ti dutiyatatiyajjhānasāṅkhātāokāsavasena **gahitā**. Kathaṃ? **“Vinā vitakkavicārehi assāsapassāsānaṃ uppādakkhaṇe”**ti evaṃ gahitā **puggalā visesetvā dassitā**. Kena? Teneva vitakkavicārarahitaassāsapassāsūppādakkhaṇeṇāti yojetabbaṃ.

Paṭhamakoṭṭhāse jhānokāsavasena puggaladassanaṃ katanti vuttaṃ **“puna...pe... dasseti”**ti. Bhūmiokāsavasena puggalaṃ dasseti sambandho. **Dvipakārānanti** jhānabhūmiokāsabhedena duvidhānaṃ. **Tesanti** puggalānaṃ. **“Paṭhamaṃ jhānaṃ samāpannānaṃ kāmāvacarāna”**nti ca idaṃ nivattetabbagahetabbasādhāraṇavacanānaṃ, tassa ca avacchedakaṃ **“assāsapassāsānaṃ uppādakkhaṇe”**ti idanti vuttaṃ **“visesa...pe... khaṇe”**ti. **Tena** visesanena. **Kāmāvacarānaṃpi**ti **pi**-saddo sampiṇḍanatto. Tena na kevalaṃ rūpārūpāvacaresu paṭhamajjhānaṃ samāpannānaṃ, atha kho kāmāvacarānaṃpi vuttamevatthaṃ sampiṇḍeti. Kīdisānaṃ kāmāvacarānanti āha **“gabbhagatādīna”**nti. **Ādi**-saddena udakanimuggavisaññibhūtā saṅgahitā, na matacatutthajjhānasamāpannanīrodhasamāpannā. Te hi akāmāvacaratāya viya rūpārūpabhavasamaṅgino vitakkavicāruppattiyāva nivattitā. **Ekantikattā**ti assāsapassāsābhāvassa ekantikattā. **Nidassitā**ti rūpārūpāvacarā nidassanabhāvena vuttā, na tabbīrahitānaṃ aññesaṃ abhāvato adhippāyo. Paṭhamajjhānokāsā assāsapassāsāvīrahavisiṭṭhāti yojanā. Paṭhamañcetta paṭhamajjhānasamaṅgīnaṃ rūpārūpāvacarānaṃ gahaṇaṃ, dutiyaṃ yathāvuttāgabbhagatādīnaṃ. **Iminā nāyena**ti yvāyaṃ **“saṅkhārānaṃ puggalānañcā”**tiādīnā jhānokāsabhūmiokāsavasena puggalavibhāganayo vutto, iminā nāyena upāyena. **Sabbattha** sabbapucchāsu.

21. Etasmim pana atthe satīti yvāyaṃ uppattibhūmiyā jhānaṃ visesetvā attho vutto, etasmim atthe gayhamāne aññatthapi uppattibhūmiyā jhānaṃ visesitabbaṃ bhavēyya, tathā ca anīṭṭhaṃ āpajjātīti dassento **“catutthajjhāne”**tiādīmāha. Kiṃ pana taṃ anīṭṭhanti āha **“bhūmīnaṃ okāsabhāvasseva aggahitatāpattito”**ti. Yattha yattha hi jhānaṃ gayhati, tattha tattha taṃ uppattibhūmiyā visesitabbaṃ hoti. Tathā satī jhānokāsava gahito siyā, na bhūmiokāso guṇabhūtattā. Kiñca **“catutthajjhāne rūpāvacare arūpāvacare”**ti ettha rūpārūpabhūmiyā catutthajjhāne visesiyamāne tadekadesova okāsavasena gahito siyā, na sabbam catutthajjhānaṃ. Tenāha **“sabbacatutthajjhānassa okāsavasena aggahitatāpattito**

cā”ti. **Jhānabhūmiokāsānanti** jhānokāsabhūmiokāsānaṃ.

Nanu ca jhānabhūmiokāse asaṅkarato yojyamāne na sabbasmim paṭhamajjhānokāse kāyasāṅkhāro vacīsaṅkhāro ca atthi, tathā sabbasmim kāmāvacarokāseti codanuppattiṃ sandhāya tassa parihāraṃ vattaṃ **“yadipi”**tiādīmāha. **Tatthāti** paṭhamajjhānokāse kāmāvacarokāse ca. **Taṃdvayuppattī**ti tassa kāyavacīsaṅkhāradvayassa uppatti. Okāsadvayassa asaṅkarato gahaṇe ayaṅca guṇo laddho hotīti āha **“visuṃ...pe... na vattabbaṃ hoti”**ti. Tattha **aṅgamattavasena**ti vitakkādijhānaṅgamattavasena. Tattha vattabbaṃ aṭṭhakathāyaṃ vuttameva. Vitakkarahitopi vicāro vacīsaṅkhāroyevāti āha **“avitakka...pe... gacchati”**ti. **Muddhabhūtaṃ dutiyajjhānanti** catukkanaye dutiyajjhānamāha. Tañhi sakalakkhobhakaradhammavigamena vitakkekaṅgappahāyikato sātisayattā **“muddhabhūta”**nti vattabbaṃ labhati. **Asaññasattā viyāti** idaṃ visadisudāharaṇaṃ daṭṭhabbaṃ.

37. Āvajjanato pubbe pavattaṃ sabbam cittaṃ paṭisandhicittena samānagatikattā ekaṃ katvā vuttaṃ **“paṭhamato”**ti. Tenāha **“avitakkaavicārato”**tiādi. **Cittasaṅkhārassa ādidassanattanti** suddhāvāse cittasaṅkhārassa ādidassanattaṃ. Tathā **“vacīsaṅkhārassa ādidassanatta”**nti etthāpi.

Pavattivāraṇaṇā niṭṭhitā.

Saṅkhārayamakavaṇṇanā niṭṭhitā.

7. Anusayayamakam

Paricchedaparinuddesavāraṇaṇā

1. **“Avijjāsamudayā rūpasamudayo, taṇhāsamudayā rūpasamudayo, kammāsamudayā rūpasamudayo. Lobho nidānaṃ kammānaṃ samudayāyā”**ti ca evamādinā kusalamūlakusalādīnaṃ paccayabhāvo vuttoti āha **“paccayadīpakena mūlayamakenā”**ti. **“So ‘aniccaṃ rūpaṃ, aniccaṃ rūpa’**nti yathābhūtaṃ pajānāti. Cakkhu aniccaṃ, rūpā aniccā”ti ca ādinā bahulakhandhādīmukhena aniccānupassanādayo vihitāti vuttaṃ **“khandhādīsu tīraṇabāhullato”**ti. Kilesānaṃ samucchindanato paraṃ pahānakiccaṃ natthīti āha **“anusayapahānantā pahānapariññā”**ti. Yadi pi anusayehi sampayogato ārammaṇato vā pahānapariññā nappavattati, anusayābhāve pana tadārambho eva natthīti katvā vuttaṃ **“anusayehi pahānapariññaṃ vibhāvetu”**nti. **Anusayabhāvena labbhamānānanti** anusayabhāvena vijjāmānaṃ, anusayasabhāvānanti attho. **Tihākārehī**ti paricchedādīhi tīhi pakārehi. Anusayesu gaṇanasarūpappavattiṭṭhānato abodhitesu puggalokāsādivasena pavattiyamānā tabbisayā desanā na suviññeyyā hotīti dassento āha **“tesu tathā...pe... duravabodhattā”**ti.

Ettha purimesūti paduddhāro anantarassa vidhi paṭisedho vāti katvā sānusayavārādiapekkho, na anusayavārādiapekkho anusayavāre pālīvavattānassa pageva katattāti dassento **“etesu sānusayavārādīsu purimesūti attho”**ti āha. Sānusayavārādīsu hi tīsu purimesu okāsavāre yato tatoti desanā pavattā, na anusayavārādīsu. **Atthavisesābhāvatoti** **“kāmadhātuyā cutassā”**tiādinā (yama. 2.anusayayamaka.302) pālīgatapadassa, **“kāmadhātuṃ vā pana upapajjantassā”**tiādinā yamakabhāvena aṭṭhakathāādigatapadassa ca atthavisesābhāvato. **Kathamayaṃ yamakadesanā siyā** dutiyassa padassa abhāvatoti attho. Yadi nāyaṃ yamakadesanā, atha kasmā idhāgatāti āha **“purimavāre hī”**tiādi. Tattha **anusayaṭṭhānaparicchedadassananti** anusayaṭṭhānatāya paricchedadassanaṃ. Evampi kathamidaṃ anusayayamakam yamakadesanāsabbhāvatoti āha **“yamakadesanā...pe... nāmaṃ daṭṭhabba”**nti. **Atthavasena**ti paṭilomatthavasena. Paṭhamapadena hi vuttassa viparivattanavasena pi yamakadesanā hoti **“rūpaṃ rūpakkhandho, rūpakkhandho rūpa”**ntiādisu (yama. 1.kandhayamaka.2), tattha pana atthaviseso atthi, idha natthi, tasmā na tathā desanā katāti dassento āha **“atthavisesābhāvato pana na vuttā”**ti. **Labbhamānatāvasena**ti pucchāya labbhamānatāvasena.

Uppattiarahataṃ dassetiti iminā nippariyāyena anusayā anāgatāti dassitaṃ hoti yato te

maggavajjhā, na ca atītapaccuppannā uppattirahāti vuccanti uppannattā. Yaṃsabhāvā pana dhammā anāgatā anusayāti vuccanti, taṃsabhāvā eva te atītapaccuppannā vuttā. Na hi dhammānaṃ addhābhedenā sabhāvabhedo atthi, tasmā anusayānaṃ atītapaccuppannabhāvā pariyāyato labbhantīti **aṭṭhakathāyaṃ** (yama. aṭṭha. anusayayamaka 1) “atītopi hotī”tiādi vuttaṃ. **Evampakārāti** anusayappakārā, kāraṇalābhe sati uppajjanārahāicceva attho. **So evampakāro** uppajjanavāre **uppajjati-saddena gahito** uppajjanārahātāya avicchinabhāvādīpanatthanti adhippāyo. Tenāha “**na khandhayamakādīsu viya uppajjamānatā**”ti, paccuppannatāti attho. **Tenevātiadinā** yathāvuttamatthaṃ pākāṭataraṃ karoti. Tattha **ninnānākaraṇoti** nibbiseso. Uppajjanānusayānaṃ ninnānākaraṇattā eva hi “etthesā taṇhā uppajjamānā uppajjati, ettha nivisaṃānā nivisati”ti **vibhaṅge** (vibha. 203) āgataṃ. Anusayanañhi ettha nivisananti adhippettaṃ.

Idāni yena pariyāyena atītapaccuppannesu anusayavohāro, taṃ dassetukāmo anāgatampi tehi saddhiṃ ekajjhaṃ katvā dassento “**anurūpaṃ kāraṇaṃ pana...pe... vuccantī**”ti āha. Etena bhūtapubbagatiyā atītapaccuppannesu uppattirahatā veditabbāti dasseti. Uppattirahatā nāma kilesānaṃ maggena asamucchinnatāya veditabbā. Sā ca atītapaccuppannesupi atthevāti pakārantarenapi tesam pariyāyatova anusayabhāvam pakāseti. Tenevāha “**maggassa panā**”tiādi. **Tādisānanti** ye maggabhāvanāya asati uppattirahā, tādisānaṃ. **Dhammo eva ca uppajjati**, na dhammākāroti adhippāyo. Na hi dhammākārā aniccatādayo uppajjantīti vuccanti. Yadi pana te uppādādisamaṅgino siyūṃ, dhammā eva siyūṃ. Tena vuttaṃ “appahīnākāro ca uppajjatīti vuttuṃ na yujjati”ti.

Vuttampi thāmagamaṇaṃ aggahetvā appahīnaṭṭhamattameva gahetvā codako codeṭṭi dassento āha “**sattānusaya...pe... āpajjatīti ce**”ti. Na hi thāmagamaṇe gahite codanāya okāso atthi. Tenāha “**nāpajjati**”tiādi. Vuttaṃ aṭṭhakathāyaṃ, na kevalamaṭṭhakathāyameva pāṭhagatovāyamattho, tasmā evameva gahettabboti dassento “**thāmagato...pe... yutta**”nti vatvā kiṃ pana taṃ thāmagamaṇanti parāsāṅkaṃ nivattento “**thāmagatanti ca...pe... vuttā**”ti āha. Tattha **aññehi asādhāraṇoti** kilesavatthuādīnaṃ kilesatādisabhāvo viya kāmarāgādito aññattha alabbhamāno tesamyeva āveṇiko sabhāvo, yato te bhavabījjaṃ bhavamūlanti ca vuccanti. Yasmā ca thāmagamaṇaṃ tesam anaññasādhāraṇo sabhāvo, tasmā anusayanaṃti vuttaṃ hotīti dassento “**thāmagatoti anusayasamaṅgīti attho**”ti āha.

“Yassa kāmarāgānusayo anuseti, tassa paṭighānusayo anusetīti? Āmantā”tiādinā (yama. 2.anusayayamaka.3) anusayavāre vutto eva attho “yassa kāmarāgānusayo uppajjati, tassa paṭighānusayo uppajjatīti? Āmantā”tiādinā (yama. 2.anusayayamaka.300) vuttoti anusayanākāro eva uppajjanavāre uppajjati-saddena gahitoti “uppajjanavāro anusayavārena ninnānākaraṇo vibhatto”ti yaṃ vuttaṃ, tattha vicāraṃ ārabhati “**anusayauppajjanavārānaṃ samānagatikattā**”tiādinā. “**Uppajjati**”ti **vacanaṃ siyāti** uppajjanavāre “uppajjati”ti vacanaṃ appahīnākārādīpakaṃ siyā. Tathā ca sati yathā “imassa uppādā”ti ettha imassa anirodhāti ayamatthopi ñāyati, evaṃ “uppajjati”ti vutte atthato “na uppajjati”ti ayamattho vutto hoti appahīnākārassa uppattirahabhāvassa anuppajjamānasabhāvattāti codanaṃ dassento “**uppajjatīti vacanassa avuttatā na sakkā vuttanti ce**”ti āha. **Vacanaṭṭhaviseseṇa taṃdvayassa vuttattāti** etena dhammanānattābhāvepi padaṭṭhanānattāna vārantaradesanā hoti yathā sahaṃjātasamaṣaṭṭhavāresūti dasseti. **Anurūpaṃ kāraṇaṃ labhitvāti**tiādi tameva vacanaṭṭhaviseseṇa vibhāvetuṃ āradhamaṃ. **Uppattiyogganti** uppattiyā yoggam, uppajjanasabhāgatanti attho. Yato anusayā uppattirahāti vuccanti, ekantena cetadeva sampaṭicchitabbam “yassa kāmarāgānusayo uppajjati, tassa paṭighānusayo uppajjatīti? Āmantā”tiādivacanaṭṭhato (yama. 2.anusayayamaka.300). “Anusetīti anusayā”ti ettake vutte sadā vijjamānā nu kho te apariniṭṭhannānusayanaṭṭhena “anusayā”ti vuccantīti ayamattho āpajjatīti taṃnisedhanaṭṭhaṃ “**anurūpaṃ kāraṇaṃ labhitvā uppajjantīti**”ti vuttaṃ. Uppattirahabhāvena thāmagatā anusayaṭṭhoti yaṃ tesam uppattiyogavacanaṃ vuttaṃ, taṃ sammadeva vuttanti imamatthamāha “**anusayasaddassā**”tiādinā. Tena vāradvayadesanuppādikā anusayasaddatthaniddhāraṇāti dasseti. **Tampi suvuttameva iminā tantippamaṇenāti** idampi “abhidhamme tāvā”tiādinā āgataṃ tividhameva tantim sandhāyāhāti dassento āha “**tantittayenapi hi cittasampayuttatā dīpitā hotī**”ti.

Paricchedaparicchinuddesavāraṇṇanā niṭṭhitā.

Uppattiṭṭhānavāraṇṇanā

2. **Evam satīti** vedanānaṃ viśesitabbabhāve kāmādhātuyā ca viśesanabhāve sati. **Kāmādhātuyā anusayanaṭṭhānatā na vuttā hoti** appadhānabhāvato, padhānāppadhānesu padhāne kiccadassanato, viśesanabhāvena caritabbatāya cāti adhippāyo. Hotu ko dosoti kadāci vadeyyāti āsaṅkamāno āha “**dvīsu panā**”tiādi. **Dvīsu**ti niddhāraṇe bhummaṃ, tathā “**tīsu dhātūsū**”ti etthāpi. **Tasmāti** yasmā dhātuādibhedena tividhaṃ anusayaṭṭhānaṃ, tattha ca rūpārūpadhātūnaṃ bhavarāgassa anusayaṭṭhānatā vuttāti kāmādhātuyā kāmāgassa anusayaṭṭhānatā ekantena vattabbā, tasmā. **Tīsu dhātūsū tīsu vedanāsūti** ca niddhāraṇe bhummaṃ, **kāmādhātuyā dvīsu vedanāsūti** ca ādhāre.

Dvīsvevāti dvīsu sukhopekkhāsu eva. **Sabbāsu dvīsu**ti yāsu kāsuci dvīsu. **Tenāti** “kāmāgō dvīsu vedanāsu anuseti”ti vacanasāmatthiyaladdhena viśesanicchayeneva. **Bhavarāgānusayaṭṭhānaṃ** rūpārūpadhātuyo tadanurūpā ca vedanā. Na hi dvīsu vedanāsu kāmāgānusayo anusetīti avadhāraṇaṃ icchitaṃ, dvīsu eva pana vedanāsūti icchitaṃ. Tenevāha “**dvīsveva anuseti, na tīsū**”ti. **Aṭṭhānañca** anusayānaṃ, kiṃ taṃ aparīyāpannaṃ sakkāye? Sabbo lokuttaro dhammo. **Ca**-saddena paṭighānusayaṭṭhānaṃ saṅgaṇhāti. Tena vuttaṃ “**yathā cā**”tiādi. **Aññāti** kāmāgānusayaṭṭhānabhūtā dve vedanā.

Aññesu dvīhi vedanāhi vip̐payuttesu. **Piyarūpasātarūpesūti** piyāyitabbamadhurasabhāvesu. Viśesanañcetaṃ rūpādīnaṃ sabbadvārasabbapurisesu iṭṭhabhāvassa aniyatatāya kataṃ. **Sātasantasukhagiddhiyāti** sātasukhe santasukhe ca giṭṭhanākārena abhikaṅkhanākārena. Tattha sātasukhaṃ kāyikaṃ, santasukhaṃ cetasikaṃ. Sātasukhaṃ vā kāyikasukhaṃ, santasukhaṃ upekkhāsukhaṃ. Tathā cāhu “upekkhā pana santattā, sukhamicceva bhāsītā”ti (visuddhi. 2.644; mahāni. aṭṭha. 27). Parittaṃ vā oḷārikaṃ sukhaṃ sātasukhaṃ, anoḷārikaṃ santasukhaṃ. Parittaggahaṇaṅcetta kāmāgānusayassa adhippetattā. **Aññatthāti** vedanāhi aññattha. **Soti** kāmāgānusayo. **Vedanāsu anugato hutvā seṭīti** vedanāpekkho eva hutvā pavattati yathā puttāpekkhāya dhātiyā anuggaṇhanappavatti, sayanasāṅkhātā pavatti ca kāmāgassa nikāmanameva. Tenāha “**sukhamicceva abhilapātī**”ti. Yathā tassa, evaṃ paṭighānusayādīnampi vuttaniyāmena yathāsakaṃ kiccakaraṇameva dukkhavedanādīsu anusayanaṃ daṭṭhabbaṃ. Tena vuttaṃ “**evaṃ paṭighānusayo cā**”tiādi. **Tīsu vedanāsu anusayanaṭṭhānatā** tīsu vedanāsu yathārahaṃ anusayanaṭṭhānena. **Iṭṭhādibhāvena gahitesūti** iṭṭhādīsu ārammaṇapakatiyā vasena iṭṭhādibhāvena gahitesu viparītasaññāya vasena aniṭṭhādīsu iṭṭhādibhāvena gahitesūti yojanā. Na hi iṭṭhādibhāvena gahaṇaṃ viparītasaññā.

Tatthāti iṭṭhārammaṇādīsu. **Etthāti** anusayane. **Kāmassādādivatthubhūtānaṃ kāmabhavādīnanti** kāmassādabhavassādavatthubhūtānaṃ kāmārūpārūpabhavānaṃ gahaṇaṃ veditabbanti yojanā. **Tatthāti** vedanāttayadhātuttayesu. Niddhāraṇe cetaṃ bhummaṃ. **Dukkhaṭṭhāto** dukkhe anabhirati. **Yattha tatthāti** dukkhavedanāya taṃsampayuttesu aniṭṭharūpādīsu vāti yattha tattha. Mahaggaṭā upādinnakkhandhā **rūpārūpabhavā**, anupādinnakkhandhā **rūpārūpāvacaradhammā**. **Tatthāti** yathāvuttesu mahaggaṭadhammesu bhavarāgoicceva veditabbo. Tena vuttaṃ “**rūpadhātuyā arūpadhātuyā ettha kāmāgānusayo nānuseti**”ti. **Diṭṭhānusayādīnanti ādi**-saddena vicikicchānusayaavijjānusayādīnaṃ saṅgaho daṭṭhabbo.

Dhātuttayavedanāttayavinimuttaṃ diṭṭhānusayādīnaṃ anusayanaṭṭhānaṃ na vuttanti suvuttametaṃ diṭṭhānusayādīnaṃ uppattiṭṭhānapucchāyaṃ “sabbasakkāyaparīyāpannesu dhammesu”icceva viśajjittatā. Kāmāgō pana yattha nānuseti, taṃ dukkhavedanārūpārūpadhātuviniṃmuttaṃ diṭṭhānusayādīnaṃ anusayanaṭṭhānaṃ atthīti dassetaṃ “**nanu cā**”tiādi āraddhaṃ. Tattha **tadanusayanaṭṭhānatoti** tassa kāmāgānusayassa anusayanaṭṭhānato. **Aññā** nekkhammassitasomanassupekkhāsāṅkhātā. Ayamettha saṅkhepattho – nekkhammassitadomanasse viya

paṭighānusayo nekkhammassitasomanassupekkhāsu kāmarāgānusayo nānusetīti “yattha kāmarāgānusayo nānuseti, tattha diṭṭhānusayo nānusetī”ti sakkā vuttanti tasmā taṃ uddharitvā na vuttanti. **Hontūti** tāsama vedanānaṃ atthitaṃ paṭijānitvā uddharitvā avacanassa kāraṇaṃ dassento āha “**na pana...pe... taṃ na vutta**”nti. **Tadanusayanaṭṭhānanti** tesama diṭṭhānusayādīnaṃ anusayanaṭṭhānaṃ. **Tasmāti** yasmā satipi kāmarāgānusayanaṭṭhānato aññasmiṃ diṭṭhānusayādīnaṃ anusayanaṭṭhāne taṃ pana dhātuttayavedanāttayavinimuttaṃ natthi vedanādvayabhāvato, tasmā. **Taṃ** vedanādvayaṃ **na vuttaṃ** visuṃ na uddhaṅgati attho. **Tasmāti** yasmā “yattha kāmarāgādayo nānuseti, tattha diṭṭhivicikicchā nānusetī”ti ayamatto “āmantā”ti iminā paṭivacanavissajjanaena avibhāgato vuttoti “yattha kāmarāgādayo anuseti, tattha diṭṭhivicikicchā anusetī”ti ayampi attho avibhāgato labbhati, tasmā. Avibhāgato ca dukkhaṃ paṭighassa anusayanaṭṭhānanti dīpitaṃ hoti. Tenāha “**avisesena...pe... veditabba**”nti. Tattha **avisesenāti** gehassitaṃ nekkhammassitanti visesaṃ akatvā. **Samudāyavasena gahetvāti** yathāvuttaavayavānaṃ samūhavasena dukkhantveva gahetvā. “Avisesena samudāyavasena gahetvā”ti imamatthaṃ **tathā**-saddena anukaḍḍhati “dvīsu vedanāsū”ti etthāpi gehassitādivibhāgassa anicchitattā.

Yadi evaṃ “paṭighaṃ tena pajahati, na tattha paṭighānusayo anusetī”ti idaṃ suttapadaṃ kathanti codanaṃ sandhāya “**apicā**”tiādi vuttaṃ. **Tatthāti** tasmim domanasse, taṃsampayutte vā paṭighe. **Nekkhmassitaṃ domanassanti**ādīnā neyyatthamidaṃ suttaṃ, na nītatthanti dasseti. Yathā pana suttaṃ udāhaṅgaṃ, tathā idha kasmā na vuttanti āha “**paṭighuppattirahaṭṭhānatāyā**”tiādi. Evampi suttabhidhammapāṭhānaṃ kathamavirodhoti āha **nippariyāyadesanā hesā, sā pana pariyāyadesanāti**. **Evañca katvāti** pariyāyadesanattā eva. **Rāgānusayoti** kāmarāgānusayo adhippeto. Yato “anāgāmiṃ maggena samugghānaṃ sandhāyā”ti vuttaṃ, tasmā tassa na mahaggatadhammā anusayanaṭṭhānanti taṃ paṭhamajjhānañca anāmasitvā “**na hi lokiyā...pe... nānusetīti sakkā vattu**”nti vuttaṃ. **Avatthubhāvato**ti sabhāveneva anuppattiṭṭhānatā. **Idhāti** imasmim anusayayamaṃ. **Vuttanayenāti** “nekkhammassitaṃ domanassaṃ uppādetvā”tiādīnā vuttana nayena. **Taṃpaṭipakkhabhāvato**ti tesama paṭighādīnaṃ paṭipakkhassa maggassa sabbhāvato. Na kevalaṃ maggasabbhāvato, atha kho balavavipassanāsabbhāvatoṭṭi dassento āha “**taṃsamugghā...pe... bhāvato cā**”ti.

Idāni yadetaṃ tattha tattha “anusayanaṭṭhāna”nti vuttaṃ, taṃ gahetabbadhammavasena vā siyā gahaṇavisesena vāti dve vikappā, tesu paṭhamamaṃ sandhāyāha “**ārammaṇe anusayanaṭṭhāne sati**”ti. Rūpādiārammaṇe anusayānaṃ anusayanaṭṭhānanti gayhamāne yamatthaṃ sandhāya “na sakkā vattu”nti vuttaṃ, taṃ dassetuṃ “**dukkhāya hī**”tiādimāha. **Yadi siyāti** yadi kāmarāgānusayo siyā. **Etassapīti** diṭṭhānusayasampayuttalobhassapi “sabbasakkāyapariyāpannesu dhammesū”ti kāmarāgassa ṭhānaṃ vattabbaṃ siyā, na ca vuttaṃ. **Atha panāti**ādi dutiyavikappaṃ sandhāya vuttaṃ. **Ajjhāsaya**vasena **taṃninnatāyāti** asatipi ārammaṇakaraṇe yattha kāmarāgādayo ajjhāsayaṃ ninnā, taṃ tesama anusayanaṭṭhānaṃ. Tena vuttaṃ “anugato hutvā setī”ti. Atha pana vuttanti sambandho. **Yathāti**ādi yathāvuttassa atthassa udāharaṇavasena nirūpanaṃ. **Dukkhe paṭihaññanavaseneva pavattati**, nārammaṇakaraṇavasenāti adhippāyo. **Dukkhomeva tassa anusayanaṭṭhānaṃ vuttanti** ajjhāsayaṃ tattha ninnattā dukkhomeva tassa paṭighassa anusayanaṭṭhānaṃ vuttaṃ, **nālambitaṃ** rūpādi sukhavedanā cāti adhippāyo. **Evanti** yathā aññārammaṇassapi paṭighassa ajjhāsayaṃ dukkhaninnatāya dukkhomeva anusayanaṭṭhānaṃ vuttaṃ, evaṃ. **Dukkhadīsu...pe... vuttanti** “dukkhena sukhaṃ adhigantabbaṃ. Natthi dinna”nti ca ādinā kāyakilamanadukkhe dānānubhāvādike ca micchābhinivesanavasena uppajjamānena diṭṭhānusayena sampayutto aññārammaṇopi lobho “evaṃ sukhaṃ bhavissati”ti ajjhāsayaṃ sukhābhisaṅgavaseneva pavattatīti sukhupekkhābhedamaṃ sātasantasukhadvayaṃ assa lobhassa anusayanaṭṭhānaṃ vuttaṃ pāḷiyaṃ, na yathāvuttaṃ dukkhādi, tasmā **bhavarāga...pe... na virujjhati**. **Ekasmimyeva cāti**ādi dutiyavikappaṃyeva upabrūhanatthaṃ vuttaṃ. Tattha rāgassa sukhajjhāsayaṃ taṃsamaṅgino puggalassa vasena veditabbā, tanninnabhāvena vā cakkhussa visamajjhāsayaṃ viya. Esa nayo sesesupi. **Tesama** rāgapaṭighānaṃ **nānānusayaṭṭhānatā hoti** ekasmimipi ārammaṇeti attho.

Evañca katvāti asatipi gahetabbabhede gahaṇavisesena anusayanaṭṭhānassa bhinnattā eva. “**Yattha...pe... no**”ti vuttam, aññathā virujjheyya. Gahetabbabhedena hi rāgapatiṅghānaṃ anusayanaṭṭhānabhede gayhamāne vipākamatte ṭhātabbaṃ siyā, na ca taṃ yuttam, napi sabbesaṃ purisadvārānaṃ iṭṭhāniṭṭhaṃ niyatanti. Yadiipi yathāvuttalobhassa vuttanayena kāmarāgānusayatā sambhavati, yathā pana sukhupekkhāsu iṭṭhārammaṇe ca uppajjantena domanassena saha pavatto doso dubbalabhāvena paṭiṅghānusayo na hoti, evaṃ yathāvuttalobhopi kāmarāgānusayo na hotīti imamattam dassetuṃ “**aṭṭhakathāyaṃ panā**”tiādi vuttam. **Na paṭiṅghānusayoti** ettha **na-kāro** paṭisedhanattho, na aññattho, itarattha pana sambhavo eva natthīti dassento “**yaṃ paneta**”ntiādimāha. Tattha “**na hi domanassassa paṭiṅghānusayabhāvāsāṅkā atthi**”ti iminā **na-kārassa** aññatthatābhāvadassanamukhena abhāvattatam samattheti.

Desanā saṃkiṇṇā viya bhaveyyāti ettha desanāsankaram dassetuṃ “**bhavarāgassapi...pe... bhaveyyā**”ti vuttam. Tassattho – yathā kāmarāgassa kāmadhātuyā dvīsu vedanāsu ārammaṇakaraṇavasena uppatti vuttā “kāmarāgo kāmadhātuyā dvīsu vedanāsu anuseti”ti, evaṃ yadi “bhavarāgo kāmadhātuyā dvīsu vedanāsu anuseti”ti vucceyya, bhavarāgassapi...pe... bhaveyya. Tato ca kāmarāgena saddhiṃ bhavarāgassa desanā saṃkiṇṇā bhaveyya, kāmarāgato ca bhavarāgassa viseso dassetabbo. So ca sahaṭṭhānusayavasena na sakkā dassetunti ārammaṇakaraṇavasena dassetabbo. Tena vuttam “**tasmā ārammaṇa...pe... adhippāyo**”ti. Tattha **ārammaṇavisesenāti** rūpārūpadhātusaṅkhātāārammaṇavisesena. **Visesadassanatthanti** kāmarāgato bhavarāgassa visesadassanattham. **Evaṃ desanā katāti** “rūpadhātuyā arūpadhātuyā ettha bhavarāgānusayo anuseti”ti evaṃ visaye bhummaṃ katvā desanā katā. Tenāha “**sahajātavedanāvisesābhāvato**”ti.

Uppattiṭṭhānavāraṇṇanā niṭṭhitā.

Mahāvāro

1. Anusayavāraṇṇanā

3. Pavattāvirāmvasenenāti anusayappavattiyā avirāmvasena, avicchedavasenāti attho. Kathaṃ pana kusalābyākatacittakkhaṇe anusayānaṃ pavattīti āha “**maggeneva...pe... pubbe**”ti.

20. Cittacetasiṅkānañca ṭhānaṃ nāma cittuppādoti āha “**ekasmiṃ cittuppāde**”ti. **Tesaṃ tesaṃ puggalānanti** puthujjanādīnaṃ puggalānaṃ. **Pakatiyā** sabhāvena. Sabhāvasiddhā hi dukkhāya vedanāya kāmarāgassa ananusayanaṭṭhānatā. Evaṃ sesesupi yathārahaṃ vattabbaṃ. Vakkhati hi “pakatiyā dukkhādīnaṃ kāmarāgādīnaṃ ananusayanaṭṭhānatam sandhāya vutta”nti. **Pahānenāti** tassa tassa anusayassa samucchindanena. **Tiṇṇam puggalānanti** puthujjanasotāpannasakadāgāmīnaṃ. **Dvinnam puggalānanti** anāgāmiarahantānaṃ. **Etthāti** etasmiṃ puggalokāsavāre. **Purimanayeti** “tiṇṇam puggalāna”ntiādike purimasmim viṣṭajjananaye. **Okāsanti** uppattiṭṭhānaṃ, idha pana dukkhavedanā veditabbā. **Pacchimanayeti** “dvinnam puggalāna”ntiādike viṣṭajjananaye. **Anokāsati** ananusayanaṭṭhānatā.

Anusayavāraṇṇanā niṭṭhitā.

2. Sānusayavāraṇṇanā

66-131. “**Sānusayo, pajahati, pariṅgānāti**”ti puggalo vuttoti “kāmarāgena sānusayo, kāmarāgaṃ pajahati, kāmarāgaṃ pariṅgānāti”tiādīsu anusayasamaṅgibhāvena pahānapariṅgānāyā kattubhāvena ca puggalo vutto, na dhammo. **Bhavavisesena vāti** kevalena bhavavisesena vā. **Itaresūti** paṭiṅghānusayādīsu. **Bhāvānusayavisesena vāti** kāmabhavādibhavavisiṭṭhānusayavisesena vā. **Sānusayatāniranusayatādikāti** ettha **ādi-saddena** pahānapariṅgānāyā saṅgayhanti. Nanu ca bhavavisesa kesañci anusayānaṃ appahānanti? Na taṃ anusayakataṃ, atha kho paccayavekallato

anokāsātāya cāti nāyaṃ virodho. **Dvīsu vedanāsūti** sukhaupekkhāsu vedanāsu dukkhāya vedanāya kāmarāgānusayena niranusayoti yojetabbaṃ. **Idampi natthi** puggalavasena vuccamānattā. Tenāha “**na hi puggalassa...pe... anusayāna**”nti. Yadihi puggalassa anusayanokāso anokāso, tassa pana sānusayatādihetu hotīti dassento “**anusayassa panā**”tiādimāha. **Niranusayatādīnanti ādi**-saddena appahānāpariññā saṅgaṇhāti. **Parijānaṃ** samatikkamananti pariññāvārepi “apādāne nissakkavacana”nti vuttaṃ.

Anusayanaṭṭhānatoti anusayanaṭṭhānāhetu. “**Ananusayanaṭṭhānato**”ti etthāpi eseva nayo. **Nimittāpādānabhāvadassanattanti** sānusayavāre nimittabhāvadassanattamaṃ, pajahanapariññāvāresu apādānabhāvadassanattāñcāti yojetabbaṃ. **Pajahatīti** ettha “rūpadhātuyā arūpadhātuyā tato mānānusayaṃ pajahati”ti pālīpadaṃ āharitvā yojetabbaṃ, **na pajahatīti** ettha pana “dukkhāya vedanāya tato kāmarāgānusayaṃ nappajahati”ti. **Evamādīsūti ādi**-saddena pariññāvārepi saṅgaṇhāti. **Bhummaniddeseneva** hetuattheneva niddiṭṭhāti attho.

Catutthapañhavissajjanenāti “yato vā pana mānānusayena sānusayo, tato kāmarāgānusayena sānusayo”ti etassa pañhassa vissajjanena. Tattha hi “rūpadhātuyā arūpadhātuyā”tiādinā sarūpato anusayanaṭṭhānāni dassitāni. **Tadattheti** taṃ anusayanaṭṭhānadassanaṃ attho etassāti tadattho, tasmim tadatthe. “Anusayassa uppattiṭṭhānadassanattamaṃ ayaṃ vāro āraddho”tiādinā “yato”ti etena **anusayanaṭṭhānaṃ vuttanti imamatthaṃ vibhāvetvā. Pamādalikhitaṃ viya dissati** uppanna-saddena vattamānuppanne vuccamāne. Yathā pana uppajjanavāre uppajjati-saddena uppattiyogadīpakattā uppattirahā vuccanti, evamidhāpi uppattirahe vuccamāne na koci virodho. Yaṃ pana vakkhati “na hi apariyāpannānaṃ anusayuppattirahaṭṭhānatā”ti, sopi na doso. Yattha yattha hi anusayā uppattirahā, tadeva ekajjhaṃ gahetvā “sabbatthā”ti vuttanti. **Tatheva dissatīti** taṃ pamādalikhitaṃ viya dissatīti attho.

Yato uppannena bhavitabbanti yato anusayanaṭṭhānato kāmagārānusayena uppannena bhavitabbaṃ, tena kāmarāgānusayena uppattirahaṭṭhāne nissakkavacanaṃ kataṃ “yato”ti. **Tathāti** ettha **tathā**-saddo yathā “yato uppannā”ti ettha uppattirahaṭṭhānato anusayassa uppattirahatā vuttā, tathā “uppajjanakenā”ti etthāpi sā eva vuccatīti dīpetīti āha “**sabbadhammesu...pe... āpannā**”ti. Tattha “uppajjanako”ti vutte anuppajjanako na hotīti ayamatto viññāyati, tathā ca sati tena anuppatti nicchitāti uppannasabhāvatā ca pakāsītā hotīti. Tenāha “**sabbadhammesu...pe... apanetī**”ti. “Yo yato kāmarāgānusayena niranusayo, so tato mānānusayena niranusayo”ti pucchāya “yato tato”ti āgatattā vissajjane “sabbatthā”ti padassa nissakkavaseneva sakkā yojetunti dassento “**sabbatthāti...pe... na na sambhavatī**”ti āha. **Bhummato aññatthāpi saddavidū icchanti**, yato sabbesaṃ pādakaṃ “sabbatthapādaka”nti vuccati, idha pana nissakkavasena veditabbaṃ.

Sānusayavāraṇṇanā niṭṭhitā.

3. Pajahanavāraṇṇanā

132-197. Appajahanasabbhāvāti appahānassa, appahīyamānassa vā sabbhāvā. **Tasmāti** yasmā yo kāmarāgānusayaṃ pajahati, na so mānānusayaṃ niravasesato pajahati, yo ca mānānusayaṃ niravasesato pajahati, na so kāmarāgānusayaṃ pajahati pageva pahīnattā, tasmā “yo vā pana mānānusayaṃ pajahati, so kāmarāgānusayaṃ pajahatīti? No”ti vuttanti veditabbaṃ. Yadi evaṃ paṭhamapucchāyaṃ kathanti āha “**yasmā pana...pe... vutta**”nti. Tattha **pahānakaraṇamattamevāti** pahānakiriyāsambhavamattameva, na niravasesappahānanti adhippāyo. **Te ṭhapetvāti** diṭṭhivicikicchānusayādīnaṃ niravasesappajahanake aṭṭhamakādike ṭhapetvā. **Avasesāti** tassa tassa anusayassa niravasesappajahanakehi avasiṭṭhā. Tesu yesaṃ ekacce anusayā pahīnā, tepi **appajahanasabbhāveneva nappajahantīti vuttā. Na ca yathāvijjamānenāti** maggakiccabhāvena vijjamānappakārena pahānena vajjitā rahitā eva vuttāti yojanā.

Kesañcīti sotāpannasakadāgāmimaggasamaṅgisakadāgāmīnaṃ. Puna **kesañcī**ti anāgāmiaggamaggasamaṅgiarahantānaṃ. **Ubhayanti** kāmarāgavicikicchānusayadvayaṃ. **Sesānanti** “sesā”ti vuttānaṃ yathāvuttapuggalānaṃ. **Tesanti** vuttappakārānaṃ dvinnaṃ anusayānaṃ. **Ubhayāppajahanassā**ti kāmarāgavicikicchānusayāppajahanassa. **Kāraṇaṃ na hotīti** yesaṃ vicikicchānusayo pahīno, tesam tassa pahīnatā, yesaṃ yathāvuttaṃ ubhayappahīnaṃ, tesam tadappajahanassa kāraṇaṃ na hotīti attho. Tenāha “**tesaṃ pahīnattā ‘nappajahantī’**ti na **sakkā vattu**”nti. Atha pana na tattha kāraṇaṃ vuttaṃ, yena kāraṇavacanena yathāvuttadosāpatti siyā, kevalaṃ pana sanniṭṭhānena tesaṃ puggalānaṃ gahitatādassanattaṃ vuttaṃ “**kāmarāgānusayañca nappajahantī**”ti, evampi pucchitassa saṃsayatthassa kāraṇaṃ vattabbaṃ. Tathā ca sati “sesapuggalā tassa anusayassa pahīnattā nappajahantī”ti kāraṇaṃ vattabbamevāti codanaṃ sandhāyāha “**na vattabba**”ntiādi. Tattha **na vattabbanti** vuttanayena kāraṇaṃ na vattabbaṃ kāraṇabhāvasseva abhāvato. “Ubhayāppajahanassa kāraṇaṃ na hotī”ti vuttaṃ, yathā pana vattabbaṃ, taṃ dassetuṃ “**yo kāmarāgānusayaṃ...pe... vattabbattā**”ti āha. Tena pahīnāppahīnavasena kāraṇaṃ na vattabbaṃ, pahīnānaṃyeva pana vasena vattabbanti dasseti. **Saṃsayatthasaṅgahiteti** saṃsayatthena padena saṅgahite. Sanniṭṭhānapadasaṅgahitaṃ pana pahīyamānattā “nappajahatī”ti na sakkā vattunti.

Pajahanavāraṇṇanā niṭṭhitā.

5. Pahīnavāraṇṇanā

264-274. Phalaṭṭhavaseneva desanā āradhā, na maggaṭṭhavasena, kuto puthujjanavasena. Kasmā? Phalakkhaṇe hi anusayā pahīnāti vuccanti, maggakkhaṇe pana pahīyantīti. Tenevāha “**maggasamaṅgīnaṃ aggahitataṃ dīpeti**”ti. **Paṭilome hi puthujjanavasenapi desanā gahitā** “yassa dīṭṭhānusayo appahīno, tassa vicikicchānusayo appahīnoti? Āmantā”tiādinā. **Anusayaccantapaṭipakkhekacittakkhaṇikānanti** anusayānaṃ accantaṃ paṭipakkhabhūtaekacittakkhaṇikānaṃ. **Maggasamaṅgīnanti** maggaṭṭhānaṃ. Ettha ca anusayānaṃ accantapaṭipakkhatāggahaṇena uppattirahataṃ paṭikkhipati. Na hi te accantapaṭipakkhasamuppattito parato uppattirahā honti. Maggasamaṅgitāggahaṇena anuppattirahatāpāditataṃ paṭikkhipati. Na hi maggakkhaṇe te anuppattirahataṃ āpādītā nāma honti, atha kho āpādīyantīti. Ekacittakkhaṇikatāggahaṇena santānabyāpāraṃ. Tenāha “**na kocī**”tiādi. Tattha **teti** maggasamaṅgino. Na kevalaṃ pahīnavāreyeva, atha kho aññesupīti dassento “**anusaya...pe... gahitā**”ti āha.

275-296. Yattha anusayo uppattiraho, tatthevassa anuppattirahatāpādananti “**attano attano okāse eva anuppattidhammataṃ āpādito**”ti āha. Tathā hi vuttaṃ “cakkhuṃ loke piyarūpaṃ sātārūpaṃ, etthesā taṇhā uppajjamānā uppajjati, ettha nivisamānā nivisatī”ti (vibha. 203) vatvā puna vuttaṃ “cakkhuṃ loke piyarūpaṃ sātārūpaṃ, etthesā taṇhā pahīyamānā pahīyati, ettha nirujjhamānā nirujjhatī”ti (vibha. 204). **Tasmāti** yasmā tadokāsattameva kāmādhātuādiokāsattameva anusayānaṃ dīpentī pahīnāppahīnavacanāni, tasmā. **Anokāse tadubhayāvattabbatā vuttāti** yasmā kāmarāgapaṭiḅhānusayānaṃ dvinnaṃ uppattiṭṭhānaṃ, so eva pahānokāsoti svāyaṃ tesaṃ aññamaññaṃ anokāso, tasmim anokāse tadubhayassa pahānāppahānassa navattabbatā vuttā. Kāmarāgānusayokāse hi paṭiḅhānusayassa appahīnattā so “tattha pahīno”ti na vattabbo, aṭṭhitattā pana “tattha appahīno”ti ca, tasmā anokāse tadubhayāvattabbatā vuttāti. **Tena saddhim samānokāseti** tena kāmarāgena saddhim samānokāse. “Sādhāraṇaṭṭhāne”ti vutte kāmādhātuyaṃ sukhupekkhāsu pahīno nāma hoti, na samānakāle pahīno tatiyacatutthamaggavajjhataṃ kāmarāgamānānusayānaṃ.

Pahīnavāraṇṇanā niṭṭhitā.

7. Dhātuvāraṇṇanā

332-340. Appahīnuppattirahabhāvā idha anugamanasayanānīti dassento “**yasmim ...pe... attho**”ti āha. **Idhāpi vuttāti** pubbe vuttamevatthaṃ parāmasati. Tathā hi vuttaṃ “kāraṇalābhe uppattirahataṃ

dassetī”ti (yama. mūlaṭī. anusayayamaka 1). **Cha paṭisedhavacanānī** tissannaṃ dhātūnaṃ cutūpapātavisiṭṭhānaṃ paṭisedhanavasena vuttavacanāni, tato eva dhātuvisesaniddhāraṇāni na honti. Paṭisedhoti hi idha sattāpaṭisedho vuttoti adhippāyena vadati. Aññatthe pana na-kāre nāyaṃ doso. **Imaṃ nāma** dhātuṃ. **Taṃmūlikāsūti** paṭisedhamūlikāsu. **Evañhīti** “na kāmadhātuyā cutassa kāmadhātuṃ upapajjantassā”tiādinā paṭhamayojanāya satī. Nakāmadhātuādīsu upapattikittaneneva nakāmadhātuādiggaṇenapi dhātuvisesasseva gahitatāya atthato viññāyamānattā. Tenāha “**na kāmadhātu...pe... viññāyati**”ti. **Bhañjitabbāti** vibhajitabbā. Vibhāgo panettha duvidho icchitoti āha “**dvidhā kātabbāti attho**”ti. Pucchā ca vissajjanāni ca **pucchāvissajjanāni**. Yathā avutte bhaṅgābhāvassa aviññātattā “anusayā bhaṅgā natthī”ti vattabbaṃ, tathā tayidaṃ “kati anusayā bhaṅgā”ti etadapekkhanti tadapi vattabbaṃ. Pucchāpekkhañhi vissajjananti.

Dhātuvāraṇṇanā niṭṭhitā.

Anusayayamakavaṇṇanā niṭṭhitā.

8. Cittayamakam

Uddesavāraṇṇanā

1-62. Sarāgādīti ettha **ādi**-saddena “yassa sarāgaṃ cittaṃ uppajjati, na nirujjhatī”ti ārabhitvā yāva “yassa avimuttaṃ citta”nti vāro, tāva saṅgaṇhāti. **Kusalādīti** pana **ādi**-saddena “yassa kusalaṃ cittaṃ uppajjati, na nirujjhatī”ti ārabhitvā yāva “yassa saraṇaṃ cittaṃ uppajjati, na nirujjhatī”ti vāro, tāva saṅgaṇhāti, tasmā **sarāgādīkusalādīhīti** sarāgādīhi avimuttantehi, kusalādīhi araṇantehi padehi **missakā** vārā. **Suddhikāti** kevalā yathāvuttasarāgādīhi kusalādīhi ca amissakā. **Tayo tayoti** puggaladhamavasena tayo tayo mahāvārā. Yadi evaṃ kathaṃ soḷasa puggalavārāti āha “**tattha tattha pana vutte sampiṇḍetvā**”ti. **Tattha tattha** soḷasavidhe sarāgādīmissakacitte **vutte** puggale eva ekajjhaṃ **sampiṇḍetvā** saṅgahetvā “soḷasa puggalavārā”ti vuttaṃ. “Dhammapuggaladhamavārā”ti etthāpi eseva nayo. **Na nirantaram vutteti** dhamme puggaladhamme ca anāmasitvā soḷasasupi ṭhānesu nirantaram puggale eva vutte sampiṇḍetvā soḷasa puggalavārā na vuttāti attho.

Samsaggavasenāti saṃsajjanavasena desanāya vimissanavasena. Aññathā hi uppādanīrodhā paccuppannānāgatakālā ca kathaṃ saṃsajjīyanti. **Sesānampi vārānanti** uppāduppannavārādīnaṃ. **Taṃtaṃnāmatāti** yathā “yassa cittaṃ uppajjati, tassa cittaṃ uppanna”ntiādinā uppāduppannabhāvāmasanato uppāduppannavāroti nāmaṃ pālito eva viññāyati, evaṃ sesavārānampīti āha “**taṃtaṃnāmatā pālīanusārena veditabbā**”ti.

Uddesavāraṇṇanā niṭṭhitā.

Niddesavāraṇṇanā

63. Tathārūpassevāti pacchimacittasamaṅgino eva. **Taṅca cittanti** taṅca yathāvuttakkhaṇaṃ pacchimacittaṃ. “**Evampakāra**”nti imassa atthaṃ dassetuṃ “**bhaṅgakkhaṇasamaṅgimevā**”ti **vuttaṃ** nirujjhamānākāraṃ “evampakāra”nti vuttattā.

65-82. Dvayametanti yaṃ “khaṇapaccuppannameva cittaṃ uppādakkaṇāpagamena uppajjittha nāma, tadeva uppādakkaṇe uppādaṃ pattattā uppajjittha, anatītattā uppajjati nāmā”ti vuttaṃ, etaṃ ubhayampi. **Evaṃ na sakkā vattunti** iminā vuttappakārena na sakkā vattuṃ, pakārantarena pana sakkā vattunti adhippāyo. Tattha “**na hi**”tiādinā paṭhamapakkaṃ vibhāveti. **Vibhajitabbaṃ siyāti** “bhaṅgakkhaṇe taṃ cittaṃ uppajjittha, no ca uppajjati, uppādakkaṇe taṃ cittaṃ uppajjittha ceva uppajjati cā”ti vibhajitabbaṃ siyā, na ca vibhattaṃ. “**Āmantā**”ti **vattabbaṃ siyā** khaṇapaccuppanne

citte vuttanayena ubhayassapi labbhamānattā, na ca vuttaṃ. Idāni yena pakārena sakkā vuttaṃ, taṃ dassetaṃ “**cittassa bhaṅgakkhaṇe**”tiādīmāha. **Puggalo vutto**, puggalavāro hesoti adhippāyo. **Tassāti** puggalassa. **Na ca kiñci cittaṃ uppajjati** cittassa bhaṅgakkhaṇasamaṅgibhāvato. **Taṃ pana cittaṃ uppajjati**, yaṃ cittasamaṅgī so puggaloti **evamettha attho daṭṭhabbo**. Yadi anekacittavasenāyaṃ yamakadesanā pavattāti codanaṃ sandhāyāha “**cittanti hi...pe... tiṭṭhati**”ti. **Sanniṭṭhānavasena niyamo veditabbo**, aññathā “no ca tesam cittaṃ uppajjati”tiādīnā paṭisedho na yujjeyyāti adhippāyo. **Tādisanti** tathārūpaṃ, yadavattho uppannauppajjamānatādipariyāyehi vattabbo hoti, tadavatthanti attho.

83-113. Imassa puggalavārattāti “yassa cittaṃ uppajjamāna”ntiādīnayappavattassa imassa atikkantakālavārassa puggalavārattā. **Puggalo pucchitoti** “yassa cittaṃ uppajjamānaṃ...pe... tassa citta”nti cittasamaṅgipuggalo pucchitoti **puggalasseva vissajjanena bhavitabbaṃ**, itarathā aññaṃ pucchitaṃ aññaṃ vissajjitaṃ siyā. **Na koci puggalo na gahito** sabbasattānaṃ anibbattacittatābhāvato. **Te ca pana** sabbe puggalā. **Nirujjhamānakkhaṇātītacittāti** nirujjhamānakkhaṇā hutvā atītacittā. **Tathā dutiyatatiyāti** yathā paṭhamapañho anavasesapuggalavisayattā paṭivacanena vissajjetabbo siyā, tathā tato eva dutiyatatiyapañhā “āmanta”icceva vissajjetabbā siyunti attho. Catuttho pana pañho evaṃ vibhajitvā puggalavaseneva vissajjetabboti dassento “**pacchimacittassā**”tiādīyaṃ vatvā tathā avacane kāraṇaṃ dassento “**cittavasena puggalavavathānato**”tiādīmāha. “Bhaṅgakkhaṇe cittaṃ uppādakkhaṇaṃ vītikkanta”nti iminā **vattamānassa cittassa vasena puggalo uppādakkhaṇātītacitto**, “atītaṃ cittaṃ uppādakkhaṇaṃ vītikkantanti bhaṅgakkhaṇaṃ vītikkanta”nti iminā pana **atītassa cittassa vasena puggalo uppādakkhaṇātītacitto vutto**.

Tatthāti tesu dvīsu puggalesu. **Purimassāti** paṭhamam vuttassa sanniṭṭhānapadasaṅgahitassa cittaṃ na bhaṅgakkhaṇaṃ vītikkantaṃ. “No ca bhaṅgakkhaṇaṃ vītikkanta”nti hi vuttaṃ. Pacchimassa vītikkantaṃ cittaṃ bhaṅgakkhaṇanti sambandho. “Bhaṅgakkhaṇaṃ vītikkanta”nti hi vuttaṃ. **Evamādiko puggalavibhāgoti** dutiyapañhādīsu vuttaṃ sandhāyāha. **Tassa cittassa taṃtaṃkhaṇavītikkamāvītikkamadassanavasena**ti tassa tassa uppādakkhaṇassa bhaṅgakkhaṇassa ca yathārahaṃ vītikkamassa avītikkamassa ca dassanavasena dassito hoti puggalavibhāgoti yojanā. **Idhāti** imasmiṃ atikkantakālavāre. **Puggalavisitṭhaṃ cittaṃ pucchitaṃ** “yassa cittaṃ tassa citta”nti vuttattā. **Yadipi puggalappadhānā pucchā** puggalavārattā. **Athāpi cittaappadhānā** puggalaṃ visesanabhāvena gahetvā cittassa visesitattā. **Ubhayathāpi dutiyapucchāya** “āmanta”ti **vattabbaṃ siyā** anavasesapuggalavisayattā. Tathā pana avatvā “atītaṃ citta”nti vuttaṃ, kasmā nirodhakkhaṇa...pe... dassanathanti daṭṭhabbanti yojanā. **Esa nayo “na nirujjhamāna”nti etthāpīti** nirujjhamānaṃ khaṇaṃ nirodhakkhaṇaṃ khaṇaṃ vītikkantakālaṃ kiṃ tassa cittaṃ na hotīti attho.

114-116. Sarāgapacchimacittassāti sarāgacittesu pacchimassa cittassa, ekassa puggalassa rāgasampayuttacittesu yaṃ sabbapacchimaṃ cittaṃ, tassa. So pana puggalo anāgāmī veditabbo. **Na nirujjhāti** nirodhāsamaṅgitāya. **Nirujjhissati** idāni nirodhaṃ pāpuṇissati. Appaṭisandhikattā pana tato aññaṃ **nuppajjissati**. **Itaresanti** yathāvuttasarāgapacchimacittasamaṅgiṃ vītarāgacittasamaṅgiṃca ṭhapetvā avasesānaṃ itarasekkhānaṃceva puthujjanānaṃca.

Niddesavāraṇṇanā niṭṭhitā.

Cittayamakavaṇṇanā niṭṭhitā.

9. Dhammayamakam

1. Paṇṇattivāro

Uddesavāraṇṇanā

1-16. Yathā mūlayamake kusalādidhammā desitāti kusalākusalābyākatā dhammā

kusalakusalamūlādivibhāgato mūlayamake yamakavasena yathā desitā. **Aññathāti** kusalakusalamūlādivibhāgato aññathā, khandhādivasenāti attho.

Uddesavāraṇṇanā niṭṭhitā.

2. Pavattivāraṇṇanā

33-34. Taṃ pana kammasamuṭṭhānādirūpaṃ aggahetvā. **Kecīti** dhammasirittheraṃ sandhāyāha. So hi “cittasamuṭṭhānarūpavasena vutta”nti aṭṭhakathaṃ āharitvā “imasmim pañhe kammasamuṭṭhānādirūpañca labbhatī”ti avoca. Tathā ca vatvā paṭilomapāḷim dassetvā “cittasamuṭṭhānarūpameva idhādhippetam. Kammasamuṭṭhānādirūpe na vidhānaṃ, nāpi paṭisedho”ti āha. **Tathāti** yathā vuttappakāre pāṭhe cittasamuṭṭhānarūpameva adhippetam, tathā etthāpīti attho. Noti vuttanti vadantīti sambandho. **Taṃ panetanti** yathā uddhaṭṭassa pāṭhassa atthavacanam, evam na sakkā vattum. Kasmāti āha “**cittassa bhaṅgakkhaṇe...pe... paṭisedhasiddhito**”ti. Svāyaṃ paṭisedho heṭṭhā dassitoyevāti adhippāyo.

Ye ca vadantīti ettha ye cāti vajirabuddhittheraṃ sandhāyāha. So hi “sotāpattimaggakkhaṇe”tiādinā paṭisambhidāmaggapāḷim āharitvā “yathā tattha satipi kammajādirūpe ṭhapetvā cittasamuṭṭhānarūpanti cittapaṭibaddhattā cittajarūpameva ṭhapetabbabhāvena uddhaṭṭam, evamidhāpi cittajarūpameva kathita”nti vadati. **Taṅca** nesam **vacanam tathā na hoti**, yathā tehi udāhaṭṭam, visamoyaṃ upaññāsoti attho. Yathā ca taṃ tathā na hoti, taṃ dassetum “**yesaññhī**”tiādi vuttam. **Tesanti** kammajādinam. **Tassāti** maggassa. **Teti** abyākatā, ye uppādanirodhavanto. **Avijjamānesu ca** uppādanirodhesu nibbānassa viya.

Sanniṭṭhānena gahitesu puggalesu. Tesu hi keci akusalābyākatacittānam uppādakkhaṇasamaṅgino, keci abyākatacittassa, keci kusalābyākatacittassa, tesu purimā dve paṭhamakoṭṭhāsena saṅgahitā tassa kusaluṭṭhānādirūpam, te pana bhavavasena vibhajitvā vattabbāti dassento “**pañcavokāre**”tiādimāha. **Evanti** yathāvuttanayena. **Sabbatthāti** sabbapañhesu.

79. Tatoti ekāvajanavīthito. **Purimatarajavanavīthi** yāya vuṭṭhānagāminī saṅgahitā, tattha uppannassapi cittassa. **Kusalānāgatabhāvapariyosānenāti** kusalahammānam anāgatabhāvassa pariyosānabhūtena aggamaggānantarapaccayattena **dīpitaṃ hoti samānalakkhaṇam sabbam**. Kena? **Tāya eva samānalakkhaṇatāya. Esa nayo**ti yathā kusalānuppādo kusalānāgatabhāvassa pariyosānabhūtato vuttaparicchedato orampi labbhatīti so yathāvuttaparicchedo lakkhaṇamattanti svāyaṃ nayo dassito. Esa nayo akusalātibhāvassa ādimhi “dutiye akusale”ti vuttaṭṭhāne, abyākatātibhāvassa ādimhi “dutiye citte”ti vuttaṭṭhānepīti yojanā. Idāni “esa nayo”ti yathāvuttamatidesam “**yathā hī**”tiādinā pākāṭataram karoti. **Bhāvanāpahānāni dassitāni honti** “aggamaggasamaṅgī kusalañca dhammaṃ bhāveti, akusalañca pajahatī”ti. **Idhāti** imasmim pavattivāre. **Taṃ tanti** akusalātibhāvassa ādimhi “dutiye akusale aggamaggasamaṅgī”ti evamādinā antena ca.

100. Paṭisandhicittatoti idam mariyādaggahaṇam, na abhividhiggahaṇam, yato “**soḷasama**”nti āha. Abhividhiggahaṇameva vā soḷasacittakkhaṇāyukameva rūpanti imasmim pakkhe adhippete paṭikkhittovāyaṃ vādoti dassento “**tato parampi vā**”ti āha. Ayañca vicāro heṭṭhā dassito eva. **Na tato oranti viññāyati** tato oraṃ akusalānāgatādi kusalañca dhammaṃ bhāveti, akusalañca pajahatī”ti evamādinā antena ca.

Pavattivāraṇṇanā niṭṭhitā.

Dhammayamakavaṇṇanā niṭṭhitā.

10. Indriyayamakam

1. Paṇṇattivāro

Uddesavāraṇṇanā

1. Indriyayamake vibhaṅge viyāti yathā indriyavibhaṅge purisindriyānantaraṃ jīvitindriyaṃ uddiṭṭhaṃ, na manindriyānantaraṃ, evaṃ imasmiṃ indriyayamake. Tañca suttadesanānurodhenāti dassento “**tīṇimāni...pe... sutte desitakkamenā**”ti āha. Soyaṃ yadatthaṃ tassa sutte desitakkamena uddeso, taṃ dassetuṃ “**pavattivārehī**”tiādi vuttaṃ. Tattha yathā “jīvitindriya”nti idaṃ rūpajīvitindriyassa arūpajīvitindriyassa ca sāmāññato gahaṇaṃ, evaṃ upādinnassa anupādinnassa cāti āha “**kammajānaṃ akammajānañca anupālaka**”nti. Atha vā sahadhammānupālakampi jīvitindriyaṃ na kevalaṃ khaṇaṭṭhitiyā eva kāraṇaṃ, atha kho pabandhānupacchedassapi kāraṇameva. Aññathā āyukkhayamaṇaṃ na sambhaveyya, tasmā “kammajānañca anupālaka”nti avisesato vuttaṃ, cutipaṭisandhīsu ca pavattamānānaṃ kammajānaṃ anupālakaṃ. **Itīti** tasmā. **Tammūlakānīti** jīvitindriyamūlakāni. **Cutipaṭisandhipavattivāsenāti** cutipaṭisandhivasena pavattivāsenā ca. Tattha yaṃ upādinnaṃ, taṃ cutipaṭisandhivaseneva, itaraṃ itaravāsenāpi vattaḃbaṃ. Yasmā cakkhundriyādīsu purisindriyāvāsānesu ekantaupādinnesu atamaṣabhāvattā yaṃ manindriyaṃ mūlameva na hoti, tasmā taṃ ṭhapetvā **avasesamūlakāni** cakkhundriyādīmūlakāni. **Āyatanayamake viyāti** yathā āyatanayamake paṭisandhivasenāyatanānaṃ uppādo, maraṇavasena ca nirodho vutto, evamidhāpi cutiupapattivāsenā vattaḃbāni, tasmā atamaṣabhāvattā jīvitindriyaṃ **tesaṃ** cakkhundriyādīnaṃ majjhe anuddisitvā **ante** purisindriyānantaraṃ uddiṭṭhaṃ. Yaṃ pana cakkhundriyādīmūlakesu manindriyaṃ sabbapacchā eva gahitaṃ, tattha kāraṇaṃ aṭṭhakathāyaṃ vuttameva.

Uddesavāraṇṇanā niṭṭhitā.

Niddesavāraṇṇanā

94. Koci sabhāvo natthīti koci sabhāvadhammo natthi. Yadi evaṃ “natthī”ti paṭikkhepo eva yuttoti āha “**na ca rūpādī**”tiādi. “Sukhā dukkhā adukkhamasukhā”tiādīsu sukhadukkhasaddānaṃ sāmāññavacanabhāvepi indriyadesanāyaṃ te viṣiṭṭhavisayā evāti dassento “**sukhassa...pe... gahitoyevā**”ti āha. **Dukkhassa ca** bhedaṃ katvā.

140. Paññindriyāni hontīti āmantāti vuttanti pajānanaṭṭhena adhipateyyaṭṭhena ca paññindriyāni honti, dassanaṭṭhena pana cakkhūni cāti cakkhu, indriyanti pucchāya “āmantā”ti vuttanti adhippāyo. “**Taṇhāsotamevāhā**”ti vuttaṃ, “yassa chattiṃsati sotā”tiādīsu (dha. pa. 339) pana diṭṭhiādīnampi sotabhāvo āgato.

Paṇṇatiniddesavāraṇṇanā niṭṭhitā.

2. Pavattivāraṇṇanā

186. Aññadhammanissayenāti “yo tesaṃ rūpīnaṃ dhammānaṃ āyu ṭhiti”tiādīnā (dha. sa. 634) aññadhammanissayena gahetabbaṃ. **Pavattiñca gahetvā gatesu** vissajjanesu, cutipaṭisandhiyo gahetvā gatesu yojanā na labbhatīti adhippāyo. Alabbhamānā ca sukhadukkhadomanassindriyeheva na labbhati. **Tammūlakā ca nayāti** sukhindriyādīmūlakā ca nayā. **Tehīti** sukhindriyādīhi. **Yojanāti** “pavatte sukhindriyavippayuttacittassa uppādakkaṇe”tiādīnā uppajjamānehi yojanā. **Tammūlakā ca** tathāyojanāmūlabhūtā ca nayā jīvitindriyādīmūlakā ca nayā. **Pākaṭāyevāti** pāḷigatiyā eva viññāyamānayojanattā suviññeyyā eva.

Taṃ vacanaṃ. **Somanassavirahitasacakkhukapaṭisandhinidassanavāsenāti** somanassavirahitasacakkhukapaṭisandhiyeva nidassananti yojetabbaṃ. Kathaṃ panetaṃ jānitabbaṃ “nidassanamattameṭaṃ, na pana gaṇanaparicchindana”nti āha “**na hi catunnaṃyevāti niyamo**

kato’ti. **Taṃsamānalakkhaṇā**ti tāya sacakkhukapaṭisandhitāya samānalakkhaṇāti parittavipākaggahaṇaṃ. Tattha sasomanassapaṭisandhiyo sandhāya upekkhāpaṭisandhiyo nidassanabhāvena vuttāti keci. Parittavipākapaṭisandhi ca kusalavipākāhetukapaṭisandhi veditabbā. Sāpi hi sacakkhukā siyā. **Taṃsamānalakkhaṇā**ti vā tāya upekkhāsahagatāya samānalakkhaṇā yathāvuttaahetukapaṭisandhi ca pañcamajjhānapaṭisandhi ca. Yadi evaṃ “catunna”nti kasmā gaṇanaparicchedoti āha “**kāmāvacare...pe... nidassanaṃ kata**”nti. **Tenā**ti upekkhāsahagatamahāvīpākanidassanena, yehi samānatāya ime nidassanabhāvena vuttā, te ekaṃsena taṃsabhāvā evāti ayamettha adhippāyo. Tenāha “**yathā sasomanassa...pe... to hoti**”ti.

Nanu ca gabbhaseyyakesu ayamattho ekaṃsato na labbhatīti āsaṅkaṃ sandhāyāha “**gabbhaseyyakānaṅca...pe... dassitā hoti**”ti. Tenāha “**sacakkhukāna**”ntiādi. Tattha yadi sahetukapaṭisandhikānaṃ kāmāvacarānaṃ niyamato sacakkhukādibhāvadassanaṃ gabbhaseyyakavasena labbheyya, yuttametam siyāti codanaṃ sandhāyāha “**gabbhaseyyakepi hī**”tiādi. **Tathā āyatanayamake dassitanti** idam āyatanayamakavaṇṇanāyaṃ attanā vuttaṃ “evaṅca katvā indriyayamake”tiādivacanaṃ sandhāya vuttaṃ. Tattha hi somanassindriyuppādakakammassa ekantena cakkhundriyuppādanato gabbhepi yāva cakkhundriyuppatti, tāva uppajjamānatāya “abhinanditabbattā”ti vuttaṃ. **Sanniṭṭhānena saṅgahitānanti** “yassa vā pana somanassindriyaṃ uppajjati”ti etena sanniṭṭhānena saṅgahitānaṃ. **Itthīnaṃ aghānakānaṃ upapajjantīnanti ādisūti ādi-**saddena “itthīnaṃ acakkhukānaṃ upapajjantīna”ntiādiṃ saṅgaṇhāti. **Te evāti** gabbhaseyyakā eva.

Taṃsamānalakkhaṇanti sopekkhaacakkhukapaṭisandhibhāvena samānalakkhaṇaṃ. **Tatthāti** ahētukapaṭisandhicitte. **Samādhilesa** dubbalasamādhī yo cittaṭṭhitimatto. **Tasmāti** yasmā cittaṭṭhiti viya dubbalaṃ vīriyaṃ natthī, yo “vīriyaleso”ti vattabbo, tasmā, lesamattassapi vīriyassa abhāvāti attho. **Aññesūti** ahētukapaṭisandhicittato aññesu. **Kesucīti** ekaccesu. Ubhayenapi manodvārāvajjanahasituppādacittaṃ vadati. **Idhāti** ahētukapaṭisandhicitte. **Samādhivīriyāni indriyappattāni ca na hontīti** samādhikiccaṃ paṭikkhipatī, na samādhimattaṃ, na vīriyalesassa sabbhāvatoti yojetabbaṃ. Tenevāha “**visesanañhi visesitabbe pavattati**”ti. Yasmim vīriye satī indriyuppatti siyā, tadeva tattha natthīti attho.

Apāye opapātikavasenāti idam sugatīyaṃ opapātika vikalindriyo na hotīti katvā vuttaṃ, “labbhanteva nānavippayuttāna”nti pana vuttattā “duhetukapaṭisandhikānaṃ vasenā”ti aṭṭhakathāyaṃ vuttaṃ. **Tesanti** itthipurisindriyasantānānaṃ. Itthipurisindriyānaṃ pana uppādanīrodhā abhinhasova hontīti. **Paṭhamakappikādīnanti** ettha **ādi-**saddena gahitānaṃ parivattamānalīṅgānaṃ vasena uppādanīrodhaggahaṇaṃ veditabbaṃ. Paṭhamakappikānaṃ pana vasena uppādo eva labbhati. “**Cutiupapattivaseneva dutiyapucchāsūpi sanniṭṭhānehi gahaṇaṃ veditabba**”nti idam upādinnaindriyehi niyamitattā vuttaṃ.

190. Santānuppattinīrodhadassanatoti santānavasena uppādanīrodhānaṃ dissamānattā. Etena rūpajīvitindriyassa cakkhundriyādisamānagatikataṃ yuttito sādheti. Āgamato pana “vinā somanassenā”tiādinā parato sādhesati. **Chedoti nāmaṃ datṭhabbaṃ** sarūpadassaneneva saṃsayachedanato.

Tassāti rūpajīvitindriyassa. **Te ca** asaṅghasattā. Nanu ca uppādova jīvitindriyassa cutiupapattivasena vattabbo, na anuppādoti āha “**anuppādo...pe... na pavatte**”ti. Ayaṅca nayo na kevalaṃ purimakoṭṭhāse eva, atha kho itarakoṭṭhāsepi gahito evāti dassento “**pacchimakoṭṭhāsepī**”tiādimāha.

“Upapatticittassa uppādakkhaṇe”ti kasmā vuttanti yenādhippāyena codanā katā, tamadhippāyaṃ vivarituṃ “**nanu suddhāvāsa**”ntiādi vuttaṃ. **Na vattabbanti** “upapajjantāna”nti na vattabbaṃ, “upapatticittassa uppādakkhaṇe”iceva vattabbanti attho. Idāni yathā “upapajjantāna”nti na vattabbaṃ, tam dassetuṃ “**yathā hī**”tiādi vuttaṃ. **Somanassamanindriyānanti** somanassindriyamanindriyānaṃ, ayameva vā pāṭho. **Tadāti** paṭhamassa rūpajīvitindriyassa

dharamānakāle. **Tasmāti** yasmā rūpārūpajīvitindriyānaṃ attheva kālābhedo, ubhayañcetta jīvitindriyabhāvasāmaññaena ekajjhaṃ katvā gayhati, tasmā. **Ubhayanti** somanassindriyajīvitindriyanti idaṃ ubhayaṃ. **Uppādakkhaṇena nidassitanti** etena “upapatticcittassa uppādakkhaṇe”ti idaṃ nidassanamattanti dasseti. Idāni tamevatthaṃ udāharaṇena pākaṭataraṃ kātuṃ “**yathā hi**”tiādi vuttaṃ. Tatha yathā tādisānaṃ anekesaṃ cittānaṃ bhaṅgakkhaṇe labbhamānaṃ tadekadesena sabbapaṭhamassa upapatticcittassa bhaṅgakkhaṇena nidassitaṃ, evamidhāpi khaṇadvaye labbhamānaṃ tadekadesena uppādakkhaṇena nidassitanti evaṃ nidassanattho vedītabbo.

Tesanti jīvitindriyādīnaṃ. **Aññatthāti** pavatte. **Idhāti** anāgatakālabhede. **Na na sambhavati** upapattikkhaṇassa viya tato paraṃ pavattikkhaṇassapi anāgatakālabhāvato. **Tasmāti** upapattito aññatthāpi yathādhippetauppādasambhavato. Ayañca attho vārantarepi dissatīti dassento āha “**evañca katvā**”tiādi. **Na hīti**ādīnā tamevatthaṃ samattheti. Tatha **api pacchima...pe... sandhikassāti** apisaddena “ko pana vādo apacchimabhavikassa somanassasahagatapaṭisandhikassā”ti dasseti. Apacchimabhavikassa cutito pacchā “somanassindriyaṃ nirujjhissatī”ti vattabbameva natthīti āha “**cutito pubbevā**”ti. **Ettha hi paṭhamapucchāsu sanniṭṭhānatthoti**ādīsu ayaṃ saṅkhepattho – ettha “yassa cakkhundriyaṃ uppajjissatī”ti evamādīsu yamakesu yā paṭhamapucchā, tāsu sanniṭṭhānapadasaṅgahito attho. **Pucchitabbatthanissayoti** “tassa somanassindriyaṃ uppajjissatī”tiādikassa pucchitabbassa atthassa nissayabhūto **mādisova** mayā sadiso eva attho **upapattiuppādindriyavā** upapattikkhaṇe uppādāvattahindriyasahito, **ubhayuppādindriyavā** paṭisandhipavattīsu uppādāvattahindriyasahito vā. **Paṭinivattivāpi pucchitabbatthassa nissayoti** “yassa vā panā”tiādinā paṭinivattivā pucchitabbassapi saṃsayatthassa nissayoti **evaṃ** iminā viya ajjhāsayena “yassa vā pana somanassindriyaṃ uppajjissatī”tiādisu **dutiyaupucchāsu sanniṭṭhānatthameva** sanniṭṭhānapadasaṅgahitameva atthaṃ niyameti. **Tattheva** tāsu eva pubbe vuttapaṭhamapucchāsu eva. **Pucchitabbam** “tassa somanassindriyaṃ uppajjissatī”tiādisu **anāgatabhāvamattena sarūpato gahitaṃ uppādaṃ** uppādasāṅkhātāṃ, “tassa somanassindriyaṃ nirujjhissatī”tiādisu **anāgatabhāvamattena sarūpato gahitaṃ nirodhaṃ vā** nirodhasāṅkhātāṃ vā saṃsayatthaṃ na niyametīti. **Evanti** vuttapakārena sanniṭṭhānatthassa niyamo hoti, na saṃsayatthassa, tasmā “yassa vā pana...pe... āmantā”ti vuttaṃ. **Esa nayoti** yvāyaṃ uppādavāre vicāro vutto, nirodhavārepi eseva nayo. Tathā hi “yassa vā pana somanassindriyaṃ nirujjhissatī, tassa cakkhundriyaṃ nirujjhissatī? Āmantā”ti vuttaṃ.

Evaṃ avuttattāti uppādanirodhānaṃ anāgatānaṃ sarūpena avuttattā. Na hi tatha te sarūpena vuttā, atha kho “nuppajjissatī”ti paṭikkhepamukhena vuttā. **Tatthāti** anulome. **Na evaṃ yojetabbā** paṭilome. Tameva ayojetabbataṃ “**yathā hi**”tiādinā vivarati. Uppādanirodhe atikkamitvā uppādanirodhā sambhavanti yojetuṃ, tathā uppādanirodhe appatvā uppādanirodhā sambhavanti yojetunti yojanā. Idañca dvayaṃ yathānulome sambhavati, na evaṃ paṭilome. Tenāha “**na evaṃ...pe... sambhavanti**”ti. Tatha kāraṇamāha “**abhūtābhāvassa...pe... sambhavānupapattito**”ti. **Abhūtābhāvassāti** abhūtassa abhāvassa, abhūtassa uppādassa nirodhassa ca abhāvassāti adhippāyo. Tenāha “**abhūtuppādanirodhābhāvo ca paṭilome pucchito**”ti, tasmā “āmantā”ti ca vuttaṃ, na vuttaṃ vissajjananti sambandho. **Assa visesarahitassa abhūtābhāvassāti** imassa yathāvuttassa yathā rūpābhāvo vedanābhāvoti koci abhāvopi visesasahito, na evamayanti visesarahitassa abhūtābhāvassa.

Kālantarayogābhāvatoti kālavisayasogābhāvato. **Yādisānanti** yāni bhūtāni na vattamānāni satī paccaye uppajjanārāhāni, tesam anāgatānanti attho. **Uppādanirodhābhāvena pucchitabbassāti** “nuppajjissatī na nirujjhissatī”ti evaṃ uppādassa nirodhassa ca abhāvena pucchitabbassa atthassa. **Sannissayo** nissayabhūto **sanniṭṭhānena sannicchito** sanniṭṭhānapadasaṅgahito. So yathāvutto attho nissayo etesanti **tannissayā**. **Tādisānaṃyeva** anāgatānaṃyeva **upapatticutiuppādanirodhānaṃ** upapatticutisāṅkhātauppādanirodhānaṃ anuppādanirodhānaṃ paṭikkhepavasena. **Jīvitādīnampi** jīvitamanindriyādīnampi. **Anuppādanirodhā saṃsayapadena pucchitā honti** “yassa somanassindriyaṃ nuppajjissatī, tassa somanassindriyaṃ na nirujjhissatī”ti. “**Āmantā**”ti vuttaṃ vibhajitvā vattabbassa abhāvato. Tenāha “**na vuttaṃ...pe... vissajjana**”nti.

Ye sopekkhapaṭisandhikā bhavissanti rūpaloke, te saṅgahitāti yojanā. **Taṃsamānalakkhaṇatāyāti** tena sopekkhapaṭisandhikabhāvena samānalakkhaṇatāya. **Taṃ pamādalikhitaṃ** dhammayamake tādissasseva vacanassa abhāvato. Tatthapi yaṃ vattabbaṃ, taṃ cittayamake vuttaṃ “na hi khaṇapaccuppanne uppajjitthāti atītavohāro atthī”tiādinā.

Pavattivāraṇṇanā niṭṭhitā.

3. Pariññāvāraṇṇanā

435-482. Lokiyaabyākatehī phaladhammanibbānavinimuttehi abyākatehi. **Tāni upādāyāti** tāni lokiyaabyākātāni upādāya. Taṃsamānagatikānaṃ manindriyādīnaṃ “so vedanākkhandhaṃ parijānātīti? Āmantā”tiādinā (yama. 1.khandhayamaka.206) vedanākkhandhādīnaṃ viya pariññeyyatā vuttā. Yañhi parijānitabbaṃ, tadeva parijānātītiādinā vuttaṃ. Evamaviparīte atthe siddhepi codako “missakattā”ti ettha labbhamānaṃ lesaṃ gahetvā codeti “**yadi pariññeyyamissakattā**”tiādinā. Tassattho – yathā idha pariññeyyamissakānaṃ pariññeyyatā vuttā, evamaññatthāpi sā tesāṃ vattabbā, tathā bhāvetabbamissakānaṃ bhāvetabbatāti. Tenāha “**kasmā dhammayamake**”tiādi. **Kusalākusalesu bhāvanāpahānābhiniveso hoti**, yena vuttaṃ “so taṃ akusalaṃ pajahati, kusalaṃ bhāvetī”tiādi. **Na abyākatabhāvanti** ekena yathā phassadvārato viya viññānavārato kusalādīnaṃ uppattipariyāyo, evaṃ vedanākkhandhādīnaṃ viya na abyākatādīnaṃ pariññeyyatāpariyāyoti dasseti.

Kusalākusalabhāvena aggahitāti samudayasabhāvena aggahitāti attho. **Kusalākusalāpīti** kusalākusalabhāvāpi samānā. **Bhāvetabbapahātābbabhāvehi vināpi hoti**, yo na maggasamudayasaccapakkhiyo. Yathā “aniccaṃ rūpa”nti ettha “aniccaveva rūpaṃ, na nicca”nti paṭiyogivivattanameva eva-kārena karīyati, na tassa dukkhānattatādayo nivāritā honti, evaṃ “pahātābbamevā”ti ettha eva-saddena paṭiyogibhūtaṃ appahātābbameva nivattīyati, na tato aññavisesāti dassento āha “**etena pahātābbamevā**”tiādi. **Bhāvetabbabhāvo eva tassa** aññindriyassa **gahito** ukkaṃsagativijānato. “**Parato likhitabbaṃ uppaṭipāṭiyā likhita**”nti kasmā vuttaṃ. **Dve puggalāti** hi ādi anulome āgataṃ uddhaṭaṃ, **cakkhundriyaṃ na parijānātīti** ādi pana paṭilome. **Domanassindriyaṃ na pajahanti nāmāti** idaṃ “no ca domanassindriyaṃ pajahanti”ti pālīpadassa atthavacanāṃ. Yaṃ pana “cakkhundriyamūlakaṃ atikkamitvā domanassindriyamūlake idaṃ vutta”nti vuttaṃ, paṭilome āgataṃ sandhāya vuttatā taṃ na yuttaṃ, na taṃ aṭṭhakathācariyā paṭhamāṃ āgataṃ padaṃ laṅghitvā tādissasseva pacchā āgatapadassa atthavaṇṇanaṃ karonti. Padānukkamoto eva hi aṭṭhakathāyaṃ atthavaṇṇanā āraddhā, pariyoṣāpitā ca, tasmā anupaṭipāṭiyāva likhitaṃ, na uppaṭipāṭiyāti daṭṭhabbaṃ “dve puggalā”tiādikassa anulome āgatassa uddhaṭatā.

Etthāti etasmim parīññāvāre. **Cha puggalāti** puthujjanena saddhim yāva anāgāmimaggatthā cha puggalā. **Abhinditvā gahito** tattha bhābbābhābānaṃ kiccavisesassa aggahitattā. Yattha pana sati puthujjanaggahaṇasāmaññe bhābbānaṃ kiccaṃ gahitaṃ, yattha ca abhābbānaṃ, tattha te eva bhinditvā vuttā hontīti dassento “**ye ca puthujjanā maggaṃ paṭilabhissanti, ye ca puthujjanā maggaṃ na paṭilabhissanti**”ti ca ādimāha. **Arahāti** ariyo, ayameva vā paṭho. **Paṭhamamaggaphalāsamaṅgīti** purimamaggaphalāsamaṅgī. **Itaroti** arahā. **Evaṃ puggalābhedaṃ nītvāti** idha puthujjano so ca abhābboti gahito, idha bhābboti idha ariyā, ye ca paṭhamamaggaphalāsamaṅgino yāva aggamaggaphalāsamaṅgino evaṃ yathāvuttaṃ puggalavibhāgaṃ nītvā. **Tattha tatthāti** tesāṃ dve puthujjanā aṭṭha ariyāti imesaṃ yathāvuttapuggalānaṃ bhedaṃ abhedato ca gahaṇavasena āgate tasmim tasmim paṭhapadesa. **Sanniṭṭhānenāti** sanniṭṭhānapadavasena, nicchayavaseneva vā. **Niddhāretvāti** nīharitvā. **Vissajjanaṃ yojetabbanti** vissajjanavasena pavattapālīyā yathāvuttaatthadassanena sambandhato vibhāvetabboti.

Pariññāvāraṇṇanā niṭṭhitā.

Indriyayamakavaṇṇanā niṭṭhitā.

Yamakapakaraṇa-anuṭikā samattā.

Namo tassa bhagavato arahato sammāsambuddhassa

Paṭṭhānapakaraṇa-anuṭikā

Ganthārambhavaṇṇanā

Kāmaguṇādīhī kāmaguṇajhānābhīññācittissariyādīhi. **Laḷantī** laḷitānubhavanavasena ramanti. **Tesūti** kāmaguṇādīsu. **Viharantī** iriyāpathaparivattanādinā vattanti. **Paccatthiketī** bāhirabbhantarabhede amitte. **Issariyaṃ** tattha tattha ādhipateyyaṃ. **Ṭhānaṃ** seṭṭhisenāpatiyuvarājādiṭṭhānantaraṃ. **Ādi**-saddena parivāraparicchedādi saṅgayhati. **Puññayogānubhāvappattāyāti** dānamayādipuññānubhāvādhiḡatāya samathavipassanābhāvanāsaṅkhātayogānubhāvādhiḡatāya ca. **Jutiyāti** sarīrappabhāya ceva ṇāṇappabhāya ca. Ettha ca deva-saddo yathā kīḷāvijigīsāvohārajutigatiattho, evaṃ sattiabhitthavakamanatthopi hoti dhātusaddānaṃ anekatthabhāvatoṭi “**yadicchitanipphādane sakkontīti vā**”tiādi vuttaṃ.

Iddhividhādītāmattena bhagavato abhiññādīnaṃ sāvakehi sādharmaṇatāvacaṇaṃ, sabhāvato pana sabbepi buddhaguṇā anaññasādharmaṇāyevāti dassento “**niratisayāya abhiññākīḷāya, uttamehi dibbabrahmaariyavīhārehi**”ti āha. Cittissariyasattadhanādīnaṃ dānasaṅkhātena sammāpaṭipattiaveccappasādasakkārānaṃ gahaṇasaṅkhātenāti yojanā. Gahaṇācettha tesu upalabbhamānasammāpaṭipattiaveccappasādānaṃ tehi upanīyamānasakkārassa ca abhinandanāṃ anumodanaṃ sampaṭicchanaṇca veditabbaṃ. Dhammasabhāvānurūpānusāsānīvacaneneva ca pana sikkhāpadapaññattipi saṅgahitāti daṭṭhabbā vītikkamadhammānurūpā anusāsānīti katvā. **Nāṇagati** ṇāṇena gantabbassa ñeyyassa avabodho. **Samannāgatattāti** idaṃ “abhiññākīḷāya”tiādīsu paccekāṃ yojetabbaṃ, tathā **sadevakena lokenāti** idaṃ “gamaṇīyato”tiādīsu. **Te deveti** sammutidevādike deve. **Tehi guṇehīti** abhiññādiguṇehi. **Pūjanīyataro devoti** idaṃ pūjanīyapariyāyo ayaṃ ati-saddoti katvā vuttaṃ. **Atirekataroti** adhikataro. **Upapattidevānanti** idaṃ tabbahulatāya vuttaṃ. Visuddhidevāpi hi tattha vijjanteva, tesupi vā labbhamānaṃ upapattidevabhāvamattameva gahetvā tathā vuttaṃ. **Paṭipakkhānaṃ** dussīlyamuṭṭhassaccavikkhepanāṃ, sīlavipattiabhijjhādomanassaavasīṭṭhanīvaraṇānaṃ vā.

Isīnaṃ sattamo, isīsu sattamoti duvidhampi atthaṃ yojetvā dassento “**catusaccāvabodhagatiyā... pe... vutto**”ti āha. Saparasantānesu sīlādiguṇānaṃ esanaṭṭhena vā isayo, buddhādayo ariyā. Isi ca so sattamo cāti **isisattamoti** evamettha attho daṭṭhabbo. “Nāmarūpanirodha”nti ettha yaṃ nāmarūpaṃ nirodhetabbaṃ, taṃ dassento “**yato viññānaṃ paccudāvattati**”ti āha. Vaṭṭapariyāpannañhi nāmarūpaṃ nirodhetabbaṃ. Tasmīñhi nirodhite sabbaso nāmarūpaṃ nirodhitameva hoti. Yathāha “**sotāpattimaggañāṇena abhisāṅkhāraviññāṇassa nirodhena satta bhave ṭhapetvā anamatagge samsāre ye uppajjeyyūṃ nāmaṇca rūpaṇca, etthete nirujjhanti...pe... arahato anupādisesāya nibbānadhātuyā parinibbāyantassa carimaviññāṇassa nirodhena paññā ca sati ca nāmaṇca rūpaṇca, etthete nirujjhanti vūpasamanti atthaṃ gacchanti paṭippassambhanti**”ti (cūḷani. ajitamāṇavapucchāniddeṣa 6). **Atigambhīranayamaṇḍitadesanaṃ** sātisayaṃ paccayākārassa vibhāvanato. Sabhāvato ca paccayākāro gambhīro. Yathāha “**adhigato kho myāyaṃ dhammo gambhīro**”tiādi (dī. ni. 2.67; ma. ni. 1.281; 2.337; saṃ. ni. 1.172; mahāva. 7, 8), “**gambhīro cāyaṃ, ānanda, paṭiccasamuppādo gambhīrāvabhāso**”ti (dī. ni. 2.95; saṃ. ni. 2.60) ca ādi. Tassa cāyaṃ anantanayapaṭṭhānadesanā atigambhīrāva.

Ganthārambhavaṇṇanā niṭṭhitā.

Paccayuddesavaṇṇanā

Samānaneti samānanayane, samāharaṇe, samānakaṛaṇe vā aṭṭhakathādhippāyaṃ. Tattha “dve anulomāni dhammānulomañca paccayānulomañcā”tiādīnā parato vaṇṇayissanti.

Paṭṭhānanāmatthoti “paṭṭhāna”nti imassa nāmassa attho, taṃ pana yasmā avayavadvārena samudāye niruḷhaṃ, tasmā yathā avayavesu paṭiṭṭhitam, tameva tāva dassetum “**tikapaṭṭhānādīnaṃ tikapaṭṭhānādīnāmattho**”ti vuttaṃ. Atha vā avayavānameva paṭṭhānanāmattho niddhāretabbo taṃsamudāyamattattā pakaraṇassa. Na hi samudāyo nāma koci attho atthīti dassetum “**paṭṭhānaṃ... pe... nāmattho**”ti vuttaṃ. Tenevāha “**imassa pakaraṇassa...pe... samodhānatā cettha vattabbā**”ti. Vacanasamudāyatthavijānanena viditapaṭṭhānasāmaññatthassa vitthārato paṭṭhānakathā vuccamānā sukhaggahaṇā hotīti dassento āha “**evañhi...pe... hotī**”ti. **Tatthāti** tāsū nāmatthayathāvuttasamodhānatāsū. **Sabbasādhāraṇassāti** sabbesaṃ avayavabhūtānaṃ tikapaṭṭhānādīnaṃ samudāyassa ca sādharmaṇassa. **Atthato āpannaṃ nānāvidhabhāvanti** pakāraggahaṇeneva pakāraṇaṃ anekavidhatā ca gahitāva hontīti vuttaṃ. Pakārehi ṭhānanti hi paṭṭhānaṃ, nānāvidho paccayo, taṃ ettha vibhajanavasena atthīti paṭṭhānaṃ, pakaraṇaṃ, tadavayavo ca. Etasmiñca atthanaye saddatopi nānāvidhabhāvasiddhi dassitāti veditabbā. Tattha nānappakārā paccayatā, nānappakāraṇaṃ paccayatā ca nānappakārapaccayatāti ubhayampi sāmāññaniddesena ekasesanayena vā ekajjhaṃ gahitanti dassento “**ekassapi...pe... veditabbā**”ti āha. **Anekadhammabhāvatoti** aneke dhammā etassāti anekadhammo, tabbhāvatoti yojetabbaṃ. **Nānappakārapaccayatāti** nānappakārapaccayabhāvo, yo aṭṭhakathāyaṃ “nānappakārapaccayattho”ti vutto.

Kāmaṃ dhammasaṅgahādīsūpi attheva paccayadhammavibhāgo, so pana tattha paccayabhāvo na tathā tapparabhāvena vibhatto yathā paṭṭhāneti dassento “**etena...pe... dasseti**”ti āha. **Sātisayavibhāgatam** imassa pakaraṇassa tathā tadavayavānaṃ.

Sabbaññutaññānaṃ yathāvuttagamanam yadadhikaraṇam, taṃ dassetum “**etthāti vacanaseso**”ti. **Gamanadesabhāvatoti** pavattiṭṭhānabhāvato. **Aññehi gatimantehīti** tīsu kālesu appaṭihataññādīhi. **Tassa** sabbaññutaññānaṃ.

Tividhena paricchedena desitesu dhammesu tikavohāroti āha “**tikānanti tikavasena vuttadhammāna**”nti. Tṇi parimāṇāni etesanti hi tikā. Samantāti samantato sabbabhāgatoti vuttaṃ hotīti āha “**anulomādīhi sabbappakārehipī**”ti. **Gatānīti** pavattāni. **Samantacatuvisatipaṭṭhānānīti** samantato anulomādisabbabhāgato samodhānavasena catuvisati paṭṭhānāni. **Anulomādisabbakoṭṭhāsototi** anulomādicatukoṭṭhāsato. **Tikādichachabhāvanti** tikādidukadukapariyosānehi chachabhāvaṃ. **Tenāti** yathāvuttadassanena. **Dhammānulomādisabbakoṭṭhāsototi** paccanīkādidukādīsahajātavārādipaccayapaccanīyādiārammaṇamulādīnaṃ gahaṇaṃ daṭṭhabbaṃ. Yathāvuttato aññassa pakāraṇassa asambhavato “**anūnehi nayehi pavattānīti vuttaṃ hotī**”ti āha. **Tāni pana** yathāvuttāni samantapaṭṭhānāni. Ayañca atthavaṇṇanā aṭṭhakathāvacanena aññadatthu saṃsandatīti dassento āha “**tenevāha...pe... vasesā**”ti.

Hetunoti hetusabhāvassa dhammassa. Satipi hetusabhāvassa ārammaṇapaccayādibhāve saviseṣe tāva paccaye dassentena “**adhipatipaccayādibhūtassa cā**”ti vuttaṃ. “Hetu hutvā paccayo”ti vutte dhammassa hetusabhāvata niddhāritā, na paccayavisesoti tassa adhipatipaccayādibhāvo na nivāritoti āha “**etenapi so eva doso āpajjati**”ti. **Tenāti** hetubhāvaggahaṇena. **Idhāti** “hetupaccayo”ti ettha. **Dhammaggaṇanti** alobhādidhammaggaṇaṃ. **Sattiviseso** attano balaṃ sattikāraṇabhāvo, yo rasotipi vuccati, svāyaṃ anaññasādhāraṇatāya dhammato anaññopi paccayantarasaṃavāyeyeva labbhamānattā añño viya katvā vutto. **Tassāti** hetubhāvasaṅkhātassa sāmattiyaṃ. **Hetu hutvāti** etthāpi hetubhāvavācako hetusaddo, na hetusabhāvadharmavācako āha “**hetu hutvā paccayoti ca vutta**”nti.

Evañca katvātiādīnā yathāvuttamattham pāliyaṃ samattheti. Yadi evaṃ aṭṭhakathāyaṃ dhammasseva paccayatāvacaṇaṃ kathanti āha “**aṭṭhakathāyaṃ panā**”tiādi. Teneva cettha amhehipi

“dhammato anaññopi añño viya katvā”ti ca vuttam. Yadi aṭṭhakathāyaṃ “yo hi dhammo, mūlaṭṭhena upakārako dhammo”ti ca ādisu dhammena dhammasattivibhāvanam katam, atha kasmā idha hetubhāvena paccayoti dhammasattiyeva vibhāvītāti codanam manasi katvā vuttam “**idhāpi vā...pe... dasseti**”ti. Dhammasattivibhāvanam panettha na sakkā paṭikkhipitunti dassento “**na hī**”tiādimāha. Attho etassa atthīti attho, atthābhidhāyivacananti vuttam “**etīti etassa attho vattatī**”ti, tasmā atthoti atthavacananti vuttam hoti. Tenāha “**tañca uppattiṭṭhitīnam sādharmaṇavacana**”nti. **Tañcāti** hi “vattatī”ti vacanam paccāmatṭham. Atha vā **etīti etassa atthoti** “etī”ti etassa padassa attho “vattatī”ti ettha vattanakiriya. **Tañcāti** tañca vattanam. Etasmiṃ panatthe **sādharmaṇavacananti** ettha **vacana-**saddo atthapariyāyo veditabbo “vuccatī”ti katvā. Yadaggena uppattiyā paccayo, tadaggena ṭhitiyāpi paccayoti koci āsaṅkeyyāti tadāsaṅkānivattanattham vuttam “**koci hi...pe... hetuādayo**”ti. Ettha ca yathā uppajjanārahānam uppattiyā paccaye satiyeva uppādo, nāsati, evam tiṭṭhantānampi ṭhitipaccayavaseneva ṭhānam yathā jīvitindriyavasena sahaṅgādharmānanti daṭṭhabbam. Ye pana arūpadhammānam ṭhitim paṭikkhipanti, yaṃ vattabbam, taṃ heṭṭhā vuttameva.

Yathā adhikaraṇasādhano patiṭṭhattho hetu-saddo, evam karaṇasādhano pavattiatthopi yujjātīti dassento “**hinoti**”tiādimāha. “Lobho nidānam kammānam samudayāyā”tiādivacanato hetūnam **kammanidānabhāvo** veditabbo.

Etenāti hetupaccayato aññeneva kusalahāvasiddhivacanena. **Eke** ācariyā. **Sabhāvatovāti** etena yathā aññesaṃ rūpagatam obhāsantassa padīpassa rūpagatobhāsakena aññena payojanam natthi sayam obhāsanasabhāvattā, evam aññesaṃ kusalādibhāvasādhakānam hetūnam aññena kusalādibhāvasādhakena payojanam natthi sayameva kusalādisabhāvattāti dasseti. Na sabhāvasiddho alobhādīnam kusalādibhāvo ubhayasabhāvattā taṃsampayuttaphassādīnam viyāti imamattham dasseti “**yasmā panā**”tiādinā. **Sā pana** aññapaṭibaddhā kusalādītā.

Na koci dhammo na hotīti rūpādibhedena chabbidhesu saṅkhatāsaṅkhatapaññattidhammesu kocipi dhammo ārammaṇapaccayo na na hoti, svāyam ārammaṇapaccayabhāvo heṭṭhā dhātuvibhaṅgavaṇṇanāyam vuttoyeva.

Purimābhisaṅkhārūpanissayanti “chandavato”tiādinā vuttākārena purimasiddham cittābhisaṅkhārakasāṅkhātam upanissayam. **Citteti** cittasīsenāyam niddeso daṭṭhabbo. Na hi cittameva tathābhisaṅkharīyati, atha kho taṃsampayuttadhammāpi. **Sādhayamānāti** vase vattayamānā. Vasavattanañcettha tadākārānuvidhānam. Chandādisu hi hīnesu majjhimesu pañītesu taṃtaṃsampayuttāpi tathā tathā pavattanti. Tenāha “**hīnādibhāvena tadanuvattanato**”ti. **Tenāti** attano vase vattāpanena, tesam vā vase vattanena. **Tehi chandādayo. Adhipatipaccayā honti** attādīnānam patibhāvena pavattanato. **Garukātabbam ārammaṇam** mahagatadhammalobhanīyadhammādi.

Tadanantaruppādaniyamoti tassa tasseva cittassa anantaram uppajjamānatam. **Taṃtaṃsahakārīpaccayavisiṭṭhassāti** tena tena ārammaṇādīnā sahakārīkaraṇena taduppādanasamatthataṃsaṅkhātam visesaṃ pattassa. **Tāyayevāti** yā vekhādāne pupphanasamatthatā vekhāpagame laddhokāsā, tāyameva.

Upasaggavasenaṃ atthaviseso hotīti vuttam “**saddatthamattato nānākaraṇa**”nti. **Vacaniyatthototi** bhāvattatho. Bhāvattthopi hi vacanaggahaṇānusārena viññeyyattā “vacaniyo”ti vuccati. **Nirodhuppādantarābhāvototi** purimanirodhassa pacchimuppādassa ca byavadhāyakābhāvato. **Nirantaruppādanasamatthatāti** etena nirodhānam nirodhasamakāluṭṭhāvādānam nivāreti. Sati hi samakālatte byavadhānāsaṅkā eva na siyā saṅghānābhāvato. Idamito heṭṭhā uddham tiriyaṃti vibhāgābhāvā attanā ekattamiva upanetvāti yojanā. Saṅghānābhāvena hi appaṭighabhāvūpalakkhaṇena vibhāgābhāvam, tena ekattamivūpanayanam suṭṭhu anantarabhāvam sādheti, sahāvattānābhāvena pana anantameva uppādanam.

Vibhāgato ñāṇena ākarīyatīti **ākāro**, dhammānaṃ pavattibhedo.

Nevasaññānāsaññāyatanaṃ phalasaṃpattīnaṃ nirodhupādānataratāyāti yojanā. **Purimacuttī** asaññāsatuppattito purimacuti. Yadi kālantaratā natthi, kathamidam “sattāhaṃ nirodhaṃ samāpajjitvā pañca kappasatāni atikkamītvā”ti vacananti āha “**na hi tesam...pe... vucceyyā**”ti. Nanu tesam antarā rūpasantāno pavattatevāti anuyogaṃ sandhāyāha “**na ca...pe... aññasantānattā**”ti. Yadi evaṃ tesam aññabhinnasantānaṃ viya aññamaññūpakārenapi bhavitabbanti codanāya vuttam “**rūpārūpa...pe... hontī**”ti. Tenetaṃ dasseti – yadipi rūpārūpadhammā ekasmiṃ puggale vattamānā visesato aññamaññūpakārahāvena vattanti, aññamaññaṃ pana visadisabhāvatāya visumyeva santānabhāvena pavattanato byavadhāyakā na hontī santativasena mithu apariyāpannattā, yato “aññamaññaṃ vippayuttā, viṣaṃsaṭṭhā”ti ca vuttanti. Upakārako ca nāma accantaṃ bhinnasantānānampi hotiyevāti na tāvatā santānābhedoti bhīyyopi nesaṃ byavadhāyakatābhāvo vedītabbo. Yathā samānajātikānaṃ cittupādānaṃ nirantaratā suṭṭhu anantarabhāvena pākāṭā, na tathā asamānajātikānanti adhippāyena “**javanānantarassa javanassa viya bhavaṅgānantarassa bhavaṅgassa viyā**”ti vuttam.

Paccayabhāvo cetthāti ettha **ca**-saddo byatireko. So yena visesenettha uppādakkhaṇaṃ, taṃ visesaṃ joteti. **Anantarapaccayādīnanti ādi**-saddena samanantarapaccayaṃ saṅgaṇhāti. Purepacchābhāvā, tadupādīkā vā uppādānirodhā **pubbantāparantaparicchedo**, tena **gahitānaṃ** khaṇattayapariyāpannānanti attho. Tenāha “**uppajjati vacanaṃ alabhantāna**”nti. Uppādakkhaṇasamaṅgī hi “uppajjati”ti vuccati. Tathā hi vuttam “uppādakkhaṇe uppajjamānaṃ, no ca uppannaṃ, bhāṅgakkhaṇe uppannaṃ no ca uppajjamāna”nti (yama. 2.cittayamaka.81). **Soti** anantarādīpaccayabhāvo. **Aparicchedanti** kālavasena paricchedarahitaṃ. **Yatoti** pubbantāparantavasena paricchedābhāvato. **Tenevāti** kālavasena paricchijja eva dhammānaṃ gahaṇato.

Uppattiyā paccayabhāvena pākāṭenāti idaṃ tassa nidassanabhāvanidassanaṃ. Siddhañhi nidassanaṃ. **Paccayuppannānanti** paccayanibbattānaṃ, attano phalabhūtānanti adhippāyo. **Sahajātabhāvenāti** saha uppannabhāvena. Attanā sahuppannadhammānañhi sahuppannabhāvena upakāratā sahajātapaccayatā. Tena ṭhitikkhaṇepi nesaṃ upakāratā vedītabbā. Evañhi “pakāsassa padīpo viyā”ti nidassanampi suṭṭhu yujjati. Padīpo hi pakāsassa ṭhitiyāpi paccayoti.

Aññamaññatāvasenevāti iminā sahajātādībhāvena attano upakārakassa upakāratāmattaṃ na aññamaññapaccayatā, atha kho aññamaññapaccayabhāvavasevāti lakkhaṇasaṅkarābhāvaṃ dasseti, na sahajātādīpaccayehi vinā aññamaññapaccayassa pavatti. Tenevāha “**na sahajātatādivasena**”ti. Yadipi aññamaññapaccayo sahajātādīpaccayehi vinā na hoti, sahajātādīpaccayā pana tena vināpi hontīti sahajātatādividhureneva pakārena aññamaññapaccayassa pavattīti dassento “**sahajātādi...pe... na hotī**”ti vatvā tamevatthaṃ pākāṭataraṃ kātuṃ “**na ca purejāta...pe... hontī**”ti āha. **Sahajātatādīti** ca **ādi**-saddena nissayaatthiavigatādīnaṃ gahaṇaṃ vedītabbaṃ.

Pathavīdhātuyaṃ patiṭṭhāya eva sesadhātuyo upādārūpāni viya yathāsakakiccaṃ karontīti vuttam “**adhiṭṭhānākārena pathavīdhātu sesadhātūna**”nti. Ettha **adhiṭṭhānākārenāti** ādhārākārena. Ādhārākāro cettha nesaṃ sātisaṃ tadadhīnavuttitāya vedītabbo, yato bhūtāni aniddisītabbatṭhānāni vuccanti. Evañca katvā cakkhādīnampi adhiṭṭhānākārena upakāratā suṭṭhu yujjati. Na hi yathāvuttam tadadhīnavuttīyā visesaṃ muñcitvā añño cakkhādīsū adesakānaṃ arūpadhammānaṃ adhiṭṭhānākāro sambhavati. Yadipi yaṃ yaṃ dhammaṃ paṭicca ye ye dhammā pavattanti, tesam sabbesam tadadhīnavuttībhāvo, yena pana paccayabhāvavisesena cakkhādīnaṃ paṭumandabhāvesu cakkhuviññādayo tadanuvīdhānākāreneva pavattanti, svāyamidam tesam tadadhīnavuttīyā siddho visesoti vutto. Evañhi paccayabhāvavisesāmaññe satipi ārammaṇapaccayato nissayapaccayassa viseso siddhoti vedītabbo. Svāyaṃ dhātuvibhaṅge vibhāvītoyeva. **Khandhādayo taṃtaṃnissayānaṃ khandhādīnanti** “upakārakā”ti ānetvā sambandhitabbaṃ.

Yaṃ kiñci kāraṇaṃ nissayoti vadati, na vuttalakkhaṇūpapannaṃeva. Etena paccayaṭṭho idha

nissayaṭṭhoti dasseti. **Tatthā**ti niddhāraṇe bhummaṃ. Tena vuttaṃ “**niddhāretī**”ti.

Suṭṭhukatataṃ dīpeti, kassa? “Attano”ti vuttassa pakatasaddena visesiyamānassa paccayassa. Kena katanti? Attano kāraṇehīti siddhovāyamattho. **Tathā**ti phalassa uppādanasamatthabhāvena. Atha vā **tathā**ti nipphādanavasena upasevanavasena ca. Tattha nipphādanam hetupaccayasamodhānena phalassa nibbattanam, taṃ suviññeyyanti anāmasitvā upasevanameva vibhāvento “**upasevito vā**”ti āha. Tattha **alliyāpanam** paribhogavasena vedittabbaṃ. Tenāha “**upabhogūpasevana**”nti. **Vijānanādivasenā**ti vijānanaañjānanānubhavanādivasena. **Tenā**ti yathāvuttaupasevitassa pakatabhāvena. **Anāgatānampi...pe... vuttā hoti**, pageva atītānam paccuppannānañcāti adhippāyo. Paccuppannassapi hi “paccuppannam utu bhojanam senāsanam upanissāya jhānam uppādentī”tiādivacanato (paṭṭhā. 2.18.8) pakatūpanissayabhāve labbhatīti.

Yathā ye dhammā yesam dhammānam pacchājātapaccayā honti, te tesam ekaṃsena vippayuttaatthiavigatapaccayāpi honti, tathā ye dhammā yesam dhammānam purejātapaccayā honti, te tesam nissayārammaṇapaccayāpi hontīti ubhayesu ubhayesam paccayākārānam lakkhaṇato saṅkarābhāvaṃ dassetuṃ “**vippayuttākārādīhi viṣiṭṭhā, nissayārammaṇākārādīhi viṣiṭṭhā**”ti ca vuttaṃ. Yathā hi pacchājātapurejātākārā aññamaññaviṣiṭṭhā, evaṃ pacchājātavippayuttākārādayo purejātanissayākārādayo ca aññamaññavibhattasabhāvā evāti.

Manosañcetanāhāravasena pavattamānehīti iminā cetanāya sampayuttadhammānampi tadanuṅgaṃ attano paccayuppannesu pavattimāha. **Tenevā**ti cetanāhāravasena upakārikā eva.

Payogena karaṇīyassāti etena bhinnajāti yaṃ tādisaṃ payogena kātuṃ na sakkā, taṃ nivatteti. Anekavāram pavattiyā āsevanaṭṭhassa pākāṭabhāvoti katvā vuttaṃ “**punappunam karaṇa**”nti. Ekassa pana paccayadhammassa ekavārameva pavatti. **Attasadisassā**ti arūpadhammasārammaṇatāsukkakaṇhādībhāvehi attanā sadisassa. Idaṃ paccayuppannavisesanam, “**attasadisasabhāvatāpādana**”nti idaṃ pana paccayabhāvavisesanam, tañca bhinnajātiyatādimeva visadisasabhāvataṃ nivatteti, na bhūmantaratādi. Na hi parittā dhammā mahaggataappamañānam dhammānam āsevanapaccayā na hontīti. **Vāsanam** vāsam gāhāpanam, idha pana vāsanam viya vāsanam, bhāvananti attho. **Ganthādīsū**ti ganthasippādīsū. Visaye cetam bhummaṃ, na niddhāraṇe. Tena ganthasippādīvisayā purimasiddhā ajjhayanādīkiriya “**ganthādīsū purimā purimā**”ti vuttā, sā pana āsevanākārā idha udāharaṇabhāvena adhippetāti āha “**purimā purimā āsevanā viyāti adhippāyo**”ti. Niddhāraṇe eva vā etaṃ bhummaṃ. Ganthādīvisayā hi āsevanā ganthādīti vuttā yathā rūpavisayajjhānam rūpanti vuttaṃ “rūpī rūpāni passatī”tiādīsū (ma. ni. 2.248; 3.312; paṭi. ma. 1.209; dha. sa. 248).

Attano viya sampayuttadhammānampi kiccāsādhikā cetanā cittassa byāpārabhāvena lakkhīyatīti āha “**cittapayogo cetanā**”ti. **Tāyā**ti tāya cetanāya. **Uppannakiriya**tiāvisiṭṭheti cittapayogasaṅkhātāya cetanākiriyaṃ uppattiyā viṣiṭṭhe visesam āpanne. Yasmiñhi santāne kusalākusalacetanā uppajjati, tattha yathābalaṃ tādisaṃ visesādhānam katvā nirujjhati, yato tattheva avasesapaccayasamavāye tassā phalabhūtāni vipākakaṭattārūpāni nibbattissanti. Tenāha “**sesapaccaya...pe... na aññathā**”ti. **Tesanti** vipākakaṭattārūpanam. **Tenā**ti cittakiriyaabhāvena. **Kim vattabbanti** asahajātānampi bhāvīnam upakārikā cetanā sahajātānam upakārikāti vattabbameva natthīti attho.

Nirussāhasantabhāvenāti ussāhanam ussāho, natthi etassa ussāhoti nirussāho, so eva santabhāvoti nirussāhasantabhāvo, tena. Ussāhoti ca kiriyaamayacittuppādassa pavattiākāro vedittabbo, yo byāpāroti ca vuccati, na vīriyussāho. Svāyam yathā asamugghātītānusayānam kiriyaamayacittuppādesu sātisayo labbhati, na tathā niranusayānam. Tato eva te santasabhāvā vipākuppādanabyāpārarahitāva honti, kiriyaamayacittuppādātāya pana saussāhā evāti tatopi visesanattham “nirussāhasantabhāvenā”ti vuttaṃ. **Etenā**ti nirussāhasantabhāvaggahaṇena. **Sārammaṇādībhāvenā**ti sārammaṇaarūpadhammacittacetāsikaphassādībhāvena. **Visadisavipākabhāvaṃ dasseti**

yathāvuttaussāhamattarahitasantabhāvassa vipakkabhāvamāpannesu arūpadhammesu eva labbhanato. **Soti** vipākabhāvo. **Vipākānaṃ payogena asādhettabbatāyāti** “chandavato kiṃ nāmana sijjhatī”tiādina cittaḥhisāṅkhārapayogena yathā kusalākusalā nipphādīyanti, evaṃ vipākānaṃ payogena anipphādetabbatā. **Payogenāti** kammaphaluppattimūlahetubhūtena purimapayogena. Yaṃ sandhāya vuttaṃ “payogasampattiṃ āgamma vipaccanti”tiādi. **Aññathāti** payogena vinā. **Sesapaccayesūti** kammassa vipākuppādane sahakārikāraṇesu. **Kammassa kaṭattāyeva** payoge sati asatipīti vuttamevatthaṃ avadhāraṇena dassento vipākānaṃ nirussāhataṃ pākaṭaṃ karoti. **Na kilesavūpasamasantabhāvo** yathā taṃ santānesu jhānasamāpattīsūti adhippāyo. Ayañca vipākānaṃ santabhāvo nānumāniko, atha kho paccakkhasiddhoti dassento “**santabhāvatoyevā**”tiādimāha. Tattha abhinipātaggaḥṇena kiccato pañcaviññāṇāni dasseti. Tenevāha “**pañcahi viññāṇehi na kiñci dhammaṃ paṭijānāti aññatra abhinipātamattā**”ti. **Tappaccayavatanti** vipākappaccayavantānaṃ, vipākappaccayena upakattabbānanti attho. **Avipākānaṃ** rūpadhammānaṃ. **Vipākānukulaṃ pavattinti** santasabhāvaṃ paccayabhāvamāha.

Yathāsakaṃ paccayehi nibbattānaṃ paccayuppannānaṃ anubalappadānaṃ upatthambhakkattāṃ, tayidaṃ āhāresu na niyataṃ tato aññathāpi pavattanato. Tathā sati tadeva tattha kasmā gahitanti codanaṃ manasi katvā āha “**satipi...pe... upatthambhakattenā**”ti. Tena padhānāppadhānesu padhānena niddeso ñāyagatoti dasseti. Kāmañcetta “rūpārūpānaṃ upatthambhakattenā”ti avisesato vuttaṃ, sāmāññajotanaṃ pana visese avatiṭṭhatīti yathārahaṃ paccayabhāvo niddhāretabbo. Svāyaṃ tesāṃ upatthambhakattassa padhānabhāvavibhāvaneneva āvi bhavatīti tameva dassento “**upatthambhakattañhi**”tiādimāha. Phassamanosañcetanāvīññāṇāni attanā sahaññādhānaṃ saḥupādānabhāvena paccayā hontīti āha “**satipi janakatte arūpīnaṃ āhārāna**”nti. **Upatthambhakattāṃ hoti** uppādato parampi nesaṃ paccayabhāvato. **Asatipi janakatte** upatthambhiyamānassa rūpassa aññehi yathāsakaṃ paccayehi janitattā. Tenāha “**catusamuṭṭhānikarūpūpatthambhakarūpāhārassā**”ti. Yadaggena rūpārūpāhārā attano phalassa uppattiyā paccayā honti, tadaggena ṭhitiyāpi paccayā hontiyevāti upatthambhakattāṃ janakattāṃ na byabharati, tasmā anupatthambhakkassa āhārassa kuto janakatā. Tenāha “**asati pana...pe... natthīti upatthambhakattāṃ padhāna**”nti. Yasmā janako ajanakopi hutvā āhāro upatthambhako hoti, anupatthambhako pana hutvā janako na hotiyeva, tasmāssa upatthambhakattāṃ padhānanti attho. Idāni janakattampi āhārānaṃ upatthambhanavaseneva hotīti dassento “**janayamānopi hī**”tiādimāha. **Avicchedavasenāti** santatiyā ghaṭṭanavasena.

Yadi adhipatiyaṭṭho indriyapaccayatā, evaṃ sante adhipatipaccayato indriyapaccayassa kiṃ nānākaraṇanti codanaṃ manasi katvā taṃ tesāṃ nānākaraṇaṃ dassento “**na adhipatipaccayadhammānaṃ viyā**”tiādimāha. Tattha **pavattinivāraketi** attano adhipatipaccayapavattiyā nivārake aññe adhipatipaccayadhamme. **Abhibhavitvā pavattanenti** purimābhisaṅkhārasiddhena dhoreyyabhāvena abhibhuyya pavattiyā. **Garubhāvoti** jeṭṭhakabhāvo. Ayañhettha saṅkhepattho – yena jeṭṭhakabhāvena chandādayo attano pavattivibandhake tulyayogīdhamme tadaññādhānaṃ viya abhibhuyya pavattanti, na so indriyapaccayatāya adhipatiyaṭṭhoti adhippetoti. Atha ko carahīti āha “**atha kho**”tiādi. **Dassanādikicesu** nimittabhūtesu **cakkhaviññāṇādīhi** cakkhādīhi paccayehi cakkhādīnaṃ anuvattanīyatāti sambandho. **Jīvane** anupālāne **jīvantehi** sahaññādhānaṃ jīvitassa, **sukhitādīhi** sukhitadukkhitasomanassitadomanassitupekkhitehi sahaññādhānaṃ sukhitādīnaṃ anuvattanīyatāti yojanā. **Taṃtaṃkicesūti** vuttameva dassanādikiccaṃ paccāmasati. Cakkhādayo paccayā etesanti cakkhādipaccayā, cakkhaviññāṇādayo. Tehi **cakkhādipaccayehi**. **Cakkhādīnanti** cakkhādijīvitasukhādisaddhādīnaṃ.

Tesu kicesūti dassanādikicesu. **Cakkhādīnaṃ issariyaṃ** adhipatiyaṭṭho, sā indriyapaccayatāti attho. **Tappaccayānaṃ** cakkhaviññāṇādīnaṃ **tadanuvattanena** tesāṃ cakkhādīnaṃ anuvattanena. **Tattha** dassanādikice. **Pavattīti** ca idaṃ tassa adhipatiyaṭṭhassa pākaṭakaraṇaṃ. Anuvattakena hi anuvattanīyo adhipatiyaṭṭho pākaṭo hoti. Yathā cakkhādīnaṃ kiccavasena adhipatiyaṭṭho, na evaṃ bhāvadavayassa. Tassa pana tādisena kāraṇatāmattenāti dassento “**itthipurisindriyānaṃ**

panā”tiādimāha. **Paccayehī**ti kammā dipaccayehi. **Tatoti** itthādiggahaṇapaccayabhāvato. **Taṃsahitasantā**neti itthindriyādisahasantāne. **“Sukhindriyadukkhindriyānīpi cakkhādiggahaṇena gahitānī”**ti idaṃ indriyapaccayameva sandhāya vuttaṃ, pacchājātādīhi pana tāni rūpadhammānampi paccayā hontiyeva.

Lakkhaṇārammaṇūpanijjhānabhūtānanti aniccatādīlakkhaṇassa pathavīkasiṇādiārammaṇassa ca upanijjhānavasena pavattānaṃ. **Vitakkādīnanti** vitakkavicārapīvedanācittakaggatānaṃ. **Upagantvā nijjhānanti** upanikacca nijjhānājjhānārammaṇassa jhānacakkhunā byattataraṃ olokanaṃ atthato cintanameva hotīti vuttaṃ **“pekkhanaṃ cintanañcā”**ti. Tenevāha **“vitakkañādivasena”**ti. **Vitakkādīnamyeva sādharmaṇo**, yena teyeva “jhānaṅgānī”ti vuccanti. **Sukhadukkhavedanādvayanti** sāmāññavacanampi upanijjhāyanaṭṭhassa adhikatattā anupanijjhānasabhāvameva taṃ bodhetīti āha **“sukhindriyadukkhindriyadvaya”**nti. Tañhi idhādhippetabbaṃ, na somanassadomanassindriyaṃ. Tena vuttaṃ **“adhippāyo”**ti. **Ajhānaṅgā upekkhācittakaggatā** pañcaviññāṇasahagatā daṭṭhabbā vitakkapacchimakkattā jhānaṅgānaṃ. **Yadi evanti** jhānaṅgavacaneneva ajhānaṅgānaṃ nivattanaṃ kataṃ, evaṃ sante. **Ekantena** na upekkhāya viya anekantena. Anekantikañhi upekkhāya ajhānaṅgattaṃ. Yadi ekantena ajhānaṅgaṃ sukhadukkhindriyaṃ, atha kathaṃ pasaṅgoti āha **“jhānaṅgaṭṭhāne niddiṭṭhattā”**ti. Atha vā yadi ekantena ajhānaṅgattaṃ vedanādvayaṃ, kathaṃ jhānaṅgavohāroti āha **“jhānaṅgaṭṭhāne niddiṭṭhattā”**ti. Satipī...pe... dassanattaṃ **“ṭhapetvā sukhadukkhindriyadvaya”**nti vuttanti yojanā. Yadi evaṃ yathāvuttavedanādvayena saddhiṃ tādīsā upekkhācittakaggatā kasmā na ṭhapitāti āha **“upekkhā...pe... atthī”**ti, pañcaviññāṇasahagatānaṃ jhānapaccayabhāvo pana natthi, na itaresanti adhippāyo. Gahaṇaṃ kataṃ upekkhācittakaggatānanti ānetvā yojanā.

Yato tato vāti duggatito vā sugatito vā saṃkilesato vā vodānato vā niyyānaṭṭho, svāyaṃ yathākkamaṃ sammā micchā vā hotīti āha **“sammā vā micchā vāti attho”**ti. **Ahetukacittesu na labbhanti**ti ettha ahetukacittesu eva na labbhanti evamavadhāraṇaṃ gahetabbaṃ, na ahetukacittesu na labbhanti evāti. Tasmā purimasmiñhi avadhāraṇe ahetukacittesu alābho niyatoti so patiyogīsu nivattito hoti. Tenāha **“sahetukacittesu alābhābhāvadassanattaṃ vutta”**nti. Dutīye pana ahetukacittāni alābhe niyatānīti tesu anavasesato alābhena bhavitabbaṃ. Tathā sati yo kesuci ahetukacittesu jhānapaccayo labbhanti, sopi nivārito siyā. Tena vuttaṃ **“na ahetukacittesu”**tiādi. Tattha **lābhābhāvadassanattanti** lābhābhāvasseva dassanattaṃ na vuttanti attho. Tena ekaccālābho apaṭikkhitto hoti. Tenevāha **“katthaci kassaci lābho na nivārito”**ti. **Evaṃ atthe gayhamāneti** evaṃ vuttanayena paṭhamapadāvadadhāraṇavasena atthe viññāyamāne. **Ettakameva viññāyeyyāti** ahetukacittesu kesuci cittesu jhānamaggapaccayesu kassaci paccayassa lābho na nivāritoti ettakameva viññāyeyya avisesena vuttattā. Kiṃ panettha upari kātābanti āha **“na savitakka...pe... kata”**nti. Yadi pi na kataṃ, atthato pana taṃ katamevāti veditabbaṃ.

Ahetukacittesu vā lābhābhāvadassanattetiādi pacchimapadāvadadhāraṇavasena atthadassanaṃ. **Tasmāti** yasmā ahetukacittesu na labbhanti evāti evaṃ niyame kariyamāne yathāvutto attho sambhavati, tasmā. Ayañca attho pāṭhantarenapi saṃsandatīti dassetaṃ **“yena alābhenā”**tiādi vuttaṃ. **Taṃ alābhanti** taṃ dhammasaṅgaṇiyaṃ pakāsitaṃ alābhaṃ. **Esāti** esa idha paṭṭhānavanāyamaṃ “ahetukacittesu na labbhanti”ti alābho vutto. Kīdiso pana alābhoti taṃ dassento **“yathā hi”**tiādimāha. Tattha **sahetukesūti** sahetukacittesu. **Saṅkaḍḍhitvāti** avisaṭe katvā. **Ekattagatabhāvakarāṇanti** ekabhāvāpādanamaṃ. **Imasmiṃ pana pakaraṇe jhānapaccayo vuttova** yathālābhapaccayākāravibhāvane desanāya tapparabhāvato.

Samanti avisamaṃ, sammā, saha vā. **Pakārehī**ti ekavatthukatādippakārehi. **Yuttatāyāti** saṃsaṭṭhatāya. Sā pana saṃsaṭṭhatā yasmā sabhāvato anekesampi satamaṃ ekattagamaṇaṃ viya hoti, tasmā vuttaṃ **“ekībhāvopagamanena viya upakārakatā”**ti. Evaṃ upakārakatā ca tesamaṃ bahūnaṃ sahacca ekattakāritāya nidassetabbā.

Yuttānampi satanti vuttappakārena saṃsaṭṭhatāya aññamaññasambandhatāya yuttānampi

samānānaṃ. Ayañca yuttatā na sampayuttapaccayatāya viya paccayadhammesu paccayuppannadhammesu ca veditabbā, kevalaṃ tattha arūpasabhāvattā ubhayaṃ samadhuraṃ, idha rūpārūpasabhāvattā vidhuranti ayaṃ viseso. **Vippayuttabhāvenā**ti viśamsaṭṭhabhāvena. Tena vuttaṃ **“nānattūpagamenā”**ti. Idañhettha vippayuttatāya viśesaṇaṃ yā nānattūpagamanasaṅkhātā vippayuttatā, na sā **“ñāṇavippayutta”**ntiādīsu viya abhāvamattanti, ayañca upakāratā vinā samsaggena sahāvaṭṭhāyitāya kiccakāritādīhi nidassetabbā. **Na hītiādi** **“yuttāna”**nti vuttassa atthassa samatthanaṃ **“tādise yoge satiyeva vippayuttapaccayatā”**ti. Tenāha **“na hī”**tiādi. Tassattho – yathā **“vatthu khandhānaṃ, sahaḥjātā kusalā khandhā cittasamuṭṭhānānaṃ rūpānaṃ, pacchājātā kusalā khandhā purejātassa imassa kāyassa vippayuttapaccayena paccayo”**tiādivacanato (paṭṭhā. 1.1.434) vatthusahajātapacchājātavasena yuttānaṃ atthi vippayuttapaccayatā, na evaṃ ayuttānaṃ vatthusahajāta...pe... atthīti. Yadi evaṃ rūpānaṃ rūpehi kasmā vippayuttapaccayo na vuttoti āha **“rūpānaṃ panā”**tiādi. **Vippayogoyeva natthi** sampayogāsāṅkāya abhāvato. Sampayujjamañānañhi arūpānaṃ rūpehi, rūpānañca tehi siyā sampayogāsāṅkā, sampayogalakkaṇaṃ pana natthīti tesāṃ vippayogo vutto. Tenāha **“catūhi sampayogo catūhi vippayogo”**ti.

Atthi me pāpakammaṃ katanti katabhāvavisiṭṭhā atthitā vuccamānā kiriyāya siddhabhāvameva dīpeti, na sijjhamānatanti āha **“nibbattatālakkaṇaṃ atthibhāva”**nti. Atthato pana kammaṃ anibbattaphalatāya evamettha atthitā veditabbā. **Atthi puggaloti** panettha tassā paññattiyā gaheṭṭabbatā, tadupādānaṃ vā pabandhāvicchēdo labbhatevāti vuttaṃ **“upalabbhamānatālakkaṇaṃ atthibhāva”**nti. Paccayadhammassa yadipi uppādato paṭṭhāya yāva bhaṅgā labbhamañatā atthibhāvo, tathāpi tassa yathā uppādakkhaṇato ṭhitikkhaṇe sātisayo byāpāro, evaṃ paccayuppannepīti vuttaṃ **“satipi janakatte upatthambhakappaṭṭhānā atthibhāvena upakāratā”**ti. **Vatthārammaṇasahajātādīnanti ādi**-saddena purejātapacchājātādīni saṅgaṇhāti. **Atthibhāveneva** na nissayādibhāvenāti **“sādhāraṇa”**nti vuttaṃ upakāratam vibhāveti.

Phassādīnaṃ anekesaṃ sahabhāvo natthīti idaṃ na ekacittuppadapariyāpanne sandhāya, atha kho nānācittuppadapariyāpanneti dassento **“ekasmiṃ phassādisamudāye sati dutiyo na hotī”**ti āha. Svāyamattho **“sahabhāvo natthī”**ti sahabhāvapaṭikkhepeneva viññāyati. Ettāvatā pana anavabujjhantānaṃ vasena vivarivā vutto. **Tenāti** anekesaṃ phassādīnaṃ sahabhāvābhāvena. Yadi natthitāmattena upakāratā natthipaccayatā, anānantarātītavasenapi siyāti codanaṃ sandhāyāha **“satipi”**tiādi. **Tānīti** purimataracittāni. **Dadamānaṃ viyāti** kasmā vuttaṃ, nanu okāsaṃ detiyeva. Tathā hi vuttaṃ **“pavattio kāsadānena upakāratā”**ti? Saccametam, evamajjhāsaya viya paccayadhammā abhāvaṃ gacchantīti dassanattam viya-saddaggaṇaṃ.

Natthitāvigaṇānaṃ satipi paccayassa dhammassa anupaladdhitāsāmaññe natthivigatapaccayesu labbhamañānaṃ viśesamattham vibhāvetuṃ **“ettha cā”**tiādi vuttaṃ. **Abhāvamattenti** hutvā abhāvamattena. Tenettha nirodhānantaraṃ paccayadhammassa upakāratam āha, yathā tam **“okāsadāna”**nti vuttaṃ. **Sabhāvavigamenāti** etena nirodhato parampi yato **“vigatatā nirodhappattatā”**ti vuttaṃ. Paccayadhamme yāsaṃ natthitāvigaṇatānaṃ vasena natthivigatapaccayā vuttā, tāsāṃ viśese dassite natthivigatapaccayānaṃ viśeso dassito hotīti **“natthitā ca nirodhānantarasuññatā vigatatā nirodhappattatā”**ti vuttaṃ, tattha nirodhānantarā na nirodhasamakālāti adhippāyo. **Tathāti** iminā yathā paccayadhammāvisesepi natthivigatapaccayabhāvaviseso niddhārito, tathā atthivigatapaccayabhāvavisesoti imamattam upasaṃharati. Yathā hi nirodhānantarānirodhānapagamehi atthivigatātānanti. Kathaṃ panāyaṃ dhammāvisese paccayabhāvaviseso duviññeyyarūpena ṭhito sammā vibhāvissatīti āha **“dhammānañhī”**tiādi. **Tadabhisamayāya** tesāṃ paccayavisesānaṃ adhigamattham.

Catūsu khandhesu ekassapi asaṅgahitattābhāvato anantarādīhīti vibhattiṃ pariṇāmetvā yojanā. **Aññanti** sukhumarūpaṃ. Na hi tam purejātapaccayo hoti. Nanu ca rūparūpampi purejātapaccayabhāvena kusallatike nāgatanti āha **“rūparūpaṃ panā”**tiādi. **Aññattha āgatamevāti** yadipi kusallatike nāgataṃ,

sanidassanattikādīsu pana āgatattā na sakkā rūparūpassa purejātapaccayatam paṭikkhipitunti attho.

Paccayuddesavaṇṇanā niṭṭhitā.

Paccayaniddeso

1. Hetupaccayaniddesavaṇṇanā

1. Hetupaccayena paccayabhāvo hetupaccayoti uddiṭṭho, na hetupaccayadhammoti attho. **Soti** hetubhāvena paccayo. Ettha ca paṭhamavikappe yo hetupaccayena paccayabhāvo vutto, yo ca dutiyavikappe hetubhāvena paccayo vutto, so yasmā atthato yathāvuttassa paccayadhammassa yathāvuttānaṃ paccayuppannānaṃ hetupaccayabhāvoyeva, tasmā vuttam **“ubhayathāpi hetubhāvena upakāratā hetupaccayoti uddiṭṭhoti dassitam hoti”**ti. Yathā cettha, evaṃ **“ārammaṇapaccayena paccayabhāvo, ārammaṇabhāvena vā paccayo ārammaṇapaccayo”**tiādina ārammaṇapaccayādīsu attho netabboti dassento **“esa nayo sesapaccayesupī”**ti āha. **Dhammasabhāvo eva, na dhammato aññā dhammasatti nāma atthīti. Upakāraṃ dhammanti paccayadhammaṃ āha. Upakāratanti paccayatam.**

Paccattaniddiṭṭhoti paccattavasena niddiṭṭho, paṭhamāya vibhattiyā niddiṭṭhoti attho. **Tenāti** paccayadhammaniddesabhūtena paccattaniddiṭṭhena paṭhamena hetusaddena. **Etassāti** hetusaddābhidheyyamatthamāha. So hi chabbidho navavidho dvādasavidhoti anekabhedenā bhinnopi hetubhāvasāmaññena ekajjhaṃ katvā ekavacanena vutto. Dutiyō hetusaddoti ānetvā yojanā. **Hetunā sampayuttānanti** adhikatattā vuttam **“hetu sampayuttānaṃ paccayo honto hetunā sampayuttānameva paccayo hoti, na vippayuttāna”**nti evaṃ padametaṃ. Na hi sabbena sabbaṃ hetuvippayuttadhammaṇaṃ hetupaccayo na hotīti. Sampayuttasaddassa sambandhīsaddattā **“sampayuttasaddassa sāpekkhattā”**ti vuttam. Sampayuttoti hi vutte kena sampayuttoti ekantato sambandhiantaraṃ apekkhitabbaṃ. Tenāha **“aññassa...pe... viññāyati”**ti. **Nāyaṃ ekantoti** yvāyaṃ **“dutiye hetusadde avijjamāne”**tiādina vutto attho, ayamekanto na hoti, aññāpekkhōpi saddo aññassa visesaṇaṃ hotīti idaṃ na sabbattheva sambhavaṭīti attho. **“Paccattaniddiṭṭho”**ti iminā paṭhamassa hetusaddassa sampayuttasaddānapekkhattaṃ āha. Tena vuttam **“hehupaccayena paccayoti ettheva byāvaṭo”**ti. **Avisiṭṭhāti** na visesitā. **Evanti** yathā hetusaddena aññattha byāvaṭena sampayuttā na visesiyanti kiccantarapasutattā, evaṃ sampayuttasaddena hetusaddavisesanarahitena tadatthamattabyāvaṭattā avisesato sampayuttānaṃ gahaṇaṃ siyā. Tena vuttam **“sampayuttasaddenā”**tiādi. **Āhārindriyāsampayuttassa abhāvatoti** āhārehi indriyehi ca nasampayuttassa dhammassa abhāvato. Na hi phassacetanāvīññāvedanājīvitavirahito cittuppādo atthi. Tenāha **“vajjetabbā...pe... taṃ na kata”**nti. **Vajjetabbaṃ** hetuvippayuttam.

Evampīti dutiyena hetusaddena gayhamānepi nāpajjati. Yadihi hetavo bahavo, sāmaññaniddeso cāyaṃ, tathāpi sāmaññajotanāya visesaniddiṭṭhattāti adhippāyo. Tena vuttam **“paccatta...pe... vuttattā”**ti. **Vināpi dutiyena hetusaddena hetusampayuttabhāve siddhepīti** iminā yaṃ vuttam **“nāyamekanto”**ti, tameva ulliṅgeti. **Na pana hetūnanti** idaṃ hetussa paccayabhāvena gahitattā paccayuppannabhāvena gahaṇaṃ na yujjeyyāti āsaṅkamānaṃ sandhāya vuttam. Tenevāha **“evampi gahaṇaṃ siyā”**ti. **Soti** dutiyō hetusaddo. Apare pana **“hetusampayuttakāna”**nti ettha hetūnañca sampayuttakānañcāti samāsaṃ vikappenti. **Paṭiṭṭhāmattādibhāvena nirapekkhāti** hetujhānamaggadhammā paṭiṭṭhānaupanijjhānaniyyānamattena aññadhammanirapekkhā hetujhānamaggapaccayakiccaṃ karonti. **Sāpekkhā evāti** aññasāpekkhā eva. **Āharitabbaisitabbā** āhārindriyapaccayehi upakattabbadhammā. **Tasmāti** yasmā yehi sāpekkhā, te attano paccayuppannadhamme paccayabhāveneva paricchinditvā tiṭṭhanti, tasmā. Tenāha **“te vināpi...pe... na kata”**nti. **Paricchindanti** visesenti. **Tanti** dutiyaṃ āhārindriyaggahaṇaṃ. **Tatthāti** āhārindriyapaccayaniddese. Na kevalaṅca tattheva, **idha ca** hetupaccayaniddese **dutiyaṃ hetuggahaṇena paccayuppannānaṃ puna visesanakiccaṃ natthi**, kasmā? Paccayabhūteneva hetunā

sampayuttānaṃ aññesañca hetūnaṃ avicchinntā.

Purimavacanāpekkho vuttasseva niddesoti taṃ-saddassa paṇiniddesabhāvamāha. **Pākaṭṭibhūteva** atthe pavattati, pākaṭṭibhāvo ca aññānapekkhena saddena pakāsītattā veditabbo. **Anapekkhaniyo** atthantarabyāvaṭṭattā. **Aññoti** hetusaddato añño. **Niddisitabbapakāsako vutto natthi**, yo taṃ-saddena paṇiniddesaṃ labheyya.

Yadi evaṃ “taṃsambuṭṭhānāna”nti ettha kathanti āha “**hetusampayuttakānanti iminā panā**”tiādi. Tattha **pana**-saddo satipi hetū hetusampayuttakānaṃ niddesabhāve hetusampayuttakasadde labbhamānānaṃ niddisitabbānaṃ pākaṭṭikaraṇasaṅkhātānaṃ hetusaddato viśesaṃ joteti. “Hetusampayuttakāna”nti imassa samāsapadassa uttarapadatthappadhānattamāha “**paccayuppannavacanena**”ti. Tena ca yathādhīppetassa atthassa ekadesova vuccati dhammānaṃ viśesanaṃ bhāvātoti āha “**asamattena**”ti. Viśesanaṃ nāma viśesitabbāpekkhanti āha “**paccayuppannavacanantarāpekkhena**”ti. Vuttatāya vinā paṇiniddesatā natthīti “**pubbe vuttenā**”ti vuttaṃ.

Taṃ-saddena niddisitabbanti “taṃsambuṭṭhānāna”nti ettha taṃ-saddena niddisitabbānaṃ hetusampayuttakasadde pākaṭṭibhūtaṃ kiṃ panāti pucchati. Te hetū ceva...pe... hetusampayuttakā ca taṃ-saddena niddisitabbānaṃ hetusampayuttakasadde pākaṭṭibhūtāti sambandho. **Aññathāti** “yehi hetūhi”tiādinā vuttappakāro aññathā aññena pakārena. Taṃ aññaṃ pakāraṃ dassento “**te hetū...pe... sambandhe sati**”ti āha. **Idhāti** anantaraṃ vuttasambandhanaṃ bhūmaniddesena parāmasati. **Tenevāti** paṭhameneva hetusaddena. **Taṃ-saddena niddisitabbāti** “taṃsambuṭṭhānāna”nti ettha taṃ-saddena niddisitabbānaṃ yathā pākaṭṭā, evaṃ pubbe “taṃsambuṭṭhānāna”nti vuttacodanāyampi evameva teneva taṃ-saddena niddisitabbānaṃ pākaṭṭā bhavituṃ arahanti. Tathā ca sati niddisitabbassa...pe... na yujjeyya. **Duvidhampi vā hetuggahaṇaṃ apantevāti** “hetū hetusampayuttakāna”nti ettha kataṃ dvippakārahetuggahaṇaṃ avicāretvā “taṃsambuṭṭhānānanti avatvā”tiādinā **taṃ-saddavacanīyataṃ codeti**, “niddisitabbassa apākaṭṭattā”tiādinā **pariharati ca. Hetū hi paccayāti** idaṃ ayaṃ hetupaccayakathāti katvā vuttaṃ.

Taṃ na vuttanti cittasambuṭṭhānavacanānaṃ na vuttaṃ. **Tassāti** sahaṃjātapaccayassa. **Kaṭṭārūpassa paccayabhāvo na vutto bhaveyya**, vuttova so “vipākābyākato eko khandho tiṇṇannaṃ khandhānaṃ kaṭṭattā ca rūpānaṃ sahaṃjātapaccayena paccayo, tayo khandhā ekassa khandhassa kaṭṭattā ca rūpāna”ntiādinā, tasmā cittacetāsikānaṃ kaṭṭārūpapaccayabhāvo na sakkā nivāretuṃ. **Tatthāti** sahaṃjātapaccayaniddese. Tattha hi “cittacetāsikā dhammā cittasambuṭṭhānānaṃ rūpānaṃ sahaṃjātapaccayena paccayo”ti cittasambuṭṭhānarūpāni eva niddiṭṭhāni. **Idhāpi** imasmim hetupaccayaniddeseṃ. **Evaṃ bhavitabbanti** “cittasambuṭṭhānāna”nti niddesena bhavitabbānaṃ. Yadi evaṃ kasmā tathā na vuttanti āha “**cittasambuṭṭhānānanti panā**”tiādi. **Viśesitaṃ hoti** sabbacittacetāsikāsamūṭṭhānabhāvena. **Vacanena**ti yathādhāsitena sahaṃjātapaccayaniddesavacanena. **Cittacetāsikānaṃ paccayabhāvo eva hi tattha paccayaniddese vutto**, na cittacetāsikānaṃ samūṭṭhānabhāvoti adhippāyo.

Hetuādiṭṭhānaṃ dasseti yadaggena tāni cittaṭṭhānaṃ dasseti, tadaggena taṃsambuṭṭhānaṃ dasseti. **Ārammaṇametānaṃ hoti**ti yadetaṃ kusālākusalacetānāvasena manodvāre cetānaṃ sesadvāresu kāyavacīpayogavasena saṅkappaṇaṃ, yañca kāmarāgādīnaṃ santāne anusayanaṃ, etaṃ ārammaṇaṃ eso paccayo kammaviññānaṃsa ṭhitiyā paṭiṭṭhānāya. **Paṭiṭṭhite**ti kammaṃ jāvēpetvā paṭisaṅkhaṇānaṃsa matthatāpaṭiṭṭhāpatte kammaviññāne viruḷhenti tato eva kammaviññānato paṭisaṅkhaṇānaṃsa bīje **viruḷhe** viruhanteti attho. Atha vā **paṭiṭṭhā viññānaṃsa hoti**ti kilesābhisaṅkhaṇānaṃsa kammaviññānaṃsa ṭhitiyā pavattiyā ārammaṇe paccaye paṭisiddhe āyatipaṭisaṅkhaṇānaṃsa paṭiṭṭhā hoti, **tasmim** paṭisaṅkhaṇānaṃsa punabbhavābhiniṭṭhāvasena **paṭiṭṭhite** paṭiṭṭhahante **viruḷhe** bījabhāvena viruhante nāmarūpassa avakkanti hoti evamettha attho veditabbo. Tenāha “**paṭisaṅkhaṇānaṃsa viññānapaccayatā**

vuttā”ti.

Purimatarasiddhāyāti khettabhāvanibbattiyā puretameva siddhāya pathaviyā. Attalābhoyeva cettha patiṭṭhānaṃ, na paṭiladdhattabhāvānaṃ avatṭhānanti dassento “**patiṭṭhānaṃ kammaṃ kaṭattā uppattīti vuttaṃ hotī**”ti āha.

Sesarūpānanti paṭisandhikkhaṇe pathavīdhātuādīnaṃ sesarūpānaṃ, pavatte pana tisantatirūpānampi. **Sahabhavanamattaṃ vā dasseti**. Sahabhāvenapi hi atthi kāci viśesamattā. **Katthaci katthacīti** pakatikālabhāvaviśesādike. Tatiyapakatiyañhi paṭhamakappikakāle ca bhāvakalāpo natthi, rūpabhāve kāyakalāpopi. **Ādi-saddena** tattheva ghānajiṅghakalāpā, kāmbhāve ca andhādīnaṃ cakkhādīkalāpā saṅgayhanti. **Katthaci abhāvābhāvato**ti nāmarūpokāse katthacipi abhāvābhāvato.

Tesanti pavattiyāṃ kaṭattārūpādīnaṃ. Na hi hetu pavattiyāṃ kaṭattārūpassa paccayo hoti, utuāhārajānaṃ pana sambhavoyeva natthi. Tena vuttaṃ “**paccayabhāvappasaṅgoyeva natthī**”ti. **Na pana labbhati** paccayapaccanīye tādisassa vārasa anuddhaṭattā. **Idanti** “pavattiyāṃ kaṭattārūpādīnaṃ paccayabhāvapaṭibhānato”ti idaṃ “hetū sahaṭāna”nti adesaṇāya parihāravacanaṃ, īdisī pana codanā anokāsā evāti dassetuṃ “**bhagavā panā**”tiādi vuttaṃ. Yo hi dhammo yathā bhagavatā desito, so tatheva gahettaboti.

Hetupaccayaniddesavaṇṇanā niṭṭhitā.

2. Ārammaṇapaccayaniddesavaṇṇanā

2. Uppajjanakkhaṇeyevāti ettha uppādato paṭṭhāya yāva bhaṅgā uddhaṃ pajjanaṃ gamaṇaṃ pavattanaṃ uppajjanaṃ, tassa khaṇo, tasmimṃ uppajjanakkhaṇeti evaṃ vā attho daṭṭhabbo. Evañhi sati uppajjanasaddena uppannasaddena viya sabbe pavattamānabhāvā saṅgahitā honti, na uppādamattaṃ. **Tenāti** cakkhuvīññānādīnaṃ vattamānakkhaṇeyeva rūpādīnaṃ ārammaṇapaccayattena. **Anālambiyamānānanti** sabbena sabbamṃ nālambiyamānānanti attho. Aññathā hi yathāvuttānaṃ rūpādīnaṃ yadā ārammaṇapaccayattābhāvo, tadā anālambiyamānatāvāti. **Sabbarūpānīti** sabbāni rūpāyatanāni, yattakāni tāni āpāthagatāni yogyadesa ṭhitāni, tāni sabbānīti attho. **Saha na hontīti** ekajjhaṃ ārammaṇaṃ na honti. Satipi hi anekesaṃ ekajjhaṃ āpāthagamane yattha yattha pubbābhogo, taṃ taṃyeva ārammaṇaṃ hoti, na sabbamṃ. Nīlādisaṅghātavasena cetamṃ vuttaṃ, na paccemaṃ nīlādirūpāyatanamattavasena. Samuditānīyeva hi rūpāyatanāni cakkhuvīññāṇassa ārammaṇaṃ, na viṣuṃ viṣunti dhātuvibhaṅgavaṇṇanāyaṃ dassitoyaṃ nayo. Yaṃ pana aṭṭhakathāyaṃ “te te viṣuṃ viṣuṃ ārammaṇapaccayo hontī”tipi vuttaṃ, tampi yathāvuttamevatthaṃ sandhāya vuttaṃ. Aññathā rūpāyatanamṃ manindriyagocaraṃ nāma na siyā. Saddādisupi eseva nayo. Tenevāha “**tathā saddādayopi**”ti. “Saha na hontī”ti vuttamatthaṃ pāḷiyā vibhāvetuṃ “**yaṃ yanti hi vacanaṃ rūpādīni bhindati**”ti āha.

“Ye ete”tiādiko purimo attho, “na ekato hontī”tiādiko pana pacchimo, “sabbārammaṇatādivasena vā idhāpi attho gahettabbo”ti kasmā vuttaṃ. Na hi “yaṃ yaṃ vā panārabbhā”ti imissā pāḷiyā viya “yaṃ yaṃ dhammaṃ ārabbhā”ti imassa pāṭhassa purato manovīññāṇassa sabbārammaṇatā nāgatā. Vuttañhi “sabbe dhammā manovīññādhātuyā taṃsampaṃyuttakānañca dhammānaṃ ārammaṇapaccayena paccayo”ti. Na hi anantameva pāḷiyā sarūpato āgatamatthaṃ gahetvā padantaraṃ saṃvaṇṇetabbaṃ. Tattha hi “rūpārammaṇaṃ vā”tiādīnā niyamavasena cha ārammaṇāni vatvā “yaṃ yaṃ vā panārabbhā”ti vacanaṃ sabbārammaṇatādidassananti yuttamevetanti, idha pana sabbārammaṇataṃ vatvā puna “yaṃ yaṃ dhammaṃ ārabbhā”ti vuccamānaṃ sabbārammaṇatādidassananti kathamidamṃ yujjeyya? Kamābhāvopi “sabbe dhammā”ti avisesavacaneneva siddho ārammaṇānupubbīyāva aggahitattā. Na hi manodhātuyā viya manovīññādhātuyā idha ārammaṇāni anupubbato gahitāni, tattha viya vā eteneva niyamābhāvopi saṃvaṇṇitoti veditabbo. Tasmā aṭṭhakathāyaṃ vuttanayenevettha attho gahettabbo.

Pavattanti pavattanaṃ. Nadiyā sandanaṃ pabbatassa tñhānanti hi vuttā aviratamavicchedanāyaṃ tathāpavattikiriyāva. Tenāha “**avirataṃ avicchinnaṃ sandanti**”ti. **Evanti** yathā “sandanti”ti vattamānavacanaṃ vuttaṃ, evaṃ “ye ye dhammā uppajjanti”ti sabbasaṅgahavasena uppajjanassa gahitattā ārammaṇapavaggato “uppajjanti”ti vattamānavacanaṃ vuttanti attho. Tenāha aṭṭhakathāyaṃ “**sabbakālasaṅgahavasena**”tiādi. Tathā ca vuttaṃ “**atītānāgata...pe... adhippāyo**”ti, atītānāgatapaccuppannānaṃ cittacetāsikānanti attho. **Samudāyavasenā**ti cittena rāsīkaraṇavasena. **Adhippāyoti** iminā vattamānupacārena vināva “ye ye dhammā uppajjanti”ti ettha vattamānatthaṃ sakkā yojetunti imamattaṃ ulliṅgeti. Tenāha “**ime panā**”tiādi. Yādiṇi paccayadhammā keci atītā anāgatāpi honti, paccayuppannadhammo pana paccuppanno evāti āha “**atītānāgatānaṃ na hontī**”ti. Uppāde vā hi paccayuppannassa paccayena bhavitabbaṃ tñhitiyaṃ vāti. **Tasmāti** yasmā atītānāgatā paramatthato natthi, tasmā. **Tesūti** paccayuppannesu. **Taṃtaṃpaccayāti** taṃ taṃ rūpādiārammaṇaṃ paccayo etesanti taṃtaṃpaccayā. **Ayamatto dassito hoti** samānasabhāvattā. Na hi atthābhedenā sabhāvabhedo atthi. **Na pana taṃtaṃpaccayavantatā dassitā hoti** atītānāgatesu nippariyāyena tadabhāvato. Yasmā **paccayavanto** paccayuppannāyeva, te ca **paccuppannāyevāti**.

Yaṃ yaṃ dhammaṃ te te dhammāti yaṃnimittāyaṃvacanabhedo, taṃ dassetuṃ “**ettha cā**”tiādi āradhāṃ. Rūpārūpadhammā hi kalāpato pavattamānāpi cittacetāsikānaṃ kadāci viṣuṃ viṣuṃ ārammaṇaṃ honti, kadāci ekajjhaṃ, na ettha niyamo atthi, purimābhogoyeva pana tathāgahaṇe kāraṇaṃ. Tayimaṃ dīpetuṃ bhagavatā yaṃvacanabhedo katoti ca sakkā vuttuṃ, yasmā pana ekakalāpapariyāpannānampi dhammānaṃ ekajjhaṃ gahaṇe na samudāyo gayhati tadābhogābhāvato, atha kho samuditā dhammā evāti sahaggahaṇampi viṣuṃgahaṇagatikaṃ, tasmā viṣuṃgahaṇasabbhāvadīpanatthaṃ “yaṃ ya”nti vatvā satīpi viṣuṃgahaṇe te sabbe ekajjhaṃ ārammaṇapaccayo hontīti dassanatthaṃ “te te”ti vuttanti imamattaṃ dassento “**cattāro hi khandhā**”tiādimāha. Tattha **vedanādīsūti** vedanādīsū catūsū khandhesu abhinditvā gahaṇavasena, bhinditvā pana gahaṇavasena phassādīsū. **Yo ca rūpādikoti** idaṃ viññāṇantarassa sādharmaṇārammaṇavasena vuttaṃ, **ye ca aneke phassādayoti** idaṃ asādharmaṇārammaṇavasena. **Te sabbeti** te sādharmaṇāsādharmaṇappabhede sabbepi ārammaṇadhamme. **Ekekameva ārabha uppajjantīti** ettha yaṃ vattabbaṃ, taṃ heṭṭhā vuttameva. **Rūpārammaṇadhammā ca aneke** nīlādibhedato. **Tathāti** aneke. Tena bherisaddādiḷe, mūlagandhādiḷe, mūlarasādiḷe, kathinasamphassādiḷe, vedanādiḷe ca saṅgaṇhāti. **Aneketi** hi iminā anekakalāpagatānaṃyeva vaṇṇādīnaṃ indriyaviññāṇārammaṇabhāvamāha. Sāmaññato hi vuttaṃ yathārahaṃ bhinditvā nidassitabbaṃ hotīti.

Kusalavipākassāti kusalassa vipākassa ca. **Na hi nibbānaṃ pubbe nivutthanti** idaṃ “diṭṭhanibbānoyevā”tiādinā vakkhamānameva atthaṃ hadaye tñhapetvā vuttaṃ. Pubbenivāsānussatiñāṇena hi nibbānavibhāvanaṃ aditṭhasaccassa vā siyā diṭṭhasaccassapi vā. Tattha aditṭhasaccena tāva taṃ vibhāvetumeva na sakkā appaṭividdhattā, itarassa pana pageva vibhūtamevāti taṃ tena vibhāvitaṃ nāma hotīti adhippāyo. Ettha ca “**na ca taṃ vutta**”nti iminā pubbenivāsānussatiñāṇassa nibbānārammaṇakaraṇābhāvaṃ āgamato dassetvā “**na hi nibbāna**”ntiādinā yuttito dasseti. Tattha “**na pubbe nivutthaṃ asaṅkhatattā**”ti kasmā vuttaṃ? Gocarāsevanāya āsevitassapi nivutthanti icchitattā. Diṭṭhasaccoyeva hi pubbenivāsānussatiñāṇena nibbānaṃ vibhāveti, na aditṭhasacco. Taṃ pana ñāṇaṃ khandhe viya khandhapaṭibaddhepi vibhāvetīti nibbānārammaṇakhandhavibhāvane nibbānampi vibhāvetīti sakkā viññātuṃ. Etena payoanābhāvacodanā paṭikkhittāti daṭṭhabbā. **Evaṃ anāgatamaṣaṇepi yojetabbanti** yathā pubbenivāsānussatiñāṇassa nibbānārammaṇatā dassitā, evaṃ anāgatamaṣaṇepi yathārahaṃ yojetabbaṃ. Tattha pana “khandhapaṭibaddhavibhāvanakāle”tiādinā yojanā veditabbā. Tena vuttaṃ “**yathāraha**”nti. **Kassaci** abhiññāpattassapi rūpāvacarassa, pageva itarassa.

Ārammaṇapaccayaniddesavaṇṇanā niṭṭhitā.

3. Adhipatipaccayaniddesavaṇṇanā

3. Dhurasahacariyato dhoreyyo “dhura”nti vuttoti āha “**dhuranti dhuraggāha**”nti. Chandassa pubbaṅgamatāsiddhaṃ pāsamsabhāvaṃ upādāya aṭṭhakathāyaṃ “jeṭṭhaka”nti vuttanti tamevatthaṃ dīpento “**seṭṭha**”nti āha. Tathā hi vuttaṃ **aṭṭhasālīniyaṃ** “chandaṃ pubbaṅgamaṃ katvā āyūhita”nti. **Purimachandassāti** “chandādhipatī”ti purimasmīṃ pade niddesavasena vuttassa chandasaddassa **samānarūpena** sadisākārena. **Tadanantaram niddiṭṭhenāti** tassa purimassa chandasaddassa anantaram niddesavasena vuttana. Tato eva ca tamsamānatthātāya ca **tamsambandhena** “chandasampayuttakāna”nti ettha chandasaddeneva adhipatisaddarahitenāti attho. **Paccayabhūtassāti** adhipatipaccayabhūtassa. **Sampayuttakavisesanabhāvoti** attanā sampayuttadhammānaṃ so eva adhipatipaccayatāsāṅkhāto visesanabhāvo. **Esa nayoti** iminā “vīriyādhipati vīriyasampayuttakānantīādīsu purimavīriyassa samānarūpenā”tiādīnā vattabbaṃ atthavacanaṃ atidisati.

Kusalābyākatānaṃ pavattinti kusalābyākatānaṃ adhipatīnaṃ pavattanākāraṃ. **Aladdhaṃ** ārammaṇaṃ **laddhabbaṃ** labbhanīyaṃ, laddhuṃ vā sakkuṇeyyaṃ, dutiye pana atthe lābhamarahatīti **laddhabbaṃ**. **Avaññātanti** pageva anavaññātanti attho.

Appanāpattā kusalakiriyadhammā mahābalā sādhipatikā eva honti, tathā micchattaniyatāpīti āha “**appanāsadisā...pe... nuppajjantī**”ti. **Appanāsadisāti** appanāpattasadisā. **Kammakilesāvaraṇabhūtā ca teti** te micchattaniyatadhammā kammāvaraṇabhūtā, ye ānantariyappakārā kilesāvaraṇabhūtā, ye niyatamicchādīṭṭhidhammā, sampayuttacetanāya panettha kilesāvaraṇapakkhikātaṃ daṭṭhabbā ānantariyacetanāsampayuttassa paṭighassa kammāvaraṇapakkhikātaṃ viya. Paccakkhagati anantarātāya vinā bhāvinīti vuttaṃ “**paccakkhasaggānaṃ kāmāvacaradevānampī**”ti. Tena tesu ānantariyā viya asambhāvino ahetukābhinivesādayopīti dasseti.

Tividhopi kiriyārammaṇādhipatīti ettha ayaṃ kiriyārammaṇādhipatīti ajjhattārammaṇo adhippeto, udāhu bahiddhārammaṇoti ubhayathāpi na sambhavo evāti dassento “**kāmāvacarādibhedato panā**”tiādīmāha. Tattha parasantānagatānaṃ sārammaṇadhammānaṃ adhipatipaccayatā natthīti sambandho. **Abhāvato**ti avacanato. Avacanañhi nāma yathādhammasāsane abhidhamme abhāvo evāti eteneva anuddhaṭṭāpi avuttato veditabbā. Ajjhattārammaṇabahiddhārammaṇadvayavinimuttassa sārammaṇadhammassa abhāvato natthīti viññāyatīti vattabbe tameva viññāyamānataṃ sambhāvento “**natthīti viññāyamānepī**”ti āha. Tena vuttaṃ “**bahiddhā khandhe**”tiādī. **Rūpe eva bhavituṃ arahati** edisesu ṭhānesu arūpe asambhavatoti adhippāyo. Asambhavato ca yathāvuttapāḷianusāratoti veditabbanti. “**Vicārita**”nti kasmā vuttaṃ, nanu “atītārammaṇe anāgate khandhe garuṃ katvā assādetī”tiādivacanato arūpepi edisesu ṭhānesu khandhasaddo pavattateva. **Āvajjanakiriyasabbhāvato panāti** idaṃ yathādassitapāḷiyā virodhahariṇādhīppāyena vuttaṃ, avacanaṃ pana katthaci vineyyajjhāsāyena, katthaci nayadassanena hotīti kuto virodhāvasaro.

Adhipatipaccayaniddesavaṇṇanā niṭṭhitā.

4. Anantarapaccayaniddesavaṇṇanā

4. Yathāvuttā nirodhānantarasuññatā nirodhappattatā **okāsādānaviseso**, attano anurūpacittuppādanasamatthatā cittaniyamahetutā, tattha anantaruppādanasamatthatā ca saṅghānābhāvato suṭṭhutarāṃ nirantaruppādanasamatthatā ca **cittaniyamahetuviseṣo** daṭṭhabbo. **Dhātuvasenāti** viññāṇadhātumanodhātumanoviññāṇadhātuvasena. Ettakā eva hi dhātuyo bhinnasabhāvā anantarapaccayatāya niyamevā vattabbā, abhinnasabhāvā pana visesābhāvato purimatāmattamyeva visesaṃ purakkhatvā vattabbāti tā kusalādibhedena tathā vuttā. Tenāha “**kusalādivasena cā**”ti. Yā pana manodhātumanoviññāṇadhātuvasena anantarapaccayatā vattabbā, tattha manoviññāṇadhātu manodhātuyā anantarapaccayena paccayoti vuccamāno sammoho siyā, pure manodhātuyā anantarapaccayabhāvena vuttā, idāni manoviññāṇadhātu manodhātuyāti paccayapaccayuppannavisesā na viññāyeyya, manodhātuyā pana cakkhuvīññāṇādīdhātūnaṃ anantarapaccayabhāve vuccamāne niyamo

natthi. Tenāha “**manodhātu cakkhuvīññādhātuyāti cā**”ti. **Tathevāti** niyamābhāvato evāti attho. **Tasmāti** yasmā ito aññathā desanāya paccayapaccayuppannānaṃ visesābhāvo cittavisesadassanavicchedo niyamābhāvo cāti ime dosā āpajjanti, tasmā. **Nidassanenāti** dhātuvasena nidassanena. **Nayaṃ dassetvāti** “manovīññādhātu taṃsampayuttakā ca dhammā manodhātuyā taṃsampayuttakānañca dhammānaṃ anantarapaccayena paccayo”ti evamādikassa anantarapaccayatāggahaṇassa nayaṃ dassetvā. **Niravasesadassanatthanti** niravasesassa anantarapaccayabhāvino cittuppādassa dassanattham.

Sadisakusalānanti samānakusalānaṃ, samānatā cettha ekavīthipariyāpannatāya veditabbā. Tenevāha “**bhūmibhinnānampi paccayabhāvo vutto hotī**”ti. Samānavīthitā ca yasmā samānavedanā samānahetukā ca honti, tasmā “**vedanāya vā hetūhi vā sadisakusalāna**”nti āha. **Vā-saddo** cettha aniyamattho. Tena ñāṇasaṅkhārādibhedassapi vikappanavasena saṅgaho daṭṭhabbo. **Cutipi gahitā** taṃsabhāvattā. Bhavaṅgacittameva hi pariyosāne “cutī”ti vuccati. Kusalākusalānantarañca kadāci sā uppajjatīti **tadārammaṇampi gahitanti** daṭṭhabbaṃ, kiriyajavanānantaraṃ tadārammaṇuppattiyanti adhippāyo.

Kāmāvacarakiriyāya āvajjanassāti ayamettha attho adhippetoti dassento “**āvajjanaggahaṇena kāmāvacarakiriyāṃ visesetī**”ti āha. Tameva hi atthaṃ pākaṭataraṃ kātuṃ “**kāmāvacaravipāko**”tiādi vuttaṃ. **Voṭṭhabbanampi gahitaṃ** santīraṇānantarattāti adhippāyo.

Anantarapaccayaniddesavaṇṇanā niṭṭhitā.

6. Sahajātapaccayaniddesavaṇṇanā

6. Porāṇapāṭhoti purātano aṭṭhakathāpāṭho. **Imassāti** imassa padassa. **Avuttassāti** pāliyaṃ avuttassa. Yadi pi sahaḡatasaddassa atthasaṃvaṇṇanāyaṃ saṃsaṭṭhasaddassa viya samānatthassapi katthaci saddantarassa attho vuccati pariyāyavisesabodhanattham, tathāpi na mūlasaddassa attho vibhāvito hotīti dassento āha “**na ca...pe... hotī**”ti. “Aññaṃañña”nti ca “aññaañña”nti vattabbe **ma-kārāgamaṃ** katvā niddeso, kammabyatīhāre cetam padaṃ, tasmā itaretaranti vuttaṃ hoti. Paccayapaccayuppannānaṃ ekasmiṃyeva khaṇe paccayuppannapaccayabhāvassa icchitattā yo hi yassa paccayo yasmim khaṇe, tasmimyeva khaṇe sopi tassa paccayoti ayamettha aññaṃaññaṃpaccayatā. Tathā hi aṭṭhakathāyaṃ “añño aññassā”ti vatvā “iminā...pe... dīpetī”ti vuttaṃ. **Okkamaṃ** pavisananti attho. Āsanakkhaṇe hi dhammā purimabhavato imaṃ bhavaṃ pavisantā viya honti. Tena vuttaṃ “**paralokato imaṃ lokaṃ āgantvā pavisaṃtaṃ viya uppajjatī**”ti. Tasmā avisesena paṭisandhi okkantisaddābhidheyatī adhippāyena vuttaṃ “**okkanti...pe... adhippāyenāhā**”ti. **Taṃnivāraṇatthanti** tassa khaṇantare rūpīnaṃ sahaḡātapaccayabhāvassa “kañci kāle na sahaḡātapaccayena paccayo”ti nivāraṇattham. Tena padadvayena samānesu paccayapaccayuppannadhammesu purimato pacchimassa visesamattham dasseti.

Evañca “kañci kāle”ti padassa “keci kāleti vā, kismiñci kāle”ti vā vibhattivipallāsena attho gahetabboti adhippāyena paṭhamavikappaṃ dassetvā idāni pakārantarena dassetuṃ “**kañci kāleti keci kismiñci kāleti vā attho**”ti āha. Tena “kañcī”ti ayaṃ sāmāññaniddesoti dasseti. Yo hi ayaṃ “keci”ti paccattabahuvacanābhidheyo attho, yo ca “kismiñcī”ti bhummekavacanābhidheyo, tadubhayaṃ sati kālavantakālatāvibhāge kiṃ-saddassa vacanīyatāsāmāññaṃ pana ekajjhaṃ katvā “kañcī”ti pāliyaṃ vuttanti taṃ vibhajitvā dassetuṃ “**keci kismiñcī**”ti vuttaṃ. Aṭṭhakathāyaṃ pana “kismiñcī”ti bhummavaseneva vuttaṃ. **Tena** yathāvuttaatthavibhāgena padena. **Vatthubhūtāti** vatthusabhāvā. Hadayarūpameva sandhāya vadati. **Rūpantarānanti** hadayavatthuto aññarūpānaṃ. Arūpīnaṃ sahaḡātapaccayatam pubbe “okkantikkhaṇe nāmarūpa”nti ettha anivāritam nivāretīti yojanā, tathā vatthussa ca kālantare paṭisandhikālato aññasmiṃ kāle arūpīnaṃ nivāretīti. **Evañca katvāti**ādinā yathāvuttaatthavaṇṇanāya pāliyaṃ vibhattiniddesassa rūpakabhāvamāha. Punapi purimato pacchimassa upacayena visesaṃ dassetuṃ “**purimena cā**”tiādi vuttaṃ. Tattha **purimenāti** “okkantikkhaṇe

nāmarūpa”nti iminā paccayaniddesavacanena. “**Eko khandho vatthu ca tiṇṇaṃ khandhāna**”ntiadinā paṭiccavārādīpāṭhena. Atthavivaraṇaṇhi paccayaniddesapāḷiyā sabbepi satta mahāvārā. Vatthussa vattabbatte āpanne kinti paccayoti tassa nāmassāti yojanā. **Etenāti** “rūpino dhammā arūpīnaṃ dhammāna”nti etena vacanena. **Kevalassāti** nāmarahitassa vatthussa. **Tathāti** nāmassa paccayabhāvena.

Katthacīti “rūpino dhammā arūpīnaṃ dhammānaṃ kañci kālaṃ sahaḷātapaccayena paccayo”ti etasmim niddese. Ettha hi aññamañña sahaḷātapaccayabhāvo labbhati. **Vacanenāti** “aññamañña”nti iminā vacanena pāḷiyaṃ sahaḷātapaccayabhāvassa **asaṅgahitattā**, atthato pana labbhatevāti. Tenāha “**labbhamānepi**”ti. **Tassāti** aññamaññapaccayattassa. **Evanti** “na aññamaññavasena”ti iminā pakārena. **Samudāyekadesavasena sāmivacananti** avayavāvayavisambandhe avayavini sāmivacananti attho, **niddhāraṇe vā** “kaṇhā gāvīna”ntiādīsu viya.

Sahaḷātapaccayaniddesavaṇṇanā niṭṭhitā.

8. Nissayapaccayaniddesavaṇṇanā

8. Kismiñci kāleti idaṃ na labbhati sabbadāpi nissayapaccayatāya labbhamānattā. Sahaḷāp purejanti hi vibhāgaṃ anāmasitvā nissayatāmattameva nissayapaccayatā. **Vatthurūpaṃ pañcavokārabhave**ti vatthurūpaṃ pañcavokārabhave cāti ca-saddo luttaniddiṭṭho daṭṭhabbo. **Tassāti** āruppavipākaṭṭhapanassa. **Pakāsetabbattāti** iminā apākaṭṭhaṃ pākaṭṭhaṃ katvā vacanena codanā anokāsāti dasseti.

Nissayapaccayaniddesavaṇṇanā niṭṭhitā.

9. Upanissayapaccayaniddesavaṇṇanā

9. Upanissaye tayoti anantarārammaṇapakatūpanissayappabhede tayo upanissaye. **Anekasaṅgāhakatāyāti** anekesaṃ paccayadhammānaṃ saṅgahaṇato. **Ekanteneva honti** cittaniyamahetubhāvena pavattiniyamato. **Yesu padesūti** yesu kusalādīpadesu. **Saṅgahitoti** saṅgahaṃ gato, kusalādīpadesu yesaṃ padānaṃyeva anantarūpanissayo labbhatīti attho. **Tesu “kesaṅcī”ti na vuttaṃ**. Kasmā? **Na sakkā vuttaṃ** ekanteneva upalabbhanato. **Tesūti** kusalākusalapadesu. Na hi kusalo akusalassa anantarūpanissayo hoti, akusalo vā kusalassa, ārammaṇapakatūpanissayā pana anekantikā, tasmā tattha “kesaṅcī”ti vuttaṃ. **Siddhānaṃ paccayadhammānanti** paccayabhāvena purimanipphannaṃ kusalādīnaṃ kusalassa akusalassa vāti attho. **Akusalādīhīti** yathāsankhyaṃ akusalena kusalena vā. **Avisesenāti** yathāvuttavisesaṃ niyamaṃ aggahetvā akusalādīsu akusalakusalānaṃ “kesaṅcī”tiadinā.

Anārammaṇattā ārammaṇūpanissayaṃ pubbāparaniyamena appavattito anantarūpanissayaṃ na labhatīti yojanā. **Pakatassāti** nipphādītassa, upasevitassa vā. Na hi rūpasantānassa saddhādīnipphādānaṃ atthi, utubhojanādiupasevanaṃ vā sambhavati. Tenāha “**yathā hi...pe... rūpasantānenā**”ti. Nanu ca rūpasantāne pubbenāparaṃ viseso labbhati, so ca na vinā samānāḷāyena kāraṇenāti svāyaṃ pakatūpanissayaḷābhoti kadāci āsaṅkeyyāti āha “**yasmīncā**”tiādi. Tattha **tanti** utubījādikaṃ kammādi ca **tena** rūpena purimanipphanna. **Uppādanam** sābhisandhikaṃ daṭṭhabbaṃ. Adhipatīsu pubbābhisankhāro viya **pakappanaṃ** saṃvidhanaṃ. **Pakaraṇam** vuttalakkaṇena kāraṇabhāvena avaṭṭhānaṃ, yato kāraṇaviseso “pakatī”ti vuccati. Yadi evaṃ kasmā rūpasseva taṃ paṭikkhipiyatīti āha “**yathā ca...pe... daṭṭhabbā**”ti. Evampi utubījādīnaṃ ankurādīsu kathaṃ paccayavisesabhāvoti āha “**utubījādāyo pana...pe... bhāvato**”ti. Upanissayoti ca yasmā balavatākāraṇam adhippetam, tasmā na ettha ekantena purimanipphatti icchitabbā. Yadi evaṃ pāḷiyaṃ kathaṃ purimaggahaṇanti āha “**purimapurimānaṃyeva panā**”tiādi. Tepi vā parikappanavasena purimanipphannaṃyeva nāma hontī. Na hi asaṃviditākāre vatthusmim patthanāpavattīti. Tenāha

“**taṃsamānalakkhaṇatāyā**”ti.

Dhammeti puggalasenāsanapaññattīnaṃ upādānabhūte dhamme. **Ayaṃ nayoti** paññattimukhena paññāpetabbā tadupādānabhūtā dhammā gayhantīti yathāvutto nayo. **Etthevāti** “senāsanampi upanissayapaccayena paccayo”ti etasmiṃyeva vacane. Kathaṃ paccuppanassa pakatūpanissayabhāvoti codanāya “vakkhatī”tiādīnā āgamaṃ dassetvā yuttim dassetuṃ “**paccuppanānampica tādisānaṃ pubbe pakatattā**”ti vuttaṃ. **Tādisānanti** yādisā utuādayo paccupaṭṭhitā, tādisānaṃ tato **pubbe** puretaraṃ **pakatattā** pakatūpanissayayogyatāya āpāditattā.

Kasiṇādīnampi ārammaṇūpanissayatā sambhavatīti katvā vuttaṃ “**iminā adhippāyena ‘ekaccāyā’ti āhā**”ti. Tathā hi “kasiṇamaṇḍalaṃ disvā”tiādīnā tassa upanissayabhāvo aṭṭhakathāyaṃ vutto.

Arūpāvacarakusalampi upanissayo hoti, pageva kāmāvacararūpāvacarakusalanti adhippāyo. Taṃ pana yathā upanissayo hoti, taṃ dassetuṃ “**yasmim kasiṇādīnhi**”tiādi vuttaṃ. **Anuppannajhānuppādaneti** rūpāvacarajjhānaṃ sandhāyāha, arūpāvacarajjhāne pana vattabbameva natthi. **Taduppādakakusalānanti** tassa rūpāvacaravipākassa uppādakakusalānaṃ, rūpāvacarakusalānanti attho. **Paṭisandhiniyāmakassāti** rūpāvacarapaṭisandhiniyāmakassa. **Cuttitoti** rūpāvacarapaṭisandhiyā anantarapaccayabhūtāya cutiyā. **Purimajavanassa vasenāti** cutiyā āsannajavanabhāvena. **Rūpāvacarakusalānaṃ arūpāvacaravipākassāti** etthāpi “taduppādakakusalāna”ntiādīnā ānetvā yojetabbaṃ. Yathā ca “rūpāvacarakusalānaṃ arūpāvacaravipākassa upanissayo”ti vuttaṃ, evaṃ “kāmāvacarakusalampi taduppādakakusalāna”ntiādīnā yojetabbaṃ. Lokuttaravipākassa tebhūmakakusalānampi pādakādivasena upanissayabhāvo pākaṭoyeva, tathā taṃtaṃbhūmakakusalānaṃ taṃtaṃbhūmakakiriyānaṃ, kāmāvacarakusalassa rūpārūpāvacarakiriyānaṃ, rūpāvacarakusalassa arūpāvacarakiriyāya upanissayabhāvoti imamattaṃ dassento “**evaṃ paccekānaṃ...pe... vedītabbo**”ti āha. “Saddhaṃ upanissāya dānaṃ detī”tiādīnā pakatūpanissayo uddesavaseneva pāṭho āgato, na vibhajanavasenāti āha “**pāḷiyampi...pe... vissajjito**”ti. Kusalattikādīsu anulomādībhedabhinnattā **pañhāvāresūti** bahuvacananiddeso.

Lokuttaranibbattaṃ upanissāya parassa sinehuppādane lokuttaradhammā upanissayo viya hontīti ayamettha lesa, bhāvino pana lokuttarassa akusalānaṃ upanissayatā sambhavatīti āha “**na idaṃ sārato daṭṭhabbanti adhippāyo**”ti. **Rūpāvacarādīkusalānanti** rūpārūpāvacaralokuttarakusalānaṃ uppādiyamānassa rūpāvacarakusalassāti yojanā. Rūpāvacarakiriyassa ca arūpāvacaravipāko upanissayo kathanti āha “**pubbe nivutthādīsu...pe... arahato**”ti. Taṃ taṃ vipākaṃ patthento tassa tassa vipākassa hetubhūtaṃ kusalaṃ nibbatetīti vipākānaṃ kusalūpanissayatāti āha “**catubhūmakā...pe... upanissayo**”ti. Lokiyakusalānaṃ pana lokuttaravipākā upanissayo na hontīti dassento “**yadipi**”tiādīmāha. Teneva hi “tathā tebhūmakavipāko”ti tebhūmakaggahaṇaṃ kataṃ. Tattha **tenāti** anāgāminā. **Tanti** arahattaphalaṃ. **Tasmāti** adīṭṭhapubbattā. **Tāni viyāti** sotāpattiphalāni viya. **Tesanti** puthujjanādīnaṃ. **Imassāti** anāgāmino. Idaṃ vuttaṃ hoti – yathā puthujjanādīnaṃ santāne jhānādīnaṃ sotāpattiphalādīnaṃ na upanissayapaccayo anupaladdhapubbattā, evaṃ anāgāmino jhānādīnaṃ aggaphalaṃ upanissayapaccayo adīṭṭhapubbattā. Tenāha “**upaladdhapubbasadisameva hi anāgatampi upanissayo**”ti. Aṭṭhakathāyaṃ pana heṭṭhimaphalānaṃ kusalūpanissayatā vuttā eva.

Yathā vipākā kusalānaṃ, evaṃ kiriyāpi tesam upanissayo hotīti taṃ nayaṃ dassetuṃ “**kiriyaṃ atthapaṭisambhidādi**”ntiādi vuttaṃ. **Yonisomanasikāre vattabbameva natthīti** catubhūmakakusalassapi yonisomanasikāro upanissayo hotīti ettha vattabbameva natthi, tadatthaṃ yonisomanasikāraṃ pavattentassāti attho. **Tanti** yonisomanasikāraṃ. Akusalassa ca catubhūmakavipākassa upanissayo yonisomanasikāroti yojanā. **Evaṃ kiriyassapīti** yathā kusalassa yonisomanasikāraṃ vasena upanissayo vutto, evaṃ kiriyassapi yonisomanasikāraṃ vasena yojetabbanti attho. So hi taṃ upanissāya rāgādiuppādane akusalassa vuttanayena

kusalākusalūpanissayabhāvamukhena catubhūmakavipākassa upanissayo hotiyeva. Yadi kiriyasaṅkhāto...pe... hotiyeva, atha kasmā pakatūpanissayavibhajane kiriyā na gahitā, utubhojanasenāsanāniyeva gahitānīti āha “**nevavipākanavipākadhammadhammesu...pe... nayadassanamattamevā**”ti. **Evamādikanti ādi**-saddena “kusalaṃ dhammaṃ sahaḥjāto abyākato dhammo uppajjati na upanissayapaccayā”ti evamādikaṃ saṅgaṇhāti. Upanissayapariyāyo upanissasaddoti katvā vuttaṃ “**viññāṇūpanisaṃ nāmarūpaṃ, nāmarūpūpanisaṅca saḷāyatanantiādikenā**”ti. Ettha hi viññāṇassa nāmarūpānaṃ phassarūpādīnaṃ cakkhāyatanādīnaṅca upanissayabhāvo vuttoti.

Upanissayapaccayaniddesavaṇṇanā niṭṭhitā.

10. Purejātapaccayaniddesavaṇṇanā

10. Dassitameva nayadassanavasenāti yojanā. Yadi dassitameva, kasmā vuttaṃ “sāvasesavasena desanā katā”ti āha “**sarūpena adassitattā**”ti. “Yaṃ yaṃ dhammaṃ purejātaṃ ārabha ye ye dhammā uppajjanti cittacetasiḥ dhammā, te te dhammā tesam tesam dhammānaṃ purejātapaccayena paccayo”ti evaṃ **sarūpena** pāḷiyaṃ **adassitattā**. **Iddhividhābhiññāya cāti ca**-saddena cutūpapātañāṇassapi saṅgaho daṭṭhabbo. Tassapi hi rūpadhammārammaṇakāle **aṭṭhārasasu yaṃ kiñci ārammaṇapurejātaṃ hoti** paccuppannārammaṇattā. “Cavamāne upapajjamāne”ti hi vuttaṃ. Dibbacakkhudibbasotañāṇesu ca vattabbameva natthi.

Itarassapi abhāvāti ārammaṇapurejātassapi abhāvā aggahaṇaṃ paṭisandhibhāvinoti yojanā. Satipi kassaci paṭisandhibhāvino ārammaṇapurejāte vibhūtaṃ pana katvā ārammaṇakaraṇābhāvato avijjamānasadisanti katvā vuttaṃ “**itarassapi abhāvā**”ti. Tenevāha “**paṭisandhiyā viya aparibhyattassa ārammaṇassa ārammaṇamattabhāvato**”ti. Santīraṇabhāvino manoviññāṇadhātuyāpi ekanteneva purejātapaccayo rūpādīni pañcārammaṇānīti yojanā. Ettha ca “manodhātūnaṅcā”tiādi “**tadārammaṇabhāvino**”ti padassa purato vattabbo, uppaṭipāṭiyā likhitaṃ.

Purejātapaccayaniddesavaṇṇanā niṭṭhitā.

11. Pacchājātapaccayaniddesavaṇṇanā

11. Niravasesadassitapurejātadassanavasenāti “catusamuṭṭhānikatisamuṭṭhānikarūpakāyassā”ti evaṃ niravasesato dassitassa purejātassa paccayuppannassa dassanavasena. Paccayā hi idha kāmāvacararūpāvacaravipākā, tesu kāmāvacaravipāko ca catusamuṭṭhānikarūpakāyassa paccayo, na itaro. Tenevāha “**rūpāvacaravipāko pana āhārasamuṭṭhānassa na hoti**”ti, tasmā “**tassevā**”ti vuttepi yathārahmattho veditabbo.

Pacchājātapaccayaniddesavaṇṇanā niṭṭhitā.

12. Āsevanapaccayaniddesavaṇṇanā

12. Pakārehi guṇitaṃ **paguṇaṃ**, bahukkhattum pavattiyā bhāvitanti attho. Atisayena paguṇaṃ **paguṇataraṃ**, tatoyeva **balavataraṃ**. Tassa bhāvo, tena paguṇatarabalavatarabhāvena **visiṭṭhaṃ** visesappattaṃ. Svāyaṃ viseso vipāke natthīti āha “**etena vipākābyākatato visesetī**”ti.

Āsevanapaccayaniddesavaṇṇanā niṭṭhitā.

13. Kammaṇapaccayaniddesavaṇṇanā

13. Evaṃsabhāvāti kammaṃpaccayena upakāraṃsabhāvā. **Samatthātā**ti ānubhāvo. **Tassā**ti vipākakkhandhakaṭṭārūpasāṅkhātassa phalassa. **Kammaṃpaccayabhāvo vuttoti** kammaṃpaccayena paccayabhāvo vutto. **Ekavokāre rūpampī**ti ekavokārepi rūpaṃ na janeti, pageva catuvokāreṭi attho.

Kammaṃpaccayaniddesavaṇṇanā niṭṭhitā.

14. Vipākappaṃpaccayaniddesavaṇṇanā

14. Yathā hi rūpabhāve saññīnaṃ taṃnibhattitapuññābhisaṅkhāreṇeva rūpuppatti, evaṃ asaññīnaṃpīti tattha kāmāvacarakammunā yathā vipākānurūpānaṃ paccayo honto kesañciyeva hoti, na sabbesaṃ, katthaciyeva hoti, na sabbattha, na evaṃ vipākānanti āha “**ekantenā**”ti. **Tesaṃ vasaṇā**ti tesaṃ vipākappaṃpaccayaḷābhīnaṃ vipākakkhandhānaṃ vasaṇa. **Na hī**tiādinā “ekantenā”ti vuttamatthaṃ byatirekato vibhāveti. **Bhūmidvayavipākoti** kāmāvacararūpāvacaravipāko āruppe rūpassa na hi paccayoti yojanā.

Vipākappaṃpaccayaniddesavaṇṇanā niṭṭhitā.

15. Āhārapappaṃpaccayaniddesavaṇṇanā

15. Kevalāya oḷāya ajjhoharaṇassa abhāvā “**asitapītādivatthūhi saha ajjhoharitovā**”ti vuttaṃ. Khādanīyabhojanīyappabhede asite tāva kabalīkārātā hotu, pātābbādike pana kathanti āha “**pātābba... pe... hontī**”ti. Yebhuyyavasena vā evaṃ vuttanti veditābbaṃ.

Anupālakoti upatthambhako. **Cittasamuṭṭhānassa** kāyassa **āhārapappaṃpaccayabhāvo** kabalīkārāhārassa vicāretvā gahetābbo. Kasmāti ce? Ettha kāraṇamāha “**na hī**”tiādinā. Sati hi paccayabhāve “cittasamuṭṭhāno kabalīkārāhāro cittasamuṭṭhānassa kāyassa āhārapappaṃpaccayena paccayo”tiādi vattābbaṃ siyā, na pana vuttaṃ, nocittasamuṭṭhānassa pana vuttaṃ. Tenāha “**tividhopi... pe... vutto**”ti.

Āhārapappaṃpaccayaniddesavaṇṇanā niṭṭhitā.

16. Indriyappaṃpaccayaniddesavaṇṇanā

16. “Missakattā”ti idaṃ indriyatāya rūpārūpajīvitindriyānaṃ ekajjhaṃ katvā desitāṃ sandhāya vuttaṃ, tasmā **missakattā**ti rūpajīvitindriyamissakattāti attho. **Jīvitindriyanti** arūpajīvitindriyaṃ. **Na sabbena sabbāṃ vajjitābanti** yathā pañhāpucchake arūpajīvitindriyaṃ missakattā na gahitaṃ, na evamidha arūpajīvitindriyaṃ aggahitanti attho.

Arūpānaṃ cakkhaviññāṇādīnaṃ **paccayantarāpekkhāni** āvajjanārammaṇādiññāpaccayasāpekkhāni **indriyappaṃpaccayā siyūṃ** cakkhādīnaṃ rūpārūpānaṃ aññamaññaṃ kadāci pi avinibbhuttābhāvassa abhāvato, paccayantarāsamodhānāpekkhātāya ca. **Yo pana nirapekkhoti** yathā cakkhādīni paccayantaresu sāpekkhāni, evaṃ sāpekkho ahutvā yo tattha nirapekkho indriyappaṃpaccayo hoti avinibbhuttādhamaṇaṃ yathā duvidhampi jīvitindriyaṃ, so attano...pe... natthīti yojanā. **Avinibbhuttānaṃ tesampi** līṅgādīnaṃ **siyūṃ** vinibbhuttānaṃ paccayuppannānaṃ indriyappaṃpaccayatābhāvassa adiṭṭhattā. Nanu cakkhādīnaṃ vinibbhuttānaṃ indriyappaṃpaccayabhāvo diṭṭhoti? Saccāṃ diṭṭho, na pana so samānajātiyāti dassento “**na hī**”tiādimāha. **Sati cevanti** evaṃ vuttappakāre samānajātiyaṃyeva avinibbhuttassa indriyappaṃpaccayabhāve sati **itthipurisindriyehi** saddhiṃ. Sahayoge hi idaṃ karaṇavacanāṃ. Yadipi itthipurisindriyāni līṅgādīnaṃ kalalādīkāle indriyappaṃpaccayatāṃ na phareyyuṃ tesaṃ tadā abhāvato. Ye pana rūpadhamā tadā santi, tehi avinibbhuttāva, tesaṃ kasmā na pharantīti āha “**aññesaṃ panā**”tiādi. **Abjābhāvato** animittābhāvato. **Tadanurūpānanti**

kalalādiavattānūrūpānaṃ **atthitaṃ icchanti**, yato “itthī, puriso”ti pakativibhāgo viññāyatīti tesam adhippāyo.

Kusalajātiyanti niddhāraṇe bhummaṃ. Ye pana “kusalajātika”nti paṭhanti, tesam paccattekavacanaṃ. **Visuṃ ekajāti vā bhūmi vā na hoti** tadekadesabhāvato. **Hetuādīsūpīti ādi-**saddena “akusalāhāresupi eseva nayo”ti evamādikaṃ saṅgaṇhāti. **Esa nayoti** yvāyaṃ “bhūmivasena vuttēsū”tiādinā arūpe alabbhamānassa indriyapaccayassa aṭṭhapane atthanayo vutto, esa nayo yojetabboti. **Tathā apaniyāpannakusalahetu, tathā akusalahetūti** etthāpi paṭhamāpaniyāpannakusalahetu domanassasahagatākusalahetu ca visuṃ ekajāti bhūmi vā na hontīti āruppe alabbhamānāpi visuṃ na ṭhapitāti yojetabbo. Esa nayo “akusalāhāresupi eseva nayo”ti evamādīsu.

Sati sahaṇāpaccayatte uppādakkhaṇepi indriyapaccayatā siyāti katvā vuttaṃ “**sahaṇāpaccayattābhāvaṃ sandhāyā**”ti. Vuttañhi “uppajjamāno saha uppajjamānabhāvena upakārako dhammo sahaṇāpaccayo”ti (paṭṭhā. aṭṭha. paccayuddesavaṇṇanā). Tassa pana sahaṇāpaccayattābhāvo yadipi aṭṭhakathāyaṃ “sahaṇāpaccayatā pana tassa natthī”ti sarūpeneva dassito, tathāpi taṃ ananujānanto “**uppāda...pe... nivāretu**”nti vatvā “**vakkhatī**”tiādinā tamatthaṃ samattheti. **Kammapaccayasadisanti** hi etena tassa uppādakkhaṇe paccayabhāvo pakāsīto. **Pavattēcāti ca-**saddena paṭisandhiyañca kaṭattārūpassa rūpajīvitindriyato añño indriyapaccayo na hi atthīti yojanā. **Paṭiccavārādayo** sampayuttavārapariyosānā **cha** vārā **uppādakkhaṇameva gahetvā pavattā** “kusalaṃ dhammaṃ paṭicca kusalo dhammo uppajjati hetupaccayā”tiādinā, na ṭhitikkhaṇanti adhippāyo. **Evañca katvāti** uppādakkhaṇameva gahetvā pavattattā. **Etesūti** yathāvuttēsū chasu vāresu. Keci pana “rūpajīvitindriyassa anupālanam uppādakkhaṇe na pākāṭam balavañca yathā ṭhitikkhaṇe pacchājātāpaccayalābhato thirabhāvappattiyāssa taṃ pākāṭam balavañca, tasmā ‘ṭhitikkhaṇe’ti vutta”nti vadanti.

Indriyapaccayaniddesavaṇṇanā niṭṭhitā.

17. Jhānapaccayaniddesavaṇṇanā

17. Somanassadomanassasaṅkhātānīti somanassadomanassapaniyāyena vuttāni, jhānaṅgabhāvavisesanato vā somanassadomanassabhūtāneva sukhadukkhāni jhānaṅgāni, na itarasukhadukkhānīti jhānaṅgabhūtānaṃyeva sukhadukkhānaṃ jhānaṅgabhāvadassanattam **somanassadomanassaggahaṇam kataṃ**. Idāni yathāvuttameva “**dvipaṅcaviññāṇēsū**”tiādinā vitthārato vibhāveti, taṃ suviññeyyameva. **Tenāti** visesanabhūtena somanassadomanassaggahaṇena.

Abhinipātamattattāti ārammaṇakaraṇamattabhāvato. **Cintanāpavattiyā** upanijjhāyanapavattiyā. **Yathāvutteneva kāraṇenāti** “upanijjhānākārassa abhāvato”ti etena kāraṇena. **Pubbetiādito. Cattāri aṅgāni vajjitānīti** sattasu aṅgesu dassiyamānesu cattāri aṅgāni vajjitāni. **Aṭṭhakathā hesāti** lesena apakāsetabbatāya kāraṇamāha. **Tīsipi ekameva vattabbaṃ siyā**, taṃsamānalakkhaṇatāya itaresam tiṇṇampi gahaṇam hotīti. **Tiṇṇam pana vacanenāti** upekkhāsukhadukkhānaṃ ajhānaṅgatādasanattana vacanena. **Tato** upekkhādito **aññassa** dhammassa cित्तेkaggatāya **jhānaṅganti uddhaṭabhāvo āpajjati** ajhānaṅgesu aggahitattā. **Yathāvuttakāraṇatoti** “upanijjhānākārassa abhāvato”ti vuttakāraṇato **aññena kāraṇena anuddhaṭabhāvo vā āpajjati** anupanijjhāyanasabhāvehi saddhiṃ aggahitattā upanijjhāyanākārabhāvato aññeneva kāraṇena cित्तेkaggatāya pāliyaṃ anuddhaṭabhāvo āpajjati. **Taṃdosapariharaṇatthanti** yathāvuttadosavinimocanattam.

Ye panātiādi padakāramattadassanaṃ. **Somanassādīhi**ti somanassadomanassajhānaṅgupekkhāhi. **Avibhūtabhāvo** upekkhanaṃ. Upekkhā hi avibhūtakiccā vuttā. **Samānaṃ kesam? Sukhādīnam,** kehi? **Somanassādīhi,** katham? **Sukha...pe... yuttatāti** yojanā. **Na cित्तेkaggatāyāti** sukhādīhi, tadaññehi abhiniropanādīhi ca anindriyakiccatāya ca anupanijjhāyanakiccatāya ca asamānatāya

pañcaviññāṇesu cित्तेkaggaṭāya jhānaṅgati anuddhaṭabhāve kāraṇaṃ na vattabbanti. **Sāti** cित्तेkaggaṭā. **Etthāti** “upekkhāsukhadukkhānī”ti etasmiṃ aṭṭhakathāvacane na gahitā. **Vicikicchāyuttamanodhātuādīsūti** vicikicchāsampayuttacitte manodhātuyā sampañcchanādīsū ca. **Tassāpi** cित्तेkaggaṭāyapi.

Jhānapaccayaniddesavaṇṇanā niṭṭhitā.

18. Maggapaccayaniddesavaṇṇanā

18. Duvidhampi saṅkappanti sammāsaṅkappo micchāsaṅkappoti ca evaṃ anavajjasāvajjabhedena duvidhampi. Vīriyaṃ samādhinti etthāpi eseva nayo. Saṅgaṇhitvā vitakkādibhāvasāmañña saha gahetvā, ekekameva katvā gahetvāti attho. **Tehi** micchāvācākammantājīvehi. **Idhāti** imasmiṃ maggapaccayaniddese **labbhamānāni ca** maggapaccayabhāvato, ca-saddena **alabbhamānāni ca** maggapaccayattābhāvā. Yadi evaṃ kasmā vuttānīti āha “**maggaṅgavacanasāmañña**”ti. Evam pariyaṇaniddeso idha kimatthiyoti codanaṃ sandhāyāha “**evaṇhi suttavohāropi dassito hotī**”ti. **Evaṃ pana dassentenāti** paramatthato amaggaṅgānīpi sutte maggaṅgavohārasiddhiyā idha maggaṅgehi saha dassentena. **Uddharitvāti** paduddhāraṃ katvā. Idāni micchāvācādīhi saddhiṃ dvādasāṅgāni na dassetabbāni, kasmāti ceti āha “**na hi pāliyaṃ...pe... vattabbo**”ti. **Tappaṭipakkhabhāvatoyeva micchāmaggaṅgāni**, na micchādiṭṭhiādayo viya sabhāvatoti adhippāyo.

Pariyaṇanippariyaṃ maggaṅgadassanatthepi atthavacane evaṃ na vattabbamevāti dassento “**pariyaṇa...pe... adhikaraṇānī**”ti āha. Tassattho – yathā “aññabhāgiyassa adhikaraṇassā”ti ettha pāḷigataadhikaraṇasaddapatirūpako añña adhikaraṇasaddo pāḷigatatadaññasādhāraṇatāya ubhayapadattho uddhaṭo “adhikaraṇaṃ nāma cattāri adhikaraṇānī”ti, evamidhāpi nippariyaṃ itarañca maggaṅgaṃ dassetukāmena pāḷigatatadaññasādhāraṇo maggaṅgasaddo uddharitabbo siyā, tathā na katanti. **Tasmāti** yasmā pāḷigatoyeva maggaṅgasaddo uddhaṭo, na tadaññasādhāraṇo, na ca atthuddhāramukhena adhippetattho niyamito, tasmā. **Tesūti** ahētukacittuppādesu. “Sammādiṭṭhi...pe... samādhayo”ti ettha saṅkappavāyāmasamādhayo sammāmicchāsaddhehi viśesetvā vuttāti āha “**sammādiṭṭhiādayo yathāvuttā santi**”ti. Saṅkappavāyāmasamādhippattā pana tattha keci santiyevāti. Atha vā **sammādiṭṭhiādayoti** vuttappakāre sammādiṭṭhiādikeye anavasese sandhāya vuttaṃ. Tenāha “**yathāvuttā**”ti. **Uppattiṭṭhānaniyamanatthattā** na viśesanatthattāti adhippāyo.

Maggapaccayaniddesavaṇṇanā niṭṭhitā.

20. Vippayuttapaccayaniddesavaṇṇanā

20. Sampayogāsaṅkāvatthubhūtoti sampayogāsaṅkāya adhiṭṭhānabhūto. Tenāha aṭṭhakathāyaṃ “arūpino hi khandhā cakkhādīnaṃ vatthūnaṃ abhantarato nikkhamantā viya uppajantī”ti.

Vippayuttapaccayaniddesavaṇṇanā niṭṭhitā.

21. Atthipaccayaniddesavaṇṇanā

21. Yasmīṃ sati yaṃ hoti, asati ca na hoti, so tassa paccayoti yadidaṃ samāsato paccayalakkhaṇaṃ yaṃ sandhāya sutte vuttaṃ “imasmiṃ sati idaṃ hoti, imasmiṃ asati idaṃ na hotī”ti, tayidaṃ atthipaccaye yojetvā dassento “**yo hī**”tiādiṃ vatvā ayañca nayo nibbāne na labbhati, tasmā nibbānaṃ atthipaccayabhāvena na uddhaṭanti dassetuṃ “**nibbānañca...pe... upakāraṃ hotī**”ti āha. Tena paccayadhammānaṃ paccayabhāvo viśesato byatirekamukhena pākāṭo hotīti dasseti. **Natthibhāvopakāratāviruddhoti** natthipaccayabhāvaviruddho. Vigatāvīgatapaccayā viya hi aññañānaṃ ujupaccanīkabhāvena ṭhitā natthiatthipaccayā. **Na nibbānaṃ atthipaccayo**

natthibhāvopakāratāvirodhato. Ye hi atthipaccayadhammā, te natthibhāvopakāratāviroddhā eva diṭṭhāti adhippāyo.

Sati ca uppannatteti sambandho. Yesaṃ paccayā honti āhārindriyāti yojanā. **Ekatoti** saha. **Sahajātādipaccayattābhāvototi** sahajātapurejātapacchājātapaccayattābhāvato. **Tadabhāvoti** sahajātādipaccayattābhāvo. **Etesanti** atthipaccayatāvasena pavattamānānaṃ āhārindriyānaṃ. **Dhammasabhāvavasenāti** dhammatāvasena. Dhammatā hesā, yadidaṃ paccayuppannehi saha puretaraṃ pacchā ca labbhamānā āhārindriyā tesāṃ atthipaccayā honti, na sahajātādipaccayāti. Yathā vā cakkhādīdvārānaṃ rūpādīārammaṇānaṃ satipi niyatavuttitāya dvārārammaṇato viññāssa chabbidhabhāve ārammaṇamanāmasitvā, dvārato dvāramanāmasitvā ārammaṇato chabbidhatā vuccati, evamidhāpi āhārindriyānaṃ paccayuppannehi satipi sahajātādibhāve arūpakkhandhādivasena sahajātādibhedabhinnassa atthipaccayassa dassitattā pañhāvāre āhārindriyānaṃ vasena āgate catutthapañcamakoṭṭhāsabhūte atthipaccayavisesa sahajātādibhedam āmasitum na labbhatīti dassetum atṭhakathāyaṃ “āhāro indriyāṇca sahajātādibhedam na labhatī”ti vuttam, na pana āhārindriyēsu sahajātādibhāvassa abhāvato. Evampettha attho daṭṭhabbo.

Atthipaccayaniddesavaṇṇanā niṭṭhitā.

22-23-24. Natthivigataavigatapaccayaniddesavaṇṇanā

22-23. Etthāti natthipaccaye. **Nānanti** nānattam. **Etenāti** anantarapaccayato natthipaccayassa visesamattāpanena “paccayalakkhaṇameva hettha nāna”nti iminā vacanena. **Atthoti** dhammo. **Byañjanasaṅgahiteti** “natthipaccayo vigatapaccayo”ti evamādibyañjanena saṅgahite. **Paccayalakkhaṇamatteti** ettha pavattiokāsādānena upakārakā arūpadhammā, vigatabhāvena upakārakāti evamādike paccayānaṃ lakkhaṇamatte.

Natthivigataavigatapaccayaniddesavaṇṇanā niṭṭhitā.

Paccayaniddesavaṇṇanā niṭṭhitā.

Paccayaniddesapakiṇṇakavinicchayakathāvaṇṇanā

Ādimapāṭhoti purimapāṭho. **Tathā ca satīti** dosassapi sattarasahi paccayehi paccayabhāve sati. Adhipatipaccayabhāvopissa anuññāto hotīti āha “**dosassapi garukaraṇaṃ pāliyaṃ vattabbaṃ siyā**”ti. “Sesāna”nti vacaneneva nivāritoti kadāci āsaṅkeyyāti taṃnivattanatthamāha “**na ca sesāna**”ntiādi. **Purejātādīhīti** purejātakammāhārajhānindriyamaggavipākapaccayehi. **Tannivāraṇatthanti** tassa yathāvuttadosassa nivāraṇattham. **Visuṅca aggahetvāti** lobhamohā vipākapaccayāpi na honti, tathā dosoti evaṃ visuṅca aggahetvā. Phoṭṭhabbāyatanam kāyaviññāṇadhātuyā ārammaṇādipaccayo hontameva pathavīadisabhāvattā attanā sahajātānaṃ sahajātādipaccayā hontiyevāti vuttam “**phoṭṭhabbāyatanassa sahajātādipaccayabhāvaṃ dassetī**”ti. “Sabbadhammāna”nti “sabbe dhammā manoviññāṇadhātuyā taṃsampayuttakānaṇca dhammānaṃ ārammaṇapaccayena paccayo”ti ettha vutte sabbadhamme sandhāyāha “sabbadhammānaṃ yathāyogaṃ hetādipaccayabhāvaṃ dassetī”ti. **Na hi etaṃ...pe... bhāvadassanaṃ**, atha kho ekadhammassa anekapaccayabhāvadassanaṃ, tasmā “etena phoṭṭhabbāyatanassā”tiādi vuttanti adhippāyo. **Rūpādīnanti** rūpāyatanādīnaṃ.

Bhedāti visesā. **Bhedam anāmasitvāti** cakkhuvīññāṇadhātuādivisesaṃ aggahetvā. **Te evāti** yathāvuttavisesānaṃ sāmāññabhūte khandhe eva. Yaṃ sandhāya “evaṃ na sakkā vattu”nti vuttam, taṃ vibhāvetum “**na hi**”tiādi vuttam. **Paṭṭhānasamvaṇṇanā hesāti** etena sutte vuttapariyāyamaggabhāvenettha na sakkā micchāvācādīnaṃ maggapaccayaṃ vattuntīti dasseti. **Sesapaccayabhāvoti** maggapaccayaṃ ṭhapetvā yathāvuttehi sesehi atṭhārasahi paccayehi paccayabhāvo.

Adhipatipaccayo na hotīti ārammaṇādhīpatipaccayo na hoti. **Tanti vicikiccham. Tatthāti** yathāvuttesu ahirikādīsu.

Dasadhā paccayā honti, puna tathā hadayavatthunti idaṃ atthamattavacanāṃ. Pāṭho pana “hadayavatthu tesañceva vippayuttassa ca vasena dasadhā paccayo hotī”ti veditabbo.

Rūpasaddagandharasāyatanamattamevāti idaṃ rūpādīnaṃ sahaajātapaccayatāya viya nissayapaccayatāya ca abhāvato, purejātapaccayatāya ca bhāvato vuttaṃ. **Etānīti** yathāvuttāni rūpasaddagandharasārammaṇāni. **Sabbātikantapaccayāpekkhāti** “ekadhammassa anekapaccayabhāvato”ti etasmim vicāre hetuādiatikkantapaccayāpekkhā **etesam** rūpādīnaṃ **apubbatā natthi**, atha kho ārammaṇārammaṇādhīpatiārammaṇūpanissayapaccayāpekkhā. Na hi rūpādīni hetusahajātādhipatiādivasena paccayā hontīti. **Tassāti** rūpajīvitindriyassa **purejātapaccayabhāvato apubbatā**, tasmā taṃ ekūnavīsatividho paccayo hotīti vuttaṃ hoti. **Sattadhā paccayabhāvo yojetabbo**, na hi oṇā purejātapaccayo na hotīti.

Atthoti vā hetuādidhammānaṃ sabhāvo veditabbo. So hi attano paccayuppannehi araṇīyato upagantabbato, ñāṇena vā ñātabbato “attho”ti vuccati. **Ākāroti** tasseva pavattīākāro, yena attano paccayuppannānaṃ paccayabhāvaṃ upagacchatīti evamettha attho daṭṭhabbo. **Taṃ pana** vippayuttaṃ. “Sattahākārehi”ti paṭhānassa kāraṇamāha “**ukkaṭṭhaparicchedo hi**”tiādīnā.

Yaṃ kammaṃ paccayo...pe... daṭṭhabbaṃ āsevanakammaṃ paccayānaṃ paccayuppannassa anantarāṭṭhānatāya. Sahaajātampi hi anantamevāti. **Koci panetthāti** ettha etasmim pakatūpanissayasamudāye koci tadekadesabhūto kammaṃ sabhāvo pakatūpanissayoti attho. **Tatthāti** “yadidaṃ ārammaṇapurejāte panettha indriyavippayuttapaccayatā na labbhatī”ti vuttaṃ, tasmim, tasmim vā ārammaṇapurejātaggahaṇe. **Vatthussa vippayuttapaccayatā labbhatīti na vattabbā**. Na hi ārammaṇabhūtaṃ vatthu vippayuttapaccayo hoti, atha kho nissayabhūtamevāti. **Ito uttarīti** ettha “**ito**”ti idaṃ paccāmasanaṃ purejātaṃ vā sandhāya ārammaṇapurejātaṃ vā. Tattha paṭhamanayaṃ apekkhitvā vuttaṃ “**purejātato paratopi**”ti. Tena kammādi paccayesu vakkhamānesu labbhamānālabbhamānaṃ veditabbanti vuttaṃ hoti. Dutiyāṃ pana nayaṃ anapekkhitvā aṭṭhakathāyaṃ āgatavasena vuttaṃ “**ito vā indriyavippayuttato**”ti, attanā vuttanayena pana “**nissayindriyavippayuttato vā**”ti. Tattha vattabbaṃ sayamevāha “**ārammaṇādhīpati**”tiādi. **Kammādīsu labbhamānālabbhamānaṃ na vakkhati** “ito uttarī”tiādīnā pageva atidesassa katattā, tasmā purimoyeva purejātatoṇīti vuttaatthoyeva adhippeto.

“Maggapaccayatāṃ avijahantovā”ti iminā ca maggapaccayo vuttoti “maggavajjānaṃ navanna”nti vuttaṃ **pacchimapaṭṭhe, purimapāṭṭhe** pana “maggapaccayatāṃ avijahantovā”ti vuttattā eva maggapaccayena saddhim sahaajātādīpaccayā gahetabbāti “dasanna”nti vuttaṃ. Tattha pacchimapaṭṭhe “ekādasahākārehi”ti vattabbaṃ, purimapāṭṭhe “dvādasahī”ti.

Samanantaraniruddhatāya ārammaṇabhāvena cāti vijjānānampi visesamanāmasitvā kevalaṃ samanantaraniruddhatāya ārammaṇabhāvena, na ca samanantaraniruddhatāārammaṇabhāvasāmaññenāti attho. “Iminā upāyenā”ti paccayasabhāgatādassanena paccayavisabhāgatādassanena ca vuttaṃ padadvayaṃ ekajjhaṃ katvā paduddhāro katoti dassento “**hetuādīnaṃ sahaajātānaṃ...pe... yojetabbā**”ti āha. Hetuārammaṇādiṇaṃ sahaajātāsahaajātabhāvena aññamaññāvisabhāgatāti yojanā. **Evamādināti ādi**-saddena purejātānaṃ cakkhādīnaṃ rūpādīnaṃ purejātābhāvena sabhāgatā, pavattiyāṃ vatthukhandhādīnaṃ purejātapacchājātānaṃ purejātapacchājātābhāvena visabhāgatāti evamādinānampi saṅgaho daṭṭhabbo. Hetunahetuādībhāvatoṇi cettha yugaḷakato viññātabbo vinicchayo. Hetupaccayo hi hetubhāvena paccayo, itare tādāññabhāvena. Evamitaresu yathārahaṃ yugaḷakato veditabbo.

Ubhayappadhānatāti janānopatthambhanappadhānatā. **Ṭhānanti** padassa atthavacanāṃ **kāraṇabhāvoti** vināpi bhāvapaccayaṃ bhāvapaccayassa attho ñāyatīti. **Upanissayaṃ bhindantenāti** anantarūpanissayapakatūpanissayavibhāgena vibhajantena. **Tayopi upanissayā vattabbā**

upanissayavibhāgabhāvato. **Upanissayaggahaṇameva kātabbam** sāmāññarūpena. **Tatthāti** evamavaṭṭhite anantarūpanissayapakatūpanissayoti **bhindanam** vibhāgakaraṇam yadi **pakatūpanissayassa rūpānam paccayattābhāvadassanattham**, nanu ārammaṇūpanissayaanantarūpanissayāpi rūpānam paccayā na hontiyevāti? Saccam na honti, te pana dassitanayāti tadekadesena itarampi dassitameva hotīti imamattham dassento “**ārammaṇam...pe... datṭhabba**”nti āha. **Taṃsamānagatikattāti** tehi anantarādīhi samānagatikattā arūpānaṃyeva paccayabhāvato. **Tanti** purejātapaccayam. **Tatthāti** anantarādīsu paṭhitvā.

Paccayaniddesapakiṇṇakavinicchayakathāvaṇṇanā niṭṭhitā.

Pucchāvāro

1. Paccayānulomavaṇṇanā

Ekekaṃ tikam dukañcāti kusalattikādīsu bāvīsatiyā tikesu hetudukādīsu sataṃ dukesu ekekaṃ tikam dukañca. **Na tikadukanti** tulyayogīnam na tikadukanti attho. Tikavisiṭṭham pana dukam, dukavisiṭṭhañca tikam, tikavisiṭṭhatikadukavisiṭṭhadukesu viya nissāya upari desanā pavattā evāti.

Ye kusalādidhamme paṭiccāti vuttā “kusalam dhammam paṭicca kusalo dhammo uppajjati hetupaccayā”tiādīsu, **te** kusalādidhammā **paṭiccattham pharantā** hetuādipaccayaṭṭham sādhentā kusalātipaccayā cevāti attho. **Tenevāhāti** yasmā paccayadhammānam paccayuppannesu paṭiccatthapharaṇam ubhayesaṃ tesam sahabhāve sati, nāññathā. Teneva kāraṇenāha “**te ca kho sahajātāvā**”ti. **Teti** hetuādipaccayā. Tesu hi hetusahajātaaññamaññanissayādayo sahajātā, anantasamanantarādayo asahajātā paccayā hontīti. Etehi dvīhi vārehi itaretaratthabodhanavasena pavattāya desanāya kiṃ sādhitam hotīti āha “**evañca niruttikosallam janitam hoti**”ti.

Te te pañhe uddharitvāti “siyā kusalo dhammo kusalassa dhammassa hetupaccayena paccayo”tiādayo ye ye pañhā vissajjanam labhanti, te te pañhe uddharitvā. **Pamādalekhā esāti** idam “kusalo hetu hetusampayuttakānam dhammāna”nti likhitam sandhāya vuttam. Paṭiccasahajātavāresu sahajātapaccayo, paccayanissayavāresu nissayapaccayo, saṃsaṭṭhasampayuttavāresu sampayuttapaccayo ekantikoti katvā vuttoti āha “**purimavāresu...pe... niyametvā**”ti. **Tatthāti** tesu purimavāresu chasu. **Na viññāyanti** sarūpato anuddhaṭṭā. **Evamādīhi** pañhehi. **Hetātipaccayapaccayuppannesūti** hetuādīsu paccayadhammesu sampayuttakkhandhādībhedesu tesam paccayuppannesu. Niddhāraṇe cetam bhummam. **Hetātipaccayānam nicchayābhāvato**ti “ime nāma te hetuādayo paccayadhammā”ti nicchayābhāvato sarūpato aniddhāritattā. Yathā hi nāma nānājaṭājaṭitam gumbantaragatañca taṃsadisaṃ sarūpato adissamānam idam tanti na vinicchiniyati, evaṃ ñātuṃ icchitopi attho sarūpato aniddhārito nijjaṭo nigumbo ca nāma na hoti nicchayābhāvato, sarūpato pana tasmim niddhārite tabbisayassa nicchayassa vasena puggalassa asambuddhabhāvāppattiyā so pañho nijjaṭo nigumbo ca nāma hotīti āha “**nicchayābhāvato te pañhā nijjaṭā nigumbā ca katvā na vibhattā**”ti, “**na koci pucchāsaṅgahito... pe... vibhattā**”ti ca. **Tanti** pañhāvissajjanam **sandhāya nijjaṭatā na vuttā**, atha kho nicchayuppādananti adhippāyo.

Ṭhapanam nāma idha vineyyasantāne paṭiṭṭhapanam, tam pana tassa atthassa dīpanam jotananti āha “**pakāsittā**”ti. **Pakārehīti** hetuādipaccayappakārehi, kusalātipaccayapaccayuppannappakārehi vā.

25-34. Parikappanam vidahananti katvā āha “**parikappapucchāti vidhipucchā**”ti. **Siyāti** bhaveyyāti attho. **Eso vidhi kiṃ atthīti** etena “siyā”ti vidhimhi kiriyāpadam. Pucchā pana vākyatthasiddhā veditabbā. Tameva hi vākyatthasiddham puccham dassetuṃ aṭṭhakathāyampi “**kiṃ so kusalam dhammam paṭicca siyā**”ti vuttam. **Sampucchanaṃ parikappapucchāti** tasmim pakkhe hi kiriyāya padeneva pucchā vibhāvīyatīti vuttam hotīti. “Siyā kusalam dhammam paṭicca kusalo dhammo

uppajjeyya hetupaccayā”ti ettha “kusalaṃ dhammaṃ paṭicca hetupaccayā”ti ubhayamidam paccayavacanam, “kusalo dhammo uppajjeyyā”ti paccayuppannavacanam. Tesu paccayadhammassa paccayabhāve vibhāvite paccayuppannassa uppatti atthato vibhāvitāyeva hotīti paccayadhammova pucchitabbo. Tattha ca paccayadhammavisiṭṭho paṭiccattho vā pucchitabbo siyā paccayavisiṭṭho vāti duvidhā pucchitabbāyeva atthavikappā aṭṭhakathāyaṃ vuttā. Tesu paṭhamasmim pucchā sadosāti dassento “**yo kusalo dhammo uppajjeyyā**”tiādimāha. Tattha **sabbapucchānam pavattitoti** kusalamūlādīnam sattasattapucchānam pavattanato, **uppajjamānam** kusalam. **Tehi paccayehīti** pacchājātavipākapaccayehi **uppatti anuññātāti āpajjati**, na ca taṃ yuttanti adhippāyo. **Taṃtaṃpaccayāti** tato tato yonisomanasikārādipaccayato. **Bhavanamatthitā ettha na ca pucchitāti** “kiṃ siyā”ti vuttayojanāya dosamāha. **Evañca katvāti** uppattiyā eva pucchitattā.

Tatthāti “atha vā”tiādinā vutte atthantare. **Uppajjeyyāti uppattiṃ anujānitvāti** “uppajjeyyā”ti ettha vuttaṃ kusalapaccayam uppattiṃ anujānitvā. **Tassāti** uppattiyā. **Bhavanapucchananti** hetupaccayā bhavanapucchanam na yuttanti sambandho. Puna **tassāti** hetupaccayā uppattiyā. **Bhavanapucchananti** kevalam bhavanapucchanam. **Tasmāti** yasmā vuttanayena ubhayatthāpi uppattianujānanamukhena bhavanapucchanam ayuttaṃ, tasmā. Anujānanañca aṭṭhakathāyaṃ vutte atthavikappadvaye atthato āpannam, taṃ ananujānanto āha “**ananujānitvāvā**”tiādi. **Samṇapucchanamevāti** iminā samṇapucchane “uppajjeyyā”ti idaṃ kiriyāpadanti dasseti. Yadi evam “siyā”ti idaṃ kathanti āha “**siyāti...pe... pucchati**”ti. **Ayam nayoti** “siyā”tiādinā anantaravutto atthanayo. **Na viññāyati** anāmaṭṭhavisesattā. **Dvepi pucchāti** sambhavanapucchā tabbisesapucchā cāti duvidhāpi pucchā **ekāyeva pucchā** samṇapucchanabhāvato ekādhikaraṇabhāvato ca.

Gamanussukkavacananti gamanassa ussukkavacanam. Gamanakiriyāya yathā attano kattā upari kattabbakiriyāya yogyarūpo hoti, evameva ṭhānam gamanussukkanam tassa bodhanam vacanam. Evambhūtā ca kiriyā yasmā atthato kiriyantarāpekkhā nāma hoti, tasmā vuttaṃ “**gamanassa...pe... attho**”ti. Katham panetasmim saḥajātapaccayapaṭṭhāne paṭiccavāre paṭiccasaddassa pacchimakālakiriyāpekkhatāti codanam manasi katvā āha “**yadipi**”tiādi. Tenetaṃ dasseti “asatipi paṭiayanuppajjanānam kālabhede aññatra hetuphalesu dissamānam purimapacchimakālatam hetuphalatāsāmaññato idhāpi samāropetvā ruḥhivasena purimapacchimakālavohāro kato”ti. Tenāha “**gahaṇappavattiākāravasena...pe... daṭṭhabbo**”ti. Tattha **attapaṭilābho** uppādoti attho.

Gamananti “paṭiccā”ti ettha labbhamānam ayanakiriyam pariyāyantarenāha. Sā panatthato pavatti, pavatti ca dhammānam yathāpaccayam uppattiyeva. Sabhāvadhammānañhi uppattiyam loke sabbo kiriyākāravohāro, tasmā “paṭiccā”ti ettha labbhamānam yaṃ paṭiayanam paṭigamanam atthato paṭiuppajjamānam, tañca gacchantādiapekkhāya hotīti āha “**gacchantassa paṭigamanam, uppajjantassa paṭiuppajjana**”nti. Tayidaṃ gamanapaṭigamanam, uppajjanapaṭiuppajjanam samānakiriyā. Katham? Yasmā **paṭikaraṇam paṭisaddattho**. **Tasmāti** yasmā saḥajātapaccayabhūtassa uppajjantassa paṭiuppajjanam “paṭicca uppajjati”ti ettha attho, tasmā. **Tadāyattuppattiyāti** sahayoge karaṇavacanam, karaṇatthe, hetutthe vā, tasmim uppajjamāne kusaladhamme āyattāya paṭibaddhāya uppattiyā saheva paṭigantvāti attho. Tena paṭiayanattalābhānam samānakālatam dasseti. Tenevāha “**saḥajātapaccayam katvāti vuttaṃ hoti**”tiādi. Nanu ca samānakālakiriyāyam īdiso saddappayogo natthi, purimakālakiriyāyameva ca atthīti? Nāyamekanto samānakālakiriyāyampi kehici icchitattā. Tathā hi –

“Nihantvā timiraṃ loke, udito sataraṃsami;
Lokekacakkhubhūtoya-matthameti divākaro.

“Sirīvilāsarūpena, sabbasobhāvibhāvinā;
Obhāsetvādito buddho, sataraṃsi yathā paro”ti. –

Ca payogā dissanti.

35-38. Tāsūti dukamūlakanaye hetārammaṇaduke ekūnapaññāsapucchā, tāsū.

Hetārammaṇaduketi “hetupaccayā ārammaṇapaccayā”ti evaṃ hetupaccayaārammaṇapaccayānaṃ vasena āgate paccayaduke. **Dvinnam pucchānam dassitattāti** yasmim vācanāmagge kusalapadamūlā kusalapadāvasānā, kusalādipadattayamūlā kusalādipadattayāvasānā ca ekūnapaññāsāya pucchānaṃ ādipariyosānabhūtā dve eva pucchā dassitā, taṃ sandhāya vuttaṃ. **Etthāti** etasmim paṇṇattivāre **pucchānam vutto** na paccayānanti attho. Pucchāya hi vasena hetupaccaye hetupaccayasankhātāṃ ekamūlaṃ etassāti ekamūlako, nayasaddāpekkhāya cāyaṃ pulliṅganiddeso. Evaṃ ārammaṇapaccayamūlakādīsu. Tathā hetuārammaṇapaccayasankhātāni dve mūlāni etassāti dvimūlakotiādīnā yojetabbā. Paccayānaṃ pana vuccamāne paṭhamanayassa ekamūlakatā na siyā. Na hi tattha paccayantaraṃ atthi, yaṃ mūlabhāvena vattabbaṃ siyā. Tenāha “**paccayānaṃ pana vasenā**”tiādi. **Hetārammaṇadukādīnanti** avayave sāmivacanaṃ, adhipatiādīnanti sambandho. **Tato paraṃ mūlassa abhāvato sabbamūlakam** anavasesānaṃ paccayānaṃ mūlabhāvena gahitattā. Na hi mūlavantabhāvena gahitā paccayā mūlabhāvena gayhanti. **Paccayagamaṇam pāḷigamaṇanti viññāyati** abhidheyānurūpaṃ līṅgavacanādīti katvā. **Idhāti** anulome. **Ca**-saddo upacayattho. So tevīsatiṃmūlassa sabbamūlabhāvaṃ upacayena vuccamānaṃ joteti.

39-40. Evaṃ satīti “ārammaṇapaccayā hetupaccayā”ti ārabhitvā “ārammaṇapaccayā avigatapaccayā, ārammaṇapaccayā hetupaccayā”ti evaṃ vācanāmagge satī. Cakkabandhanavasena pāḷigati āpajjatu, ko dosoti kadāci vadeyyāti āha “**heṭṭhimasodhanavasena ca idha abhidhamme pāḷi gatā**”ti. Tathā hi khandhavibhaṅgādīsūpi pāḷi heṭṭhimasodhanavasena pavattā. Gaṇanaāreṇa tamatthaṃ sādhetuṃ “**evañca katvā**”tiādi vuttaṃ. **Ārammaṇādīsūti** ārammaṇamūlakādīsū navesu. **Tasmim tasminti** tasmim tasmim ārammaṇādipaccaye. **Suddhikatoti** suddhikanayato. **Tasmāti** ārammaṇamūlakādīsū suddhikanayassa alabbhamānattā. **Ekamūlakanayo daṭṭhabbo** ārammaṇamūlaketi adhippāyo. “**Ārammaṇapaccayā...pe... avigatapaccayāti vā**”tiādi tādīsaṃ vācanāmaggaṃ sandhāya vuttaṃ. Yattha “ārammaṇapaccayā hetupaccayā, ārammaṇapaccayā adhipatipaccayā, ārammaṇapaccayā...pe... avigatapaccayā”ti evaṃ ārammaṇamūlake anantarapaccayamūlabhūtā ārammaṇapaccayapariyosānameva ekamūlakam dassetvā upari avasiṭṭhaekamūlakato paṭṭhāya yāva sabbamūlake vīgatapaccayā, tāva saṃkhipitvā avigatapaccayova dassito. Tenāha “**ekamūlakesū**”tiādi. Ito paresūpi edisesu ṭhānesu eseva nayo. **Mūlameva dassetvāti** adhipatimūlake ekamūlakassa ādimeva dassetvā. **Na suddhikadassananti** na suddhikanayadassanaṃ. “Suddhikanayo hi viśesābhāvato ārammaṇamūlakādīsū na labbhatī”ti hi vuttaṃ. **Nāpi sabbamūlake katipayapaccayadassanaṃ** upari sabbamūlake ekamūlakassa āgatattā.

41. Ekasmīncāti avigatamūlakādīke ca naye. **Saṅkhepantaragatoti** saṅkhepassa saṅkhipitassa abhantaragato, saṅkhipitabboti attho. **Majjhimānaṃ dassananti** majjhimānaṃ nayato dassanaṃ, aññathā saṅkhepo eva na siyā. **Gatidassananti** antadassanaṃ akatvā pāḷigatiyā dassanaṃ, tañca ādito paṭṭhāya katipayadassanaṃ. **Tena** vīgatapaccayuddhāraṇena **osānacatukkaṃ dasseti** avigatamūlake vīgatapaccayassa osānabhāvato. **Sabbamūlakassa avasānena** “vīgatapaccayā”ti padena.

Yathā hetuādīnaṃ paccayānaṃ uddesānupubbīyā dukatikādiyojanā katā, evaṃ tattha ārammaṇādipaccaye laṅghitvāpi sakkā yojanaṃ kātuṃ, tathā kasmā na katā? Yadipi anavasesato paccayānaṃ mūlabhāvena gahitattā kesañci kehici yojane atthaviseso natthi, ārammaṇamūlakādīsū pana ārammaṇādhipatidukādīnaṃ hetumūlake ca hetuadhipatianantaratikādīnaṃ taṃtaṃavasīṭṭhapaccayehi yojanāya attheva viśeso, evaṃ santepi yasmā uppaṭipāṭiyā yojanā na sukhaggahaṇā, sakkā ca ñāṇuttareṇa puggalena yathādassitena nayena yojitunti uppaṭipāṭiyā paccaye aggahetvā paṭipāṭiyāva te yojetvā dassitāti imamattamaṃha “**ettha cā**”tiādīnā.

Tañca gamaṇam yuttanti yaṃ sabbehi tikehi ekekassa dukassa yojanāvasena pāḷigamaṇam, taṃ yuttaṃ tikesu dukānaṃ pakkhepabhāvato. **Tatthāti** dukesu. **Ekekasminti** ekekasmim dukatike. **Nayāti** anulomanayādayo vāre vāre cattāro nayā, **pucchā** pana sattavīsati. Yadi evaṃ kasmā hetudukena samānāti? Taṃ tikapadesu paccekam hetudukassa labbhamānassa hetudukabhāvasāmaññato vuttaṃ.

Vuttanayenā “na hī”tiādinā dukatike vuttanayena. Tattha hi na dukassa yojanā atthi, atha kho dukānaṃ ekekena padena tikassa yojanā. Tenāha “**ekeko tiko dukasatena yojito**”ti. **Ekekasminti ekekasmim** tikaduke.

Tikādayo cha nayāti “tikañca paṭṭhānavara”ntiādinā gāthāyaṃ vuttā tikapaṭṭhānādayo cha nayā. **Sattavidhampī**ti vārabhedena sattadhā bhinditvā vuttampi. **Anulomanti** paccayānulomaṃ anulomabhāvasāmaññena **saha gahetvā**. Tathā **catubbidhampi tikapaṭṭhānaṃ** tikapaṭṭhānatāsāmaññena, **dukapaṭṭhānādīni** ca cattāri cattāri taṃsāmaññena **saha gahetvā**. **Imamatthaṃ gahetvā** “tikañca paṭṭhānavara”nti gāthāya adhippāyavibhāvanavasena “**anulomamhī**”tiādinā vuttaṃ imamatthaṃ gahetvā. **Sattappabhedeti** paṭiccvārādivasena sattappabhede. **Chapi ete** tikādibhedena catucattuppabhedā dhammānulomādivasena cha uddharitabbāti idaṃ dassētīti yojanā. Ayañhettha saṅkhepattho – dhammānulomādivibhāgabhinnaṃpi tikādibhāvasāmaññena ekajjhaṃ katvā vuttā tikapaṭṭhānādisaṅkhātā tikādayo cha dhammanayā paṭiccvārādivasena vibhajyamānā tattha tattha niddhāriyamāne anulomatāsāmaññena anulomanti ekato gahite paccayānulome suṭṭhu ativiya gambhīrāti. Aṭṭhakathāyaṃ pana “idha pana ayaṃ gāthā tasmiṃ dhammānulome paccayānulomaṃ sandhāya vuttā”ti dhammānulomo paccayānulomassa visesanabhāvena niyamevā vutto. Esa nayo paccanīyagāthādīsūpi. Tikapaṭṭhānassa dukapaṭṭhānassa ca pubbe attho vuttoti āha “**dukatikapaṭṭhānādīsū**”ti. **Tikehi paṭṭhānanti** tikehi nānappakārato paccayavibhāvanaṃ, tikehi vā ñāṇassa pavattanaṭṭhānaṃ. Dukasambandhi tikapaṭṭhānaṃ, dukavisiṭṭhānaṃ vā tikānaṃ paṭṭhānaṃ dukatikapaṭṭhānanti imamatthaṃ dassento “**dukāna**”ntiādimāha. **Dukādivisesitassāti** dukādīpadavisesitassa **dukādibhāvo daṭṭhabbo** “hetuṃ kusalaṃ dhammaṃ paṭicca, nahetuṃ kusalaṃ dhammaṃ paṭiccā”tiādivacanato.

Paccayānulomavaṇṇanā niṭṭhitā.

2. Paccayapaccanīyavaṇṇanā

42-44. Yāvāti pāḷipadassa atthavacanaṃ **yattakoti** āha “**pabhedo**”ti. **Atthi** tevīsatiṃmūlakassāti attho. **Tāva tattakaṃ** pabhedam. **Tatthāti** anulome āgatanti attho. **Nayadassanavasena dassitaṃ**, kinti? **Ekekassa padassa vitthāraṃ dasseti**. **Avasesassa paccayassa** mūlavantabhāvena gahitassa.

Paccayapaccanīyavaṇṇanā niṭṭhitā.

3. Anulomapaccanīyavaṇṇanā

45-48. Puna tatthāti anulome. **Paccayapadānīti** paccayā eva padāni paccayapadāni. **Idhāti** anulomapaccanīye. **Suddhikapaccayānanti** paccayantarena avomissānaṃ paccayānaṃ, anulomapaccanīyadesanaṃ vakkhamānaṃ sandhāyāti attho.

Anulomapaccanīyavaṇṇanā niṭṭhitā.

Pucchāvāraṇṇanā niṭṭhitā.

1. Kusalattikaṃ

1. Paṭiccvāravaṇṇanā

1. Paccayānulomaṃ

(1) Vibhaṅgavāraṇṇanā

53. Tikapadānaṃ tikantarapadehi visadisatā pākāṭāyevāti vuttaṃ “**tikapadanānattamattena vinā**”ti. **Mūlāvasānavasenā**ti “ekamūlekāvasānaṃ navā”tiādīnā vuttamūlāvasānavasena. “Na tāyeva vedanāttikādīsū”ti ettha yā sadisatā paṭikkhittā, taṃ dassetuṃ “**sadisataṃ sandhāya ‘na tāyevā’ti vutta**”nti āha. **Yāti** yā pucchā. **Sabbapucchāsamāharaṇanti** sabbāsaṃ ekūnapaññāsāya pucchānaṃ samuccayanaṃ anavasesetvā kathanāṃ. **Idha** imasmiṃ paṭiccavāruddese **kattabbaṃ**. Ādito hi anavasesato vutte pacchā yathārahaṃ tadekadesavacanaṃ yuttaṃ. **Na hi tattha ekūnapaññāsa pucchā vissajjanaṃ labhanti**ti tattha tasmīṃ dhammānulomapaccanīye pītittike ekūnapaññāsa pucchā vissajjanaṃ na hi labhanti, aṭṭhavise pana labhanti attho.

Tena sahaḷātapaccayabhūtenāti tena vedanādibhedena ekena dhammena sahaḷātapaccayo hontena, sahaḷātapaccayatāṃ vā pattena pāpuṇantenāti attho. **Anuññātaṃ viya hoti**ti yadipi aṭṭhakathāyaṃ “yāva nirodhagamaṇā”tiādivacanehi **khaṇattayasamaṅgī** uppajjati **anuññātaṃ viya hoti, uppādkkhaṇasamaṅgiyeva pana uppajjati vutto** paṭiccavārādīnaṃ channaṃ vārānaṃ uppādameva gahetvā pavattattā. Tathā hi tesu pacchāḷātapaccayo anulomato na tiṭṭhati.

Idha kusalavacanena gahite khandhe sandhāya vuttanti imasmiṃ paṭiccavāre “kusalaṃ dhammaṃ paṭicca kusalo dhammo uppajjati”ti kusalasaddena gahite khandhe sandhāya vuttaṃ catūsūpi kusalakhandhesu ekato uppajjamānesu sāmāññato vuttasu sahaḷāṭādisādhāraṇapaccayavasena avisesato sabbe sabbesaṃ paccayāti ayameva imassa paccayo, imasseva ayaṃ paccayoti ca niyametvā vuttaṃ na sakkā. Tena vuttaṃ aṭṭhakathāyaṃ “ekasseva dvinnaṃyeva vā”tiādi. “Sukhāya vedanāya sampayuttaṃ dhammaṃ paṭiccā”tiādisu pana visesanabhāvena vedanādīnaṃ visuṃ gahitattā “ekam khandhaṃ paṭicca dve khandhā”tiādi vuttaṃ sakkā. Tena vuttaṃ “**vedanāttikādīsū panā**”tiādi. **Tathāti** iminā “ekekassapi dukādibhedānañcā”ti imaṃ anukaḍḍhati.

Etasminti “vipākābyākataṃ kiriyābyākata”nti evaṃ vipākakiriyābyākataggahaṇe. “**Sabbasmiṃ na gahetabba**”nti vuttaṃ, kattha pana gahetabbanti āha “**cittasamuṭṭhānañca rūpanti ethevā**”ti. Evaṃ paṭhame vākye atibyāpitaṃ pariharitvā dutiye abyāpitaṃ pariharitūṃ “**na kevala**”ntiādi vuttaṃ. **Etthāti** “vipākābyākataṃ kiriyābyākata”nti ettha **na gahetabbaṃ** tassapi āruppe uppajjamānassa rūpena vinā uppattito. Ettha ca yathā hetupaccayaggahaṇeneva ahetukaṃ nivattitaṃ, evaṃ cittasamuṭṭhānañca rūpanti rūpaggahaṇeneva āruppe vipākopi tattha uppajjamānena cittuppādena saddhiṃ na gahito. Taṃ panetaṃ atthasiddhameva akatvā sarūpato pākāṭataraṃ katvā dassetuṃ aṭṭhakathāyaṃ “**vipākābyākata**”ntiādi vuttaṃ. Paṭisandhipacchimacittāni panettha satipi rūpassa anuppādane vavattānābhāvato na gahitānti daṭṭhabbaṃ.

Paccayabhūtassāti khandhānaṃ paccayabhūtassa vatthussa **aggahitatāpattiṃ nivāretuṃ**, kathaṃ? **Paccayuppānabhāvena**, kattha? “**Kaṭattā ca rūpa**”nti **etasmīṃ sāmāññavacane** “**khandhe paṭicca vatthū**”ti **vuttaṃ**, evañhissa paccayuppānatā dassitā hoti. **Aññamaññāpekkhaṃ vacanadvayanti** “khandhe paṭicca vatthu, vatthuṃ paṭicca khandhā”ti padadvayaṃ sandhāya vuttaṃ. **Sāmāññena gahitanti** “kaṭattā ca rūpa”nti iminā sāmāññavacanena, kaṭattārūpasāmāññena vā gahitaṃ.

Upādārūpaggahaṇena vinā “upādārūpa”nti aggahetvā kevalaṃ cittasamuṭṭhānarūpaṃ “kaṭattārūpaṃ”iceva gahetvāti attho. **Etasmīṃ pana dassaneti** “mahābhūtepi paṭicca uppattidassanatta”nti vutte etasmīṃ atthadassane. **Khandhapaccayasahitanti** paṭisandhiyaṃ kaṭattārūpaṃ, pavattiyaṃ cittasamuṭṭhānaṃ rūpaṃ vadati. **Asahitanti** pana pavattiyaṃ kaṭattārūpaṃ āhārasamuṭṭhānaṃ utusamuṭṭhānaṃ anindriyabaddhaṃ asaññabhavasaṅgahitañca rūpaṃ. **Paṭisandhiyampi pi**-saddena pavattiyampi kaṭattārūpaṃ aññāñca tattha uppajjanakaṃ upādārūpanti attho daṭṭhabbo. Kathaṃ panettha bhūte paṭicca uppajjamānassa rūpassa hetupaccayā uppajjati? “Khandhe paṭicca hetupaccayā uppajjamānaṃ rūpaṃ bhūtepi paṭicca uppajjati”ti evaṃ padameṃ, bhūtānaṃ vā hetupaccayato nibbattattā evaṃ vuttaṃ. Kāraṇakāraṇampi hi kāraṇantveva vuccati yathā “corehi gāmo daḍḍho”ti.

Bhūte paṭicca upādārūpanti paduddhāro kato, “mahābhūte paṭicca upādārūpa”nti pana pāḥoti aṭṭhakathāyañca tameva vuttaṃ. Ayaṃ hetthattho – “mahābhūte paṭicca upādārūpa”nti imasmim pāṭhe vuttanayena upādārūpampi kusale khandhe mahābhūte ca paṭicca uppajjati. Ko pana so nayoti taṃ dassetuṃ “**mahābhūte...pe... sandhāyāhā**”ti vuttaṃ. Tattha **atthato ayaṃ nayo vuttoti** “mahābhūte paṭicca cittasamuṭṭhānaṃ rūpaṃ kaṭattārūpaṃ upādārūpa”nti iminā abyākate khandhe mahābhūte ca paṭicca upādārūpānaṃ uppattivacanena kusale khandhe mahābhūte ca paṭicca upādārūpānaṃ uppatti atthato vutto hotīti attho.

54. Rūpena vinā paccayuppannaṃ na labbhatī etena yā pucchā arūpamissakāvasānā, tāpi idha na gayhanti, pageva rūpāvasānāti dasseti.

57. Tāya samānalakkhaṇāti pañcakkhandhapaṭisandhitāya gabbhaseyyakapaṭisandhiyā samānalakkhaṇā. **Paripuṇṇadhammānanti** pariyattivibhāgānaṃ pañcakkhandhadhammānaṃ. **Etthāti** etasmim sahaṅgāpaccayaniddese.

Cittakammasamuṭṭhānarūpanti cittasamuṭṭhānarūpaṃ kammamūṭṭhānarūpañca. **Puna āhārasamuṭṭhānanti** ettha punagahaṇaṃ utusamuṭṭhānāpekkhaṃ. Na hi taṃ pubbe bāhiraggahaṇena aggahitaṃ, āhārasamuṭṭhānaṃ pana aggahitameva, utusamuṭṭhānassa kasmā punagahaṇanti āha “**etehi**”tiādi. **Tatthāti** asaññasattesu. **Tassāti** utusamuṭṭhānassa. **Ādimhīti** bāhiraāhārasamuṭṭhānautusamuṭṭhānaasaññasattavasena āgatavārehi paṭhamavāre. **Avisesavacananti** bāhirādivisesaṃ akatvā vuttavacanaṃ, arūpampi paccayaṃ labhantaṃ atthaṃ hetādike paccaye labhantaṃ saha saṅgaṇhitvāti yojanā. **Tassāti, tatthāti** ca padadvayena yathāvuttaṃ paṭhamavārameva paccāmasati. **Taṃsamānagatikanti** cittasamuṭṭhānagatikaṃ. **Idhāpīti** imasmim sahaṅgāpaccayaniddese. **Kammappaccayavibhaṅge viyāti** nānākkhaṇikakammappaccayaniddese viya. Tathā hi vuttaṃ aṭṭhakathāyaṃ “taṃsamūṭṭhānanti iminā paṭisandhikkhaṇe kaṭattārūpampi saṅgaṇhāti”ti. Ayañca atthaviseso ettha ekaṃsena icchitabboti dassento “**na hi...pe... atthi**”ti āha.

Avisesetvāti “utusamuṭṭhāna”ntiādinā visesaṃ akatvā. Upādārūpanti visesetvāva kasmā pana vuttānīti yojanā. **Hetupaccayādisūti ādi-**saddena sahaṅgāpaccayādim saṅgaṇhāti. **Sahāti** cittasamuṭṭhānarūpaṃ kaṭattārūpanti evaṃ ekato. **Visunti** cittasamuṭṭhānaṃ rūpaṃ kaṭattārūpato visesetvā. **Tattha bāhiraggahaṇādīhi viyāti** yathā “bāhiraṃ ekaṃ mahābhūta”ntiādisu bāhiraāhārasamuṭṭhānautusamuṭṭhānaggahaṇehi mahābhūtāni visesitāni, evaṃ **ettha** “mahābhūte paṭicca”ti etasmim niddese **mahābhūtānaṃ kenaci** visesanena **avisesitattā** cittasamuṭṭhānarūpabhāvakaṭattārūpabhāvehi visesetvāva vuttānīti yojanā.

Idāni aññenapi kāraṇena tesam visesitabbataṃ dassetuṃ “**apicā**”tiādi vuttaṃ. Tattha **na koci paccayoti** idaṃ paṭṭhāne āgataniyāmena rūpaṃ upanissayapaccayaṃ na labhatīti katvā vuttaṃ. Tenāha “**hetādīsū**”ti. Tadavinābhāvato pana tassa cittaṃ kammānaṃ kāraṇabhāvo veditabbo, yato iddhicittanibbattāni kammappaccayāni cāti vuttāni. Nanu cittaṃ āhārautusamuṭṭhānānaṃ paccayo hotīti? Saccaṃ hoti, so pana upatthambhakattena, na janakattenāti dassento āha “**āhāra...pe... janaka**”nti. Kim pana tesam janakanti āha “**mahābhūtāneva...pe... janakāni**”ti. **Cittena kammunā ca vinā abhāve** yathākkamaṃ cittaṃ kammamūṭṭhānaupādārūpānanti attho.

Cittasamuṭṭhānarūpakaṭattārūpabhūtānevāti cittaṃ kammamūṭṭhānamahābhūtānibbattāneva mahābhūtānaṃ tesam āsanna kāraṇattā. **Aññānīti** utuāhārasamuṭṭhānāni upādārūpāni vadati. **Visesanaṃ katam** “cittasamuṭṭhānaṃ rūpaṃ kaṭattārūpaṃ upādārūpa”nti. **Samānajātikena rūpena** utunā āhārena cāti attho. **Pākaṭavisesanānevāti** idaṃ yehi mahābhūtehi tāni nibbattāni, tesam “āhārasamuṭṭhānaṃ utusamuṭṭhāna”nti visesitattā vuttaṃ. **Na visesanaṃ arahanti** na visesitabbāni kāraṇavisesaneneva visesassa siddhattā, “mahābhūte paṭicca upādārūpa”ntiveva vattabbanti attho. **Etāni pana** cittaṃ kammamūṭṭhānarūpāni.

Savisesenāti yena visesena visesitā, taṃ dassento cittaṃ sandhāyāha

“**sahajātādipaccayabhāvato**”ti, itaraṃ pana sandhāya “**mūlakāraṇabhāvato**”ti, kammūpanissayapaccayabhāvatoṭi attho. **Itarānī**ti āhārautusunamuttānānīpi upādārūpāni. **Mahābhūtavisesaneneva visesitānī**ti “āhārasamuttānaṃ ekaṃ mahābhūtaṃ paṭicca utusunamuttānaṃ ekaṃ mahābhūtaṃ paṭiccā”ti mahābhūtavisesaneneva janakapaccayena āhārena utunā ca visesitāni. **Idhāti** “cittasamuttānaṃ rūpaṃ kaṭattārūpaṃ upādārūpa”nti imasmiṃ vacane. Ettha hi upādārūpānaṃ cittakammasamuttānatāvacanena taṃnissayānampi tabbhāvo pakāsītoṭi. **Aññataravisesanaṃ ubhayavisesanaṃ hoti** ubhayesaṃ avinibbhogena pavattanato.

58. Pubbeti hetupaccayādīsu. Visuṃ paccayabhāvenāti “paṭisandhikkhaṇe vipākābyākataṃ ekaṃ khandhaṃ paṭicca tayo khandhā kaṭattā ca rūpa”ntiādīnā vatthussa visuṃ paccayabhāvena. Ettha ca visuṃyeva paccayabhāvena dassitānīti na sakkā vattuṃ, “khandhe paṭicca vatthu, vatthuṃ paṭicca khandhā”ti paccayuppannabhāvo viya khandhānaṃ **ekatopi paccayabhāvo dassito**. Teneva hi tasmīṃ atthe attano aruciṃ vibhāvento āha “**iminā adhippāyenāhā**”ti. Yo panattho attano rucati, taṃ dassetuṃ “**khandhe paṭicca vatthūti idaṃ panā**”tiādī vuttaṃ. **Khandhānaṃ** paccayabhūtaṃ paṭiccaṭṭhapharaṇatādassanaṃ, **vatthussa** paccayabhūtaṃ paṭiccaṭṭhapharaṇatādassanaṃ, na khandhānanti sambandho. **Idhevāti** imasmiṃ aññamaññapaccaye eva. **Hetupaccayādīsupi ayameva nayo**, tattha hi paṭiccaṭṭhapharaṇassa samānatā. **Dassitāya** paṭiccaṭṭhadvayapharaṇatāya. **Khandhavatthūnañca dassitāyevāti** khandhavatthūnañca ekato paṭiccaṭṭhapharaṇatā dassitāyeva.

Evamādīti ādi-saddena “akusalaṃ dhammaṃ paṭiccā”ti evamādi saṅgayhati. Nanu bhavitabbanti yojanā. **Hetupaccayādīhi viyāti** sadisudāharaṇanti taṃ dassento “**na hī**”tiādīmāha. **Yaṃ “ekaṃ, tayo, dve ca khandhe paṭiccā”ti vuttaṃ** paccayajātanti attho. Paccayaṭṭho hi paṭiccaṭṭho. Tenāha “**te hetupaccayabhūtā eva na hontī**”ti. Etena na paṭiccaṭṭhapharaṇakassa ekantiko hetuādipaccayabhāvoti dasseti. Tenāha “**esa nayo ārammaṇapaccayādīsū**”ti. Na hi ārammaṇapaccayabhūto dhammo paṭiccaṭṭhaṃ pharati. Vuttañca “kusalaṃ dhammaṃ paṭicca kusalo dhammo uppajjati ārammaṇapaccayā”ti.

Paccayantarenapī upakāratāmattampi gahetvā paṭiccavāre vārantare ca hetuādipaccayā dassitāti upacayena yathāvuttaṃ vibhāvento “**paccayavāre cā**”tiādīmāha. **Taṃpaccayāti** vatthupaccayā, yathārahaṃ paccayabhūtaṃ vatthuṃ labhitvāti attho. **Teti** kusale khandhe paṭicca. **Tesanti** mahābhūtaṃ khandhānaṃ. **Paccayabhāvābhāvatoṭi** idaṃ khandhānaṃ hetusahajātādipaccayabhāvassa mahābhūtesu diṭṭhattā vuttaṃ. Yadi evaṃ aññamaññapaccayāpi te tesam bhaveyyunti parassa āsaṅkanirāsakaṃ karonto “**aññamaññasaddo hī**”tiādīmāha. **Nirapekkhoti** aññanirapekkho. Na hi hetudhammo dhammantarāpekkho hutvā hetupaccayo hoti, saddasīsenettha attho vutto. **Aññatarāpekkhoti** attanā sahaṅkārikāraṇabhūtaṃ, itaraṃ vā yaṃ kiñci aññataraṃ apekkhatīti aññatarāpekkho. **Yathāvuttetaretarāpekkhoti** arūpakhandhādībhedaṃ pālīyaṃ vuttappakāraṃ itaretaraṃ mithu paccayabhūtaṃ apekkhatīti itaretarāpekkho. **Paccayapaccayuppannā ca khandhā mahābhūtā idha yathāvuttā bhaveyyunti** kasmā vuttaṃ. Na hi khandhā mahābhūtā aññamaññaṃ aññamaññapaccayabhāvena vuttā, atha khandhā ca mahābhūtā cāti visuṃ visuṃ gayheyyuṃ, evaṃ sati “mahābhūtā khandhānaṃ na koci paccayo”ti na vattabbaṃ.

Yassa sayam paccayo, tato tena tannissitena vāti yassa dhammassa sayam attanā paccayo hoti, tato dhammato sayam uppajjamānaṃ kathaṃ tena dhammena tannissitena vā aññamaññapaccayena evaṃbhūtaṃ taṃ dhammajātaṃ aññamaññapaccayā uppajjatīti vattabbaṃ arahatīti vuttamevatthaṃ udāharaṇena vibhāveti “**yathā**”tiādīnā. Tattha “**khandhe paṭicca khandhā**”ti idaṃ “**tena aññamaññapaccayena uppajjamāna**”nti imassa udāharaṇaṃ, “**vatthuṃ paccayā khandhā**”ti idaṃ pana “**tannissitena aññamaññapaccayena uppajjamāna**”nti etassa. **Tasmāti** vuttameva atthaṃ kāraṇabhāvena paccāmasati. **Attano paccayassa paccayattābhāvatoṭi** attano paccayabhūtaṃ arūpakhandhassa paccayabhāvābhāvato. Na hi mahābhūtā yato khandhato uppannā, tesam paccayā hontī. **Tadapekkhattāti** itaretarapaccayabhāvāpekkhattā. **Khandhe paṭicca paccayā cāti** paṭiccavāre vuttaniyāmeneva khandhe paṭicca, paccayavāre vuttaniyāmena khandhe paccayā ca.

Naaññamaññapaccayā ca vuttāti aññamaññapaccayato aññasmā nissayapaccayādito mahābhūtānaṃ uppatti vuttā cāti attho. **Vatthum paccayā uppajjamānāti** vatthum purejātapaccayaṃ katvā uppajjamānā. **Tannissitena ca aññamaññapaccayenāti** taṃ vatthum nissitena khandhena aññamaññapaccayabhūtena uppajjanti, **tasmā** yathāvuttana kāraṇena **vatthum paccayā...pe... vuttā**, iminā pariyāyena pana ujukaṃ pavattiyam vatthussa aññamaññapaccayabhāvoti attho.

59. Sā na gahitāti yā “cakkhāyatanam nissāyā” tiādīnā cakkhāyatanādīnam nissayapaccayatā vuttā, sā idha paṭiccvāre na vuttāti attho sahaṃjātatho paṭiccatthoti katvā. Tenāha **“cakkhāyatanādīni...pe... adhippāyo”**ti. Yesam pana arūpakkhandhamahābhūtanāmarūpacittacetasikamahābhūtarūpidhammānaṃ vasena chadhā nissayapaccayo icchito, tesam vasena idha vibhato eva. Katham rūpivasena vibhattoti ce? “Vatthum paṭicca khandhā” ti hadayavatthivasena sarūpato dassito eva. Itaresampi vasena “abyākataṃ dhammaṃ paṭicca abyākato dhammo uppajjati nissayapaccayā” ti ettha dassito. Yathā hi “kusalam dhammaṃ paṭicca kusalo dhammo uppajjati ārammaṇapaccayā” tiādīsu rūpāyatanādīnam asatipi paṭiccaṭṭhapharaṇe ārammaṇapaccayabhāvo dassito hoti, evamidhāpi cakkhāyatanādīnam nissayapaccayabhāvo dassito hoti. Tena vuttaṃ **“nissaya...pe... na gahitāni”**ti.

60. Dvīsu upanissayesūti anantarapakatūpanissayesu. **Kusalāpi pana mahaggatāti pi-saddena** abyākate mahaggate ākaḍḍhati “kusalāpi mahaggatā ārammaṇūpanissayaṃ na labhanti, pageva abyākata” ti. **Kadāci na labhanti**, yadā garuṃ katvā na pavattantīti attho.

61. Aññattha hetupaccayādīsu. **Paccayaṃ aniddisitivāti** paccayaṃ dhammaṃ sarūpato aniddisitivā. Na hi hetupaccayaniddesādīsu alobhādikusalādīsarūpavisesato hetuādīdhammā dassitā. **Kusalādīsūti** idaṃ alobhādivisesanaṃ. Tena yathā alobhādīsu ayameva paccayoti niyamo natthi, evaṃ tabbisesesu kusalādīsūti dasseti. **Idha pana** purejātapaccaye. **Vatthunavatthudhammesūti** niddhāraṇe bhummaṃ. **Purejātapaccayā uppajjamānānti** iminā paṭisandhikkhaṇe, āruppe uppajjamāne ca khandhe nivatteti. Kasmā panettha vatthupurejātameva gahitaṃ, na ārammaṇapurejātanti codanaṃ manasi katvā āha **“ārammaṇapurejātampi hi vatthupurejāte avijjamāne na labbhati”**ti. **Tassāti** paṭisandhivipākassa. **Na uddhaṭoti** vuttamevattham pākaṭam kātuṃ **“nevavipāka...pe... tīṇīti vutta”**nti vuttaṃ. **Alābhatoti** yadi labbheyya, “cattārī” ti vattabbaṃ siyāti dasseti. **Tatthāti** vipākattike. **Tīṇīti** “vipākaṃ dhammaṃ paṭicca vipāko dhammo uppajjati purejātapaccayā, vipākadhammadhammaṃ, nevavipākanavipākadhammadhammaṃ paṭiccā” ti imāni tīṇi.

63. Tadupādārūpānanti te mahābhūte nissāya pavattaupādārūpānaṃ. **Vadatīti** ekakkhaṇikanānākkhaṇikakammappaccayaṃ vadatī avinibbhogavasena pavattamānānaṃ tesam paccayena viśesābhāvato. **Pavattiyam kaṭattārūpānanti** viśesanaṃ paṭisandhikkhaṇe kaṭattārūpānaṃ ekakkhaṇikassapi kammappaccayassa icchittatā. Teneva hi aṭṭhakathāyaṃ “tathā paṭisandhikkhaṇe mahābhūtāna” nti duvidhopi kammappaccayo vutto.

64. Yam yam paṭisandhiyam labbhatīti cakkhundriyādīsu yam yam indriyarūpaṃ paṭisandhiyam labbhati, **tassa tassa vasena** indriyarūpaṅca vatthurūpaṅca “kaṭattārūpa” nti vuttaṃ.

69. Kesañcīti pañcavokāre paṭisandhikkhandhādīnaṃ. Tesañhi vatthu niyamato vippayuttapaccayo hoti. **Samānavippayuttapaccayāti** sadisavippayuttapaccayā. Kusalākusalā hi khandhā ekacce ca abyākata yassa vippayuttapaccayā honti, na sayam tato vippayuttapaccayaṃ labhanti cittasamuṭṭhānānaṃ vippayuttapaccayābhāvato vatthunāva vippayuttapaccayena uppajjanato. Ekacce pana abyākata yassa vippayuttapaccayā honti, sayampi tato vippayuttapaccayaṃ labhanti yathā paṭisandhikkhaṇe vatthukkhandhā. Tena vuttaṃ **“kesaṅci khandhā...pe... nānāvippayuttapaccayāpi”**ti. **Paccayaṃ paccayaṃ karotīti** paccayadhammaṃ vatthum khandhe ca attano paccayabhūtam karoti, yathāvuttaṃ paccayadhammaṃ paccayaṃ katvā pavattatīti attho. **Tamkiriyākaraṇatoti** vippayuttapaccayakiccakaraṇato. **Paṭicca uppatti natthīti** paṭiccaṭṭhapharaṇam

natthi sahaḷātaṭṭho paṭiccaṭṭhoti katvā. “Paṭicca uppajjantī”ti ettakamevāha, kiṃ paṭicca? Khandheti pākaṭoyamatthoti. Tenāha “**kiṃ pana paṭicca**”tiādi. Paccāsattiñāyena anantarassa vidhi paṭisedho vā hotīti gaṇḥeyyāti taṃ nivāretuṃ vuttanti dassento “**anantarattā...pe... vuttam hotī**”ti āha.

71-72. Saṅkhipitvā dassitānaṃ vasenetam vuttanti saṅkhipitvā dassitānaṃ paccayānaṃ vasena etaṃ “ime tevīsati paccayā”tiādivacanaṃ vācanāmaggaṃ dassentehipi pāḷiyam vuttanti aṭṭhakathāyaṃ vuttam. **Ekenapīti** kusalādīsū ca padesu ekenapī padena, tasmim tasmim vā paccayaniddese vākyasaṅkhātena ekenapī padena. **Tayo paccayāti** hetuārammaṇādhīpatipaccayā. **Te cattāro pacchājātaṅca vajjetvāti** ettha yathāvutte cattāro paccaye vitthāritattā “vajjetvā”ti vuttam, pacchājātam pana sabbena sabbam aggahitattā. Ettakā hi ekūnavīsati paccayā yathāvutte paccaye vajjetvā avasiṭṭhā. **Ye panāti** padakārake vadati. **Saṅkhipitvāti** padassa “pāḷiyam vitthāritam avitthāritaṅca sabbam saṅgahetvā vutta”nti attham vadanti. “**Tevīsati paccayā**”ti **pāṭhena bhavitabbaṃ** “sabbam saṅgahetvā”ti vuttattā. Pacchājātapaccayoyeva hi vajjetabboti. Evaṃ vādanare vattabbaṃ vatvā idāni pāḷiyā aviparītam attham dassetuṃ “**ādimhi panā**”tiādi vuttam.

Vibhaṅgavāraṇṇanā niṭṭhitā.

(2) Saṅkhyāvāraṇṇanā

73. Yathā aññamaññapaccaye viseso vibhaṅge atthīti idaṃ hetupaccayādivibhaṅgato visesabhāvasāmaññena vuttam. Na hi yādiso aññamaññapaccayavibhaṅge viseso, tādiso purejātapaccayavibhaṅge. Tathā hi aññamaññapaccaye paṭisandhi labbhati, na purejātapaccaye. “**Vipākābyākataṃ ekaṃ khandham paṭicca**”tiādike **vibhaṅgeti** iminā yasmim paccaye vipākābyākataṃ uddhaṭam, taṃ nidassanavasena dasseti. Idaṃ vuttam hoti – yathā hetupaccayādīsū “vipākābyākataṃ ekaṃ khandham paṭicca”tiādinā vibhaṅge vipākābyākataṃ uddhaṭam atthi, evaṃ vipākābyākataḥbhāvaṃ āsevanapaccaye visesaṃ dasseti.

74. Etasmim anulometi imasmim paṭiccavāre paccayānulome. **Suddhikanayeti** paṭhame naye. **Dassitagaṇanatoti** “nava, tīṇi, eka”nti evaṃ saṅkhepato dassitagaṇanato. **Tato paresu navesūti** tato paṭhamanayato paresu dutiyādinayesu. **Aññissāti** navādhedato aññissā gaṇanāya. **Abahugaṇanena yuttassa** bahugaṇanassa paccayassa, **tena** abahugaṇanena. **Samānagaṇanatā cāti ca-saddo** byatireko. Tena paccanīyato anulome yo viseso vucati, taṃ joteti. Tenāha “**anulomeyeva daṭṭhabbā**”ti. **Anulomeyevāti** avadhāraṇena nivattitam dassetuṃ “**paccanīye...pe... vakkhati**”ti vuttam.

76-79. Te pana terasamūlakādike naye sāsevanasavipākesu dvīsū dvāvīsatiṃmūlakesu sāsevanameva gahetvā itaraṃ pajahanto āha “**pacchājātavipākānaṃ parihīnattā**”ti. **Virodhābhāve satīti** idaṃ “siyā kusalam dhammam paṭicca akusalo dhammo uppajjeyyā”tiādīsū viya parikappavacanaṃ sandhāya vuttam. Tenāha “**pucchāya dassitanayenā**”ti. **Tassa ca** tevīsatiṃmūlakassa. **Nāmantī** tevīsatiṃmūlakanti nāmaṃ. **Dvāvīsati...pe... vuttanti** etena dvāvīsatiṃmūlakova paramatthato labbhati, na tevīsatiṃmūlakoti dasseti.

Aññapadānīti hetuadhīpatipadādīni. **Suddhikanayoti** paṭhamanayo, yaṃ aṭṭhakathāyaṃ “ekamūla”nti vuttam. **Ārammaṇamūlakādīsū na labbhatīti** dumūlakādīsū taṃ na yojīyati. Heṭṭhimam heṭṭhimam sodhetvā eva hi abhidhammapāḷi pavattā, tasmā “ārammaṇe...pe... pañhā”ti vuttanti sambandho. **Tatthāti** “tīṇiyeva pañhā”ti pāṭhe. “Vattu adhippāyānuvidhāyī saddappayogo”ti katvā adhippāyaṃ vibhāvento āha “**tato uddham gaṇanaṃ nivāreti, na adho paṭikkhipatī**”ti. Gaṇanāya upanikkhittapaññattibhāvato heṭṭhāgaṇanaṃ amuñcitvāva uparigaṇanā sambhavatīti āha “**tīsū ekassa antogadhatāya ca ‘tīṇiyevā’ti vutta**”nti. **Attano vacananti** “tatridam lakkhaṇa”ntiādinā vuttam attano vacanaṃ.

80-85. Avigatā...pe... vuttepi vipallāsayojanam akatvāti adhippāyo. **Sā dassitā hotīti** sā vipallāsayojanam akatvā dassiyamānā yadipi dassitā hoti, **na evam āvikaraṇavasena dassitā hoti** tādissassa liṅganassa abhāvato yathā vipallāsayojanāyanti adhippāyo. Tenāha “**vipallāsa...pe... hotī**”ti. **Evameva adhippāyo yojetabboti** “ye...pe... tam dassetu”nti ettha “yadipi avigatānantara”ntiādinā yathā adhippāyo yojito, evameva “tenetam āvikarotī”ti etthāpi adhippāyo yojetabbo. Kiṃ vuttam hoti? Yathā tattha “ūnataragaṇanehi samānagaṇanehi ca saddhiṃ saṃsandane ūnatarā samānā ca gaṇanā hotī”ti ayamatto nāpanavasena dassito, evamidhāpīti. Tena vuttam aṭṭhakathāyaṃ “ārammaṇapaccayo yena yena bahutaragaṇanena vā samānagaṇanena vā paccayena saddhiṃ tikadukāḍibhedam gacchati, sabbattha tiṇeva pañhavissajjanāni veditabbāni”ti. Na kevalamatthavisesāvikaṇatthamevettha tathā yojanā katā, atha kho desanākkamoyeva soti dassetuṃ “**paccanīyādīsupi panā**”tiādimāha. Tattha **mūlapadanti** ārammaṇapaccayādikaṃ tasmim tasmim naye mūlabhūtam padaṃ. **Tatthāti** paccanīyādīsu. **Etam lakkhaṇanti** “tatrīdam lakkhaṇa”ntiādinā vuttalakkhaṇam. **Tasmāti** yasmā pubbenāparam pāli evameva pavattā, tasmā eva. Tena mūlapadam ādimhiyeva ṭhapetvā desanā nāyāgatāti dasseti. Yadi evam liṅganena atthavisesāvikaṇam kathanti āha “**na ca viññāte atthe vacanena liṅgena ca payojanam atthī**”ti.

Paccayānulomavaṇṇanā niṭṭhitā.

Paṭiccavāro

Paccayapaccanīyavaṇṇanā

86-87. Rūpasamuṭṭhāpakavaseneva veditabbanti idaṃ aṭṭhakathāvacanam anantaram “cittasamuṭṭhānaṅca rūpa”nti pāliyaṃ āgatattā vuttam, pañcaviññāṇanam pana ahetukapaṭisandhicittānaṅca vasena yojanā sambhavatīti katvā vuttam “**sabbasaṅgāhikavasena panetaṃ na na sakkā yojetu**”nti.

93. Sahajātapurejātapaccayāti idaṃ paccayena paccayadhammopalakkhaṇanti dassetuṃ “**sahajāta ca hetuādayo...pe... attho daṭṭhabbo**”ti vatvā “**na hī**”tiādinā tamevattham samattheti.

94-97. So paccayoti so paṭiccaṭṭhapharaṇako paccayo.

99-102. Cittasamuṭṭhānādayoti ādi-saddena bāhīrarūpaāhārasamuṭṭhānādayo rūpakotṭhāsā saṅgayhanti. **Tassāti** maggapaccayaṃ labhantassa rūpassa. **Evameva panāti** iminā yathā namaggapaccaye vuttam, evameva nahetupaccayādīsu yaṃ hetupaccayaṃ labhati, tassa parihīnattāti imamattham upasaṃharati. Tenāha “**ekaccarūpassa paccayuppannatā daṭṭhabbā**”ti.

107-130. Sabbatthāti pannarasamūlakādīsu sabbesu nayesu. Kāmaṃ suddhikanayādīsu visadisavissajjanā, idhādhippetattham pana dassetuṃ “**ekesū**”tiādi vuttam. **Idhāti** etesu nāhāramūlakādinayesu. **Gaṇanāyeva na sarūpadassananti** suddhikanaye viya gaṇanāya eva na sarūpadassanam adhippetanti attho.

Paccayapaccanīyavaṇṇanā niṭṭhitā.

Paccayānulomapaccanīyavaṇṇanā

131-189. Tiṇṇanti hetu adhipati maggoti imesaṃ tiṇṇam paccayānam. **Sādhāraṇānanti** ye tesam tiṇṇam sādhāraṇā paccayā paccanīkato na labbhanti, yasmā tesam saṅgaṇhanavasena vuttam, tasmā. **Maggapaccayeti** maggapaccaye anulomato ṭhite. **Itarehīti** hetuadhipatipaccayehi. **Sādhāraṇā sattevāti** maggapaccayavajje satteva. **Hetupaccayopi paccanīyato na labbhātīti** heturahitesu adhipatino abhāvā.

So panāti hetupaccayo **asādhāraṇoti katvā na vutto** sādharmaṇaṃ alabbhamānaṃ vuccamānattā. Na hi hetupaccayo maggapaccayassa sādharmaṇo. **Yehīti** yehi paccayehi. **Teti** anantarapaccayādayo. **Ekantikattāti** avinābhāvato. **Arūpaṭṭhānikāti** arūpapaccayā arūpadhammānaṃyeva paccayabhūtā anantarapaccayādayo. **Tenāti** “ekantikānaṃ arūpaṭṭhānikā”ti idhāhippetattā. **Tehīti** purejātāsevanapaccayehi. **Tesaṃ vasaṇāti** tesaṃ ūnataragaṇaṇaṃ ekakādīnaṃ vasaṇa. **Tassa tassāti** paccanīyato yojitassa tassa tassa dukādikassa bahugaṇaṇassa. **Gaṇanāti** ūnataragaṇanā. **Anulomato ṭhitassapīti pi-saddena** anulomato ṭhito vā hotu paccanīyato yojito vā, ūnataragaṇanāya samānanti dasseti. **Nayidaṃ lakkhaṇaṃ ekantikanti** iminā yathāvuttalakkhaṇaṃ yebhuyavasena vuttanti dasseti.

Paccayānulomapaccanīyavaṇṇanā niṭṭhitā.

Paccayapaccanīyānulomavaṇṇanā

190. Sabbesupīti pacchājātaṃ ṭhapetvā sabbesupi paccayesu. So hi anulomato alabbhamānabhāvena gahito “sabbesū”ti ettha saṅghaṃ na labhati. Arūpāvacaravipākassa āruppe uppannalokuttaravipākassa ca purejātāsevanānaṃ alabbhanatoti “**kiñci nidassanavasena dassento**”ti āha.

Avasesānaṃ lābhamattanti avasesānaṃ ekaccānaṃ lābhaṃ. Tenāha “**na sabbesaṃ avasesānaṃ lābha**”nti. **Pacchājāte pasaṅgo natthīti** pacchājāto anulomato tiṭṭhatīti ayaṃ pasaṅgo eva natthi. **Purejā...pe... labbhatīti** iminā vippayutte paccanīyato ṭhite purejāto labbhatīti ayampi atthato āpanno hotīti taṃ niddhāretvā tattha yaṃ vattabbaṃ, taṃ dassetuṃ “**purejāto pana vippayutte paccanīyato ṭhite anulomato labbhatīti idampī**”tiādi vuttaṃ. Tattha “**avasesā sabbepīti atthe gayhamāne āpajjeyyā**”ti idaṃ tassā atthāpattiyā sabbhāvadassanamattaṃ daṭṭhabbaṃ, attho pana tādiso na upalabbhatīti ayamettha adhippāyo. Tenāha “**yampi kecī**”tiādi.

Tattha **kecīti** padakāre sandhāyāha. Te hi “arūpadhātuyā cavitvā kāmādhātuṃ upapajjantassa gatinimittaṃ ārammaṇapurejātaṃ hotīti nāpetuṃ ‘navippayuttapaccayā purejāte’ti ayamatto niddhārito”ti vadanti, taṃ na yujjati āruppe rūpaṃ ārabha cittuppādassa asambhavato. Tathā heke asaṅghabhavānantarassa viya āruppānantarassa kāmāvacarapaṭiṣandhivīññāṇassa purimānupaṭṭhitārammaṇaṃ icchanti. Tenevāha “**tampi tesaṃ rucimattamevā**”tiādi. **Yujjāmānakapaccayuppannavasena vāti** yasmim yasmim paccaye anulomato ṭhite yaṃ yaṃ paccayuppannaṃ bhavituṃ yujjati, tassa tassa vasaṇāti attho. **Na vicāritaṃ** suviññeyyattāti adhippāyo. **Navāti** ārammaṇaṇānantarasamanantarūpanissayapurejātāsevanasampayuttanatti vigatapaccayā. **Tampi** tesaṃ navannaṃ paccayānaṃ anulomato alabbhamānataṃ.

191-195. Na aññamaññena ghaṭitassa mūlassāti aññamaññapaccayena paccanīyato ṭhitena yojitassa sattamassa mūlassa vitthāritattā. **Sabbaṃ sadisanti** sabbapāḷigamaṃ sadisaṃ.

Imasmim...pe... veditabboti ettha **imasmim etthāti** dve bhūmaniddesā. Tesu paṭhamassa visayo paccanīyānulometi aṭṭhakathāyameva dassitoti adassitassa visayaṃ dassetuṃ “**etesū**”tiādi vuttaṃ. **Pi-saddenāti** “imesampī”ti ettha pi-saddena. **Kismiñci** paccaye. Kammappaccayaṃ labhantānīpi cakkhādīni vipākaviññāṇādīni ca indriyaṃ na labhantīti katvā “**yebhuyena**”ti vuttaṃ, katipayānaṃ na labhantīti vuttaṃ hoti. **Maggapaccayanti**ādīsūpi eseva nayo. **Yathāvuttānīti** pañcavokārapavattiasaṅghabhavapariyāpannāni kaṭattārūpāneva vadati, na cittasamuṭṭhānarūpānīti adhippāyo. **Ye rūpadhammānaṃ paccayā hontīti** ye hetuadhipatisahajātādipaccayā rūpadhammānaṃ paccayā honti, eteyeva hetuadhipatīādike cha paccaye na labhanti. **Eteyevāti** vacanena aññe katipaye labhantīti siddhaṃ hotīti taṃ dassento “**pacchājātā...pe... labhatī**”ti āha. Ayañca paccayalābho na janakavasena veditabboti dassetuṃ “**labbhamānā...pe... dassana**”nti vuttaṃ. **Dhammavasenaṇāti** paccayuppannadhammavasena. **Indriyanti** indriyapaccayaṃ. **Yadi evanti** kaṭattārūpaṃ yaṃ yaṃ na

labhati, taṃ taṃ yadi vattabbaṃ, evaṃ sante rūpadhammesu bhūtarūpāniyeva aññamaññapaccayaṃ labhantī āha **“upādārūpāni...pe... vattabba”**nti. **Taṃ pana** upādārūpānaṃ aññamaññapaccayālābhavacanaṃ. **Arūpindriyālābhanti** arūpīnaṃ indriyānaṃ vasena indriyapaccayālābhaṃ.

196-197. Bahugaṇanampi ūnataragaṇanena yojitaṃ ūnataragaṇameva hotīti katvā vuttaṃ **“yadipi tikādīsu ‘hetuyā pañcā’ti idaṃ natthī”**ti. **Anuttānaṃ** duviññeyyatāya gambhīraṃ. Yathā ca bhūtarūpāni nārammaṇapaccayā aññamaññapaccayā uppajjanti, evaṃ paṭisandhikkhaṇe vatthurūpanti āha **“vatthupi pana labhati”**ti. Yathā heṭṭhā ekamūlakaṃ **“dumūlaka”**nti vuttaṃ, evaṃ **idhāpi dumūlakaṃ “timūlaka”nti vadanti.**

203-233. **Cetanāmattasaṅgāhake**ti cetanāmattaṃyeva paccayuppannaṃ gahetvā ṭhite pañhe. Tattha hi **“nakammaṇapaccayā hetupaccayā”**ti vuttaṃ sakkā. **Evampakāreti** idaṃ **“tīṇītiādīsū”**ti ettha ādi-saddassa atthavacanaṃti dassento **“ādi-saddo hi pakāratthova hotī”**ti āha. **Rūpampi labbhati** cetanāmattameva asaṅgaṇhanato.

Paccayapaccanīyānulomavaṇṇanā niṭṭhitā.

Paṭiccavāraṇṇanā niṭṭhitā.

2. Sahajātavāraṇṇanā

234-242. **Sahajātapaccayakaraṇanti** sahaajātaṃ paccayadhammaṃ paccayaṃ katvā pavatti. **Sahajātāyattabhāvagamaṇanti** sahaajāte paccayadhamme āyattabhāvassa gamaṇaṃ paccayuppannaṃ attanā sahaajātapaccayāyattavuttitā. Ettha ca sahaajātapaccayasankhātaṃ sahaajātaṃ karotīti sahaajāto, tathāpavatto paccayuppannadhammo. Tattha pavattamāno sahaajātasaddo yasmā tassa paccayuppannaṃ attanā sahaajātaṃ paccayadhammaṃ paccayaṃ katvā pavattiṃ tadāyattabhāvūpagamaṇaṇca vadatīti vuccati, tasmā vuttaṃ **“sahajātasaddena...pe... vutta”**nti. **Tassa karaṇassa gamaṇassa vā**ti tassa yathāvuttassa sahaajātapaccayakaraṇassa sahaajātāyattabhāvūpagamaṇassa vā. **“Kusalaṃ dhammaṃ sahaajāto”**ti imassa kusalaṃ dhammaṃ sahaajātaṃ taṃsahabhāvītaṇca paccayaṃ katvāti ayamatthoti āha **“kusalādīnaṃ kammabhāvato”**ti. Sahaajātapaccayasahabhāvīnaṃ paccayānaṃ saṅgaṇhatthañhettha **“sahaajātāyattabhāvagamaṇaṃ vā”**ti vuttaṃ.

Taṃkammabhāvatoti tesam yathāvuttapaccayakaraṇatadāyattabhāvagamaṇānaṃ kammabhāvato. Aṭṭhakathāyaṃ pana **“kusalaṃ dhammaṃ sahaajātoti kusalaṃ dhammaṃ paṭicca tena sahaajāto hutvā”**ti paṭiccasaddaṃ āharitvā attho vutto, taṃ **“paṭiccattho sahaajātattho”**ti katvā vuttaṃ. Sahaajātasaddayoge kusalaṃ dhammanti upayogavacanassa yutti na vuttā, **“tena sahaajāto hutvā”**ti pana vuttattā karaṇatthe upayogavacanaṃti dassitanti keci. Nissayavāre pana kusalaṃ dhammaṃ nissayatthena paccayaṃ katvāti vadantena idhāpi **“kusalaṃ dhammaṃ sahaajātatthena paccayaṃ katvā”**ti ayamattho vuttoyeva hoti, paṭiccasaddāharaṇampi imamevatthaṃ ñāpetīti daṭṭhabbaṃ. Upādārūpaṃ kiñci bhūtarūpassa anupālakaṃ upatthambhakaṇca hontampi sahaajātalakkhaṇena na hoti, tasmā paṭiccatthaṃ na pharatīti āha **“paṭiccāti iminā vacanena dīpito paccayo na hoti”**ti. **Nidassanavasena vuttanti** udāharaṇavasena vuttaṃ, na anavasesatoti attho. **Yathāvuttoti** paṭiccatthapharaṇavasena vutto. Yathā ca upādārūpaṃ bhūtarūpassa upādārūpassa ca paccayo na hoti, evaṃ ṭhapetvā cha vatthūni sesarūpāni arūpadhammānaṃ paccayo na hotīti dassento **“vatthuvajjāni rūpāni ca arūpāna”**nti āha.

Sahaajātavāraṇṇanā niṭṭhitā.

3. Paccayavāraṇṇanā

243. **Pati-saddo patiṭṭhatthaṃ dīpeti** **“sāre patiṭṭhito”**tiādīsū, **aya-saddo gatiṃ dīpeti** **“eti**

etthāti ayo”ti.

Bhūtopādārūpāni saha saṅgaṇhitvā vuttaṃ upādārūpānaṃ viya bhūtarūpāni nissayo hotīti katvā. Yadi evaṃ kasmā aṭṭhakathāyaṃ “mahābhūte nissāya cittasamuṭṭhānaṃ upādārūpa”nti upādārūpaṃyeva dassitanti āha “**aṭṭhakathāyaṃ panā**”tiādi.

255. Paṭiccavāre sahaḥjātetī paṭiccavāre sahaḥjātapaccayavaṇṇanāyaṃ, **kammautujānanti** kammajānaṃ utujānaṃca vasena attho vuttoti yojanā. Tathā hi tattha vuttaṃ “dvisantatisamuṭṭhānabhūtavasena vutta”nti (paṭṭhā. aṭṭha. 1.57). **Kamme cāti** kamme janakakammappaccaye gahite. **Ekantānekantakammajānanti** ekantena kammajānaṃ na ekantakammajānaṃca. Tattha asaṅṅabhāve ekantakammajānaṃ nāma jīvitindriyaṃ, itaraṃ upādārūpaṃ bhūtarūpaṃca na ekantakammajānaṃ, tadubhayampi tattha ekajjhaṃ katvā vuttaṃ, “mahābhūte paṭicca kaṭattārūpa”nti idaṃ pana kammāsamuṭṭhānavaseneva vuttanti. **So nādhippetoti** yo yathā dassito paṭiccavāre sahaḥjātapaccaye attho vutto, so idha na adhippeto. Kasmāti ce, āha “**kaṭattā...pe... gahitattā**”ti. **Taṃ pahāyāti** taṃ paṭiccavāre vuttamatthaṃ pahāya aggahetvā. **Yathāgahitassāti** “asaṅṅa...pe... kaṭattārūpaṃ upādārūpa”nti pāliyaṃ eva gahitassa. **Paṭicca paccayāti** idaṃ dvinnāṃ vārānaṃ upalakkhaṇaṃ. Paṭiccavāre āgatanayena mahābhūte paṭicca, paccayavāre āgatanayena mahābhūte paccayā mahābhūtānaṃ uppatti na nivāretabbā, tasmā “upādārūpasāṅkhātaṃ kaṭattārūpa”nti evaṃ upādārūpaggahaṇena kaṭattārūpaṃ avisesetvā upādārūpānaṃ nivattetabbānaṃ utucittāhārasamuṭṭhānānaṃ atthitāya kaṭattā...pe... visesanaṃ daṭṭhabbanti evamettha yojanā veditabbā.

286-287. Ekaccassa rūpassāti ahetukacittasamuṭṭhānassa. Ito paresupi ekaccarūpaggahaṇe eseva nayo. **Cakkhādidhammavasenāti** cakkhāyatanādirūpadhammavasena. **Cittasamuṭṭhānādikoṭṭhāsavasenāti** cittajādirūpadhammabhāgavasena. **Sabbaṃ labbhatīti** satipi imassa nayassa nahetumūlakatte nonatthinovigatesu ekanti gaṇanaṃ sabbaṃ rūpaṃ sabbassa rūpassa vasena gaṇanā labbhati catusantativasena vattamānesu pañcavīsatiyā rūpadhammesu vajjitabbassa abhāvā.

Paccayavāraṇṇanā niṭṭhitā.

4. Nissayavāraṇṇanā

329-337. Nissayapaccayabhāvanti nissayavāre vuttassa sahaḥjātapurejātassa ca nissayaṭṭhassa dhammassa paccayabhāvaṃ paccayavārena niyametuntī yojanā. Tathā paccayavāre “paccayā”ti vuttassa paccayadhammassa sahaḥjātapurejātabhāvaṃ nissayavārena niyametuntī yojanā. Niyamanañcetha paccayaṭṭhanissayaṭṭhānaṃ pariyāyantaṃ pakāsittā atthato bhedābhāvadassananti veditabbo. Tena vuttaṃ “**paccayattaṃ nāma nissayattaṃ, nissayattaṃ nāma paccayatta**”nti.

Nissayavāraṇṇanā niṭṭhitā.

5. Saṃsaṭṭhavāraṇṇanā

351-368. Sāti savatthukā paṭisandhi. **Idhāpīti** imasmiṃ saṃsaṭṭhavārepi. **Adhipatipurejātāsevanesu** anulomato **nakammanavipākanajhānanavippayuttesu** paccanīyato ṭhitesu na labbhati, **añnesu** sahaḥjātādīsū anulomato hetuādīsū **paccanīyato ca** anulomato ca ṭhitesu labbhatīti. Tenāha “**labbhamānapaccayesu**”ti. **Imassa visesassāti** imassa yathāvuttassa visesassa dassanattaṃ uddhaṭā, tasmā tādisassa visesassa dassetabbassa abhāvato vatthuvirahitā paṭisandhi anuddhaṭā, na vippayutte paccanīyato ṭhite abhāvato attho. **Hetupaccayavirahitamattadassanattanti** iminā bhūtakathanaṃ ahetukaggahaṇaṃ na byabhicāranivattananti dasseti. “**Ahetukavipākakiriyavasenā**”ti bhavitabbaṃ hetupariyantattā maggassa.

369-391. “Hetumhi anulomato ðhite jhānamaggā paccanīyato na labbhantī”tiādi yaṃ idha aṭṭhakathāyaṃ vuttaṃ, taṃ hetupaccayādivasena uppajjamāno dhammo cattāro sabbaṭṭhānikā āhārindriyajhānamaggā cāti ime aṭṭha paccaye alabhanto nāma natthīti iminā paṭiccavāre anulomapaccanīyavaṇṇanāyaṃ vuttana nayena vedituṃ sakkāti āha “**paṭiccavāre...pe... nayenā**”ti. **Sesesūti** ahetukamohavajjāhetukesu **pañcaviññānā...pe... jhānapaccayaṃ labhanti**, tasmā “ahetukamohova jhānamaggapaccayaṃ labhatī”ti na sakkā vuttuṃ, kiñca **paccanīyānulome dvinnam paccayānam anulomena** anulomavasena **saha yojanā natthi** eekasseva yojanāya āgatattā, tasmā ahetukamohova maggapaccayaṃ labhatīti evamettha yojanā veditabbā.

Saṃsaṭṭhavāraṇṇanā niṭṭhitā.

6. Sampayuttavāraṇṇanā

392-400. Sadisaṃ sampayuttanti “yaṃ sadisaṃ, taṃ saṃsaṭṭha”nti vuccamānaṃ sampayuttaṃ na hoti “saṃsaṭṭhā yojitā haya”tiādīsu. **Asaṃsaṭṭhaṃ vokiṇṇanti** yaṃ na saṃsaṭṭhaṃ antarantarā uppajjamānena vokiṇṇampi vimissatāya sampayuttanti vuccamānaṃ, taṃ saṃsaṭṭhaṃ na hoti “yā sā vīmaṃsā...pe... kosajjasampayuttā”tiādīsu. Evaṃ asampayuttassapi saṃsaṭṭhapariyāyo asaṃsaṭṭhassa ca sampayuttapariyāyo atthīti tadubhayaṃ itaretaraṃ niyameṭīti dassanattaṃ vāradvayadesanāti dassento āha “**ubhayaṃ...pe... niyāmakam hoti**”ti, saṃsaṭṭhasaddo hi vokiṇṇaṭṭho natthi, sampayuttasaddo ca sadisattho, tasmā yathā saṃsaṭṭhasaddo sampayuttasaddāpekkho sadisatthato vinivattitvā ekuppādādisabhāvameva atthaṃ bodheti, evaṃ sampayuttasaddopi saṃsaṭṭhasaddāpekkho vokiṇṇaṭṭhato vinivattitvāti aññamaññāpekkhassa saddadvayassa aññamaññāniyāmakatā veditabbā.

Sampayuttavāraṇṇanā niṭṭhitā.

7. Pañhāvāravibhaṅgavaṇṇanā

401-403. Te paccayeti te hetuādike paccaye. **Paṭipāṭiyāti** ettha paccayaṭipāṭiyā kusalādīpadapaṭipāṭiyā vāti āsaṅkāyaṃ ubhayaṃvaseṇāpi attho yujjati dassento paṭhamam tava sandhāyāha “**yathākkamenā**”tiādi. Tassattho – “hetupaccayo ārammaṇapaccayo”tiādinā nayena desanākkamena yāya paṭipāṭiyā paṭiccavāre paccayā āgatā, tadanurūpaṃ te dassetunti. Dutiyam pana dassetuṃ “**kusalo kusalassā**”tiādi vuttaṃ. Sā paṇāyaṃ padapaṭipāṭi yasmā na kusalapadadassanamattena dassitā hoti, tasmā taṃ ekadesena sakalam nayato dassento āha “**kusalo kusalassāti...pe... hoti**”ti. **Tenāti** nidassanamattena “kusalo kusalassā”ti padena. **Sabbo pabhedoti** yaṃ tattha tattha paccaye “kusalo kusalassā”tiādiko yattako pabhedo vissajjanaṃ labhati, so sabbo pabhedoti attho. **Te paccaye paṭipāṭiyā dassetunti** te hetuādipaccaye kusalādīpadapaṭipāṭiyā dassetuṃ.

404. Phalavisesaṃ ākaṅkantaṃ paṭiggāhakato viya dāyakatopi yathā dakkhiṇā visujjhati, evaṃ dānaṃ dentīti āha “**visuddham katvā**”ti. **Tesanti vattabbatārahanti** iminā vodānassa sakadāgāmiādīnaṃ āveṇikataṃ dasseti. Kāmaṃ aggamaggapurecārikampi vodānameva, asekkho pana hutvā taṃ paccavekkhatīti na taṃ idha gahitaṃ. **Tanti** vodānaṃ. **Gotrabhucittanti** aṭṭhamakassa uppajjanakāle “gotrabhū”ti vattabbatārahaṃ cittaṃ. Gotrabhusadisanti vā sotāpannādīgotrābhībhāvīti vā **gotrabhucittanti** evamettha attho veditabbo. **Paccayuppannaṃ bhūmito vavatthapeti**, “tebhūmakakusalamevā”ti ettha viya na paccayadhammanti attho. **Desanantarattāti** “kusalacittasamaṅgissā”tiādinā puggalāmasanadesanato aññattā, aññathā gahitaṃ puna na gaṇheyyāti adhippāyo.

405. Rāgarahitassa viya somanassarahitassa ca rāgassa na ārammaṇe assādanavasena pavatti ajjupekkhanatoti vuttaṃ “**assādanaṃ...pe... kicca**”nti. Sahasākārappavattāya uppilāvitasabhāvāya pītiyā āhitavisesāya taṇhāya taṃ taṇhābhinandananti vuccatīti taṃ sandhāyāha “**pītikiccasahitāya taṇhāya kicca**”nti. Yathā ca yathāvuttakiccavisesāya pītiyā āhitavisesā taṇhā taṇhābhinandanā, evaṃ

diṭṭhābhinandanā veditabbā. Yasmā pana sā atthato paccayavisesavisiṭṭhā diṭṭhiyeva, tasmā vuttaṃ “**diṭṭhābhinandanā diṭṭhiyevā**”ti. **Ettha panāti** “abhinandatī”ti padassa taṇhādīṭṭhivasena vuttetu etesu pana dvīsu atthesu. **Abhinandantassāti** idaṃ diṭṭhābhinandanāṃyeva sandhāya vuttanti adhippāyena “**pacchimattameva gahetvā**”ti vuttaṃ. **Abhinandantassāti** pana avisesato vuttattā taṇhāvasena diṭṭhivasena abhinandantassāti ayamettha attho adhippeto, tasmā “**abhinandanā...pe... na sakkā vattu**”nti idamidha vacanamano kāsaṃ. Kasmā? Diṭṭhirahitepi santāne abhinandanassa vuttattā. **Taṇhāvasena nandatī** taṇhābhinandanavaseneva vutto attho purimo attho. **Dvīsu pana somanassasahagatacittuppādesūti** diṭṭhirahitāni somanassasahagatacittāni sandhāyāha. **Yathāvuttenāti** “sarāgassa somanassassā”tiādinā vuttana somanassena assādentassa, rāgena ca tesuyeva yathāvuttetu dvīsu cittesu assādentassa, catūsupi somanassasahagatacittesu sappītikataṇhāya abhinandantassa, catūsupi diṭṭhisampayuttetu diṭṭhābhinandanāya abhinandantassa diṭṭhi uppajjatīti evamettha yojanā veditabbā. Tena vuttaṃ “**itipi sakkā yojetu**”nti. Yathā diṭṭhūpanissayato diṭṭhābhinandanā sambhavati, evaṃ taṇhūpanissayato taṇhābhinandanāpi sambhavatīti daṭṭhabbaṃ. “Abhinandatī rāgo uppajjatī”ti vacanato sappītikataṇhāya abhinandantassa rāgupattipi vattabbā, na vā vattabbā taṇhābhinandanāya eva rāgupattiyā vuttattā.

406. “Tadārammaṇatāyā”ti vattabbe “**tadārammaṇatā**”ti vuttanti āha “**vibhattilopo hettha kato**”ti. **Tadārammaṇatāti** ettha tā-saddābhidheyyo attho bhāvo nāma, so pana tadārammaṇasaddābhidheyyo añño natthīti dassento āha “**bhāvavantato vā añño bhāvo nāma natthī**”ti. Etena sakatthe ayaṃ **tā**-saddoti dasseti. Tenāha “**vipāko tadārammaṇabhāvabhūtoti attho**”ti. Etasmiñcatthe “tadārammaṇatā”ti paccattekavacanāṃ daṭṭhabbaṃ. **Viññāṇācāyatana... pe... na vuttanti** yadipi kāmāvacaravipākānampi kammaṃ ārammaṇaṃ labbhati, taṃ pana viññāṇācāyatananevasaññānāsaññāyatanavipākānaṃ viya na ekantena imassa vipākacittassa idaṃ kammaṃ ārammaṇanti vavathitaṃ kāmāvacaravipākacittānaṃ bahubhedattā, tasmā taṃ labbhamānampi na vuttanti attho. Yadi evaṃ kiṃ taṃ labbhamānampi na dassitamevāti āsaṅkāyaṃ āha “**tadārammaṇena panā**”tiādi. **Anulomato samāpajjane yebhuyyena āsannasamāpattiyā ārammaṇabhāvo dassito**, aññathā “paṭilomato vā ekantarikavasena vā”ti vacanaṃ niratthakaṃ siyāti adhippāyo. **Bhaveyyāti** anāsannāpi samāpatti ārammaṇaṃ bhaveyya, na sakkā paṭikkhipitunti attho. Teneva hi “**yebhuyyenā**”ti vuttaṃ. **Evaṃ satīti** yadi āvajjanāya eva ārammaṇabhāvena kusalānaṃ khandhānaṃ abyākatārammaṇatā adhippetā, evaṃ sante. **Vattabbaṃ siyāti** “iddhividhaññassā”ti ca pāliyaṃ vattabbaṃ siyā tassāpi āvajjanāya ārammaṇabhāvato. **Taṃ na vuttanti** taṃ abyākataṃ iddhividhaññānaṃ “kusalā khandhā iddhividhaññassā”ti na vuttaṃ. **Hontīti** ārammaṇaṃ hontī. **Tānīti** cetopariyaññādīni. **Yāya kāyacīti** cetopariyaññādīnaṃ aññesañca kusalānaṃ ārammaṇakaraṇavasena āvajjantiyā.

407-409. Ādīnavadassanena sabhāvato ca anīṭṭhatāmatavasena ca domanassassa uppatti veditabbāti yojetabbaṃ. Āghātavatthuādibhedena **akkhantibhedā** veditabbā.

410. **Sabbassāti** pakaraṇaparicchinne gayhamāne sabbassa abyākatassa, atthantaravasena pana gayhamāne sabbassa ñeyyassāti attho. **Asakkuṇeyyattāti** idaṃ vattabbassa anantāparimeyyatāya vuttaṃ, na aññāṇapaṭighātato.

417. Vodānasāṅkhātaṃ vuṭṭhānaṃ apubbato na hotīti vuttaṃ “**apubbato cittasantānato vuṭṭhānaṃ bhavaṅgamevā**”ti. Tañhi yathāladhassa visesassa vodāpanaṃ paguṇabhāvāpādanaṃ apubbaṃ nāma na hotī. Tathā hi vuttaṃ “heṭṭhimaṃ heṭṭhimañhi paguṇajjhānaṃ uparimassa uparimassa padaṭṭhānaṃ hoti, tasmā vodānampi vuṭṭhānanti vutta”nti. **Avajjetabbattā vattabbaṃ natthīti** kusalahāvena samānattā vajjetabbatāya abhāvato vibhajitvā vattabbaṃ natthi, tasmā yadettha visesanaṃ labbhati, taṃ dassento “**nevasaññānāsaññāyatanā...pe... samāpattiyā**”ti āha. **Cittuppādakaṇḍe vuttamevāti** paṭṭhāne pana “kusale niruddhe vipāko tadārammaṇatā uppajjatī”tiādinā “kiriyaṇantaraṃ tadārammaṇabhāve”ti yaṃ vattabbaṃ, taṃ cittuppādakaṇḍavaṇṇanāyaṃ vuttameva.

Tā ubhopīti yā “kusalavipākāhetukasomanassasahagatā upekkhāsahagatā cā”ti dve manoviññādhātuyo vuttā, tā ubhopi somanassasahagatamanoviññādhātuvāsena vuttā. Kasmā? Dasannaṃ kāmāvacarabhavaṅgānaṃ attano tadārammaṇakāle santīraṇakāle ca voṭṭhabbanassa anantarapaccayabhāvato. Upekkhāsahagatā pana yathāvuttānaṃ dasannaṃ vipākānaṃ manoviññādhātūnaṃ attano tadārammaṇādikāle voṭṭhabbanakiriyassa santīraṇakāle manodhātukiriyassa bhavaṅgakāleti yojetabbaṃ.

423. Paṭivijjhivāti jānitvā. **Daḷhaṃ na gahetabbanti** daḷhaggāhaṃ na gahetabbaṃ. **Balavato... pe... vipaccanatoti** etena balavatā dubbalatā ca appamāṇaṃ, katokāsatā pamāṇanti dasseti. Katokāsatā ca avasesapaccayasamavāye vipākābhikumhatāti daṭṭhabbaṃ. **Yaṃ kiñcīti** ca balavaṃ dubbalaṃ vāti attho. **Vipākajanakampi kiñci kammaṃ upanissayapaccayo na hotīti sakkā vattum.** Sati hi kammaupanissayapaccayānaṃ avinābhāve vipākattike upanissayapaccaye gahite kammaṃ paccayo visum na uddharitabbo siyā, vedanāttike ca upanissaye paccanīyato ṭhite kammaṃ paccayena saddhiṃ aṭṭhāti na vattabbaṃ siyāti adhippāyo. Paccayadvayassa pana labbhamānatapparāya desanāya upanissaye gahitepi kammaṃ paccayo uddharitabbo evāti sakkā vattum. Labbhamānassa hi uddharaṇaṃ nīyāgatam, tathā upanissaye paccanīyato ṭhitepi kammaṃ paccayo vattabova upanissayassa anekabhedattā, vipākam janentaṃ kammaṃ vipākassa upanissayo na hotīti na vattabamevāti veditabbaṃ.

Parassa pavattaṃ omānanti parasantāne attānaṃ uddissa pavattaṃ avamānaṃ. **Tesūti** yo anena pubbe hato, tassa nītimittesu. Mātughātanatthaṃ pavattitatāya purimacetanāya **mātughātakamma** **sadisatā**, yathā ca **añattiyam pahārepi** eseva nayo. Tena vuttaṃ “**esa nayo dvīhi pakārehīti etthāpi**”ti.

Vaṭṭanissito dānādivāsena saddhaṃ uppādetto rāgaṃ upanissāya dānādivāsena saddhaṃ uppādeti nāma, na vivaṭṭanissito avisesena vuttattāti āha “**iminā adhippāyena vadati**”ti. **Etesanti** kāyikasukhadukkhānaṃ. **Ekatoṇṇi** idaṃ yadipi ekasmiṃ santāne sukhadukkhānaṃ ekasmiṃ khaṇe uppatti natthi, paccayasamāyogo pana tesam ekajjhampi hotīti katvā vuttaṃ.

425. Purimavāresu viyāti paṭiccavārādīsu purimesu viya. **Imasminti** pañhāvāre. **Paccayena uppatti vuccatīti** hetuādīnā tena tena paccayena taṃtaṃpaccayuppannaṃ uppatti na vuccati. **Tesam tesam dhammānanti** hetuādīnaṃ tesam tesam paccayadhammānaṃ. **Taṃtaṃpaccayabhāvoti** hetuādīnaṃ taṃtaṃpaccayabhāvo vuccati. Teneva purimesu chasu vāresu “kusalō dhammo uppajjati”tiādīnā tattha tattha uppādaggahaṇaṃ kataṃ, idha pana “kusalassa dhammassa hetupaccayena paccayo”tiādīnā paccayabhāvo gahito. **Tenāti** upatthambhakattena paccayabhāvena. **Idhāti** pañhāvāre.

427. Paṭiṭṭhābhūtassāti nissayabhūtassa. **Kammaṃ paccayoti** sahaṃjātakammaṃ paccayo. **Dukamūlakadukāvasānāti** “kusalō ca abyākato ca dhammā kusalassa ca abyākatassa ca dhammassā”ti evaṃ dukamūlakadukāvasānā katvā vuttapañhā. **Tatthāti** paccayavāre. **Kusalō ca abyākato ca dhammāti** kusalābyākatappabhedā paccayuppannā dhammā. **Yato tato vāti** paccayadhammaniyamaṃ akatvā yato tato vā kusalābyākatavasena **ubhayapaccayato uppattimattameva tattha** paccayavāre **adhippetam, ubhayassa** yathāvuttassa paccayuppannaṃ **ubhinnaṃ** yathāvuttānaṃ yeva paccayadhammānaṃ **paccayabhāvo na adhippeto** uppādapadhānattā tassā desanāyāti adhippāyo. **Nissayādhībūtāti** nissayaatthiavigatabhūtā paccayadhammā na labbhanti, tasmā kusalō ca...pe... na vuttanti yojanā.

Pañhāvāravibhaṅgavaṇṇanā niṭṭhitā.

Pañhāvārassa ghaṭane anulomagaṇanā

439. Etthāti abyākatamūlake. **Yadi evanti** yadi kusalākusalamūlehi alabbhamānampi labbhanti, evaṃ sante. **Gaṇanamattasāmaññato, na** paccayasāmaññatoti adhippāyo.

440. Nidassanavasena datṭhabbo yebhuyyena indriyamaggapaccayānañca hetupaccayassa visabhāgatā. **Indriyamaggapaccayā ca visabhāgā**ti visesanena yo tatha sabhāgabhāvo, taṃ nivatteti. **Tathā bhāvābhāvato**ti tasmim̄ hetupaccayākāre sati bhāvato, hetudhammānaṃ hetupaccayabhāve sati sahajātādipaccayabhāvatoati attho. **Adhipatipaccayādīnanti** adhipatindriyamaggapaccayānaṃ. **Visabhāgatā** hetupaccayassa. **Kusalādihetūnanti** kusalākusalakiriyābyākatahetūnaṃ. **Hetupaccayabhāveti** hetupaccayatte hetubhāvena upakārakatte. **Vipākapaccayabhāvābhāvato**ti vipākapaccayabhāvassa abhāvato. Na hi vipākānaṃ vipākapaccayatā atthi. Vipākahetūnaṃ itarahetūhi hetupaccayatāya atthi sabhāgatāti āha **“hetuvajjāna”**nti. **Vipākānaṃ visabhāgatāya bhavitabbaṃ**, na hi vipākadhammadhammanevavipākanavipākadhammadhammānaṃ vipākehi sabhāgatā atthi rāsantarabhāvatoati adhippāyo. **Ubhayapaccayasahite**ti hetuvipākapaccayasahite. **Hetupaccayabhāve vipākamhī**ti hetupaccayabhāvena vattamāne vipākadhamme. **Vipākapaccayattābhāvābhāvato**ti vipākapaccayabhāvābhāvassa abhāvato. Na hi vipāko vipākassa vipākapaccayo na hoti, tasmā natthi hetuvipākapaccayānaṃ visabhāgatāti adhippāyo.

Idāni vuttamevatthaṃ udāharaṇena samatthento **“yathā hī”**tiādīmāha.

Hetusahajātapaccayasahiteti hetupaccayasahajātapaccayasahite, ubhayapaccayayutteti attho. **Hetūnanti** idam̄ “sahajātapaccayatābhāvo”ti imināpi sambandhitabbaṃ. Hetūnañhi hetupaccayasahite rāsīmhi hetupaccayabhāvo viya sahajātapaccayabhāvopi atthīti. Tatha hetuvajjānaṃ sahajātadhammānaṃ hetudhammassa ca na sabhāgatā vuccati sahajātapaccayena sabhāgabhāvato. **Evamidhāpī**ti yathā hetusahajātapaccayesu vuttappakārena natthi visabhāgatā, evamidhāpi hetuvipākapaccayesu natthi visabhāgatāti attho. **Esa nayo vippayuttapaccayepī**ti yvāyaṃ nayo hetusahajātapaccayesu visabhāgatābhāvo vutto, esa nayo hetusahite vippayuttapaccayepīti attho. Tatthāpi hi “hetuvippayuttapaccayasahite rāsīmhī”tiādi sakkā yojetuntī. Paccuppanno eva paccayuppanno, paccayo pana atītopi anāgatopi kālavinimuttopi hotīti paccuppanakkhaṇe hetupaccayabhāve sahajātādipaccayabhāvam̄ sandhāya tathābhāvābhāvavasena sabhāgatāya vuccamānāya nānākkhaṇikānaṃ kusalādīnaṃ hetūnaṃ vipākānañca vasena visabhāgatā tasseva hetussa na vattabbāti imamatthaṃ dasseti **“apicā”**tiādīnā.

Aggahitavisesato sāmāññato viseso na suviññeyyo hotīti adhippāyenāha **“kusalā vīmamsādhīpatīti evaṃ vattabba”**nti.

441-443. “Itarāni dve labhatī”ti evaṃ vuttuṃ na sakkā, hetādhipatidukehi dassitāni yāni “kusalo dhammo kusalassa dhammassa, kusalo dhammo abyākatassa, kusalo dhammo kusalassa ca abyākatassa ca, abyākato dhammo abyākatassā”ti cattāri vissajjanāni, tesu hetusahajātanissayaatthiavigataindriyamaggapaccayesu sampayuttapaccaye pavitṭhe “kusalo dhammo kusalassa, abyākato dhammo abyākatassā”ti imāni dve labhatī. Yaṃ sandhāya aṭṭhakathāyaṃ vuttaṃ “sace tehi saddhim̄...pe... tāneva dve labhatī”ti, tehi pana itarāni nāma “kusalo dhammo abyākatassa, kusalo dhammo kusalassa ca abyākatassa cā”ti imāni dvepi siyuṃ. Na hi kusalo dhammo kusalassa vippayuttapaccayena paccayo hoti. Tena vuttaṃ **“itarāni dve labhatīti purimāpāṭho”**tiādi. **Itarāni dveti** vā aññāni dve, yāni sampayuttapaccayavasena dve vissajjanāni, vippayuttapavese pana tato aññāni aññathābhūtāni dve vissajjanāni. Yāni sandhāya vuttaṃ **“kusalo abyākatassa, abyākato abyākatassāti dve labhatīti paṭhantī”**ti. **Tesūti** ūnataragaṇanāhetūsu vipākāaññamaññādīsu.

Anāmaṭṭhavipākānīti aggahitavipākapaccayāni, ghaṭanaṃ apekkhitvā ayaṃ napuṃsakaniddeso. Na **vipākaheturahitāni** sādharmaṇavasena vuttatā. Tena vuttaṃ aṭṭhakathāyaṃ “sāmāññato navannampi hetūnaṃ vasena vuttānī”ti, “vipākahetupi labbhatī”ti ca.

Tatthāti pañcamaghaṭanato paṭṭhāya pañcasu ghaṭanesu. Tena vipākena saha, samaṃ vā uṭṭhānaṃ etassāti **samuṭṭhānanti** ayampi attho sambhavaṭṭīti vuttaṃ **“paṭisandhiyaṃ kaṭattārūpampi taṃsamuṭṭhānaggahaṇeneva saṅgaṇhātī”**ti. **Eseva nayoti** iminā kaṭattārūpampi taṃsamuṭṭhānaggahaṇeneva saṅgaṇhātīti imamevatthaṃ atidisati.

Evampīti “etesu panā” tiādinā saṅkhepato vuttappakārepīti attho. Tenāha “**etesu pana...pe... vuttanayenapī**”ti. **Yo yo paccayoti yo yo hetuādipaccayo mūlabhāvena thito** paresaṃ paccayānaṃ. **Tappaccayadhammānanti** tehi hetuādipaccayehi paccayabhūtānaṃ hetuādiddhammānaṃ. **Niravasesaūnaūnatarāūnatamalābhakkamenāti** te dhammā yesu vissajjanesu yathārahaṃ niravasesā labbhanti, yesu ūnā ūnatarā ūnatamā ca labbhanti, tena kamena ghaṭanāvacaṇato paccayuppannāpi yathākkamaṃ niravasesādikkameneva labbhanti. Tenāha “**niravasesalābhe ca...pe... veditabbo**”ti.

Hetumūlakam niṭṭhitam.

445. Pañcame ekanti sanissayato abyākatamūlaṃ akusalanti idaṃ sandhāyāha “**vatthuvaseṇa sanissayaṃ vakkhatī**”ti. **Na idanti** idaṃ catuttham ghaṭanaṃ labbhamānassapi vatthussa vaseṇa ghaṭanaṃ na hoti tassa vakkhamānattā, tasmā “ārammaṇavasenevā”ti ekaṃso gahitoti atthayojanā.

446. Sahajātapurejātā eko nissayapaccayoti iminā satipi paccayadhammabhede paccayabhāvabhedo natthīti dasseti, tathā “**atthipaccayo**”ti imināpi. Avigatapaccayopettha atthipaccayeneva saṅgahitoti daṭṭhabbo. “Atthiavigatapaccayo”ti pāṭho. Sahajātārammaṇādhipati pana na kevalaṃ paccayadhammappabhedova, atha kho paccayabhāvabhedopi atthevāti āha “**evaṃ...pe... abhāvato**”ti. Vuttamevattham pākaṭataram kātuṃ “**nissayabhāvo hī**”tiādi vuttam. Tattha **sahajātapurejātānissayādīnanti** saḥajātanissayapurejātānissayādīnaṃ. **Ādi-saddena** saḥajātapurejātaatthiavigatābhāve saṅgaṇhāti. **Na panevanti** tiādinā vuttamevattham vivaranto “**sahajāto hī**”tiādimāha. **Bhinnasabhāvāti** samānēpi adhipatisaddavacaṇīyabhāve paccayabhāvaviṣiṭṭhena sabhāvena bhinnasabhāvā, na hetupaccayādayo viya sabhāvamattena. **Tenevāti** bhinnasabhāvattā eva. Aññāthā “kusalo kusalassa saḥajātavaseṇa, abyākato ārammaṇavaseneva adhipatipaccayena paccayo hotī”ti tadubhayaṃ ekajjhaṃ katvā vattabbaṃ siyā, na ca vuttanti dassento āha “**pañhāvāravibhaṅge...pe... na vutta**”nti.

447-452. Sādhāraṇavasenevāti adhipatindriyabhāvasāmaññena. Tathā ceva cha ghaṭanāni yojetvā dasseti “**adhipatī**”tiādinā. **Dve paccayadhammāti** vīriyavīmaṃsānaṃ vaseṇa dve paccayadhammā, **ekoyeva** cittādhipativaseṇa. **Samaggakāni pubbe vattabbāni siyuṃ** adhipatipaṭipāṭiyāti adhippāyo. Paṭhamañhi vīriyādhipati pacchā cittādhipatīti. **Tesaṃ** āhāramaggapaccayānaṃ **pacchā vuttāni** samaggakāni. **Sadisattāti** idaṃ parato “hetuvaseṇa vuttaghaṭanehi sadisattā”tiādivacaṇaṃ sandhāya vuttam.

457-460. Dumūlakanti kusalābyākatamūlakam. Tam kusalamūlakesu kasmā vuttanti codanāyaṃ āha “**abyākatasahitassa kusalassa paccayabhāvadassanavaseṇā**”ti. **Etthāti** anulomagaṇane. **Yathāvuttēsūti** “sahajātaaññamaññanissayavipākasaṃpayuttavippayuttaatthiavigatamūlakesū”ti evaṃ vuttēsūti saḥajātādīmūlakesu. **Atthiavigatamūlakavajjesūti** atthiavigatamūlakāni ṭhapetvā avasesesu **āhārena** āhārapaccayena ghaṭanāni na yojitānīti sambandho. Adhipatindriyehi ca nissayādivajjesu saḥajātādīsūti ghaṭanāni na yojitānīti yojanā. **Tēsūti** hetukammajhānamaggesu āhāre adhipatindriyēsūti ca tamtamghaṭanavaseṇa yathāvuttēsūti yojiyamānesu. **Tenāti** hetuādiarūpadhammānaṃyeva labbhanato. **Tehi ghaṭanānīti** hetuādīhi yojiyamānāni ghaṭanāni. **Rūpamissakattābhāvenāti** idaṃ vuttasadisattāya kāraṇavacaṇaṃ. Kasmā panettha atthiavigatamūlakāni nissayavippayuttaatthiavigatāni tehi vajjitānīti āha “**atthiavigatehi panā**”tiādi. Nissayādīhi yojiyamānāni adhipatindriyāni rūpamissakāni hontīti na vuttānīti sambandho. Yadi evaṃ kasmā atthiavigatamūlakesu āhārena, nissayādīmūlakesu ca adhipatindriyehi yojanā katāti codanaṃ sandhāyāha “**adhipatāhārindriyamūlakesū**”tiādi.

473-477. Edisesu ṭhānesu khandha-saddo arūpesveva niruḥhoti katvā vuttam “**na pavatte viya khandhāyeva paccayuppannabhāvena gahetabbā**”ti. **Kaṭattārūpampi pana labbhatīti** iminā “ekakkhaṇīkammavaseṇa vuttānī”ti vacanaṃ paṭikkhipati. Yamattham sandhāya “**kasmā na vutta**”nti vuttam, tam pākaṭataram karonto “**nanū**”tiādiṃ vatvā puna tam udāharaṇena vibhāvetum “**yathācā**”tiādi vuttam. **Ārammaṇanissayapaccayabhāvenāti** ārammaṇapaccayabhāvena

nissayapaccayabhāvena ca. Kammassa ca paccayabhāvo pākaṭoyevāti āha “**kammampi ārammaṇapaccayabhāvena vattabba**”nti. **Dvinnam paccayabhāvānanti** kammārammaṇapaccayabhāvānaṃ. **Aññamaññapaṭikkhepatoti** iminā dvinnam paccayabhāvānaṃ bhinnattā pavattiākārassa ekakkhaṇe ekasmiṃ paccayadhamme ayujjamānataṃ dasseti. Yathādassitassa nidassitabbena asamānataṃ dassento “**paccuppannañhi...pe... yuttam vattu**”nti āha. **Kammaṃ panāti**ādinā kammārammaṇapaccayānaṃ pavattiākārassa bhinnattā ekajjhaṃ hutvā appavattimeva vibhāveti. Yato te aññamaññaṃ paṭikkhepakā vuttā, kasmā pana taṃyeva vatthu ārammaṇapaccayo hoti nissayapaccayo ca, na taṃyeva kammaṃ ārammaṇapaccayo ca kammaṃpaccayo cāti? Na codetabbametam, dhammasabhāvo esoti dassento “**esa ca sabhāvo**”tiādimāha. Tatha **vattamānānanti** paccuppannānaṃ. **Yanti** idam “vattabattā”ti iminā sambandhiyamānaṃ “**yā**”ti itthilingavasena vipariṇāmetabbaṃ. **Yathāti**ādinā tamevatthaṃ udāharaṇadassanena vibhāveti.

478-483. Yaṃ viññānaṃ adhipatipaccayo na hoti, taṃ **anāmaṭṭhādhipatibhāvaṃ** daṭṭhabbaṃ. **Vatthussa vassenāti** hāpetabbassa vatthussa vasena.

484-495. Arūpindriyāni rūpānaṃ paccayattena labbhantīti yojanā. Yadi pi evaṃ vuttam rūpindriyānaṃ arūpānaṃ paccayattañca labbhantīti āha “**cakkhādīni ca pana cakkhuvīññāṇādīnaṃ labbhantī**”ti. **Taṃsamānagatikāti** vīriyena samānagatikā maggapaccayatāya.

511-514. Viprayuttamūlake “dasame kusalādayo cittasamuṭṭhānāna”nti idam pavattivasena aṭṭhakathāyaṃ vuttanti āha “**paṭisandhiyaṃ pana ‘khandhā kaṭattārūpānaṃ vatthu ca khandhāna’nti idampi labbhantī**”ti. **Tassa dassanavasenāti** tassa vatthussa dassanavasena, na anavasesato paccayadhammassa dassanavasena. Tenāha “**khandhā ca vatthussāti idampi pana labbhatevā**”ti. **Na vajjetabbānīti** tesampi paccayuppannabhāvena yojetabbattā.

515-518. **Arūpavattahārammaṇamahābhūtaindriyāhārānaṃ** paccayadhammānanti attho. “**Āhārindriyapaccayā cā**”tipi **pana vattabbaṃ**. Kasmā? **Na hi indriyāhārānaṃ vasena saha-jātādayo labbhanti**, indriyāhārānaṃ pana vasena indriyāhārapaccayāva labbhanti. “Sahajātaṃ purejātaṃ pacchājātaṃ āhāraṃ indriya”nti hi uddisivā atthipaccayo vibhattoti. Keci panettha “āhāraggaṇena kabalīkāro āhārova gahito, indriyaggaṇena ca rūpajīvitindriyameva, sesāhārindriyāni saha-jātādīsveva antogadhāni katāni. Yāni tadantogadhāni, te sandhāya aṭṭhakathāyaṃ ‘arūpavattahārammaṇamahābhūtaindriyāhārānaṃ vassenā’ti ettha indriyāhāraggaṇaṃ katanti ‘sahajātapurejātapacchājātapaccayā labbhantī’ti vutta”nti vadanti.

Tatha arūpānaṃ saha-jātapacchājātāhārindriyapaccayabhāvo yathārahaṃ veditabbo. Vatthu saha-jātaṃ purejātañca, ārammaṇaṃ purejātameva, abhiññāññaṇassa pana kadāci saha-jātampi ārammaṇapaccayo hotiyeva. Saha-jāttaggaṇena panettha saha-jātapaccayabhūtova gayhati, so ca ekuppādādīlakkaṇayuttovāti yo dhammo saha-jāto hutvā ārammaṇaṃ hoti, na so idha adhippeto. Yadi saha-jātopi ārammaṇaṃ hoti, kasmā pāliyaṃ tathā na vibhattanti? Ekakalāpapariyāpanassa ekuppādādīlakkaṇayuttassa bhinnakalāpapariyāpanato saṅkaramocanattaṃ. Apica appacurabhāvato apākaṭabhāvato ca taṃ na gahitaṃ. **Tatoti** navamatoti attho, na dasamatoti adhippāyo. Na hi ekādasame adhipati atthīti. **Tathā cuddasameti** ettha **tathā**-saddena vatthuggaṇena cakkhādivatthūnipi gahitānīti imamatthaṃ upasaṃharati. **Tadevāti** ārammaṇameva.

519. **Saha-jātāni viyāti** saha-jātapaccayasahitāni viya ghaṭanāni. **Saha-jātenāti** saha-jātapaccayena. **Tānīti** “pakiṇṇakaggaṭanānī”ti vutttaggaṭanāni. Yāni hi saha-jātapaccayena na yojitāni, tānettha pakiṇṇakaggaṭanānīti vuttāni. **Purejāta...pe... vassenāti** ettha ayaṃ yojanā – purejātassa pacchājātassa āhārassa indriyassa ca saha-jātena aññamaññañca sāmāññavasena, tesamāyeva saha-jātena aññamaññañca asāmāññavasena cāti vuttam hoti. Yathā purejātassa pacchājātassa ca saha-jātena asāmāññaṃ bhinnasabhāvattā, tato eva āhārindriyānampi tena asāmāññaṃ, evaṃ purejātādīnaṃ catunnampi aññamaññaṃ asāmāññaṃ bhinnasabhāvattā. Evaṃ asāmāññavasena asamānatāvasena yathāvuttāni

ghaṭṭanāni vippakiṇṇāni. Yathā pana sahaṭāpaccayadhammā arūpakkhandhādayo teneva sahaṭāpaccayatāsankhātena mithūnaṃ samānabhāvena aññehi asaṃkiṇṇā attano paccayuppannānaṃ paccayo hontīti asāmaññavasena tesam pavatti, evaṃ purejātāpaccayadhammāpīti tesam sahaṭātena aññamaññaṅca yathāvuttassa sāmāññaṃ asāmaññaṃ ca vasena tāni ghaṭṭanāni vippakiṇṇānīti pakiṇṇakāni vuttāni. Evaṃ sante sahaṭātanampi ghaṭṭanānaṃ pakiṇṇakabhāvo āpajjati? Nāpajjati, tesam sahaṭātatāya eva avippakiṇṇabhāvasiddhito. Tena vuttaṃ **“sahaṭātaṃ aggahetvā vuttāni pakiṇṇakāni nāmā”**ti.

Tānīti pakiṇṇakaghaṭṭanāni. **Kusalavipākāti** kusalā ca vipākā ca, ye abhinnalakkhaṇā hutvā kusalasabhāvā vipākāsabhāvā cāti attho. Evaṃsabhāvāṅca ekaṃ aññindriyamevāti āha **“idaṃ...pe... labbhatī”**ti. Nanu ca saddhindriyādivasenapi ayamattho labbhatīti? Tesam kiriyaśabhāvātāpī atthevāti. **Dukkanti** cetasi dukkhaṃ. Tenāha **“akusalamevā”**ti. Vipākassa dukkhassāti yojanā. Tena vuttaṃ **“ajhānaṅgattā”**ti. **Akusalavipākakiriyāti** vicikicchācittapañcaviññānakiriyāmanodhātūsu pavattanato akusalavipākakiriyāva hoti cittaṭṭhitīti attho. Yasmā akusalavipākāti evamatthe gayhamāne dukkhassa cittaṭṭhitiyā ca vasena yathā jhānesu, evaṃ aññesaṃ vasena aññesu ca na labbhati, tasmā akusalassa vipākāti evamatthe gayhamāne dukkhindriyassa vasena indriyesu labbhatīti dassento āha **“akusalassa... pe... labbheyyā”**ti. Imasmiṃ kusalattike vipāko vipākābyākatamicceva gayhati, na akusalādipadehi viśesetvāti imamatthaṃ dassento **“kusalavipākā...pe... natthī”**ti āha.

Pañhāvārassa ghaṭṭane anulomagaṇanā niṭṭhitā.

Paccanīyuddhāraṇṇanā

527. Nahetupaccayenāti ettha na-kāro aññatthoti dassento **“hetupaccayato aññena paccayenā”**ti āha. **Aggahitaggahaṇenāhi** sahaṭādisaṅgahavasena aggahitānaṃ gahaṇena. **Aṭṭha hontīti** imissā pāliya āgatā ārammaṇādayo aṭṭha paccayā hontī. **Tesūti** aṭṭhasu paccayesu. **Tihīti** ārammaṇasahaṭātaupanissayapaccayehi. **Dvihīti** ārammaṇapaccayaupanissayapaccayehi. **Tasmiṃ tasmiṃ paccayeti** tasmiṃ tasmiṃ hetuādike paccaye. **Tato** hetuādipaccayato. **Yathāyogaṃ yojetabbāti** yasmīṃ paccaye paccanīyato ṭhite ye paccayā anulomato yojanaṃ labhanti, te yojetabbāti attho.

Dvinnanti anantarūpanissayassa pakatūpanissayassāti imesaṃ dvinnaṃ. **Vatthupurejātassa vasena purejātaṃ** ārammaṇapurejātassa ārammaṇena saṅgahitattā. **Aññissā cetanāyāti** nānākkhaṇikakammaṇapaccayabhāveneva pavattāya cetanāya. Arūpāhārā apariccattasahaṭātabhāvā eva āhārapaccayo hontī, rūpāhāro ṭhitippattoyevāti vuttaṃ **“sahaṭātato aññassa kabalīkārāhārassa vasena āhāro”**ti. **Sahaṭātato aññassāti** ca idaṃ arūpāhāranivattanatthaṃ vuttaṃ, na kabalīkārāhāravisesanivattanatthaṃ tādisasseva tassa abhāvato. Na hi rūpāhāro sahaṭāpaccayo hoti, nāpi purejāpaccayo hoti. Yathā sahaṭātanāṃ sahaṭāpaccayo na hoti, evaṃ purejātānaṃ pacchājāpaccayo na hoti, pacchājātānaṅca purejāpaccayo na hoti. Kasmā? Tādisassa paccayalakkhaṇassa abhāvato. Yesañhi yo janako, na tehi tassa sahaṭātatā atthi, nāpi purejātā purejāpaccayalakkhaṇayuttā, pacchājāpaccayatāya pana vattabbameva natthi rūpadhammattā. Upatthambhakattepi eseva nayo, tasmā sahaṭādividhuro eva tassa paccayabhāvo vedītabbo. Teneva hi **“sahaṭātaṃ purejātaṃ pacchājātaṃ āhāraṃ indriya”**nti ettha rūpajīvitindriyaṃ viya rūpāhāro viśum gahito. Tathā cāha **“rūpāhāro...pe... āhārapaccayova hotī”**ti. **Sahaṭātato purejātato ca aññassa rūpajīvitindriyassāti** ettha rūpāhāre vuttanayeneva attho vedītabbo.

Evaṅca katvāti purimapurimehi asaṅgahitasāṅgaṇhanavasena pacchimapacchimānaṃ gahitattā tathā rūpāhārassa jīvitindriyassa ca vasena idha āhārandriyapaccayānaṃ gahitattāti attho, aññathā **“āhārapaccayena paccayo, indriyapaccayena paccayo”**ti vattabbaṃ siyāti adhippāyo. Tenevāha **“ārammaṇa...pe... icceva vutta”**nti. **Tadaññābhāvāti** tato ārammaṇādipaccayato aññassa idhādhippetakammādipaccayassa kusale abhāvā. **Tasmāti** yasmā ārammaṇato aññesaṃ dvinnaṃ vasena

upanissayo vutto, tasmā “ārammaṇādhīpati ārammaṇapaccaye saṅgahaṃ gacchati”ti vattabbaṃ, na ārammaṇūpanissayeti adhippāyo. Yadi evaṃ kasmā parittattikapañhāvārapaccanīye ārammaṇaṃ na vuttaṃ. Upanissayena hi asaṅgahitatte taṃ vattabbameva siyāti codanaṃ sandhāyāha “**yaṃ paṇā**”tiādi. Tattha **purimehi asaṅgahitavasena vuttānanti** purimehi paccayehi asaṅgahitavasena vuttānaṃ pacchimānaṃ paccayānaṃ. **Saṅgahitavivajjanābhāvato**ti attanā samānalakkhaṇatāya saṅgahitassa paccayassa vivajjanābhāvato, vivajjane kāraṇaṃ natthīti attho. **Upanissayato aññārammaṇābhāvato**ti appamāṇo dhammo appamāṇassa dhammassa ārammaṇaṃ honto ārammaṇūpanissayova hoti ārammaṇādhīpatibhāvato attho. Yathā ārammaṇe gahite ārammaṇūpanissayo gahitova hoti balavārammaṇabhāvato, evaṃ ārammaṇūpanissaye gahite ārammaṇaṃ gahitameva hoti taṃsabhāvattāti tattha taṃ viṣuṃ na uddhaṅanti daṭṭhabbaṃ. Tenāha “**na pana ārammaṇūpanissayassa ārammaṇe asaṅgahitattā**”ti.

Pacchājātaāhārānanti attano paccayuppanato purejātakāyato pacchājātānaṃ arūpāhārānaṃ. Te hi attanā sahaajātarūpadhammānaṃ taṃsamuttānarūpadhammānampi sahaajātaatthipaccayā honti, purejātānaṃ pana vatthūnaṃ pacchājātaatthipaccayo. **Pacchājātindriyānanti** pacchājātānaṃ arūpindriyānaṃ. Sesamaññāre vuttanayena yojetabbaṃ. Yasmā ete āhārindriyā yasmaññā khaṇe purejātaatthipaccayaṃ labhanti, tasmimīyeva khaṇe taṃtaṃpaccayuppanānaṃ sahaajātaatthipaccayo pacchājātaatthipaccayo ca honti, tasmā vuttaṃ “**sahāpi atthiavigatapaccayabhāvo hoti**”ti. **Tiṇṇanti** sahaajātādīnaṃ tiṇṇaṃ. **Chahi bhede**hīti viṣuṃ gahitehi sahaajātādīhi pañcahi yathārahaṃ ekajjhaṃ gahitabhedenā cāti chahi atthipaccayabhede. **Ekekaṃ saṅgahetvāti** atthipaccayalakkhaṇaṃ avigatapaccayalakkhaṇaṃca viṣuṃ viṣuṃ chahi bhedehi saṅgahetvā vuttaṃ.

Ajjhattikabāhirabhedatoti vattabbaṃ cakkhādīnaṃ jīvitindriyassa ca adhippetattā, saparasantānikānañca indriyānaṃ anadhippetattā. **Nissayapurejātavippayuttaatthiavigatānaṃ** purejātabhūtānanti adhippāyo. Tesaññi purejāte saṅgaho. **Tadekadesassāti** ārammaṇekadesassa, ārammaṇādhīpatiārammaṇūpanissayānanti attho. **Tesanti** nissayādīnaṃ. **Upanissayādīsūti** upanissayapurejātapaccayādīsū. **Taṃ pana** purejātabhūtaṃ ārammaṇaṃ. **Tatthāti** upanissayapaccayasāṅgahe. Yathāvuttanayo cettā ekantena gahetabboti dassetuṃ “**atha paṇā**”tiādi vuttaṃ.

Eva-saddo ānetvā yojetabbo, aññathā tesu pañhesu ekasabhāvato paccayassa āgamaṇaṃ vuttaṃ siyā. **Tenāti** “ekovā”ti avadhāraṇena aggahitena. **Tesūti** sahaajātapurejātapaccayesu. **Ukkatṭhavasenāti** “eko dve”tiādinā vuttaukkaṃsavasena. **Te te paccaye saṅgahetvāti** te hetuādipaccaye sahaajātādipaccayehi saṅgahetvā. **Dassitapaccayaparicchedoti** soḷasādibhedena saṅgahetvā dassitapaccayaparicchedo.

Pabhedaparihānīsūti sahaajātapaccayādīhi saṅgahitapaccayappabhede taṃtaṃpaccayapaṭikkhepe pañhāparihānīyañcāti attho. **Nahetupaccayāti** iminā hetupaccayato aññe paccayā gahitāti katvā vuttaṃ “**nahetupaccayāti ettha labbhamānapaccaye sandhāya vutta**”nti. **Evañca katvāti** sabbapaccanīyasādhāraṇalakkhaṇavasena vuttattā eva **na vattabbaṃ siyā**, na hi hetupaccaye paccanīyato ṭhite hetudhammo hetussa dhammassa sahaajātapaccayena paccayoti sakkā vuttaṃ. **Vīsati paccayāti** hetupaccayena saddhiṃ vīsati paccayā. Parihānīyaṃ vitthārakathaṃ dassentoti yojanā.

528. Tehi tehi paccayehīti sahaajātapaccayādīhi tehi tehi saṅgāhakabhūtehi paccayehi. **Te te paccayāti** saṅgahetabbā aññamaññapaccayādayo hetupaccayādayo vā te te paccayā. **Aññesaṃ abhāvaṃ sandhāya vuttaṃ**, na tesamaññā sambhavanti adhippāyo. Tenāha “**na hī**”tiādi. Tattha **dveyevāti** ārammaṇādhīpatiṃ apanetvā āha. **Abyākatassapīti** pi-saddena na kevalaṃ kusalasseva, atha kho abyākatassapīti kusalaṃ sampiṇḍeti.

530. Tena saddhinti vatthunā saddhiṃ. **Suddhānanti** kevalānaṃ vatthunā vinā ca gahitānaṃ kusalakkhandhānaṃ. Yadi pi vatthunā saddhiṃ sahaajātaṭṭho natthi, nissayādibhāvo pana atthevāti

dassento “**vatthunā panā**”tiādimāha.

Sahajātapurejātapacchājātaāhārindriyānaṃ atthipaccayena saṅghetabbattā saḥajātādīhi saṅghetabbānaṃ taṃsaṅgaho sukaroti dassetuṃ upanissayena saṅghetabbānaṃ saṅgaho vuttanayo evāti vuttaṃ “**catūsu sabbapaccaye saṅgaṇhitvā**”ti. Kammaṃ pana saḥajātūpanissayehi asaṅghetabbatāpi atthīti sarūpato gahitaṃ, aññathā “tīsu paccayesu”ti vattabbaṃ siyā. **Missakāmissakassāti** saḥajātapurejātādibhāvehi missakassa tathā amissakassa ca. Vuttamevatthaṃ vitthārato dassetuṃ “**na hī**”tiādi vuttaṃ. **Tenāti** atthipaccayavibhāgasāṅgāhakānaṃ saḥajātādīnaṃ gahaṇena. **Sabbapaccayānaṃ...pe... hotīti** iminā “imasmīṃ pana paccayuddhāre”tiādinā vuttopi paccayasāṅgaho idha atthato dassitoyevāti imamatthaṃ dasseti.

Nissayo kasmā na vutto? Saḥajātanissayo purejātanissayoti hi sakkā vibhajitunti adhippāyo. **Vippayutto vā kasmā na vutto?** Purejātavippayutto pacchājātavippayuttoti vibhajituṃ sakkāti attho. Yaṃ missakāmissakabhāvaṃ manasi katvā “avattabbattā”ti vuttaṃ, taṃ dassento “**nissayo tāvā**”tiādimāha. **Visetitabbo** “vippayuttapaccayena paccayo”ti avisesena pāliyaṃ vuttattā. **So viyāti** atthipaccayo viya, nissayapaccayo viya vā atthipaccayavisesābhāvena vippayuttapaccayo na vattabbova. Dvinnāṃ paccayānaṃ viya pabhedasabbhāvatoti dassento “**sahajātapurejātānañcā**”tiādimāha. **Tathātiādinā** vuttamatthaṃ pāliyā samatthetuṃ “**vakkhatī**”tiādi vuttaṃ. Tattha maggaphaladhammaṃ maggaphalataṃsamuṭṭhānarūpavasena saḥajātaatthipaccayo tesamyeva purejātacatusantirūpavasena pacchājātaatthipaccayo vutto, na pana vippayuttapaccayabhāvo vakkhatīti yojanā. **Soti** vippayuttapaccayo.

Hetuādīnaṃ saḥajātantogadhattā hetuādayo tabbisesā hotīti katvā vuttaṃ “**sahajātapaccayo ca hetuādīhi visesitabbo**”ti. **Soti** saḥajātapaccayo. **Viruddhapaccayehīti** saḥajātapurejātassa saḥajātādibhāvena viruddhehi paccayehi. Tenāha “**uppattikālaviruddhehi paccayehī**”ti.

Paccanīyuddhāraṇṇanā niṭṭhitā.

Paccanīyagaṇṇanā

Nahetumūlakavaṇṇanā

532. Adhipatipaccayādibhūto ārammaṇapaccayoti

ārammaṇārammaṇādhipatīārammaṇūpanissaye vadati. Te ca yasmā ārammaṇasabhāvā eva, tasmā vuttaṃ “**parihāyatiyevā**”ti. **Pannarasasūti** dutiye saḥajātapaccaye “hetupaccayo”tiādinā vuttasu pannarasasu. **Ekādasannaṃ vasenāti** saḥajātapaccayo, saḥajātatāvisiṭṭhā adhipatinissayakammāhārindriyatthiavigatahetujhānamaggā cāti imesaṃ ekādasannaṃ vasena. **Sahajāte antogadhā** hetuādayo. **Tasmīṃ paṭikkhitteti** tasmīṃ saḥajāte paṭikkhitte paccanīyato ṭhite. **Anantogadhā** saḥajāte, ke pana teti āha “**ārammaṇādhipatipurejātanissayādayo**”ti. **Ārammaṇādiākārenāti** ārammaṇapurejātanissayanānākkhaṇīkammādiākārena.

Tasmīṃ paṭikkhitteti tasmīṃ saḥajātapaccaye paṭikkhitte. **Ime vārāti** saḥajātaṃ purejātanti vissajjitavārā. **Ete nissayādayoti** saḥajātatāvisiṭṭhe nissayādi ke vadati, na itare. Tenāha “**yasmā ca... pe... paṭikkhepena paṭikkhittā**”ti.

Nissayādibhūtañca saḥajātapaccayaṃ ṭhapetvāti etena “ṭhapetvā saḥajātapaccaya”nti ettha antogadhanissayādibhāvoyeva saḥajātapaccayo gahitoti dasseti. **Nissayādīti ādi-**saddena hetuādīnaṃ saṅgaho datṭhabbo. **Aññamaññapaccayadhammavasena pavattisabbhāvatoti** aññamaññapaccayadhammavasena saḥajātādīhi pavattisabbhāvato aññamaññe paṭikkhitte “kusalo kusalābyākatassā”ti vāro parihāyati. **Tesaṃ tesaṃ paccayuppannānanti** idaṃ sāmāññavacanampi “aññamaññapaccayasāṅgahaṃ gatā”ti vacanato aññamaññapaccayalābhīnaṃyeva gahaṇaṃ siyāti

āsaṅkaṃ nivattetuṃ “**kusalo ca kusalassā**”tiādi vuttaṃ. **Samudāyabhūtoti** catukkhandhasamudāyabhūto. **Ekadesabhūtehīti** tasseva ekadesabhūtehi. “**Kusalo panā**”tiādi “naaññaṃaṇṇapaccayena...pe... parihāyati”ti imassa aṭṭhakathāvacanassa samādhānavacanāṃ.

Rūpakkhandhekaḍḍesova honti rūpāhārarūpindriyavasena, “ekantena vippayuttapaccayadhammehī”ti vuttadhammā “te”ti paccāmaṭṭhāti āha “**teti te vippayuttapaccayadhammā**”ti.

533. Paccanīyagaṇaṇaṃ dassetunti vuttepi nanu paccayagaṇaṇameva dassitaṃ hotīti kassaci āsaṅkā siyāti taṃ nivattento āha “**paccanīyavāragaṇaṇā hi dassitā**”ti. Balavakammaṃ vipākassa upanissayo hoti, itaraṃ kammaṃ paccayo evāti āha “**vipākassapi pana...pe... kammaṃ paccayo hotī**”ti.

Nahetumūlakavaṇṇanā niṭṭhitā.

534. Paricchinnagaṇaṇānīti idaṃ na gaṇaṇāpekkhaṃ, atha kho vissajjanāpekkhanti āha “**paricchinnagaṇaṇāni vissajjanāni**”ti. Paccanīyato ṭhitopi hetu nayānaṃ mūlabhāveneva ṭhitoti āha “**hetumūlake**”ti, aṭṭhakathāyaṃ pana “nahetumūlaka”micceva vuttaṃ.

538. Mūlaṃ saṅkhipitvāti sattamūlakaṃ aṭṭhamūlakaṃ navamūlakaṃ saṅkhipitvā. **Dvīsūti** “tīṇī”ti vuttasu tīsu vissajjanesu purimesu dvīsū “kusalo dhammo abyākatassa, akusalo dhammo abyākatassā”ti imesu. Tenāha “**vipāko paccayuppanno hotī**”ti. **Tatīyeti** “abyākato dhammo abyākatassā”ti imasmiṃ. **Tesamuṭṭhānikakāyoti** utucittāhārānaṃ vasena tesamuṭṭhānikakāyo.

545. Etaṃ dvayaṃ sandhāya vuttaṃ, yathā arūpaṃ arūpassa, evaṃ rūpampi rūpassa vippayuttapaccayo na hotīti. **Rūpābyākato arūpābyākatassāti** idaṃ vatthukhandhe sandhāya vuttaṃ. **Arūpābyākato rūpābyākatassāti** idaṃ pana cittasamuṭṭhānarūpaṇcāti tesam ekantiko vippayuttapaccayabhāvoti āha “**sahajāta...pe... hotīyevā**”ti. **Sahajātāhārindriyavasenāti** saḥajātaarūpāhārindriyavasena.

546. Ekamūlakekāvasānā anantarapakatūpanissayavasena labbhantīti idaṃ yathārahavasena vuttanti taṃ yathārahaṃ paṭikkhepāpaṭikkhepavasenapi dassetabbanti “**atthipaccaye panā**”tiādi vuttaṃ. **Purimesūti** nārammaṇādīsu. **Navāti** ekamūlakāvasānā nava. **Dveyevāti** “kusalo dhammo abyākatassa, akusalo dhammo abyākatassā”ti ime dveyeva.

Paccanīyavaṇṇanā niṭṭhitā.

Anulomapaccanīyavaṇṇanā

550. Imehvāti “kusalo kusalassa, akusalo akusalassā”ti imehi eva **samānā honti** kusalādītāsāmañña. Tena vuttaṃ “**atthābhāvato pana na anurūpā**”ti. “Kusalo kusalassā”tiādinā satīpi uddesato sāmāñña yebhuyyena siyā vibhaṅge visesoti āha “**yathāyogaṃ niddesato cā**”ti.

551. Hetunāmanti hetu ca taṃ nāmaṇcāti hetunāmaṃ. **Paccayanti** tameva paccayabhūtaṃ sandhāyāti yojanā.

552. Dvinnampi adhipatīnanti saḥajātārammaṇādhipatīnaṃ vasena, taṃ “kusalaṃ kusalassa saḥajātato ceva ārammaṇato cā”tiādinā aṭṭhakathāyaṃ vuttanayeneva vedītabbaṃ. **Nārammaṇe sattāti** saḥajātādhipatīssa vasena vuttaṃ, **na saḥajāte sattāti** ārammaṇādhipatīssa vasena vuttanti yojanā. **Evanti** yathā adhipatīmi vuttaṃ, evaṃ sabbattha sabbapaccayesu. “**Tasmiṃ tasmiṃ...pe... uddharitabbā**”ti vatvā tassa gaṇanuddhārassa sukarataṃ upāyaṇca dassento “**anulome...pe...**”

viññātu’’nti āha.

Anulomapaccanīyavaṇṇanā niṭṭhitā.

Paccanīyānulomavaṇṇanā

631. Parihāpanagaṇanāyāti parihāpetabbagaṇanāya **samānattañca na ekantikam** ūnatamabhāvassapi sambhavatoti adhippāyo. Tenāha “**nahetunārammaṇadukassā**’’tiādi. Tattha saddhiṃ yojiyamānena ūnataragaṇanena adhipatipaccayena parihīnāpīti yojanā. **Saddhiṃ parihīnāpīti** vā imasmiṃ pakkhe “adhipatipaccayenā’’ti itthambhūtalakkhaṇe karaṇavacanam. **Etanti** lakkhaṇam.

Aṭṭhānanti anulomato aṭṭhānam atīṭṭhanam. **Tiṭṭhantīti** anulomatoti yojanā. **Tesanti** hetuādīnam. **Itaresūti** yādisā adhippetā, te dassetuṃ “**adhipatī**’’tiādi vuttaṃ. **Imāni dveti** “kusalābyākātā abyākatassa, akusalābyākātā abyākatassā’’ti imāni ca dve.

Nahetumūlakavaṇṇanā niṭṭhitā.

636. Hetuyā vuttehi tīhīti hetupaccayā vuttehi tīhi vissajjanehi saddhiṃ. **Vārasāmaññameva vadati**, na atthasāmaññanti adhippāyo. **Tathā kamme tīṇīti hetuyā vuttānevāti cāti** “kamme tīṇī’’ti ettha “hetuyā vuttānevā’’ti imasmiṃ atthavacanepi tathā vārasāmaññameva sandhāya vadatīti attho.

644. Ekekamevāti ekekameva vissajjanam.

650. Sakatṭhāneti attanā ṭhitatṭhāne. **Tato paretarāti** tato aggahitapaccayato paretarā paccanīyato. **Nāhāre...pe... lābho hotīti** āhārapaccaye paccanīyato ṭhite indriyapaccayam, anulomato indriyapaccaye ca paccanīyato ṭhite āhārapaccayam anulomato yojetvā yathā pañho labbhatīti attho. **Tesūti** āhārindriyesu. **Dvidhā bhinnāni** paccanīyato anulomato ca yojetabbabhāvena.

Paccanīyānulomavaṇṇanā niṭṭhitā.

Kusalattikavaṇṇanā niṭṭhitā.

2. Vedanāttikavaṇṇanā

1. Vedanāttike **paṭiccādīniyamanti** tikapadasambandhavasena paṭiccavārādīsu vattabham paṭiccasahajātatṭhādīniyamamam **na labhanti** vedanārūpanibbānāni. Kasmā? Tikamuttakattā. Tathā **paccayuppannavacanam**. Na hi sakkā vuttuṃ vedanam rūpaṃ nibbānañca sandhāya “sukhāya vedanāya sampayuttaṃ dhammam paṭicca sukhāya vedanāya sampayutto uppajjati’’ti.

Tikadhammānanti vedanāttikadhammānam. **Tatthāti** hetupaccayādīsu. **Yathānurūpatoti** vedanādīsu yo yassa vedanāya sampayuttadhammassa ārammaṇādīpaccayo bhavituṃ yutto, tadanurūpato. **Ārammaṇādīti ādi-**saddena ārammaṇādhipatīārammaṇūpanissayādike saṅgaṇhāti.

10. Kusalattikepi parihīnanti idam paccanīyam sandhāya vuttaṃ.

Rūpārūpadhammapariggāhakattāti idam anādībhūtassapi sahaṅgātassa ādimhi ṭhapane karaṇavacanam. **Ādi-saddenāti** “sahajātādayo’’ti ettha ādi-saddena. Yathārahaṃ ārabba uppattivāsena sabbe arūpadhammā ārammaṇādīnam paccayuppannā hontīti vuttaṃ “**paccayuppannavasena sabbārūpadhammapariggāhakānam ārammaṇādīna**’’nti. **Ādi-saddena** ārammaṇādhipatīārammaṇūpanissayādike saṅgaṇhāti. **Tenāti** “sabbārūpadhammapariggāhakā panā’’tiādivacanena. **Sabbatṭhānikānam...pe... dassitā hoti** sahaṅgātadassanenāti attho. Ekadesaparihānidassaneneva hi samudāyaparihāni dassitā hotīti. **Sahaṅgātādayoti** vā ādi-saddena

sabbaṭṭhānikā cattāropi dassitā hontīti. **Sahajātamūlakā**ti sahaṭātapaccaye sati bhavantā na sahaṭātam purato katvā pāliyaṃ āgatā. Tenāha “**sahajātanibandhanā...pe... vuttam hoti**”ti. So pacchājāto kasmā pana na parihāyatīti sambandho. **Tatthā**ti yathāvuttāya parihāniyaṃ aparihāniyañca. **Sahajātanibandhanehi**ti sahaṭātadhammanimittehi paccayabhāvehi idha paccayadhammahetuko vutto. **Etthevā**ti parihāniyaṃyeva. Sā hi idha adhikatā. Sahaṭātanibandhanānameva parihānīti vutte “kiṃ sabbesaṃyeva nesam parihānī”ti āsankāya āha “**sahajāta...pe... dassitameta**”nti.

17. Nayadassanameva karotīti yathā ahetakakiriyacetanaṃ sandhāya “nahetupaccayā nakammappaccayā”ti vuttam labbhā, evaṃ navipākapaccayātipi labbhā. Ahetukamoḥaṃ pana sandhāya “nahetupaccayā navipākapaccayā”ti labbhā, na “nakammappaccayā”ti. Tenāha “**na ca paccayapaccayuppannadhammasāmaññadassana**”ntiādi.

25-37. Yathā kusalattikaṃ, evaṃ gaṇetabbanti idaṃ yaṃ sandhāya pāliyaṃ nikkhittaṃ, taṃ dassetuṃ vuttam “**hetumūlakānaṃ...pe... nagaṇanasāmañña**”nti. Na hi kusalattike anulomappaccanīye gaṇanāhi vedanāttike tā samānā. **Parivattetvāpi yojitā**ti ettha “nahetupaccayā napurejātapaccayā ārammaṇe eka”nti ārammaṇaṃ paṭhamaṃ vatvā vattabbampi purejātaṃ parivattetvā paṭhamaṃ vuttanti vadanti. Tathā **nahetupaccayā kamme tīṇī**ti idameva padaṃ parivattetvā “nakammappaccayā hetuyā tīṇīti vutta”ntipi vadanti.

39. Taṃsāmpayutteti tena domanassena sāmpayutte. Domanassasīsenā sāmpayuttadhammā vuttā. **Saddhāpañcāsūti** saddhāsīlasutacāgapaññāsu. **Kattabbanti** vā yojanā kātabbāti attho. **Avasesesūti** rāgādīsu. **Pāligatidassanatthanti** “evaṃ pāli pavattā”ti pāliyaṃ pavattidassanattham. **Rāgādīhi** upanissayabhūtehi. **Anuppattitoti** na uppajjanato. Taṃ pāligatiṃ tikantarapāliyaṃ dassento “**kusalattikepihi**”tiādimāha. **Idhāpīti** imasmiṃ vedanāttikepi.

62. Anaññattanti abhedam. Sukhavedanāsāmpayutto hi dhammo sukhavedanāsāmpayuttasseva dhammassa hetupaccayena paccayo, na itaresam. Esa nayo sesapadesu sesesu ca “tīṇī”ti āgataṭṭhānesu. Tena vuttam “**sabbāni tīni suddhānaṃ tīṇṇaṃ padānaṃ vasena veditabbāni**”ti. “Pacchājātā arūpadhammānaṃ paccayo na hontī”ti yuttametaṃ, purejātā pana arūpadhammānaṃ paccayā na hontīti kathamidaṃ gaṇetabbanti codanaṃ sandhāyāha “**purejātā**”tiādi, purejātā hutvā paccayo na hontīti attho. Purimataraṃ uppajjitvā tīṇīti hi rūpadhammā pacchā uppannānaṃ arūpadhammānaṃ purejātapaccayo honti, na cāyaṃ nayo arūpadhammesu labbhāti. Tena vuttam “**purejātattābhāvato**”ti. **Tathā pacchājātattābhāvato**ti yathā imasmiṃ tike kassaci dhammassa purejātattābhāvato purejātapaccayo na hontīti vuttam, tathā pacchājātattābhāvato pacchājātā hutvā paccayo na hontī, pacchājātapaccayo na hontīti attho. Na hi ekasmiṃ santāne kesuci arūpadhammesu paṭhamataraṃ uppajjitvā tīṇītesu pacchā keci arūpadhammā uppajjanti, yato te tesam pacchājātapaccayo bhavēyyuṃ.

83-87. Avasesesu aṭṭhasūti “sukhāya vedanāya sāmpayutto dhammo”tiādinā ekamūlakekāvāsānā ye nava nava vārā ārammaṇapaccayādīsu labbhanti, tesu yathāvuttamekaṃ vajjetvā sesesu aṭṭhasu. **Tīsvevā**ti suddhesu tīsveva sahaṭātakammappaccayo labbhāti.

Vedanāttikavaṇṇanā niṭṭhitā.

3. Vipākattikavaṇṇanā

1-23. Soyevāti akatasamāsehi padehi yo attho vuccati, soyeva attho vutto hoti.

24-52. Tanti taṃ vacanaṃ, **taṃ** vā kaṭattārūpaṃ. Yasmā cittasamuṭṭhānassa upādārūpassa yathā khandhe paṭicca uppatti, tathā mahābhūte ca paṭicca uppatti. Na hi tassa tadubhayaṃ vinā uppatti atthi, na evaṃ kaṭattārūpassa. Tañhi kammaṃ kaṭattā uppajjamānaṃ mahābhūte paṭicca uppajjati, tasmā cittasamuṭṭhānaṃ rūpaṃ upādārūpassa taṃ viśesaṃ dassetuṃ tadeva vuttam, na kaṭattārūpaṃ vuttanti

imamattham dassetuṃ “**khandhe paṭicca**”tiādimāha. Yadipi kaṭattārūpaṃ “mahābhūte paṭicca cittasamuṭṭhānaṃ rūpaṃ upādārūpa”nti ettha na gahitaṃ, vacanantarena pana gahitamevāti dassento “**pavattiyam panā**”tiādimāha. **Evañca katvāti** khandhe paṭicca uppattiyā abhāvato yeva. **Nāhārapaccayeti** āhārapaccaye paccaniyato ṭhite. **Tampīti** kaṭattārūpampi. **Ṭhitikkhaṇe** kaṭattārūpassa āhāro upatthambhako hotīti katvā vuttaṃ “**uppādakkhaṇe**”ti.

Vipākattikavaṇṇanā niṭṭhitā.

4. Upādinnattikavaṇṇanā

51. Adhipatidhammoyeva lokuttaradhammesu nāhipatipaccayā uppajjatīti āha “**nāhipatipaccayāti sayam adhipatibhūtattā**”ti. Nanu adhipatidhammopi ārammaṇādhīpativasena adhipatipaccayena uppajjatīti codanaṃ sandhāyāha “**avirahitā...pe... dasseti**”ti. **Avirahitārammaṇādhīpatīsūti** lokuttare sandhāyāha. Te hi nibbānārammaṇattā evaṃ vuccati. **Pi-**saddena ko pana vādo virahitārammaṇādhīpatianekantārammaṇādhīpatīsūti dasseti.

72. Anupālanupatthambhanavasenāti jīvitindriyaṃ viya kaṭattārūpānaṃ anupālanavasena oḷā tasseva kammajakāyassa upatthambhanavasena paccayo hoti, na janakavasenāti yojanā. **Etasmiṃ pana atthe satīti** kammajakalāpe oḷā tasseva kammajakāyassa upatthambhakavasena paccayo hotīti etasmiṃ atthe labbhamāne. **Āhārantipi vattabbanti** yathā jīvitindriyavasena “upādinnupādāniyo dhammo upādinnupādāniyassa dhammassa atthipaccayena paccayo”ti vuttaṃ, evaṃ yathāvuttaāhārassapi vasena vattabbanti attho. Ettha ca yasmiṃ kalāpe kammajā oḷā kadāci tasseva upatthambhanapaccayo hotīti ayamatto aṭṭhakathāyaṃ dassito. Yadi kammajā oḷā ekamsato sakalāparūpūpatthambhanavaseneva pavattati, tathā sati imāya pāliyā virodho siyāti dassento “**yadi ca...pe... hoti**”ti aṭṭhakathāvacaṇaṃ uddharitvā tattha dosaṃ vibhāvento “**evaṃ sati**”ti āha. Tattha **tanti** taṃ vacanaṃ. **Anajjhohaṭāya** attano paccayato nibbattāya, paccayo cettha kammaṃyeva. Tenāha “**sasantānagatāya upādinnajāyā**”ti.

Ayampi pañho, na kevalaṃ pubbe vuttaāhāroyevāti adhippāyo. **Uddharitabbo siyā**, na ca uddhaṭo. **Tasmāti** etassa “vādo balavataro”ti etena sambandho. Kasmā pana yathāvuttesu dvīsu pañhesu āhāro na uddhaṭoti āha “**ajjhohaṭassa**”tiādi. Tattha **dutiyaapañhoti** dukamūlake dutiyaapañhoti yojanā. **Dutiyaapañho ca na uddhaṭoti** etthāpi “ajjhohaṭassa...pe... abhāvato”ti idaṃ ānetvā sambandhitabbaṃ. **Itarassāti** anajjhohaṭassa. **Ajjhohaṭameva** na anajjhohaṭaṃ, yathāvuttojanti adhippāyo. “**Balavataro**”ti vatvā tassa balavatarabhāvaṃ dassento “**na hi**”tiādimāha. Katipayālope ajjhoharitvā vasitvā ṭhitassa viya ajjhohaṭamattāhi maṇḍūkādīhi ajjhohārakassa sarīre visesādhānaṃ veditabbaṃ.

Idha vuttehīti imasmiṃ upādinnattike vuttehi. **Ekamūlakadukatikāvasānapañhavissajjanehīti** ekapadamūlakehi dukāvasānehi tikāvasānehi ca pañhavissajjanehi. Te pana “anupādinnupādāniyo dhammo upādinnupādāniyassa anupādinnupādāniyassa ca dhammassa atthipaccayena paccayo, anupādinnaanupādāniyo dhammo upādinnupādāniyassa anupādinnupādāniyassa anupādinnaanupādāniyassa ca dhammassa atthipaccayena paccayo”ti evaṃ veditabbo. **Idhāti** imasmiṃ upādinnattike. **Dutiya dukāvasāne viyāti** dutiya dukāvasāne pañhavissajjane viya, “anupādinnupādāniyo dhammo upādinnupādāniyassa anupādinnupādāniyassa ca dhammassa atthipaccayena paccayo, saha jātāṃ pacchājāta”nti etassa vissajjane viyāti attho. Ayañca attho tatiyapadamūlakesu dukatikāvasānapañhesupi labbhateva. Yadi pana te pañhā kusalattikepi labbhanti, atha kasmā tattha na uddhaṭāti āha “**sukhāvobdhanattham pana tattha saha jātavaseneva vissajjanaṃ kata**”nti. **Saha jātavasenevāti** saha jātāatthipaccayavaseneva. **Ekamūlakadukāvasānāti** “kusalo dhammo kusalassa ca abyākatassa cā”ti evaṃ pakārā pañhā. **Tattha** kusalattike uddhaṭā. **Idha pana** imasmiṃ upādinnattike. **Etehi** yathāvuttehi vissajjanehi. **Eko dhammoti** eko vedanādiko paccayadhammo. **Anekehīti** saha jātāpacchājātādīhi anekehi atthipaccayavisesehi. **Anekesaṃ dhammānanti** anekesaṃ

paccayuppannadhammānaṃ. **Eko atthipaccayo**ti idaṃ atthipaccayatāsāmaññato vuttaṃ.

Idāni yathāvuttaṃ avuttañca atthipaccaye labbhamānaṃ viśesaṃ vitthārato dassento “**eko hī**”tiādimāha. Tattha **ekoti** atthipaccayavisesesu eko. **Ekassāti** tādissasēva ekassa. Aññathā hi eko dhammo ekassa dhammassa paccayo nāma natthi. **Ekenevāti** sahaajātaatthipaccayeneva yathā okkantikkhaṇe vatthu. Tañhi attanā sahaajātassa nāmassa sahaajātaatthipaccayeneva paccayo hoti, na purejātādinā. **Eko** sahaajātaarūpakkhandho **anekesaṃ** attanā sahaajātānaṃ arūpakkhandhānaṃ **ekena** sahaajātaatthipaccayena, **anekehi** sahaajātapacchājātaatthipaccayehi yathākkamaṃ attanā sahaajātānaṃ cittasamuṭṭhānarūpānaṃ purejātānaṃ tesamuṭṭhānikarūpānaṃ. **Aneko** purejātavatturūpañceva sahaajātaarūpakkhandhā ca **ekassa** arūpakkhandhassa yathākkamaṃ purejātasahaajātaatthipaccayehi. **Aneko** arūpadhammo **anekesaṃ** sahaajātaarūpadhammānaṃ purejātarūpadhammānañca sahaajātapacchājātaatthipaccayehi. **Aneko** vā āhārindriyappakāro **anekesaṃ** rūpadhammānaṃ yathārahaṃ sahaajātapurejātapacchājātāhārindriyavasena atthipaccayena paccayo hoti. Evaṃ paccayuppannānaṃ asamānattepi ayamatto sambhavati, samānatte pana vattabbameva natthi. Tenāha “**samānatte paccayuppannadhammāna**”nti. **Sahaajātaṃ purejāteneva saha atthipaccayo hotīti** sahaajātaatthipaccayadhammo purejātaatthipaccayadhammena saheva atthipaccayo hoti. Yathā vatthunā purejātaatthipaccayaṃ labhantā eva kusalādidhammā sahaajātānaṃ khandhānaṃ cittasamuṭṭhānānañca rūpānaṃ sahaajātaatthipaccayo hontī, tathā te purejātassa kāyassa pacchājātapaccayopi hontiyeva. Tenāha “**pacchājātena cā**”ti. Atthipaccayo hotīti sambandho. Ayaṃ sahaajātapacchājātānaṃ atthipaccayabhāvo paccayadhammānaṃ abhede eva icchito, na bhede. Tenāha “**anaññadhammatte...pe... nānādhammatte**”ti.

Idāni tassa nānādhammatte abhāvaṃ pāliya vibhāvento “**yadi siyā**”tiādimāha. Tattha **eko atthipaccayabhāvo natthīti** ekasēva paccayadhammassa vasena labbhamāno eko atthipaccayabhāvo natthi. Kasmā? Virodhato. Tena vuttaṃ “**sahaajāta...pe... na vutta**”nti. **Evañca katvāti** sahaajātapacchājātānaṃ ekadhammavasena saha alābhato eva. **Ekadhammavasenāti** ekasēva paccayadhammassa vasena. Tenāha “**nānādhammānaṃ viruddhasabhāvattā**”ti. Viruddhasabhāvata ca sahaajātapacchājātavasena veditabbā, idha pana lokiyalokuttarādibhāvato. **Aññathāti** tesam sahaajātapacchājātānaṃ ekajjhaṃ lābhe. **Indriyapaṭikkhepepīti** indriyapaccaye paccanīkato ṭhitepi. **Tassa pañhassa lābhatoti** “upādinnupādāniyo ca anupādinnupādāniyo ca dhammā upādinnupādāniyassa dhammassa atthipaccayena paccayo”ti etassa pañhassa lābhato. **Bāvīsāti** ekamūlakāvasānā nava, ekamūlakadukāvasānā pañca, ekamūlakatikāvasānamekaṃ, dukamūlakekāvasānā cattāro, dukamūlakāvasānā dve, dukamūlakatikāvasānamekanti evaṃ bāvīsati. Yathā pubbe sahaajātaṃ purejātena saheva atthipaccayo hotīti vuttaṃ, evaṃ purejātampi tenāti dassento āha “**purejātaṃ sahaajāteneva saha atthipaccayo hotī**”ti. Tattha **sahaajāteneva sahāti** sahaajātena saheva. Aṭṭhānappayutto hi ayaṃ eva-saddo, sahaajātena na vinā purejātaatthipaccayoti attho. Itaresu pana atthipaccayadhammesu niyamo natthi tehi sahāpi vināpi bhāvato. Tenāha “**na itarehī**”ti. **Tampi vatthu taṃsahitapurejātamevāti** yaṃ “purejātaṃ sahaajāteneva saha atthipaccayo hotī”ti vuttaṃ, tampi vatthupurejātañceva taṃsahitārammaṇapurejātameva ca, na kevalaṃ ārammaṇapurejātaṃ. Tenāha “**na itara**”nti.

Idāni yathāvuttamatthaṃ pāṭhantarena vibhāvetuṃ “**kusalattike hī**”tiādi vuttaṃ. Yadi purejātaṃ taṃsahaajātena vināpi atthipaccayo siyā, “navippayuttapaccayā atthiyā pañcā”ti vuttaṃ na sakkā, vuttañcetam, tasmā viññāyati “purejātaṃ sahaajātena saheva atthipaccayo hotī”ti. **Navippayutte bāvīsāti** etthāpi eseva nayo. **Tatthāti** sanidassanattike. **Atthivibhaṅgeti** atthipaccayassa vibhajane. **Tikamūlakekāvasānanti** “sanidassanasappaṭigho ca anidassanasappaṭigho ca anidassanaappaṭigho ca dhammā anidassanasappaṭighassa dhammassa atthipaccayena paccayo”ti evaṃ tikamūlako ekāvasāno pañho uddhaṭo. **Paccayuddhāreti** ca tattheva paccayuddhāre. Tathā ca so pañho uddhaṭo. Tayidaṃ kathaṃ, yadi purejātaṃ sahaajāteneva saha atthipaccayo hotīti codanāyaṃ āha “**taṃ vatthusahitassa...pe... paccayabhāvato**”ti. Tassattho – yadipi tattha sanidassanasappaṭighaggahaṇena ārammaṇapurejātassa atthipaccayabhāvo vutto, tathāpi anidassanaappaṭighaggahaṇato vatthumpi

gahitanti vatthusahitassa ārammaṇapurejātassa sahaajātena saheva atthipaccayabhāvo vuttoti. **Pacchājātaṃ āhārindriyeheva saha atthipaccayo hoti**, na purejātenāti adhippāyo. **Anaññadhammatteti** paccayadhammassa anaññatte. Sahaajātena saha atthipaccayo hotīti yojanā. Sesapadadvayepi eseva nayo. Tatthāpi paṭiyogipurejātaṃyeva daṭṭhabbaṃ. “Atthipaccayavisesesu panā”tiādinā attanā dassitaṃ vicāraṃ “**evameta**”nti nigamanavasena paccāmasati.

Upādinattikavaṇṇanā niṭṭhitā.

6. Vitakkattikavaṇṇanā

22. Vitakkattike sattu mūlakesūti “savittakkasavicāraṃ dhammaṃ paṭicca”tiādinā āgatāni tīṇi ekakāni, tīṇi dukāni, ekaṃ tikanti evaṃ ekamūlakāni yāni sattamūlakāni, tesu. **Yathākkamanti** pāliyaṃ āgatānukkamena. **Sattāti** paṭhame ekake satta. **Pañcāti** dutiye pañca. Tānimāni hetupaccaye vuttanayena vedittabbāni. Idha pana pavattivaseneva yojetabbaṃ. **Tīṇīti**ādisu tatiye tīṇi, catutthe ekaṃ, pañcame tīṇi, chaṭṭhepi tīṇi, sattame ekaṃ. Tāni pana yathākkamaṃ tatiyapadaṃ paṭicca tatiyapadadutiya padatadubhayavasena, paṭhamapadatatiyapadāni paṭicca tatiyapadavasena, paṭhamapadadutiya padāni paṭicca paṭhamapadatatiyapadatadubhayavasena, dutiypadatatiyapadāni paṭicca paṭhamapadatatiyapadatadubhayavasena, paṭhamadutiya tatiyapadāni paṭicca tatiyapadavaseneva vedittabbāni. **Aññamaññe aṭṭhavīsāti**ādisupi imināva nayena gaṇanā vedittabbā. **Evanti** yathāvuttaṃ gaṇanaṃ paccāmasati. **Dutiya tatiyamūlakesu ekaṃ ekanti** dutiyamūlake ekaṃ, tatiyamūlake ekanti yojetabbaṃ. **Tathā āsevaneti** yathā purejāte ekādasa, tathā āsevaneti attho. **Aññānti** adhipatiāññamaññapurejātāsevanato aññesu paccayesu gaṇanāni. **Hetuārammaṇasadisānti** hetuārammaṇapaccayesu gaṇanāsadisāni.

31. Avisesenāti “vipāka”nti visesanaṃ akatvā na pana vissajjanaṃ katanti yojanā. Tattha kāraṇaṃ vattaṃ “**kasmā**”tiādimāha. **Itaresanti** lokiyavipākānaṃ. **Te visuṃ niddhāretvā vuttāti** te yathāvuttalokiyavipākā avittakkavicāramattasāmaññato visuṃ nīharitvā vuttā. “Avittakkavicāramatte khandhe paṭicca avittakkavicāramattā adhipati”ti vuttarāsi **purimakoṭṭhāso**.

38. Etanti “avittakkavicāramattaṃ avittakka...pe... saha gacchantenā”ti āgatapāliyaṃ. Tassa atthaṃ dassetaṃ “**mūlaṃ...pe... vuttaṃ hoti**”ti āha. Tattha **avittakka...pe... yojentenāti** avittakkehi avittakkapariyāyena vuttehi avittakkavicāramatta avittakkaavicārapadehi saha mūlapadaṃ, āsevanamūlakameva vā gacchantena yojentena **napurejātasadisamaṃ** nāsevane **pāliyaṃ gaṇanaṃ kātabbaṃ**, paṭhitabbanti attho. Potthakesu pana “avittakkavicāramattaṃ vipākena saha gacchantenā”ti dissati, vipākena visesana bhūtena saha yojentenāti attho. Tenevāha “**vipākaṃ avittakkavicāramattantiādi yojetabba**”nti.

Ekamūlake pāliyaṃ yojitamevāti “**dumūlakesu paṭhame**”ti vuttaṃ.

49. Mūlapadameva avasānabhāvenāti “savittakkasavicāraṃ dhammaṃ paccayā savittakkasavicāro dhammo uppajjati nahetupaccayā”tiādinā mūlapadameva avasānabhāvena yojitaṃ. **Satta mohā uddharitabbāti** idaṃ nahetupaccayaṃ sandhāya vuttaṃ. Paṭiccavāre hi ahettukamoho tikkhattumeva āgato. Idha pana “**vatthūṃ paccayā**”tiādinā catūsipi mūlakesu āgato, tasmā satta khattuṃ āgamaṃ sandhāya “satta mohā”ti vuttanti vedittabbaṃ.

Upanissayena saṅgahittāti upanissayapaccayeneva kamma paccayassa saṅgahittā. Sabbassapi rūpārūpāvacarakammaṃ balavabhāvato upanissayattābhāvo natthi, yato taṃ “garū”ti vuccati, kammakkhayakarassa pana kammaṃ balavabhāve vattabbameva natthi imamattaṃ pāliyaṃ eva vibhāvetuṃ vuttaṃ “**upādinattikapañhāvārapaccanīye hi...pe... viññāyati**”ti.

Vitakkattikavaṇṇanā niṭṭhitā.

8. Dassanenapahātabbattikavaṇṇanā

Paṭiccasamuppādavibhaṅge vicāritanayena vicāretabbanti idaṃ “na ca puthujjanānaṃ dassanena pahātuṃ sakkuṇeyyo, itaresaṃ na kenaci paccayena paccayo na hontīti sakkā vattu”ntiādinā attanā ānītaṃ amataggapathavinicchayaṃ sandhāya vuttaṃ. Tattha yaṃ vattabbaṃ, tampi paṭiccasamuppādaṭṭikāya atthavivarane vuttameva, tasmā tattha vuttanayeneva veditabbaṃ.

Dassanenapahātabbattikavaṇṇanā niṭṭhitā.

Paṭṭhānapakaraṇa-anuṭṭikā samattā.

Iti pañcapakaraṇamūlaṭṭikāya līnatthavaṇṇanā

Anuṭṭikā samattā.

Abhidhammassa anuṭṭikā samattā.